

**ETHICA DUOBUS
LIBRIS
COMPREHENSA:
QUORUM PRIOR,
ARETOLOGIA, ...**

Johann Rudolph Rodolphi





14.10.19



ETHICA

Duobus Libris comprehensa :

QUORUM PRIOR,

ARETOLOGIA,

Virtutis tùm cognoscendæ principia, materiam, indolem & officia; tùm comparandæ adminicula docet.

POSTERIOR,

EUDÆMONOLOGIA,

Virtutis præmia edisserit.

Operâ & studiô **PHILARETI,**

Bonarum Literarum Professoris publici.

Sen. Epist. XCIV.

Pars Virtutis disciplinâ constat, pars exercitatione.

Adhuc oportet; & quod didicisti, agendo confirmes.



AMSTELODAMI,

Apud **GEORGIUM GALLET.**

M. DC. XCVI.

126
131

32

P R Æ F A T I O

A D

L E C T O R E M.



ETHICA ita multis & multifariam sunt prodita, ut fastidio futura credi possint, quæ quis plura ejusce generis scribere in animum induxerit suum. *Res ardua*, inquit ille, *vetustis novitatem dare, novis auctoritatem, obsoletis nitorem, obscuris lucem, fastiditis gratiam, dubiis fidem, omnibus verò naturam, & naturæ suæ omnia*: ast operis haud paulò magis ardui est, nova penitus & incomperta, eaque in commune profutura, invenire. Ut adeò etiam non affectis voluisse abundè pulchrum atque magnificum vulgò videri soleat. Harum laudum nullam sibi præsens

b. p.

* 2

Scri-

P R Æ F A T I O.

Scriptum vindicare audent : imò ne quidem in argumenti , multis multoties retentati , & minimè poenitendo artis usu reculti , fiducia satis præsidii habet , quominus lucem aspicere , & rem literariam , plus satis mole sua laborantem , amplius etiamnum gravare metuat. Quæ causa mihi hætenus visa fuit iustissima , cur schedas hæc , evulgandi occasionem non jam solum nullus captarem , sed iterum atque iterum oblatam cautè evitarem , tandemque obtrusam , instante typographo , qua poteram arte honesta protelarem : easdem libentius æternum latere passurus , nisi amicorum atque Studioforum Adolescentum nonnulli , quibus hæc meæ quum publicè prælegebantur , per ætatem audire non sicut , flagitationibus suis renitentem vicissent. Porro quod

P R Æ F A T I O.

quod opusculi primùm suscipiendi consilium fuerit, paucis expediam. Duodevicesimus labitur annus, ex quo Cathedræ Scholasticæ, Deo sic providente, admotus sum. Ibi tum primùm meæ partes erant, linguam docere Sanctam, & tradere præcepta morum. Vixdum posteriorem muneris impositi partem aggressus eram, quum in rem & Auditoribus & mihi fore sensi, si non fugiente solùm docerem voce, sed ad calamum quoque dictarem, quæ literis custodibus potius, quam memoriæ parùm firmæ commissa vellem, in usum posthac, ubi occasio ferret, depromenda. Cujus instituti & hæc non postrema mihi ratio fuit, quòd, sic jubente consuetudine, an lege? Author mihi esset enarrandus, qui alteram Theologiæ partem, quam di-

P R Æ F A T I O.

cimus practicam, perspicua quidem & methodica brevitatem, præscriptio *Ethicæ Sacræ* titulò, complexus est, omiſſis, quæ pro institutione & disciplina morum Philosophia suppedi-
tare potest: quanquàm prælectionum Ethicarum Auditores etiamnum Philosophiæ operam darent, Theologiæ Sacris necdum per ætatem maturi, nec initiati. Atqui non immeritò intempestivum ac præposterè factum videri possit, Philosophiæ discipulis prælegi, quæ nisi solidiore principiorum Theologiæ cognitione antè imbutis rectè intelligi nequeunt. Neque in eo satis causæ apparet, cur Philosophia Moralis contra morem Scholis ferè receptum neglectui sit, quòd solidam virtutem nec docere possit, nec præstare: habet enim nihilominus, quæ ad multa in omni hominum

num

PRÆFATIO.

num vita, cumprimis ad demonstrandam virtutis, officiique nostri necessitatem usui sint. Fidem faciant principia benè multa, quæ inspectâ Dei mentisque humanæ naturâ docemur, in parte generali hujusce tractatus è ruderibus quasi & parietinis divinæ imaginis eruta, suis deinde locis in parte speciali passim ad usum referenda. Philosophiam porrò Moralem, ancillæ instar & pedissequæ fidelis, in famulitium Theologiæ recipi, quid verò prohibeat? Etenim, quemadmodum *oculi ancillæ perpetuò ad manus heræ respiciunt*, ut inquit Hieropsaltes: tametsi dubium non sit, quin levioris momenti haud pauca famulæ judicio & curæ relinquantur: itidem & Ethica Philosophi obsequium debet Theologo, quanquam & ipsa suos intra limites haud pauca

P R Æ F A T I O.

sana & utilia documenta continere queat. Quid? quòd Philosophiæ Morali cum Theologia hac quidem in parte non usque adeò malè conveniat, quin, quæ *hæc* de morum sanctimonia præcipit, *illa* conscientiæ testimoniò comprobata reperiatur. Placet Hieronymus, qui de Sapientia Gentilium inter alia sic ad Magnum; *Legimus, inquit, in Deuteronom. Domini voce præceptum, mulieris captive radendum caput, supercilia, omnes pilos & ungues corporis amputandos, & sic eam habendam in conjugio. Quid ergò mirum, si & ego sapientiam secularem, propter eloquiù venustatem & membrorum pulchritudinem, de ancilla atque captiva Israelitidem facere cupio? & si quicquid in ea mortuum est idololatriæ, voluptatis, erroris, libidinum; vel præcido, vel rado? Atque hinc*
natum

P R Æ F A T I O.

natum mihi præsens opusculum, ha-
 ctenus non iusti tractatûs, sed com-
 mentarii veriùs, vel supplementi lo-
 cò numerandum. Factum postea, ut
 cùm Discipulorum alii ejus exscribendi
 copiam sibi rogarent, idemque alii
 ad prelum expeterent, pretium ejus,
 si typis evulgaretur, exscribentis la-
 borem minimè æquaturum rati, ad
 secundas curas revocatum, variisque
 supplementis, quæ cùm novissima &
 probatissima hujus argumenti Scripta
 multis in lucem edita; tùm mea mihi
 qualiscunque penus suppeditare pote-
 rant, adauctum, accuratiorem artis
 formam acciperet, neque tamen lon-
 giùs, quàm ad ipsum Virtutis Chri-
 stianæ quasi confinium procederet;
 quâ porrò eundum esset, intentò ve-
 luti digito monstravisse satis habens.
 Stylum quod attinet, sanctissimæ Dis-
 cipli-

P R Æ F A T I O.

ciplinæ ambitiosa quærere ornamenta nec potui nec debui; feci tamen, quantum ejus potui, ne barbaries offenderet, pariter cavendum arbitratus exemplum, cùm illorum, in quos dicit Seneca; *Nocet illis eloquentia, qui non rerum faciunt cupiditatem, sed sui*: tùm aliorum, qui Ethicam inconsultò altercandi studiò supervacuarum quaestionum mole superobruunt, vitam humanam non instruentes sed turbantes: ex quorum proin lectione surgas nescio quomodo frigidius veram erga virtutem affectus, sed irritatior ad contentionem, Philosophus ut ille ait, ἀνευ τῆ πράξεως, μέχρι τῆ λέγειν. *Factis procul, verbis tenus*. Cæterùm prima bonarum Literarum studia juvare positum fuit, præceptis methodò adolescentium ætati accommodâ digestis. An autem, quod in votis est, mihi cer-

P R Æ F A T I O.

certum promittere ausim, rectiùs judicabis, quisquis libellum, vel certè, si tantum laboris abs te pudenter expectare non possim, partem ejus, sublegere non dedignatus fueris. Mihi, quod jamjam usu compertum est, spem facit, Adolescentes, ubi studiorum authorem Deum, ducemque veritatis amorem unicum, sibi constituerint, è lectione ejus pretium operæ non pœnitendum facturos. Vale.

Martial. lib. x.

*Si nimius videor, seraque coronide longus
Esse liber: legito pauca, libellus ero.*

I N-

INDEX CAPITUM

Quæ in hoc Volumine continentur.

E thicæ Prolegomena. <i>De Natura</i> <i>Ethices ejusque partitione,</i> Pag. 1	
Libri primi Ethices sive Aretologiæ pars prior.	10
CAPUT I. <i>De Actione morali in ge-</i> <i>nere.</i>	ibid.
CAP. II. <i>De Intellectu.</i>	13
CAP. III. <i>De Voluntate, Judicio &</i> <i>libero Arbitrio.</i>	35
CAP. IV. <i>De Causis Actionum moralium</i> <i>præparantibus & impellentibus atque</i> <i>sine.</i>	48
CAP. V. <i>De speciebus actionum mora-</i> <i>lium, & Norma.</i>	57
CAP. VI. <i>De Affectibus in genere, eo-</i> <i>rumque usu & incommodo.</i>	74
CAP. VII. <i>De Affectibus in specie, eo-</i> <i>rumque usu.</i>	89
CAP. VIII. <i>De Habitu animi.</i>	112
CAP. IX. <i>De Bono & Malo.</i>	124

INDEX CAPITUM.

Aretologiae Pars posterior.

DE *Virtute ejusque officiis, & Virtutis
acquirendæ adminiculis.* Pag. 134

CAP. I. *De Virtute & causis ejusdem
procreantibus.* *ibid.*

CAP. II. *De proprietatibus Virtutis, Di-
ligentia, Obedientia, Justitia correctrice,
& Humilitate.* 144

CAP. III. *De Peccato, Vitio & Hosti-
bus Virtutis.* 158

CAP. IV. *De Virtutis ab officio Distin-
ctione, Unitate, Æquabilitate & Sim-
plicitate.* 165

CAP. V. *De Pietate.* 173

CAP. VI. *De Temperantia, Sobrietate, Ca-
stitate, Frugalitate, Modestia, &c.* 189

CAP. VII. *De Fortitudine.* 216

CAP. VIII. *De Virtutibus reductitiis, ad
Temperantiam & Fortitudinem revocan-
dis.* 227

CAP. IX. *De Justitia & Æquitate.* 242

CAP. X. *De Virtutibus reductitiis, quæ
ad Justitiam & Æquitatem revocan-
tur.* 257

CAP.

INDEX CAPITUM.

CAP. XI. <i>Appendix de Officiis Justitiæ relativis.</i>	284
CAP. XII. <i>De Prudentia.</i>	288.
CAP. XIII. <i>De Virtutis acquirendæ adminiculis. In genere.</i>	307

Ethicæ Liber Secundus, qui est Eudæmonologia.

DE Præmiis Virtutis, in quibus est
hominis Beatitudo. 325

CAP. I. *De Summo Bono & Fine hominis in genere.* ibid.

CAP. II. *De Præmiis Virtutis in genere.*

Item de communione & amicitia cum Deo, in specie. 344

CAP. III. *De Tranquillitate Animi.* 349

CAP. IV. *De Sapientia & Dignitate.* 358

CAP. V. *De amicitia bonorum cum bonis. Ut & de Virtute, quodammodo sui mercede.* 362



ETHICÆ PROLEGOMENA.
D E
NATURA ETHICES,
Ejusque partitione.

§. I.

*Ethicam appellamus Doctrinam de moribus hominis
ad benè beatèque vivendum componendis.*

EXPLICATIO.

1. **E**thicæ ἀπὸ τῶν ἠθῶν à moribus, quos sibi
formandos hæc Disciplina sumit, nomen
factum. Sunt autem *Mores vivendi ratio
usu firmata.*

2. Parum referre videtur, generis loco artem di-
cas, an scientiam, an prudentiam &c. Haud ta-
men temerè est, quòd quam docemus Ethicam,
Doctrinam, quàm artem &c. dici malimus: ne
vixdum limen hujusce scholæ salutantibus litem
moveant illi, quibus nihil non ad Aristotelis placita
morosè nimis exigere volupe est. Quæstiones, qua-
rum disceptatio ad vitam benè comparandam mo-
menti nil affert, velut intemptivas à sacris hisce
nostris exesse jubemus: rem habere nolentes cum
illis, qui

*Virtutem verba putant, ut
Lucum ligna.*

3. Reliqua præcepti *Subiectum*, tum *tractationis*, tum *informationis* & *finem* exhibent. Quæ enim *Ethica* docet, *Subiectum tractationis*: quos docet, *Subiectum informationis*, dici consueverunt.

§. 2.

Subiectum tractationis sunt Mores & Beatitudo.

E x p l.

1. **D**Uo ista, *Mores* & *Beatitudo*, utramque huius *Disciplinæ* paginam faciunt. Hæc quidem actionum nostrarum veluti meta; illis ubi, quò par est, modò fuerint comparati, ad metam hanc contendendi via continetur.

2. Morum nomine cum virtutes pariter & vitia veniant, de his atque illis, quanquam dispari ratione, quæ tenenda sint, *Ethica* præcipit. Etsi enim *Virtutis*, quæ una beatitudinis spem facit haud inanem, præcipua hæc cura sit; nihilominus viatorem nostrum, ne quâ defleat incautus, de diverticulis cavendis commonitum oportet. Quin imò, ut in arte *Medica* morbis, sic in *Ethica* vitiis, ut nunc sunt res humanæ afflictæ, per censendis locus aliquis necessariò dandus est: morbo enim ignoto medicinam facere qui parat, nihil agit. Unde in remedium animi, non exercitationem ingenii, *Philosophiam* inventam, prudenter dixerè *Stoici*, totius nominè partem appellitantes suò iudiciò, quidnò verò etiam nostrò? longè nobilissimam.

Sen. de
benef.
l. VII.
c. 1.

§. 3.

Subiectum informationis est hominum quisque, à rationis usu valens, quatenus bonis moribus est imbuedus, & à pravis abducendus.

E x p l.

E X P L.

1. **H**omo virtutis inops & ad mala pronus nascitur. Id quod nec Philosophum omnino la-
 ter. Unde Cic. *Simulatque editi in lucem & suscepti su-* Insc.
Quæst.
lib. 3.
mus, in omni continuo pravitare, & in summa opinio-
num perversitate versamur, ut penè cum lacte nutricis er-
rorem suxisse videamur. In hunc hominem sanandum,
 refingendum, perficiendum; quicquid artis suæ
 habet, Ethica explicat.

2. Obijcienti; hominem verà demùm fide præ-
 ditum solidæ virtutis esse capacem, atque adeò ca-
 pessendis Ethicæ præceptis aptum: Respondeo;
 istuc me fateri verissimum, genuinæ virtuti nus-
 quam nisi *in corde Evangelica fide* ab errorum sordibus Al. 15.
repurgato, locum esse: nihilotocius neminem non, 9.
 qui suæ sit mentis compos, & id ætatis, ut Ratio-
 nem in consilium rerum agendarum adhibere queat,
 probis esse moribus informandum, & à malis avo-
 candum.

3. Neque moramur illud Aristotelis; *ὁ δὲ τῆς πο-* Nicom.
λιτικῆς ἐκ τῆς οὐκ ἐκείνης ἀπορίας ὁ νόμος. An ætas ulla, lib. 1. c. 1.
 quolibet afflicta morbo sanitati recuperandæ inima-
 tura? Rectius Seneca; *Omnis, inquit, ætatis homi-* Epist. 76.
nes hæc Schola admittit: in hac senescamus: hanc ut ju-
venes sequamur. Imò ipsissimus Orti Magister; Ne-
 que juvenis quisquam differat Philosophiam, neque senex
 defatigetur: non enim immaturus quisquam, aut vietus
 & effœtus est ad animæ sanitatem. Ut cœlò tranquillò
 & mari placido nautæ, quæ contra tempestatem
 usui sunt, expediunt: sic in ista ætate nondum tot
 curis & fluctibus exposita, quæ sint illis mitigandis,
 aut tollendis, jure præpares. Sunt porrò puero-
 rum ingenia maximè flexibilia, ex virtutum præ-
 ceptis & exemplis fingi aptissima. Quotusquisque
 est, qui ubi vitia secum adolescere siverit, facile
 mitescat, & cultura patientem commodet aurem? Unde

etiam puerili ætati hac in parte divinitus cautum legimus in S. pagina: iussis parentibus, ut suos quique liberos à prima usque pueritia legem Dei doceant.

4. Quid verò hominis hîc curandum veniat, paulò propius est dispiciendum. Homo *mente & corpore*, substantiis toto quidem genere diversis, arctissimo tamen fœdere junctis, constat. Utriusque partis cultura suò quòdam modò occupat Ethicum, tametsi sola mens, doctrinæ capax, præceptis ejus informetur.

5. Mentis quidem varii sunt modi cogitandi, quorum summa duo liceat constitui genera, ad quæ mentis humanæ functiones quælibet haud incommodè reduci queant. Ad *Prius* pertinent omne genus *Perceptiones* rerum, quæ vel menti in se ipsam reflectenti occurrunt, vel sensui forinsecus offeruntur: cujusmodi sunt *purus*, quem vocant, *intellectus*, cui sua obituro munia nihil opus est corporis adjuvamento. *Sensus* deinde, cùm *Interni*, *phantasia & memoria*: tùm *Externi*, *visus*, *auditus &c.* qui adeo usque à corporis pendent commercio, ut pro varia ejusdem temperie varient & ipsi, organorum læsione nonnunquam omnem sensus vim elidente.

6. *Posterioris generis* sunt *Voluntas &* quicquid assensum trahit, vel voluntatis quid involvit. Velut est facultas affirmandi, quæ vera; negandi, quæ falsa sunt: prosequendi, quæ bona; averfandi, quæ mala. Omnia denique animi pathemata, quæ voluntatem quoquò modò afficiunt, bonique prosecutionem juvant, vel rursus retardant eandem.

7. En jam nobis animi solum! quod ubi neglectum jacere siverimus, quid aliud nisi sylvescat, horrescatque; *namque neglectis urenda filix innascitur agris*: culturâ adhibitâ utile & fructiferum fiat? Atque hîc quæ spissa caligo, quis ad vera bona stupor, quæ infrænâ in nihili rebus curiositas, occupet mentem; quæ morum perversitas, quæ indigna

digna servitus, quæ mille mala effrænata teneant voluntatem: quis sensuum & affectuum abusus, quæ sit *ἀκρασία*, identidem recogitare, virtutis studium atque profectum apprimè juvabit. Hoc quasi vomere proscindendum animi solum, & sementi præparandum est. Sementem porrò dabit virtutis doctrina, omnis eò insumenda, ut intellectu veritatis luce collustrato; voluntate ejus, quod simpliciter optimum, prosequendi decretò munita; memoriâ præceptorum veluti supellectile instructâ; sensuum denique & affectuum usu ad bonæ mentis obsequia temperatò, lætam virtutis messem olim percipiendam sperare liceat.

8. Adhuc de animo. Corporis etiam excolendi studium extra curam Ethici non esse, vel jam dicta probant. In corpore varii cientur membrorum motus: quorum alios non equidem ab animo effici, ejus tamen imperium sequi aptos natos; alios, eisdem imperio nequaquam obnoxios, à sola partium conformatione atque organorum impetu pendere, nullò fermè negotiò animadvertimus. Exemplo sint hæc: pro arbitrato intendis oculos, rei quid, si te propiùs adsitum, si longiùs à conspectu tuo submotum, intuiturus. Sumis cibum potumque molestius vellicante stomacho, satis necessitati naturæ facturus. Modicâ ambulatiunculâ liquidiorē defæcationemque facis somnum, quoties ita volupe. At oculi pupillam remota intuenti hiare: rursus propinqua contuenti coire: cibum absumptum, digestionē ritè facta, in succum alimentitium converti, & per venas distributum deinceps in corporis nutritionem cedere: nervis & musculis spiritus animalis affluxu distensis vel coarctatis, eos crurum pedumque cieri motus, quibus ad ambulandum usus est, non perinde tui est arbitrii: hisce non ideo bellè procedentibus, quia ita tibi visum sit. Non igitur his, sed illis, nimirum arbitrariis membrorum moribus, in quibus ad bonam

bus fortè hæc nostra minùs probabuntur, verbis contendere nolim. Aretologiam præmitti placet. Cùm enim veritatis cognitio, indidemque pendens virtutis amor, partem beatitudinis faciant non ignobilem, virtutem tibi priùs cognitam oportet, quàm ad naturam summæ boni & beatitudinis indagandam accedas. *Ethica* quidem *Utens*, ut ita dicam, quod in executione ultimum est, in intentione primum amplectitur. *Ethica* verò *docens* quamobrem lege methodi analyticæ, quam vocant, necessariò adstringatur, hætenus nostro pro instituto non satis apparet.

§. 6.

Aretologia est prior Ethicæ pars, quæ quid virtus, & quæ virtuti quærendæ comparata sint adminicula, exponitur.

E X P L.

NON satis opinor esse, splendidum virtutis decorem amplo definitionum & distributionum apparatu proposuisse: imago enim hæc esset & statua, pulchra quidem aspectu, sed vita quasi & vigore destituta. Animam ergo dabunt virtutis acquirendæ præcepta. Paucos vivere videas, qui curæ habeant, quemadmodum animum, ut fieri est æquum, excolant, & vitæ rationem ad normam componant. De partibus vitæ quisque deliberat, de summa nemo. Hominum adeò solordia hanc Ethicæ partem summæ facit necessariam: idem fatente, atque etiam iteratò inculcante Aristotele; Inutile enim ferè fuerit, virtutem nòsse, verùm quomodo & ex quibus paretur, non intellexisse &c. Attamen quod verbis præ se tulit, re ipsa non præstitit, partem hanc, tot libris de re Ethica conscriptis, nusquam executus. Quinimò hoc Gentilis Philosophiæ deliquium est, quod inevitabilem vitiatæ naturæ impotentiam supe-

Magn.
Mor. l. I.
c. I.

superandi, veramque virtutem comparandi adminicula non suppeditet, quæ nulla satis commoda habet. Utrumque verò cum præstet *Christiana Religio*, summam inde suam nobis commendat excellentiam.

§. 6.

Rursus Aretologia subjectam sibi materiam habens tum quæ ad virtutem in genere pertinent; tum quæ ipsam in specie spectant, bipertitò subdividitur in partem generalem, quæ est de subjecto virtutis occupante: & specialem, quæ est de ipsa virtute, variisque ejusdem officii, sive generibus &c.

Subjectum Virtutis occupans, in homine quidem sunt actiones morales, affectus & habitus: extra hominem sunt tum res, in quibus; tum personæ in quas, virtus exercenda.

E X P L.

Hujus præcepti ampliore explicatione supersedemus, quam viam existimamus incundam, verbò significasse contenti, re ipsa verò hoc opusculò, quoad per brevitatis studium fieri poterit, ostensuri.

§. 7.

Ἐυδαιμονολογία Virtutis præmia edisserit. Eoque summum dari actionis humanæ finem atque bonum, cujus possessio beatitudinem suis numeris completam affert, & ubi reperire sit idem, gravibus atque indubiis argumentis edocet.

E X P L.

Quò consiliò metam virtuti propositam tantò hinc dimoveamus intervallò, suprà diximus. Hic loci digitum quasi eminùs intendi sic sufficiat rectà ad institutum perrecturis: quod ut benè vertat, faxit Bonus ille & Rectus, *Jehova*, monstrans peccatoribus viam.

INDEX CAPITUM

Quæ in hoc Volumine continentur.

Ethicæ Prolegomena. *De Natura Ethices ejusque partitione,* Pag. 1

Libri primi Ethices sive Aretologiæ pars prior. 10

CAPUT I. *De Actione morali in genere.* ibid.

CAP. II. *De Intellectu.* 13

CAP. III. *De Voluntate, Judicio & libero Arbitrio.* 35

CAP. IV. *De Causis Actionum moralium præparantibus & impellentibus atque fine.* 48

CAP. V. *De speciebus actionum moralium, & Norma.* 57

CAP. VI. *De Affectibus in genere, eorumque usu & incommodo.* 74

CAP. VII. *De Affectibus in specie, eorumque usu.* 89

CAP. VIII. *De Habitu animi.* 112

CAP. IX. *De Bono & Malo.* 124

Areto-

INDEX CAPITUM.

Aretologiae Pars posterior.

D	<i>E Virtute ejusque officiis, & Virtutis acquirendæ adminiculis.</i>	Pag. 134
CAP. I.	<i>De Virtute & causis ejusdem procreantibus.</i>	ibid.
CAP. II.	<i>De proprietatibus Virtutis, Diligentia, Obedientia, Justitia correctrice, & Humilitate.</i>	144
CAP. III.	<i>De Peccato, Vitio & Hostibus Virtutis.</i>	158
CAP. IV.	<i>De Virtutis ab officio Distinctione, Unitate, Equabilitate & Simplicitate.</i>	165
CAP. V.	<i>De Pietate.</i>	173
CAP. VI.	<i>De Temperantia, Sobrietate, Castitate, Frugalitate, Modestia, &c.</i>	189
CAP. VII.	<i>De Fortitudine.</i>	216
CAP. VIII.	<i>De Virtutibus reductitiis, ad Temperantiam & Fortitudinem revocandis.</i>	227
CAP. IX.	<i>De Justitia & Equitate.</i>	242
CAP. X.	<i>De Virtutibus reductitiis, quæ ad Justitiam & Equitatem revocantur.</i>	257
	CAP.	

INDEX CAPITUM.

CAP. XI. <i>Appendix de Officiis Justitiæ relativis.</i>	284
CAP. XII. <i>De Prudentia.</i>	288.
CAP. XIII. <i>De Virtutis acquirendæ adminiculis. In genere.</i>	307

Ethicæ Liber Secundus, qui est Eudæmonologia.

DE Præmiis Virtutis, in quibus est
hominis Beatitudo. 325

CAP. I. *De Summo Bono & Fine hominis in genere.* ibid.

CAP. II. *De Præmiis Virtutis in genere.*
Item *de communione & amicitia cum Deo, in specie.* 344

CAP. III. *De Tranquillitate Animi.* 349

CAP. IV. *De Sapientia & Dignitate.* 358

CAP. V. *De amicitia bonorum cum bonis.*
Ut & de Virtute, quodammodo sui mercede. 362



ETHICÆ PROLEGOMENA.
D E
NATURA ETHICES,
Ejusque partitione.

§. I.

*Ethicam appellamus Doctrinam de moribus hominis
ad benè beatèque vivendum componendis.*

EXPLICATIO.

I. **E**thicæ ἀπὸ τῶν ἠθῶν à moribus, quos sibi
formandos hæc Disciplina sumit, nomen
factum. Sunt autem *Mores vivendi ratio
usu firmata.*

2. Parum referre videtur, generis loco artem di-
cas, an scientiam, an prudentiam &c. Haud ta-
men temerè est, quòd quam docemus Ethicam,
Doctrinam, quàm artem &c. dici malimus: ne
vixdum limen hujusce scholæ salutantibus litem
moveant illi, quibus nihil non ad Aristotelis placita
morosè nimis exigere volupe est. Quæstiones, qua-
rum disceptatio ad vitam benè comparandam mo-
menti nil affert, velut intemptivas à sacris hisce
nostris exesse jubemus: rem habere nolentes cum
illis, qui

*Virtutem verba putant, ut
Lucum ligna.*

3. Reliqua præcepti *Subjctum*, tum *tractationis*, tum *informationis* & *finem* exhibent. Quæ enim *Ethica* docet, *Subjctum tractationis*: quos docet, *Subjctum informationis*, dici consueverunt.

§. 2.

Subjctum tractationis sunt Mores & Beatitudo.

E x r l.

1. **D**Uo ista, *Mores* & *Beatitudo*, utramque hujus *Disciplinæ* paginam faciunt. Hæc quidem actionum nostrarum veluti meta; illis ubi, quò par est, modò fuerint comparati, ad meram hanc contendendi via continetur.

2. Morum nomine cum virtutes pariter & vitia veniant, de his atque illis, quanquam dispari ratione, quæ tenenda sint, *Ethica* præcipit. Etsi enim *Virtutis*, quæ una *beatitudinis* spem facit haud inanem, præcipua hæc cura sit; nihilominus viatorem nostrum, ne quâ defleat incautus, de diverticulis cavendis commonitum oportet. Quin imò, ut in arte Medica morbis, sic in *Ethica* vitiis, ut nunc sunt res humanæ afflictæ, per censendis locus aliquis necessariò dandus est: morbo enim ignoto medicinam facere qui parat, nihil agit. Unde in remedium animi, non exercitationem ingenii, *Philosophiam inventam*, prudenter dixerunt Stoici, totius nomine partem appellitantes suo judiciò, quidni verò etiam nostrò? longè nobilissimam.

Sen. de
benef.
l. VII.
c. 1.

§. 3.

Subjctum informationis est hominum quisque, à rationis usu valens, quatenus bonis moribus est imbuedus, & à pravis abducendus.

E x 2

E X P L.

1. **H**OMO virtutis inops & ad mala pronus nascitur. Id quod nec Philosophum omninò lateret. Unde Cic. *Simulatque editi in lucem & suscepti sumus, in omni continuo pravitate, & in summa opinionum perversitate versamur, ut penè cum lacte nutricis errorem suxisse videamur.* In hunc hominem sanandum, refingendum, perficiendum; quicquid artis suæ habet, Ethica explicat. Tusc. Quest. lib. 3.

2. Obijcienti; hominem vera demùm fide præditum solidæ virtutis esse capacem, atque adeò capessendis Ethicæ præceptis aptum: Respondeo; istuc me fateri verissimum, genuinæ virtuti nusquam nisi in corde *Evangelica fide* ab errorum sordibus *Act. 15.* repurgato, locum esse: nihilotsecius neminem non, 9. qui suæ sit mentis compos, & id ætatis, ut Rationem in consilium rerum agendarum adhibere queat, probis esse moribus informandum, & à malis avocandum.

3. Neque moramur illud Aristotelis; *Ἀδὲ τῆς πο- Nicom.*
λυτικῆς ἐκ τῆς οὐκ ἐκ ἀρετῆς ὁ νόσος. An ætas vili, *lib. 1. c. 1.*
quolibet afflicta morbo sanitati recuperandæ immatura? Rectiùs Seneca; *Omnis, inquit, ætate homines hæc Schola admittit: in hac senescamus: hanc ut juvenes sequamur.* Imò ipsissimus Otii Magister; *Neque juvenis quisquam differat Philosophiam, neque senex defatigetur: non enim immaturus quisquam, aut vietus & effectus est ad animæ sanitatem.* Ut cœlò tranquillò & mari placido nautæ, quæ contra tempestatem usui sunt, expediunt: sic in ista ætate nondum tot curis & fluctibus exposita, quæ sint illis mitigandis, aut tollendis, jure præpares. Sunt porrò puerorum ingenia maximè flexibilia, ex virtutum præceptis & exemplis fingi aptissima. Quorusquisque est, qui ubi vitia secumadolescere siverit, facile mitescat, & cultura patientem commodet aurem? Unde

etiam puerili ætati hac in parte divinitus cautum legimus in S. pagina: jussis parentibus, ut suos quique liberos à prima usque pueritia legem Dei doceant.

4. Quid verò hominis hîc curandum veniat, paulò propiùs est dispiciendum. Homo *mente & corpore*, substantiis toto quidem genere diversis, arctissimo tamen fœdere junctis, constat. Utriusque partis cultura suò quòdam modò occupat Ethicum, tamen si sola mens, doctrinæ capax, præceptis ejus informetur.

5. Mentis quidem varii sunt modi cogitandi, quorum summa duo liceat constitui genera, ad quæ mentis humanæ functiones quælibet haud incommodè reduci queant. Ad *Prius* pertinent omne genus *Perceptiones* rerum, quæ vel menti in se ipsam reflectenti occurrunt, vel sensui forinsecus offeruntur: cujusmodi sunt *purus*, quem vocant, *intellectus*, cui sua obituro munia nihil opus est corporis adjumento. *Sensus* deinde, cùm *Interni*, *phantasia & memoria*: tùm *Externi*, *visus*, *auditus &c.* qui adeo usque à corporis pendent commercio, ut pro varia ejusdem temperie varient & ipsi, organorum læsione nonnunquam omnem sensus vim elidente.

6. *Posterioris generis* sunt *Voluntas &* quicquid assensum trahit, vel voluntatis quid involvit. Velut est facultas affirmandi, quæ vera; negandi, quæ falsa sunt: prosequendi, quæ bona; averfandi, quæ mala. Omnia denique animi pathemata, quæ voluntatem quoquò modò afficiunt, bonique prosecutionem juvant, vel rursus retardant eandem.

7. En jam nobis animi solum! quod ubi neglectum jacere siverimus, quid aliud nisi sylvescat, horrescatque; *namque neglectis urenda filix innascitur agris*: culturâ adhibitâ utile & fructiferum fiat? Atque hîc quæ spissa caligo, quis ad vera bona stupor, quæ infrænis in nihili rebus curiositas, occupet mentem; quæ morum perversitas, quæ indigna

digna servitus, quæ mille mala effrænatam teneant voluntatem: quis sensuum & affectuum abusus, quæ sit *arazja*, identidem recogitare, virtutis studium atque profectum apprimè juvabit. Hoc quasi vomere proscindendum animi solum, & sementi præparandum est. Sementem porrò dabit virtutis doctrina, omnis eò insumenda, ut intellectu veritatis luce collustrato; voluntate ejus, quod simpliciter optimum, prosequendi decretò munita; memoriâ præceptorum veluti supellectile instructâ; sensuum denique & affectuum usu ad bonæ mentis obsequia temperatò, lætam virtutis messem olim percipiendam sperare liceat.

8. Adhuc de animo. Corporis etiam excolendi studium extra curam Ethici non esse, vel jam dicta probant. In corpore varii cidentur membrorum motus: quorum alios non equidem ab animo effici, ejus tamen imperium sequi aptos natos; alios, eisdem imperio nequaquam obnoxios, à sola partium conformatione atque organorum impetu pendere, nullò fermè negotiò animadvertimus. Exemplo sint hæc: pro arbitrato intendis oculos, rei quid, sive te propius adsitum, sive longius à conspectu tuo submotum, intuiturus. Sumis cibum potum, que molestius vellicante stomacho, satis necessitati naturæ facturus. Modicâ ambulatione liquidiorē defæcationemque facis somnum, quoties ita volupe. At oculi pupillam remota intuenti hiare: rursus propinqua contuenti coire: cibum absumptum, digestionē ritè facta, in succum alimentitium converti, & per venas distributum deinceps in corporis nutritionem cedere: nervis & musculis spiritus animalis affluxu distensis vel coarctatis, eos crurum pedumque cieri motus, quibus ad ambulandum usus est, non perinde tui est arbitrii: hisce non ideo bellè procedentibus, quia ita tibi visum sit. Non igitur his, sed illis, nimirum arbitrariis membrorum motibus, in quibus ad bonam

voluntatis imperia assuefactis sancta virtutis imago, menti impressa, relucere solet, legem dicit Ethica. Ita ὁλόκληρον τὸ πνεῦμα, mens, intelligendi, judicandi, volendique vi prædita; καὶ ἡ ψυχή, mens eadem sensibus pulsari, & affectibus diversum agitari sueta; καὶ σῶμα, membrorum motus, quos duci à mente regique par est, Ethicæ curam deposcunt. Inde adeò Thessalonicensibus eadem à Deo sanctificari, in vocis fuit Apostoli.

1. Thess.
5. 23.

§. 4.

Finis Ethicæ propositus est Benè Beatèque vivendi rationem docere.

E X P L.

1. **S**Toici, testibus Cicerone, de finibus, & Senecâ, passim in Epistolis, summum hominis bonum in sola virtute positum; & ut prisca illi Heroes, nati melioribus annis, nullum aliud τῷ κατορθώματι rectè facti præmium; quàm fecisse, atque adeò inter benè & beatè vivere ne hilum quidem interesse, autumant. Unde & illud Poëtæ; Ipsa sui merces rerum pulcherrima virtus. Et Alcumenæ apud Plautum;

In Amphitr.

— Virtus præmium est optimum,

Virtus omnia in se habet: omnia assunt bona, quem penes est virtus.

Secus tamen nobis & quare, visum, opportuniùs dicetur, ubi de summo Bono & præmio virtutis. Interim.

2. Hoc interesse putamus: Illud Poëtæ; Ipsa sui merces &c. non competit virtuti, quâ virtus, & officii est; sed ut ipsamet etiam proprietas quædam sui ipsius est. Si enim bene vivere interpreteris, officium facere suum, non idem erit, atque beatè vivere. Rursum, si id ipsum bene vivere accipias tanquam naturæ humanæ decus atque perfectionem quandam amore

amore & studio veritatis, rectitudine cogitationum, consiliis, verbis, factisque, hominū imaginem Dei gerente dignis conspicuam, partem dixerō vitæ beatæ, haud postremam, quam excipit æternum perseverans felicitas summō bonō fruētis, sive consummatum illud animi gaudium, è sensu summi Boni, quod sibi ceu maximè suum repræsentat, existens. Sic sanctificationem S. pagina cottidianis virtutum auctibus ad mortem usque corporis proficere, & in morte demū consummari, docet, Sanctorum inde obitum, quō quicquid adnati, contractique vitii & labis superest, aufertur, circumcissionem quandam non manu factam appellans. Eam consequitur gaudiorum satiētas, cujus primitias hanc viventibus vitam prælibandas offert, plena messe futuro seculo reservata.

Rom. 8.

10.

Col. 2. 11.

Psal. 16.

11. &

17. 15.

Ro. 8. 23.

3. Sic maximō operæ pretiō & felicissimo laboris proventu hæcce morum disciplina, veræque sapientiæ studium sese commendat: absque quo literæ si sint, & solitariæ, quid nisi levem oblectariunculam aut otii deceptionem habent? Cujus errores minuent? cujus cupiditates prement? quem fortiozem, quem justiozem, quem liberaliozem facient? Ad sapientiam igitur eant & nos ducant: non aliter, quàm qui in patriam tendit, viâ utens & diversoriis, sed non illa finem habet, aut mansionem. Quod si aliter, en Epictetum, qui avocet & increpat; Homo, oblivio te cepit instituti tui? Non huc ibas, sed hæc:

Sen. de

brevit.

vit. c. 14.

Diff. III.

c. 23.

§. 5.

Ethicam duabus complectimur partibus: Una quidem est de cultura & regimine animi, sive virtute: altera de virtutis præmio, sive beatitudine. Illam *Agathologian*, hanc *Eudaimonologian* dicere liceat.

E X P L.

Super ista partitione bimembri, ut & ordine, quomembra pertractari debeant, cum aliis, quibus

bus fortè hæc nostra minùs probabuntur, verbis contendere nolim. Aretologiam præmitti placet. Cùm enim veritatis cognitio, indidemque pendens virtutis amor, partem beatitudinis faciant non ignobilem, virtutem tibi priùs cognitam oportet, quàm ad naturam summæ boni & beatitudinis indagandam accedas. *Ethica* quidem *Utens*, ut ita dicam, quod in executione ultimum est, in intentione primum amplectitur. *Ethica* verò *docens* quamobrem lege methodi analyticæ, quam vocant, necessariò adstringatur, hæcenus nostro pro instituto non satis apparet.

§. 6.

Aretologia est prior Ethica pars, quæ quid virtus, & quæ virtuti quærendæ comparata sint adminicula, exponitur.

E X P L.

Non satis opinor esse, splendidum virtutis decorem amplo definitionum & distributionum apparatu proposuisse: imago enim hæc esset & statua, pulchra quidem aspectu, sed vita quasi & vigore destituta. Animam ergo dabunt virtutis acquirendæ præcepta. Paucos vivere videas, qui curæ habeant, quemadmodum animum, ut fieri est æquum, excolant, & vitæ rationem ad normam componant. De partibus vitæ quisque deliberat, de summa nemo. Hominum adeò solordia hanc Ethicæ partem summæ facit necessariam: idem fatente, atque etiam iteratò inculcante Aristotele; *Inutile enim ferè fuerit, virtutem nòsse, verùm quomodo & ex quibus paretur, non intellexisse &c.* Attamen quod verbis præ se tulit, re ipsa non præstitit, partem hanc, tot libris de re Ethica conscriptis, nusquam executus. Quinimò hoc Gentilis Philosophiæ deliquium est, quod inevitabilem vitiatæ naturæ impotentiam supe-

Magn.

Mor. l. I.

c. I.

superandi, veramque virtutem comparandi adminicula non suppeditet, quæ nulla satis commode habet. Utrumque verò cum præstet *Christiana Religio*, summam inde suam nobis commendat excellentiam.

§. 6.

Rursus Aretologia subjectam sibi materiam habens tum quæ ad virtutem in genere pertinent; tum quæ ipsam in specie spectant, bipertitò subdividitur in partem generalem, quæ est de subjecto virtutis occupante: & specialem, quæ est de ipsa virtute, variisque ejusdem officii, sive generibus &c.

Subjectum Virtutis occupans, in homine quidem sunt actiones morales, affectus & habitus: extra hominem sunt tum res, in quibus; tum personæ in quas, virtus exercenda.

E X P L.

HUJUS præcepti ampliore explicatione supersedemus, quam viam existimamus ineundam, verbò significasse contenti, re ipsa verò hòc opusculò, quoad per brevitatìs studium fieri poterit, ostensuri.

§. 7.

Ἐυδαιμονολογία Virtutis præmia edisserit. Eoque summum dari actionis humanæ finem atque bonum, ejus possessio beatitudinem suis numeris completam affert, & ubi reperire sit idem, gravibus atque indubiis argumentis edocet.

E X P L.

QUO consiliò metam virtuti propositam tantò hinc dimoveamus intervallò, suprà diximus. Hic loci digitum quasi eminùs intendisse sufficiat re-cta ad institutum perrecturis: quod ut benè vertat, faxit Bonus ille & Rectus, *Jehova*, monstrans pectoribus viam.

LIBRI PRIMI ETHICES

sive

ARETOLOGIÆ

PARS PRIOR.

CAPUT I.

De

Actione morali in genere.

§. I.

Actionis moralis nomine venit, quicquid homo, quæ intelligendi volendique facultate præditus, & in ordine ad finem, quem intendere, & ad exemplar, cui in agendo se conformare debet, consideratus, consulit, dicit, facit, vel etiam faciendum omittit, eo effectui ut facti vel omissi rationem posci, & quicquid inde provenit, eidem imputari queat.

I. **P**rimum, quod ad materiam Virtuti subjectam spectans in homine ipso se considerandum offert, est *actio moralis*, nomen inde sortita suum, quod ob hujus generis actiones, prout benè vel malè fuerint comparatæ, similiter quisque moratus perhiberi, ipseque animi habitus actionibus crebrò repetitis contractus, *mos* appellari solet.

2. Fun-

2. Fundamentum moralitatis actionum hominis est, 1. Quòd istæ actiones dirigi atque provenire censentur à facultatibus, quas humano generi præbruit Creator Opt. attribuit, ita quidem, ut velut prælucente Intellectu, ac decernente voluntate suscipiantur. Quem in censum proinde referri non possunt actiones, quas vocant *merè physicas*, puta motus, qui in corpore nobis non consciis cientur, ab æconomia sanguinis & spiritûs animalis, ac impetu organorum, omninò pendentes: quibus, exempli causâ, cibus digestus, sanguini suffusus, arteriarumque pulsu ventilatus, quaqua versus ad nutricatum corporis distribuitur &c. Isti proinde motus, si quid vitii trahant, id homini imputari nequit: nisi quatenus sponte ejus prava vivendi ratione contractum fuerit. Unde non iniqua lex veterum Gallorum, quæ, narrante Strabone, *multabat juvenem*, qui justò habitior *Zonæ mensuram excesserat*: quòd ventrem prominulum illa in ætate ingluviæ & desidii argumentum crederent. Sed de imputatione, cujus etiam in præcepto meminimus, alibi, opportunius. 2. Quòd homini, maturâ saltem ætate & judicio valenti *testis est conscientia*, haud obscure hanc edocens veritatem; *Summum esse finem*, quem agens intendere: *Bonum*, quod omni studio quærere; *Dominum*, cujus imperium agnoscere: & *Exemplar*, ad quod in omni vita quisque se conformare debeat: eam item veritatem amare, eandemque consiliis suis, atque dicendis, faciendisque regulam præscribere, & legem dicere inviolabilem, sanctum esse, justum, honestum atque decorum. Ex adverso veritatem eandem odisse, dedignari, nihil pensi habere, turpe esse, atque indecorum. Possè igitur suam cuique actionem, tanquam auctori, rectè imputari, satis non est ad id, ut *actio moralis* dicatur, etsi non desint, quibus sic videatur.

3. Legem de qua mox monuimus, non tantum
dicen-

l. 4.

Psalm.
14: 1.

dicendis, faciendis & omittendis, sed & consilii dictam volumus: homine etiam moraliter agente, quando consultat, aliud ex alio cogitat, mente quid machinatur &c. Maximè verò si cogitatione sponte suscepta animum oblectet: ut stultus, qui cogitationem, non esse Deum, in deliciis habet atque fover, peccandi licentiæ indulurus: à quâ cæteroquin non est, quod magis absterreere queat, quàm sensus Numinis animum nequicquam sese obfirmantem fulguris instar perciliens.

4. Neque illud quemquam morari velim, quòd *moralibus actionibus accenseo omissionem.* Cùm enim sit omissio ejus, quod factum oportuit, hætenus prudentis & volentis, atque idè non prorsus nihil agentis, fuisse censetur. Hinc & facienda omisisse, est peccasse, & pœnæ facit obnoxium.

5. Ex dictis consequitur; Actionem moralem in ætatem infantilem non cadere. Præterea mente captorum, furiosorum &c. quibus nullâ graviore suâ culpâ id mali accidit, actiones enormes, durantes furoris æstu perpetratas, veniam potiùs & commiserationem, quàm improprium mereri. Peccant verò, quibus triste spectaculum voluptati est.

6. Actio in genere, ut hætenus, spectata, ad materiam virtuti subjectam pertinet: *suum namque in ea tenere modum virtutis est.* Ejus porrò quæ consideranda veniant, sequens præceptum doceat.

§. 2.

Actionis moralis spectari solent Principia, sive Causæ, & Genera.

E X P L.

1. **U**T, quæ de actionum generibus tenenda sunt, rectè percipiantur, primum Causas

tum *Efficientes*, è quibus producantur; tum *finem*, ad quem attemperantur, inspicere oportet.

2. *Efficientium causarum* alix quidem intra hominem reperiuntur; alix extra hominem, vires tamen suas in hominis intima quaque explicant.

3. Intra hominem est *Intellectus & Voluntas*, præcipuæ dotes, homini præ brutis concessæ. Ille quidem principium actionis quasi *dirigens*; hæc *imperans & exequens* dici consuevit. Unde *legum imperia* audire & moribus imbuti aptus natus est homo: eoque nomine actiones ejusdem longè nobiliore classe censentur, quàm motus illi brutarum animantium, quos sensuum stimuli, citra antegressam rei cujusque appetendæ vel fugiendæ cognitionem, eliciunt. Extra hominem sunt causæ, quæ ipsum actioni præparant: sunt deinde, quæ ad agendum impellunt. Hæc suò quaque locò & ordine, quantò fieri potest perspicuitatis & brevitatis studio, exponemus.

C A P. II.

De Intellectu.

I.

Intellectum vocamus eam nostræ facultatem, quæ *mentem* secum quasi habitans, sibi quæ intendens, quod cujusque rei (captus finiti modulum non excedentis) verum est, evidenter cognoscit.

E X P L.

1. **Q**uando Intellectus est, homini hoc illud agere destinanti facem præferre, prima hinc cura sit, istuc ipsum *intelligere quid sit*, intelligas.

2. Mentem secum quasi habitare, se solâ occupatam, quando *intelligit*, intelligentes utique experiri-

mur;

Taf. 1. mur: Siquidem consulescentibus sensuum atque affectuum turbis felicissimè demùm suum facit officium Intellectus. Unde rectè Cicero; *Magni, inquit, esse ingeni, revocare mentem à sensibus, & cogitationem à consuetudine abducere.* Nec temerè intelligere quasi intra vel intus legere, dictum est.

3. Nobis igitur non probantur Scholæ placita; quibus mens; quoties intelligere quid parat, ad sensus quâ interioris, quâ exterioris commercium revocata, species rerum per sensoria immixtas captare jubetur: è quibus cœinceps species, quas vocant; intelligibiles, velut instrumenta, arti suæ exercendæ idonea, præcudat. Unde natum tralatitium illud; *Nihil est in intellectu, quin idem prius fuerit in sensu.* Id quod Modernorum plurimi falsitatis revicerunt; quos, ne actum agamus, super hoc argumento consuli velim. Hoc saltem observasse juvabit; ista Scholæ philosophemata in re Ethica ferri non posse. 1. Quia ipsam Deum cognoscendi viam intercludunt. Gentiles, teste Apostolo; *etsi quod cognoscitur Dei manifestum esset in ipsis, Deo id ipsis intra animum notione insita & rebus factis notificante, non tanti fecere Deum habere in agnitione.* Atqui nulla Dei species, quæ sensibus hauriatur, nihil ulquam rerum creatarum Dei simile, quod Deum sensui repræsentet, deprehenditur. Certè quidem creaturæ, sensibus expositæ, vestigiis, potentia; sapientia; bonitatisque divinæ impressis, suò quæque locò & modò prædicant Deum suū opificem, sed *rostri*, beneficiòque luminis intelligentiæ & notionis anticipatæ prudenter animadvertenti. Triplitem Natura duce viam patere volunt Philosophi, quâ ratiocinando itur ad Deum; viam, quam vocant, *Causalitatis*; viam *Eminentia*, & viam *Negationis*. Hæc quidem vera nulli diffitemur, sed absque notione illa Numinis anticipata foret, cæco viâ prædicaretur. Id quod singula paulò penitiùs consideranti patebit. 2. Quia intelligi nequit, quomodo

do res corporeæ menti, cujus infra dignitatem tantò subsidunt intervallò, lumen intelligentiæ ullum ministrare possint, à sensuum judicio, quippe qui veram boni malive rationem assequi non valent, nec dependendum, nec fide eorundem in dijudicatione boni malive standum est. Atqui eò aurigatur doctrina Scholæ, quam hîc notamus, ut mentem ab eo, qui unus nobis *Doctor*, *Bonum* atque *Finis* esse debet, aversam; servituti sensuum atque rerum corporearum ab ipsa usque nativitate plus satis mancipatam, etiamnum magis innodet.

4. Ut ad reliqua propositæ definitionis explananda pergamus; Intellectum *quid cujusque rei verum sit cognoscere* dicimus: quia quod in falso percipit, id verum est, puta verè falsum: quemadmodum quod in bono & malo morali cognoscit, idem verè tale est. Verum porrò *evidenter cognoscit*, quando non solum *clare*, ut menti attendenti præsens sit; verum etiam *distinctè* apprehendit, ita quidem, ut quid rei cuique conveniat, quò rursus ab alia quavis re differat, menti innotescat: id quod Intellectus proprium est.

5. Nec temerè additum illud; *cujusque rei, capius finiti modulum non excedentis*. Identidem meminisse profuerit, intellectum nobis esse finitum: ne nos vel infinita perscrutari, cogitationeque complecti posse præsumamus. Quo casu multi nullo successu, pessimò exemplò, curiositatem fatigant; conditionis suæ obliti veriùs, quàm ignari, intellectumque suum mensuram rerum constituunt, gravissimò sanè damnò in religionem pariter & morum disciplinam, redundante. Neve ingenii viribus nimio perè freti pluribus simul, iisque diversissimis studiis intellectum occupemus, vix alio laboris inconsulti proventu, quàm inevitabili rationis & judicii conturbatione; & pœnitendò temporis dispendio. Atque hæc de natura intellectus dixisse sufficiat: è quibus sequentia collegisse usui erit.

§. §

Cautè igitur, cum primis in re Ethica, observandum, multum interesse inter Intellectum & Imaginationem: ut qua facultate suò quidvis pretiò aestimare volenti utendum sit, constet.

E X P L.

Discrimen paucis sic teneto. 1. Mens imaginabunda ad corpus, in quo hospitatur, conversa rem corpoream in imagine, definitam quantitatem, figuram, colorem &c. repræsentante, contuendam sibi sistit. Unde 2. Longè plura intellectus quam imaginatio assequitur. Exemplo sit globulus cereus fortè tibi visus, cujus imago etiamnum menti inerrat: ceram, utur putes, vidisse te nego; intellexisse tantum, inde constat, quia idem globulus igni admotus quicquid videras, duritiem nempe, quantitatis modum, figuram, deperdidit, cera, quæ fuerat, manente. Quando te dubitare dicis, num quæ prædico vera sint, intelligo utique, non imaginor, tuam dubitationem. Quæcunque igitur sit imaginandi dexteritas, quam certè Poëtis atque Pictoribus insignem esse oportet, ea nisi quæ sensus autè percepit, non attingit, ad ea, quæ corporeæ molis nihil habent, ineptissima. Unde idololatricam priùs mente, quàm opere committunt, qui idola & simulachra Dei fabricant. 3. Ejusdem porrò rei intelligentia omnibus est eadem: diversis enim diversimodè intelligentibus idem, unus duntaxat, vel nullus, intellexisse dicetur rem ex vero aestimanti. Atqui imaginatio pro ætate, sexu, vitæ instituto, ingenio & more gentico &c. mirum in modum variat in variis: hinc quæ Titio pulchra, Mævio sordent: quæ Gallo elegantissima, Hispano ridicula & stultitiæ insignia videbuntur: quod vestitium

stium moduli, & alia sæcundæ imaginationis inventa probant. Unde conficitur, etiam in dijudicatione veri boni malique imaginationem solam in consilium adhibendam non esse. Habent peccata, habent seculi commoda, unde se voluptati commendent & imaginationem specie pulchra vehementer everberent: sed incautos hîc falli, quàm verò est proclive?

§. 3.

Mens sibi ipsi intendens quod verum est cognoscit ex ideis quas vocant, sive notionibus cum rerum quarumlibet, tum maxime Dei, honesti, justî, atque decori, insitis.

E X P L.

1. **I** Deam appellamus illam cogitandi formam, quâ mens præsentē & perceptâ non solum conscia sit, se rem qualemcunque cogitare, sed etiam rei ejusdem attributa indidem evidentè deducere, ab aliis discernere, & definitione exprimere potest. Ideas porro menti innatas putamus, quo sensu congenitum dicitur, quod scimus vel possumus, non docti, sed facti, non instituti, sed imbuti.

2. Menti nostræ notionem Dei pariter atque honesti & decori insitam Ratio & Experientia comprobant. I. Absque illa foret, ex quocunque rerum creaturarum contemplatu ne vel levissima quidem Numinis suspicio nobis oboriri potuisset unquam, quin ne minimam quidem de eo cogitationem animò formare, neque adeò præcepta, quibus Scriptura S. virtutis studium & vitii fugam nobis inculcat, intelligere possemus. II. Apostolus intellectum, honesti & decori notitiâ instructum, opus legis cor- *Rom. 2. 15.*
dibus inscriptum dicit. Quemadmodum enim in-

intellectus rerum naturalium ideis informatus divini intellectus quidam est ectypus, quatenus res concipit, quales Deus, omnis veri author & exemplar, eas esse voluit, haud dubie, aliam si rebus naturam & indolem esse voluisset, alium quoque intellectum, rerum indoli attemperatum, homini impertiturus. Sic intellectus τὸ κατὰ φύσιν, ejus quod decet, honesti, justi &c. notitiam habens ingeneratam, æternæ legis exemplum quoddam, & divinæ veritatis sanctitatisque ἀποσκότισμα est. Quo sensu Epicharmus dixit

Οὐδὲ γὰρ τὸ ἀνθρώπων λόγος πύρρ' ἀπὸ τοῦ Θεοῦ λόγος.

Et Dei à ratione ratio nascitur mortalium.

III. Unde egregia benè multa de virtutibus & vitiis apud Philosophos gentiles? plurima de æquitate legum condendarum, de Republ. prudenter constituenda feliciterque moderanda, de judiciis agendis, & id genus aliis apud JCos Rom. antiquitus prodita? Unde, quod societatem inituri, fœdera pacturi, munia adituri, testimonium dicturi &c. jurare soliti, nullum vinculum ad adstringendam fidem jurejurando arctius & sanctius arbitrati? Unde conscientia vis, quam nec pessimi tyranni, ut maximè vellent, intra se extinguere potuerunt? quod testantur illa, quæ Suetonius de Epistola Tiberii ad Senatum conscripta refert; Postremo, inquit, semet ipse peritæsus talis epistolæ principio tantum non summam malorum suorum professus est; Quid scribam vobis, P. C. aut quomodo scribam; aut quid omnino non scribam, hoc tempore? Dii me, Deæque pejus perdant, quam quotidie perire sentio, si scio. Quam recitatam addit Tacitus; Aded facinora atque flagitia sua ipsi quoque in supplicium verierant. Neque frustra præstantissimus sapientiæ firmare solitus est, si recludantur tyrannorum mentes, posse aspici læniatus & ictus: quando ut corpora verberibus, ita sævitia, libidine, malis

Tiber.
66. 67.

Annal.
6.

malis consultis, animus dilaceretur. Nimirum hoc opus est legis, scriptum in cordibus hominum, contestante ipsorum conscientia, & cogitationibus invicem accusantibus, vel etiam defendentibus. Hæc est illa divinæ disciplinæ efficacia, quâ peccatores velut injecto frænô intra rationis gyrum coercuit, sua ceteroqui sponte in omne scelus & mentem nihil pensi habentem illicò se projecturos. Unde Deum τὸ σοφὸν ὁρῶντες τὰ ἐν ἡμῖν, gentes quasi disciplinæ frænô adstringentem, divina celebrant oracula.

Rom. 2.
15.

Psalms.
94: 10.

3. Menti sua quasi penetralia excutienti succurrit idea sive notio Numinis, cum qua inviolabili nexu conjunctam reperit honesti atque decori notitiam, ubi vel mediocrem commeditandis tanti momenti rebus attentionem afferre velit. Quanquam & id fatear esse verissimum, tantam esse hominis peccatò corrupti ignaviam, ut nisi fide, vel S. Literarum traditione excitatus, ne quidem quæ luminis naturæ sunt, velut, *existere Deum, universi conditorem &c. Animam esse immortalem; honestum naturâ discrepare turpi &c.* quantum satis est percipiat, nec quæ illis veritatibus eruendis & defendendis argumenta suggerit inspectio sive mentis humanæ, sive mundi aspectabilis, utiliter animadvertat. Unde Apostolus, fide, inquit, *animadvertimus, aptata esse secula verbo Dei.* Et Theologia, tametsi quæstionem de *existentia Dei* Philosopho relinquat, Deo Israelis & Scriptura Sacra, Theologiæ principio unico, veram divinitatem asseruisse satis habens; nihilominus demonstrandæ veritati viam pandit: *quoniam quod Dei cognosci potest, manifestum est in iis, Deus enim ipsis manifestavit. Nam invisibilia ipseus &c.* Ubi Apostolum videmus Philosopho ducem atque auctorem, ut primum quidem ex *notionibus*, quibus mens est inscripta à Conditore suâ; deinde è *rebus Universi*, haud oscitanter inspectis, argumentetur. Quotquot igitur è nuperis feliciter de Deo, mente humana; ejusque à corpore distinctione &c. philosophati

Heb. 11:
3.

Rom. 1:
19. 20.

phati verum ex tætris longæ caliginis umbris eruerunt, hætenus rationis ductum secuti sunt, sed viam ingressi aliunde præmonstratam. Quod microscopiò atomos intuentibus usu venit: minimæ enim, quæ attentos oculos penè fugiebant, minuziæ hujus instrumenti beneficiò in justam aspectui molem excrescunt, ut videri jam in iis, alioqui nunquam videndæ, partes variæ, varii colores, anguli, sinus, tubera, faciliè queant: sed cùm ita microscopium adhibuerunt, cò paulisper sepositò, solis jam oculis notant atque designant, quæ nisi primum ope illius instrumenti vidissent, nunquam visuri fuerant. Idem Philosophis nostris usu venisse nullus dubito: verbum Dei erat ipsis tubus Opticus, quæ non nisi ope ejus videnda viderunt, etiam cò sepositò vident, abstrusasque antea *boni* malique notionis colligunt.

4. Cogitanti de Deo obversatur notio *Entis infinitè perfecti*, quam fingendi pro arbitratu, vel refingendi ac immutandi potestatem homini nullam esse, penitissimus conscientiæ sensus testatur.

5. Illam notionem si non oscitanter contempler, Deum mentem perfectissimam, infinitæ vitæ, pollentiæ, scientiæ, bonitatis &c. atque ideo necessariò existere, se solò beatum, sibi sufficientem: neque quicquam præter ipsum esse posse, nisi quod ipse esse velit; neque velle, nisi quod virtutes ejus testatas facere possit, intelligo.

6. Proinde res qualvis alias unà mecum non necessariò existere, sed à Deo non inevitabili naturæ ipsius necessitate, sed liberrimò voluntatis placitò productas originem suà habere deprehendo. Unde quæ gloria est omnia creavisse, creataque conservare, illi uni deberi agnosco, imperiumque in universa & singula absolutissimum illi uni assero.

7. Porro cùm alia creationis causâ, quàm *Efficiens*, quæ Deus est, inveniri nequeat, alium quoque *finem* rerum creatarum, ipsiusque adeò hominis,

nis, nisi Deum, haberi repugnat. Quis enim nisi qui naturâ summus, nullique rei obnoxius est, omnia ad se referat? Aut quò demùm creata quæque tenderent, nisi ad eum, cui quicquid suū habent, accepto ferunt? *Finem* verò puta non *indigentia*; quid enim hominis profit infinitè perfectio, beatissimo? Sed *assimilationis*, eo quidem sensu, ut quem homo habet authorem existentia, eundem habeat exemplar vitæ ejusque ad gloriam esse studeat.

8. Insuper ad istam summæ perfectionis ideam, velut regulam, examinans creata quæque, varios perfectionum limites atque defectus in illis detego: etsi rursus suò quæque locò opificis gloriam non obiter inspicienti ingerant. Undenam verò creatis multa deesse judicarem, nisi perfectius quid illis notione Numinis antecepta prænoscerem? Hinc ideò quæcunque menti circumspicienti præter Deum occurrunt, talia comperio, quæ appetitum, quem ad infinitum quid ferri persentisco, satiare non valeant.

9. Ut Deum infinitæ perfectionis suæ amore beatum; sic veritatis omnis, cujus ipse fons unicus est & exemplar, amore *sanctum* intelligo: quidni enim, quæ Deus de se vera intelligit, eadem etiam velit & amet, ita quidem, ut illum amorem veritatis nec verbis nec factis dissimulare aut abnegare, neque adeò se alium, atque est, præbere possit? Unde & veracitas in sermone, rectitudo in omni actione, & *diæione gloria justitia in judicio*, quod secundum veritatem est, conflurgunt.

Rom. 2:


2.

Ejai. 42:

3.

10. Quando denique meipsum talem à Deo factum comperio, qui omnia hæcce verissima intelligere, eorumque cognitione & amore perfici, veramque ad felicitatem proficere possim atque debeam: imò verò hominem præ cunctis inanimatis & brutis egregia rationis dote instructum video, ut esset, qui Deo creationis gloriam atque dominii jus

in



in omnia asserere, ejusque virtutes ex operibus, velut *invisibilium spectaculis*, undiquaque collucen-
tes recognoscere, prædicare, Deumque ut finem
suum atque Bonum quò par est studiò quærere,
quæsitoque frui posset; jam etiam qua conditione
me natum & huc extrusum voluerit Sapientissimus,
Potentissimus, Sanctissimus, Optimusque ille meî
Conditor, haud obscure nôvi.

11. Atque ex his cultus divini necessitas plus satis
apparet. Cùm enim Deus qui colatur omni modo
dignissimus; tùm verò homo talis cognoscitur, qui
opis divinæ continenter indigus, & felicitatis in
Deo consequendæ non exspes, ipsum colere possit
atque debeat, nisi suapte culpâ malus factus pecca-
to servire mallet.

12. Præterea cognitò; Deum esse finem atque bo-
num hominis, eundem quoque ordinis, qui finis at-
que boni consecutionem juvet, authorem quidnî
agnoscam? Inde honorem atque obsequium deberi
intelligo cùm iis, per quos Deo sic providente vi-
tam bonorumque usuram accepi; tùm illis, qui-
bus parentes mei inita societate civili potestatis suæ
partem, ut commodè & tranquillè viveremus singu-
li, tradidere.

13. Dehinc cùm Deus alios juxta me homines esse
voluerit, meî similes, ejusdem carnis & sanguinis
participes, quos eundem unâ mecum intendere fi-
nem, idem quærere bonum, ejusdem Creatoris ad
gloriam vivere oportet: meum esse intelligo, So-
cietatem cùm aliis colere religiosam & civilem, nec
non quæ illi conservandæ idonea sunt facere, quæ
verò turbant ac interrumpunt eandem, cautè vitare.
Quem in finem etiam datus est homini sermonis u-
sus, jungendæ colendæque societati adminiculum
necessarium: ut saltem quæ quisque habet commoda
vel incommoda cùm aliis communicet, gaudiò at-
que mœrore naturaliter testem requirentibus. Er-
gò me quoque eò obligari sentio, ut quò jure ipse-
met

met frui velim, alterum quemvis eodem gaudere patiar: quinimò quem mihi adiumento fore exoptem, vicissim eidem paria cupienti referam: ut quem finem intendere, quodque bonum quærere tenentur universi, imperturbata tranquillitate consequi, Deumque communem Dominum, inoffensa pietate glorificare queant singuli.

14. Hic non intempestivum fuerit inquirere, quas instruendæ morum disciplinæ regulas & obligationes, quibus quisque suæ respectu Deo debitor sit, ex propiore nostrî inspectione, intellectu faciem præferente, eruere possimus. Homo mente & corpore, arctissimo fœdere unitis, constat. *Mentem* quàm *animam* appellare malo. potiore nostrî partem, etsi Latinis paulò aliter id nominis usurpetur: ne fraudi sit ambiguitas vocabuli *anima*. Quicquid autem meæ *mentis* nôvi, *cogitatio* & *cogitandi modus* est. Haud abs re ergò eam definitio *substantiam cogitantem*, atque adeò omnium suarum actionum passionumque penitissimè consciam: ut quærentem, quid cogitare, quid velle; quid alia id genus oppidò multa sint, ferre non possim; quando fieri nequit, quin qui scio, & scire me, & quid istuc ipsum scire sit, quàm optimè sciam. Quidnî verò ad mentis meæ essentiam pertinere velim id, absque quo foret, ego de me ne quidem quæstiunculam, *quid rei sum?* formare quirem? Imò omnem hic intelligentiæ vim intendam; mentem quidvis potius, quàm cogitantem esse, tantisper ficturus. Atqui sanè ineptus sum: prius enim, ita velim nolim, eam cogitantem deprehendo, quàm quidlibet aliud esse finxero. Contendam, quantum valeo, ut cogitationem à mente divellam: quî verò id rursus nisi cogitando præstem? Fingam etiam, me ad cogitandi quietem vel lautissimis invitari largitionibus, vel sævissimis impelli minis. Atqui tantum abesse intelligo, ut quod imperatur effectum dare queam, ut quò magis hujusmodi oratio meum pertentat animum; hòc

eum ampliùs ad cogitandum everberet. Quamnam demùm pertinacis istius cogitandi constantiæ causam afferam veriozem, nisi quia sic est mentis ingenium, ut cogitandi non magis faciat finem, atque vivendi. *Qui animam vivere fatentur, illamque simul omni sensu spoliant, prorsus animam fingunt, quæ nihil animæ habeat, aut animam ipsam à seipsa avellunt, cum ejus natura, sine qua consistere ullò modò nequit, sit moveri, sentire, vigere, intelligere, atque (ut ait Tertull.) animæ animus sensus sit.*

*Calv. in
Psychop.
pag. 391.*

15. Atque hæc mentis me docent immortalitatem, ejus fides in re Ethica maximum habet momentum. Ut enim opinio de corruptibilitate mentis omnem Religionem evertit, mores corrumpit, ingenium vastat, & quæ merces est pudoris ædificiorum, animum alternante cupiditatum & conscientiæ angorum æstu divexat: ita fides immortalitatis inter fundamenta Religionis & Moralitatis connumeranda est, atque adeò per universam morum disciplinam usus præstat insignes. Eam verò mihi persuadent allata, quæ mentem à corpore plus totò cœlò differre evincunt: modò caveam, ne corpori quicquam præter extensionem, & quod eam infert; menti præter cogitationem, & quod ejus quid includit, inesse vel deberi putem. Inde demùm fieri intelligam, ut quando neutri cum altero communionis quicquam per naturam intercedit, corpori pessima eunti mens superstes vivat, nec teli ictum, nec veneni, morbive vim funestam, nec præcipitem fatiscientis ædificii ruinam &c. formidans; quibus quidem mentem interfici, absurdus videbitur attendenti, quàm sonum fuco superillitum extinguere. Quod si animum subeat suspicio, mentem, etsi fortunæ casibus & hominum injuriis, minimè obnoxiam; nihilominus intereuntis corporis ruinâ involvi; atque esse desinere, ea fortè conditam lege, ut nisi ad tempus non existeret: Succurrat illicò; Atqui nolle Conditorem, ut mens animali supervivat, nullò apparet indicio: velle

obj.

¶.

velle verò, comprobata conscientia, præsertim si Deum de opere suo testem audire velit in S. Scriptura. Homo quippe talem se factum (neque per decentiam bonitatemque Dei aliter condi potuisse) comperit, qui naturæ ductu bonum æternum durable appetat, quæratque desiderio invincibili pariter & cruciabili, quod frustrari alienum est à Conditoris Optimo, qui frustra queri velle, negat. Sanctitas quoque & Justitia Conditoris strictim postulant, ut se ostendat timendum, atque adeò talem, quem insuper habuisse malorum sit maximum, quod ipse, ceu gloriæ suæ Zelotes, qui nullò pacto peccatori similis videri, odiumque peccati dissimulare, nedum abnegare possit, velitve, æterni iudicii poenis retaliat. Unde Servator noster, cum animam occidere hominibus negatum dixisset, Deum potius timendum, monet, qui animam & corpus perdere potest in gehenna. Ubi in posteriori colo de industria posuisse videtur verbum perdere, cruciatus significationem habens, authoribus etiam profanis de tristissimo illo improborum supplicio usurparum, quod sentiunt, quoties omnibus arcanis evolutis, sua in quemque conscientia furialibus quasi facibus armatur.

Esai. 45.
19.

Matth.
10. 28.

16. Corpus circumfero organicum, vivum, fœdere tam arcto mihi junctum, ut non solum hospes ejus mihi videar, verum id ipsum, quasi alteram mei partem familiarissimè amplectar. Ejus beneficiò Mundi incola & velut in scena spectator (an & actor? inquiram, ubi erit opportunius) plurima video, audio &c. quæ tanta varietate, quam cogitatione complecti, verbisque consequi frustra coner, sensibus meis sese ingerunt. Quò autem pacto hocce in hospitium fuerim intromissus, si quæram, hæreo, non habens, quod dicam, nisi, nescio modum. Quæ mei inspectio mox me docuit, mentem, genere quippe toto à corpore diversam, nullo seminali traduce corporis è sinu productam, solum

solum *Patrem Spirituum* sui agnoscere Conditorum, abundè comprobant. Nullo etiam provisu meo, consiliò vel ope corpus hoc tam admirabili organorum apparatu & artificio, quod non jam ego anatomes imperitus, sed ne quidem peritissimus quisque satis assequi valeat, exstructum mihi quæ aptatum fuisse, locupletissima testis est conscientia, quam nulla mea stultitia refellere potest unquam. Quibus sim parentibus, Deo sic providente, natus, scio: pariter verò & illud mihi perspectum, hominem genitorem, etsi fortè occasionem corpori formando dedisse, corpus tamen ipsum finxisse, non magis dici posse, quàm qui agrum consevit, fruges, flores &c. progenerâsse perhibetur. Non igitur huc meò veni arbitriò, neque, num hîc hospitari luberet, interrogatus ab eo, qui me tantisper morari iussit: ignarum, nedum voluntarium, me Deus huc exegit, donec revocet, manere iussum. Atqui ut corpus quidem organicum non mea artis sit opus, fortè tamen, quòd animæ junctum vivit, id mei muneris habet, *animam enim* *Vulgus animare* dicit.

Id si verum est, quî sit, ut quâ vivat ratione, alescat, augetur &c. prorsus ignorem? quâ demùm necessitate foris motusque corporis, in quibus vita consistit animalis, cum cogitatione, quæ vita mentis est, cohæret? Cur invitus, quæ mea vernitas est, revocante Domino, hospitium hocce desero, haud dubiè, si mentis sit vitam largiri corpori, longiorem moram tracturus?

17. Verùm ego *Mens* non tantum corporis hospes sum, sed & corpus alterum velut *dimidium mei* amplector. Nimirum mens & corpus adstrictissimo eoque imperferutabili nexu, copulantur, ut non jam diversissima duo, sed *unum quiddam* videantur. Nexus iste, quantum ratione assequi datur, nihil aliud est, quàm actionum & passionum mentem inter & corpus perpetua quædam vicissitudo, qua corpore tenus factæ impressiones menti, & vi-

& vicissim placita mentis corpori, suò quæque modo communicentur. Verùm quò pacto talis inter mentem & corpus, substantias totò cœlò diversas, fieri possit reciprocatio, *Oedipo opus conjectore est, qui Sphynxi interpretis fuit.* Nil equidem perinde sentio, atque familiarissimam illam mentis cum corpore communionem, aut quod ego demirari satis nequeo, quò illi intelligendæ pertinaciùs intendo, hoc illa me fugit magis, evidentissimò impervestigabilis *Omniparentis potentiae* argumentò. Proinde & hic lubens fatebor, nihil consilii opifve meæ intervenisse, nihilque nisi culpam ad nexus istius solutionem conferre me posse. Quæ enim visi divinæ potentiæ conjungi non possunt, virtute creata se-jungi nequeunt. Rupta quidem corporis compage mens vinculis suis exsoluta migrat, id verò ut fiat, lex est conditoris. Quicquid præterea non tantum in meo corpore, sed etiam in universo corporum ambitu mutationis accidit quotidie, certis motuum legibus, quæ totidem divinæ voluntatis placita sunt, innexum est. Unde consequitur, neque mentem à corpore divelli, neque machinam corporis utut subtilissimo stamine contextam, & infinita prope clatterum vasorumque exilium varietate coagmentatam, destrui posse, nisi Deo volente; neque sine culpa mea tam brevem mihi incolatum fuisse futurum. Nisi enim peccatum infausto partu Mundo illatum, Deo justitiam suam asserente, omni quasi naturæ adversum nos ministraret arma, quidquid nunc rebus humanis inimicum experimur, suas nequicquam vires nostram in vitam tentaret: hinc enim illæ lachrymæ! hinc nos malæ fidei villici, è fundo, qui unus tantopere nobis ridet, ejicimur. Cur alioqui Deus operis, quod omnium miraculorum maximum haud immeritò dixit ille Veterum, destructione delectaretur?

18. Tandem inquitenti, quid illud sit, quò ad sensorium appellente. Objecta quæque sui sensum
sive

sive gratum sive molestum ingerant, non succurrit, nisi impressio vel motus, quem filamenta nervorum ad intimos cerebri recessus convehunt. Quid verò similitudinis motui materiæ minutissimæ, qualis, exempli causâ, in aëre, quò *sonus*; in exhalatione, quâ *odor*; in radio solari, quò *lumen* & *color* ad sensoria deferri creduntur, cum perceptione, quæ horum occasione in mente cooritur? Quid similitudinis motui, quò nervorum fibræ, vulnere inflicto, laxantur vel rumpuntur, cum gravi dolore, quò mens cōpte momentò afficitur? Quid similitudinis in cibo qui palato sapere vel gustum offendere dicitur, cum sensu voluptatis vel tædii? cibi quidem ore assumpti, dentibus comminuti, salivâque macerari particulis multiformibus & in motum concitatis linguæ atque palati nervos & spiritum animale inexplicabili varietate vibrari agitarique posse intelligo: quâ verò necessitate dicam ex ista nervorum concussione & spiritus animalis concitatione illicò in mente existere hanc illam, cogitationem, sensum, affectum? quid demùm in corpore ejusque motu qualicumque, quod mentem contingere, ullòve modò afficere queat? Et hîc hæreo, quod dicam non habens, nisi, sic placuit Conditori, mentem & corpus iis adunare legibus, ut hos, illos, in corpore motus continenter excipiant in mente cogitationes & sensus, quibus mens de bono vel malo, quod corpori prodesse vel nocere queat commonefacta etiam, quæ saluti sint toti homini maturè provideat. Unde concludo, absque voluntate Dei sit, nihil usquam rerum corporearum nobis commodo vel damno fore; imò nullam corporis carnificinam quamlibet exquisitam menti dolorem illaturam esse. Ut adeò mentis & corporis unio in homine invictum providentiæ divinæ circa hominis actiones & passionis sit argumentum.

19. E dictis plurima Virtutis præcepta colligere licet: quorum nonnulla enotasse juvabit.

1. Ani-

1. *Anima*, cum nostri sit pars, quæ pretium corpore majus habet, potissima cura esto. Studio igitur vera sapientia, quò unò mens quasi alescit, nihil prævertendum.

2. *Immortalis* cum sit anima, mortale ne sit quod optat.

3. *Præ omni custodiendo custodi cor tuum &c.* Prov. 4. 23. Tales cum simus facti, quibus nulla est cogitandi quies, cogitationem verò omnem necesse sit esse vel rectam vel pravam, bonam vel malam, plurimum nostrâ refert animum nobis firmò muniri præfidiò, ne suggestionum & affectuum fraudibus sit opportunus: circumspectè cavendum, ne infrænis prava machinandi libido mentem incessat, neve, quodei familiare, sine fine modoque eam vagari, nedum nihili rerum curis distringi, voluptates architectari, falso-bonorum præstigiis & umbris oblectari patiamur. Cogitet quia cogitandi nescit finem, optet, amet &c. sed solida, sed se digna, sed æternum duratura: agitet

————— Quod magis ad se
Pertinet & nescire malum est.

3. Deum in omnibus benefactorem amemus, & ubique judicem conscientiaque legislatorem, qui solus mentem punire & malo afficere possit, vereamur.

4. Rebus corporeis, unde commodi quicquam ad nos redit per sensum & affectum, non fruendum, sed utendum est, cum gratiarum actione in ordine ad Deum, & ad gloriam ejus, qui eas usui nostro subjecit. Crimen est inexcusabile, comedere panem & Deum non invocare. Psalm. 14. 4.

5. Persuasi, nihil nos nostrâ habere præter culpam, cur turbamus discrimen, quod inter nostra & aliena esse voluit Summus ille rerum Dominus & arbiter? Ne ergo velimus, ubi nihil valemus.

6. A Deo ejusque Providentia toti pendemus, animam, corpus, vitam annexa quasi precarii clausulâ, totum adeoque hoc; nos esse homines, ab ipso nacti:

nati : nos igitur deferemus , totos nos Deo mancipaturi.

7. Ex tribus istis, *huc, hinc, hinc*, longa satis obligationum quæ me tenent, series dependet. Si enim considerem, *huc* me venisse, *hinc* esse, *hinc* tandem abire, ergo 1. *Qualis qualis sit fortunæ vultus, cavebo ne unquam eò deveniam dementiæ atque impotentiae, ut me natum esse, eaque viâ in mundum venisse pœniteat. Non censebo igitur cum illis, qui cæteroquin populo, quod aliter atque ipse & splendidius infanciant, sapientes visi fuere; optimum esse, non nasci: proximum huic quamprimum ad mortem ire. Imò natum me esse optimum arbitrabor, quia id Optimus voluit. Ad mortem ire me serius, ocyus, non interest, tum optimum futurum, ubi Optimus ire me voluerit.* 2. *Meum est, cum me Deus evocat è vivis, non tergiversari: qui enim tardè fecit servus, diu noluit: sed præsto esse promptum ac alacrem: imò ne quidem conscientia rei hinc malè gestæ cunctabundum resistare: servus enim, quem delicti conscientia remoratur, bis delinquit.* 3. *Injussu summi Imperatoris de præsidio & statione vitæ non discedam. Abitum meum utpote totum divini juris, quidni totum Deo, vitæ necisque Domino, submittam?* 4. *Corpus meum cibò, potu, somnò, reficiam, famem, sitim, somnum, expectaturus; non luxu antecapiurus, & ubi occupârint, iis quæ providentia Dei in promptu esse voluerit, prostigaturus.* Quocirca & à manifestis vitæ periculis cavebo, remedia, ubi ubi opus, adhibiturus, opem aliorum imploraturus, si in aquam, in latrones, in morbum, in egestatem, & alia id genus vitæ discrimina incidero, ne stipem quidem rogare verecundia prohibebit. Quia enim Deus jubet vivere, donec evocet, ergo & edere: quod ubi per labores & studia non licet, ostiatim etiam, quod edam, corrogabo. Dura quidem hæc obligatio videbitur illis, qui se fronte tantum & hominum moribus metiuntur, non qui legem Dei seipsis potiorent

tiorem ducunt. 5. *Eam vitæ conditionem & institutum amplectar, & amplexus, quod officii mei esse intellexero, diligenter faciam, ut suppetat, unde victitem ad Conditoris mei gloriam: neque tamen si malè elegero, quasi conditionem vitæ & vitam ipsam promiscuas habeam, mordicus retinebo.* 6. *Multa faciam, plurima feram, ut vel institutum semel vitæ cursum perpetuò & æquabiliter servem, vel etiam mutem aliquando, & iter, ubi opus est, aliò desectam. Memor, me totum pendere à Deo, agam, non quò mihi studeam, sed quò Deo paream, non murmuraturus, si hoc, illud, petens, optatum non feram; hoc, illud, agens, exitu, quem præceperam animò, frustrer: distinguam enim, quod mei esse officii ab eo, quod suo arbitrio reservatum vult Deus, qui jussit petere, non jussit impetrare: agere jussit, exitum mihi non injunxit.* 7. *Multa me onerant: non verebor igitur animum subinde relaxare meum, ne perpetua contentione frangatur. Sed ne errem, cætio est: remitti volo, non ut quod turbat excutiam, & libertati, quam impensè nimis amo, consuam; sed ut mox intendi & muneri par esse queam, Deo ad gloriam suam me vivere volente.* 8. *Tandem cum vitæ summa brevis spem nos vetet inchoare longam, cur incertæ fugacisque vitæ oblitus agenda suscipiam, quæ homines mori nescios & corpora secus atque quidem nostra sunt; formata requirunt? Numquid robur lapidum est robur meum, num caro mihi ænea? Manebit alta mente repositum illud Servatoris; Quid juvat quemquam totum lucrifecisse mundum, animâ verò suâ multari? &c. quò pretiò satis idoneo redimet quod perdidit anima magna prodigus?*

20. *Sic fontem reclusimus honesti, justique decori, uberrimum, qui in omnem morum disciplinam longè latèque se diffundit. Ex principiis enim illis intellectualibus & regulis, quas Dei & nostri inspectio nos docet, virtus ejusque officia omnia demonstrari possunt, idque si sepositis præ-*

judi-

judiciis & affectu nobis verum dici patiamur, haud minus certò & perspicuè, quàm in Mathematicis ex definitionum, axiomatum, postulatorum & lemmatum apparatu Theorematum & Problematum demonstratio instrui solet.

21. Hinc adèò etiam liquet. 1. Esse aliquid simpliciter & absolute bonum, necessariò honestum, justum, decorum, quod non demùm lege quapiam arbitraria tale haberi jubeatur, sed suapte naturâ esse notificetur, ac proinde in singulis actionibus prosequendum sit. 2. Errore cæcatos esse, qui cum Carneade, Philosopho Academico, justitiam non naturalem, sed ex utilitate natam arbitrantur, secundum illud Horatii;

Serm. l. v.
Sat. 3.

*Atque ipsa utilitas justî propè mater & æqui,
Juraque sibi homines utilitate sanxisse varia pro moribus, & apud eosdem pro temporibus sæpè mutata. Enimverò ut nullus negem, societati ineundæ, juriq; civili, quod cuique genti patrium est, condendo occasionem ex utilitate præsumpta natam esse; quò facit, quòd ipse Naturæ Author nos singulos atque infirmos, multarumque rerum ad vitam rectè ducendam indigentes nasci voluit, ut hoc ipsò magis ad societatem colendam raperemur: altiùs tamen juris & æqui, societatisque humanæ originem esse arcessendam hætenus edissertata probant. Prorsus autem insaniunt, quorum animis Dei rerumque divinarum sensus usque adèò exolevit, ut nullo principatu in facultatibus humanis agnito, præsentî cuique passioni, quæ fortè fortuna imperium sibi arripuerit, obsequendum contendant, atque in hoc summam felicitatis humanæ versari statuunt. Turpissimum illi suum errorem, si quâ potè, etiam è dictis dedoceri possunt. 3. Etsi lux illa, è tenebris emicans, sola ad benè beatèque vivendum minimè sufficiat, & ingenitum Rationis acumen ad ea, quæ Spiritus Dei sunt, adèò non valeat, ut in S. Literis nihili fiat, & mera caligo habeatur:*

beatur : nihilominus liquet , etiamnum homini tantum superesse lucis , ut ignorantia , quæ ad vitæ honestatem pertinent , peccantique causandi locus non sit. Unde ignorantia *juris universalis* turpe factum excusari posse nemo non negat. Enimverò id nisi intra usum societatis forique humani admittatur verum , hominibus quàmlibet turpiter delinquentibus *invincibilis ignorantia* obtentui foret , unde Societatem utique mirum in modum turbari contingeret. Quid ? quòd malefactorum poenitudo , pudor , remorsus , libertatisque in agendo conscientia peccatori causam dicere prohibent , omnemque ignorantia prætextum faciliè præcidunt. Quapropter etiam Apostolus *manifestationem ejus quod Del Rom. 1: cognosci potest* , eò profecisse docet , ut Gentes essent *20.28: inexcusabiles* : & cum Dei , quem ignorare non poterant , cultum insuper haberent , veritatemque in injustitia detinerent , eam sœcordiæ poenam dedisse , ut in mentem nihil pensi habentem traderentur.

§. 4.

Primum igitur locum atque principatum inter facultates mentis humanæ meritò obtinet Intellectus , præses atque via dux judicio , sensui , imaginationi , affectibus , actionibusque humanis datus.

E x p l.

1. **I**ntellektui subjiciendum esse judicium de rebus quæ facultatis ejus modum non excedunt , nemo equidem cum ratione negaverit , quando & rectè & malè judicata nisi ex intellectu sustineri vel refelli nequeunt.

2. Intellectum luce sive sua , sive mutuativa prælucentem ducem atque rectorem damus sensuum atque animi motibus in studio sapientiæ & regimine vitæ , quemadmodum & Philosophi Intellectus au-

Matth.
6. 22.
23

thoritatem aliquam *ἡγεμονίαν* agnoscunt. Eò pertinet & illud Servatoris. *Lucerna corporis est oculus &c. Si lumen quod est in te tenebræ sunt, ipsæ tenebræ quanta?* Intellectus verum bonum cernens atque monstrans affectui, oculus est simplex, uni viæ, uni fini, uni bono &c. intentus: cujus ductum si sequantur motus & desideria animi, non capientur amore bonorum pereuntium: quo de Servator in præced. dixerat.

3. Id porrò ut fiat perneccessarium esse multa docent. Primum quidem sensus & phantasia multa offerunt, quæ mentem veri boni cognitione destitutam jucunditatis specie inescare, affectum trahere & animum usque adeò exaugere solent, ut iis frui & acquiescere velis, tamen si intellectus, qui solus affulgente divinæ veritatis luce veram boni rationem assequitur, longè diversum dicitur; Verum nempe Bonum quod satiet, nec sensu inveniri, nec imaginatione repræsentari, nec affectu animali possideri posse: cætera verò quæ sensus nuntiant, bona quidem esse animalis vitæ conservationi, haud secus ac sensus ipsi, destinata, sed habenda hæctenus ut testimonia longanimitatis Dei, rudimenta amoris & argumenta bonitatis ejus, quod unicè ceu *bonum nostrum* quærendum amandumque est. Deinde ex sensu judicare quàm proclive nobis sit, nemo non experitur, unde facilis error & illusio. Verum cum idea cujusque rei in intellectu sit regula imaginis rei in sensu & phantasia, errores & vitia sensuum deprehendere atque corrigere intellectus est. Unde verissimè Augustinus, tantò, inquit, meliora esse judico, quæ oculis cerno, quantò pro sui natura viciniora sunt iis, quæ animò intelligo. Sensus autem & phantasiæ errores in rebus ad solam naturæ theoriæ pertinentibus tolerari fortè possint: inexcusabiles verò sunt in rebus, quæ vitam & mores spectant, velut ubi de discrimine boni & mali agitur &c. quocasu mentem tantò vigilantiorē esse, vimque intelli-

De vera
Relig. 63.

telligendi hōc ipso cautiùs & acriùs intendi necesse est, quò faciliùs sensuum blandimenta insequentibus affectuum illecebris menti imponere, & quò difficiliùs propriorum affectuum fraudes animadverteri, & occultæ quas struunt, insidiæ præcaveri possunt. In eo intellectûs versari officium, vel inde constat, quòd ferè alienis in vitiis atque nãvis censendis oculatiores & consultiores sumus quàm in propriis, suo quemque affectu occæcante. *Ajunt, Sen. Ep. homines plus in alieno negotio videre, quàm in suo. Hoc illis evenit, quos amor sui excacat.* 169.

C A P. III.

De Voluntate, Judicio & Lib.
Arbitrio.

§. I.

Nunc alterum actionis moralis principium nobis est dicendum, nempe Voluntas, quæ est facultas vero percepto acquiescendi, & bonum agnitum prosequendi.

E X P L.

I. **Q**uia judicium evidentem rei cognitionem ita pressè insequi solet, ut nullam cohibendæ assensionis libertatem nobis superesse sentiamus, verum non jam modò apprehendere, sed etiam judicare ejusdem intellectûs negotium esse facilè nobis persuademus: quanquam, si quod reseat arbitrari velimus, distincta experiamur hæc tria; animo quid repræsentare per ideam, quod intelligere dicimus: ei intellecto acquiescere, deque eo statuere, affirmando vel negando, id quod judicium vocamus: in idem denique si conveniens videatur men-

tem quasi exporrigere, id eligere, & quantum pote nostrum facere, quod *Voluntatem* strictiore nominis significatu, vel *liberum arbitrium* appellamus.

2. *Voluntatem* igitur generatim acceptam in iudicatione veri, & electione atque prosecutione boni, occupatam existimamus. Primum ergo spectandum hinc venit *Judicium*.

§. 2.

Judicium vocamus illam mentis acquiescentiam in percepta rerum attributorumque ratione mutua, qua quid rei cujusque verum, quid falsum sit apud se statuit, ibi quidem affirmando, hinc negando.

E X P L.

1. **I**D namque conscientia sensu constat, mentem mutuis rerum rationibus perspectis ita ad quietem redire, ut intellectum in rem cognoscendam intendere desinat. Unde quoties rationum pondere victi veritati cedimus, nos demonstratis acquiescere profiteamur. Sunt qui *Judicium* definiunt; *naturalem mentis dexteritatem attendendi cohesionem rerum*. Atqui intellectus est, non tantum rem quamlibet seorsim, verum etiam rerum rationes percipere, quod tantò dexteriùs facit, quò plura circumspectionis & attentionis admipicula adhibuerit.

2. Ratio est habitudo rei ad rem &c. quæ vel æqualitatis est & convenientiæ; vel inæqualitatis & inconvenientiæ. Quod ibi est affirmatio, hinc est negatio. Unde patescit, quòd non nisi in iudicio falsitas & error locum inveniât: quando nim. mens præpropere acquiescens qualicunque rerum perceptioni, quod negatum oportuit, affirmat, & vicissim &c. Si falsitas intellectum teneret, inexplicabilis & inevitabilis foret error, quando homini nulla facultas intellectu superior, quæ eum corrigere valeret, con-

concessa est. Cautè verò hîc falsitatem ab ignorantia, insuperabili salutaria percipiendi ἀδυναμία, & aliis vitiis quæ plurima intellectum obsident naturâ, distingui oportet; qui malè intelligit, non intelligit, sed ignorat.

§. 3.

Judicium in Theoreticis Noëticum est vel Dianoëticum.

In practicis simplex vel comparatum: utrobique eadem fermè judicandi ratione, sed diverso fine.

Judicium Noëticum & simplex est, quando exploratâ rem inter & rem, vel attributum qualecunque, convenientiæ seu inconvenientiæ ratione, affirmo verum, nego falsum.

Judicium Dianoëticum & Comparatum non jam in simplici collatione rei cum re, sed rationis cum ratione versatur.

E X P L.

1. **H**Æc exemplis tantisper declaranda sunt. Judicium noëticum & simplex erit, quando perspecta Telluris ad figuram sphæricam, virtutis ad amorem ratione, tellurêm sphæricam affirmo, virtutem amandam decerno. Hîc adeò simplicem convenientiæ vel inconvenientiæ rationem attendo, qualis inter *Exponentes* proportionis Geometricæ intervenit.

2. Judicium Dianoëticum & Compar. erit exempli causâ, quum in Proportionem Geometr. rationem primi termini ad secundum, hujusque ad tertium, tertiivæ ad quartum: vel in triangulis analogis latus cum latere, basim cum basi: vel in syllogismo rationem majoris termin. ad medium, cum ratione minoris ad eundem conféro, unine tertio, ac consequenter inter se convenient, nec ne, indagaturus. Similiter in *practicis* Judicium comparatum

erit, quando rationem virtutis ad amorem contendens cum ratione divitiarum ad eundem, animadversa inæqualitatis ratione, virtutis amorem divitiarum studio præstare pronuntio. Quoties item comparata ratione actionis ad has, cum ratione ejusdem actionis ad alias circumstantias, hoc tempore, hoc loco &c. potius quàm aliò quòvis agendum decerno.

3. Quemadmodum verò in Theoreticis multiplex usu venit rationum compositio, unde in Mathesi *potestates quadratæ, cubicæ, biquadratæ* &c. sic in Practicis iudicium comparatum suos veluti gradus habet pro varietate casuum, quibus mox pauciorum, mox complurium circumstantiarum rationes expendendæ concurrunt. Unde in Scholis *ultimum & non-ultimum* distinguui, illudque *ultimum intellectûs practici dictamen* appellari, idemque au necessariò sequatur voluntas, quæri assolet.

4. Attentò denique, quò ad assentiendum per moveri solemus, argumentò, iudicium aliud est in *scientia*, aliud in *opinione*, aliud in *fide*. Iudicium in scientia nititur evidentiâ rei ex principiis & causis ejus cognitæ. De hac cautio Philosophis; *non assentiri nisi ita perceptis, ut assensum negare non possis, quin in animo exprobrantis conscientia remorsum sentias*. Cui regulæ non absimilis esto hæc in Ethicis; *nunquam pro bono vero & solido, in quo acquiescere velis, habeto, quod citra conscientia & cordis non avertit & ἀναγενναίης improperium, negligere possis*. Opinio est, quando rei verisimilitudine movemur ad assensum cum formidine contrarii. In rebus quidem ipsis nulla probabilitas est; quidlibet enim in se vel verum vel falsum est *αἰετός*, probabile verò dicitur respectu intellectûs nostri, qui rei naturam penetrare non valens, possibilitatem ejus pro modulo suo sibi format: unde tritum illud; *Indubio fortè respondent sæpè periti*. Fidei denique firmamen est affirmantis vel restantis spectata autoritas.

§. 4.

Cohibitio assensus vel acquiescentiæ cum motu disquisitionis est dubitatio.

E X P L.

1. **R**E, quam sciri nostrâ referat, nondum compertâ iudicium suspendimus, dum veritas penitiùs exploretur.

2. Duo hîc concurrunt, quorum neutrum sine altero dubitationem facit. Velut si duobus super facto quolibet contendentibus, uno affirmante, altero negante, ego utrumque audiens & intelligens inquirere omitto, uter verum dixerit, hætenus non dubito, etsi assensum neutri præbeam. Rursus dum sollicitè disquiro, quis v. g. cædis in Titio patræ sit author, nullò hucusque auditò testimoniò vel assertionem, cui accedere nolim, non dubito: adeoque nec motus disquisitionis se solo dubitantem facit. Secus erit, si disquiram, Mævius an Sempronius cædis author sit.

3. Eam porrò nobis esse libertatem, quâ nî rerum evidentia assensum evincat, iudicium suspendere possimus pro lubitu; nosque perperam vel præposterè iudicare, quoties quid affirmamus aut negamus nondum perspectum, sua quemque conscientia docet: idque adeo verum, ut si cui super eadem re verba facere velis, illicò te memorem monitutum audias: quanquam eâ libertatè qui utantur, ut oportet, rarissimi sint. Iudicare de re qualibet, nobis perquam proclive est, sive quòd ignorare videri turpe habetur; sive quia etiam ignota quæque, dummodò usu familiaria facta admirari desinamus, probe nobis comperta esse præsumimus. Enim verò & iudicium suspendere, si rem pensitare nolis, inutile fuerit; quia errorem cavere vulgò non tanti sit, atque de re

qualibet judicare. Rem verò, quâ quidem digna est, attentione disquirere opus est nimio plus laboriosum: saltem ea in re ponendum est tempus, quod perditum facile sibi persuadet homo, quem nec voluptatis, nec vanæ gloriæ, nec commodi ullius ex isto labore percipiendi spes traxerit.

4. Nos, si quò veritatis virtutisque studiò tene-
mur, identidem meminerimus, assensum super re
qualibet cohibendum esse, dum cautiùs & circum-
spectiùs exploremus eandem, quoad ejus fieri pote-
rit. Id quod cumprimis utile in moralibus, quan-
do quæ mores spectant plerumque cognitu diffici-
liora sunt cæteris, quæ sciri nostrâ minùs intersit;
quoniam sensus & affectus in commoda vitæ anima-
lis intenti principiis *honesti*, quibus imbuta mens est,
& ratiociniis caliginem offundunt, ac vix libertatem
judicandi de rebus haud paulò minùs ad nos per-
tinentibus, saltem longè tutiùs neglectui habendi,
relinquunt.

§. 5.

*Voluntatem electione & prosecutione boni occupatam Li-
berum vocamus Arbitrium.*

E X P L.

Sunt qui hæc distingui velint, *Libero arbitrio* in
deliberandis, atque adeò *mediis* ad finem ordi-
nandis: *Voluntati* verò in bono simpliciter spectato,
& proinde in fine prosequendo, locum esse arbitran-
tes. Hos minùs rectè rem putare, ex tractandis
fortè patefiet. Causa sic distinguendi inde nata vi-
detur, quòd non tam naturam voluntatis ipsius,
quam libertatem attenderunt. Hinc adeò de liberta-
te disputandi nec finem nec modum faciunt.

§. 6.

Librium Arbitrium est facultas naturalis volendi bonum præcunte perceptione prosecutionis cum circumstantiis.

E X P L.

1. **L**ibrium Arbitrium hîc loci in genere *Entis* ut facultatem, & principium actionis moralis, non attentò, benè an malè comparatum sit, consideramus; facultatem appellantes, ut ab actu; naturalem, ut ab habitu distinguamus.

2. *Velle* quid sit conscientia verius comperiri, quam verbis definiri potest. Voluntati verò proprium est *velle bonum*. Menti enim perpetuam & invincibilem in bonum propensionem inievit Creator Optimus, testimonio certò, eam primitus ad *bonum suum* unum & verum, quod nisi Creator esse non potest, appetendum & quærendum factam fuisse. Unde bonum quâ tale nolle, & malum quâ tale velle non potest. Malum igitur quoties vult, specie boni deluditur. Nec opus est addi, *Lib. Arb.* etiam esse facult. *aversandi malum*: cum *nolle malum* sit *velle malum abesse*, quod ipsum boni rationem habet, verbò *nolle* vel *aversari* non actûs sed objecti negationem significante.

3. Ut velis necesse est percepisse rem ejusque prosecutionem cum circumstantiis. Sic demùm libera voluntatis actio differt cum ab *instinctu* brutarum animantium, tum ab affectu hominum insensatorum. Perceptio qualiscunque rerum etiam in sensu est: verùm perceptio prosecutionis cum circumstantiis solius intellectus negotium est.

4. Hinc adeò *Lib. Arbitrium* sive voluntatem strictiori sensu dictam, & ultimum Intellectus practici dictamen unum idemque esse putamus. Quid, quæ-

quæso, interest inter velle ambulare, & ultimò judicio practicò statuere, ambulationem hic & nunc esse suscipiendam, non differendam, nec omittendam? Anne fieri potest, ut hic & nunc ambulandum esse statuam, ambulare tamen nolim? Occasio distinguendi inde nata videtur, quòd ministeriò organorum corporis agere quid paranti opus est conatu aliquo in corpore ad motum componendo & excitando: hinc adeò voluntatis aliquod imperium præter ult. Intell. pract. dictamen intervenire putamus, eò quidem, ut voluntas judicium illud secuta, motum corpori exequendum imperet. Verùm si quæ mentis sunt, ab iis quæ in corpore fiunt, hòc similibusque casibus cautè attendere, & ut par est, discernere lubeat, patefcet utique non necesse esse in mente quid fingi præter illius judicii practici continuationem. Quòd si ultimum Intellectus pract. dictamen imperare potest voluntati, quidni & inferiori facultati? An, quia Imperator Chiliarchis præest, militi gregario mandata dare non potest?

§. 7.

Voluntatis consideranda sunt, cum Libertas, tum Imperium. Libertas est non Ethica, sed Physica; non Indifferentiæ, sed spontis & lubentiæ.

E X P L.

I. **L**iberum vario dicitur significatu, quem brevitas studiò evolvere omitto. Satis esto observâsse, quòd *Liber* aliquando oppositus *servo*, significet cum, qui Dominum atque superiorem non habens, quominus agat vel omittat pro lubitu, lege nulla præpeditur: quæ *libertas Ethica* dicitur. Sic homo nunquam liber est, imò verò cum maxime liber est, servus est justitiæ. Rursus *liber* appellatur, qui suæ spontis est, nec instinctu naturæ im-

impulsus, nedum coactus agens. Quo sensu voluntas semper libera est, cogi nescia. Velle igitur & sponte, lubenter, liberè, citra coactionem agere, idem significant.

2. Libertati proinde voluntatis non repugnant

1. Necessitas dependentiæ hominis à Deo, non solum quod *ad jus*, legem puta homini dictam, verum etiam quod *ad factum*, gubernationem scil. & providentiæ divinæ virtutem attinet: Apostolus, ceu naturâ notum asserit, *nos in Deo vivere, moveri & esse*. Act. 17: 28. Veritas hæc liquidissima est, dummodò altercandi, & quæ finitæ mentis captum excedunt conciliandi, pruritus absit. Interim Scholæ Sophismata objicienti reponere placet modestiam Philip. Melanchthonis, qui se ex Præceptore suo, Francisco Stadiano, audivisse dicit; *Contingentiam scio: Deum omnia gubernare scio. Quomodo ista inter se concilientur, non prorsus ita scio, ut omnibus difficultatibus possim satisfacere*. Numnam eò vergit ingenii humani pruritus, ut tandem Deum nobis comprehensibilem, & sublatâ ejus ineffabilitate minùs adorabilem existimemus? Vah proterviam! 2. Dependentiâ à perceptione mentis, iudicio simplici, gratiæ Divinæ efficacia &c. Sic Titus *ἀνδραγέρως propria voluntate* iter ad Corinthios suscepit, 2. Cor. 8: 16. 17. nihilominus id studii cordi ejus à Deo inditum fuisse testatur Apostolus. Imò verò, quò clariùs menti affulget veritatis lux, quò voluntas est fortior & expeditior, quò habitus certior, quò mens gratiæ cœlestis auxilio instructa sanior est, hòc liberior es. *Sanitas enim vera libertas est*, inquit Augustinus. 3. Nativa pravitas & servitus peccati. Voluntas enim peccati compedibus devincta nihilominus libenter, atque adeò liberè peccat.

3. In indifferentia, quâ positis omnibus ad agendum requisitis possis agere vel non agere, hoc vel illud agere; libertatem voluntatis naturalem esse sitam per-

negat-

Cartes.
med. IV.

negamus. Qui secùs sentiunt, pejùs fortasse nequeant; hominem quippe, dum fingunt ἀνίστασθαι, facientes sacrilegum. Taceo quæ plurima vulgò adversus hujus Idoli Sacerdotes argumenta allegari solent. Verissimum est illud maximi Communio-
nis Romanæ Philosophi; Neque enim opus est, me in utramque partem ferri posse, ut sim liber, sed contrà, quò magis in unam propendeo, sive quia rationem veri & boni in ea evidenter intelligo, sive quia Deus intima cogitationis meæ ita disponit, tantò liberius eam eligo. Nec sanè divina gratia, nec naturalis cognitio unquam imminuunt libertatem, sed potiùs augent & corroborant. Indifferentia autem illa, quam experior, cùm nulla me ratio in unam partem magis, quàm in alteram impellit, est infimus gradus libertatis, & nullam in ea perfectionem, sed tantummodo in cognitione defectum, sive negationem quandam (etiam divinæ gratiæ sanctificantis) testatur.

§. 3.

Imperium Voluntatis dicimus illam ejus potestatem, quæ mentis facultates quasdam in usum suum intendere, & motus animales corporis, cui mens est junctæ, pro lubitu determinare potest.

E X P L.

1. **V**oluntati quandam esse potestatem Usùs in Intellectum, Phantasiam, memoriam, maximè verò in motum membrorum corporis, experimur, quoties ita volupe est. Volentes namque intellectu & imaginandi facultate utimur, rem quamque circumspectiùs pensitaturi: volentes in memoriam revocamus audita, visa &c. quorum vestigia ætas nondum oblitteravit: intendimus oculos, arri-
gimus aures, movemus hæc, illa, membra, quia nobis ita visum est.

2. Quò

2. Quô pactô, quæ dixi, ad Voluntatis nutum tam mira dexteritate procedant, id equidem mihi tam obscurum est, quàm quod obscurissimum: quia leges fœderis, quô mens & corpus arctissimè sociata vivunt, perspectas non habeo. Imperium igitur illud sola Conditoris Sapientissimi, Potentissimi & Optimi voluntate stabilitum, certisque legibus sancitum est, voluntate humana & hîc ex se nihil valente. Quærant, quibuscumque rebus suis est otii; *An mens intelligens ideas congenitas è suo quasi penore depromat? An facultatem eas procreandi acceperit? An Deus, in quo vivimus &c. intellectu- rienti immittat? An ne denique participando Rationem Universalem, æternam, indemutabilem, modò nobis incognitò, mens intelligat? Ideam hujus illiusve rei in mente mea suscitari, quoties ad meipsum reversus eam, qua debeo imperturbata attentione requiro, utique experior. Ast quomodo voluntati & attentioni meæ cum ista idea per naturam conveniat, quove nexu cohæreant, prorsus non video. Nihil igitur hîc meæ dexteritati arrogabo, sed quod Ratio & ipse pietatis sensus agnosci jubet, certum affirmabo; Deum Spirituum omnis carnis, qui format spiritum hominis intra ipsum; Patrem illum luminum, lucis intelligentiæ fontem esse perennem & unicum. Aut quis ponit in præcordiis sapientiam? quis dat menti intelligentiam? An erudiens gentes, an, inquam, non arguet, qui addocet homines scientiam? Nonne afflatus Omnipotentis efficit eos intelligentes? Rectissimè igitur Augustinus; dic, inquit, quia tu tibi lumen non es. Et alibi; Humanis mentibus nulla interposita natura præsidet. Et Lactantius; Lumen mentis humane Deus est.*

3. Idem mihi de potestate voluntatis meæ asserendum video, si quid in membris corporis mei ad motum ciendis & applicandis valeat, paulò penitius inspicere velim. Corpus mihi junctum, quod inde mecum voco, variè quidem pro arbitrato meo

Nam. 16: 22. Zach. 12: 1. Jac. 1: 17. Job. 38: 36. Psalm. 94: 10. Job. 32: 8. Serm. 8. de verb. Dom. & de ver. relig. c. 55. Ad Do- nat. de ira Dei.

movetur, membra volenti hætenus ad nutum obsequuntur: lingua titubat, cum fari: brachia jactantur; cum natate; pedes projiciuntur; cum ire volo. Id verò quomodo fiat, perinde nescio, quàm quod maximè. Quà igitur fronte dicam, id me facere, quod quò pactò fiat nescio? Memini equidem, me olim in auditorio Physico audire, motum è cerebro per nervos ope Spiritus animalis in artus influentis per membra in usum corporis variè dispensari, idque rationibus physicis & experimentis anatomicis aliquatenus mihi assecutus videor: nihilominus sentio, me ista qualicunque cognitione in motu membrorum meorum minimè juvari: quinimò eam, si in usum vertere velim, obfuturam, quia æquè expeditè, aut fortè expeditiùs jam olim membra movi mea, cum quâ ratione moverentur, torò me cælò fugeret. Adhæc cur corpore laboribus fracto, membris paralyfi correptis &c. nullus cietur motus, utut velim & tantundem ac cum integer eram, ex parte mea contribuam? Nonne id mihi argumento est, quòd ego non faciam motum, necrùm quidem, cum etiam ad arbitrium meum membra moventur? Adde, quòd quæcunque demùm mentis humanæ sit perspicacia, necessitatis quâ motus membrorum consequitur voluntatem, ratio alia, quàm Voluntas Conditoris potentissimi, nequeat deprehendi. Hic proinde tantum velle possum, neque tamen sine Deo: & cum volo, Deus morum illum hætenus impartitur, quem volo: non quia ego velim, sed quia ipse me volente motum illum cieri vult. Quemadmodum si pusio cunas, quibus est conditus, agitari velit, sæpè agitantur ipso volente, non tamen quia vult, sed quia mater vel nutrix assidens eas impellit.

4. Quòd si meæ partes hinc nullæ sint, multò minùs meo Marte quid extra me efficere, vel motum aliis impertiri valeo: quod etiam inde arguitur; quia etsi ad imperium voluntatis me subinde manus sic

sic moveatur, ut eâdem operâ moveantur lapides aliquid digitorum uncis implexi, unde tandem certa strues, quam domum voco vel turrim, existit; tamen non perinde ad imperium voluntatis meæ aut sidera sursum deorsum, ultro citroque commebunt, aut nubes cogentur, quæ fata perpluant, aut dispellentur, ne officiant apricanti &c. Deus ergo est, qui actionem meam extra me dimanantem animat, alioqui frustrâ futuram; & actioni meæ terminos posuit, ultra quos eam proferre non constituit.

5. Rei nuper visæ, auditæ &c. memoriam recollere, eam ve animo præsentem sistere imaginando non magis meæ virtutis est, quàm ipsum *videre, audire, &c.* Ego nimirum Mundi spectator (actorem enim mihi nullâ satis idoneâ causâ me videri mox deprehendi) plurimâ video in hocce operum Dei theatro instructissimo: quî verò sit, ut videam? primum mihi est respondere, quia oculos habeo. Quid verò id est, *oculos habere*? An pelliculas, membranulas, tunicas, certis liquoribus distentas, fibrarum & nervulorum plexibus, velut reticulato opere contextas, & artificiô nulla unquam arte satis indagandô conformatas? Atqui sanè nec liquores illi, nec tunicæ illæ &c. vident, ego tamen longè diversus ab illis video, neque quid opis ad videndum conferant intelligo. Fingam enim ad oculos rei objectæ speciem appellere, (quanquam, si, quod res est arbitrari velim, longè veriùs materiæ cujusdam minutissimæ impulsus dixerim:) eamque speciem per tunicas illas oculi, atque liquores, & filamenta nervorum ad intimos cerebri recessus, in aliqua ejus parte imprimendam, deferri. Atqui hoc nihildum ad videndum facit: quia nec speculô imaginem reperi, nec ceræ signum imprimi, *videre* est: Sed adstantem oculos intendere speculo, imaginemque illam & signum illud sensu percipere, id demùm *videre* est. Videtis etiam quæ
cap.

cap. 11. §. 18. dicta. Aliis igitur oculis opus est mihi, speciem ab oculis hisce reflexam, aut cerebro impressam, visuro; de quibus idem quærendi locus usque & usque erit. Oculi proinde, quod ad videndum conferunt, non à se, nec à me, sed aliunde habent: unde verò nisi à Deo? Quod autem de visu, idem de auditu, odoratu &c. imò & imaginatione, quæ nisi sensu percepta non attingit, verissimum prædicari, patet attendenti.

6. Hisce vestigiis Deum cum ubique, tum maxime in memet ipso præsentem, potentem, operantem, vel palpando inveniam, Act. 17: 27. Stupendum planè Providentiæ divinæ miraculum est homo. *Ejusdem prorsus momenti est, idem in re ipsa miraculum: ex imperio voluntatis meæ linguam in ore meo tremere, cum terram dico, & ex eodem imperio terram ipsam tremere. Interest tantum, quòd illud ad tempus aliquod fieri Deo placuerit; non item hoc. Sic meipsum humiliare, à Deo pendere, & quæ mea, quæ aliena Deus esse voluit, prudenter discernere discam.*

C A P. I V.

De causis actionum moralium præparantibus, & impellentibus, atque fine.

§. I.

Haëtenus de principiis sive causis actionum moral. quæ sunt intra hominem: sequuntur considerandæ causæ, quæ sunt extra hominem, vires tamen suas in intima ejus explicant.

Earum aliæ sunt præparantes; aliæ Impellentes.

Præ-

*Præparantium causarum alia est primaria : alia
Secundaria.*

Illæ in actionibus bonis est efficacia gratiæ illuminantis, dirigentis, refrænantis, sanctificantis.

Hæc est educatio, institutio, disciplina, & exemplum.

Impellentes causæ sunt, suasio, dissuasio: hortatio, dehortatio: præceptum, interdictum: promissio, comminatio: laus, vituperium: præmium, pœna.

E X P L.

1. **C**ausam præparantem primariam dico gratiam Dei: absque qua sit, homo suapte naturâ ad omne bonum ineptus, & ad quidvis mali proclivis, ne quidem ut par est, in causâ morum, vera de falsis, bona de malis discernere, nedum quod verè bonum est, sincero & constante amore amplecti potest, attestante & Scripturâ S. & omnium ætatum memoriâ.

2. Gratia vel communis est & coercens; quam Deus promiscuè quibusvis; vel specialis & sanctificans, quam solis electis impertitur. Quod Gentilium alios quidem pudor; alios legum reverentia; alios honestatis laus, ambitio; alios aliud vitæ institutum prohibuit, quominus quidvis, ut hominis animalis fert indoles; certò humanæ societatis exitiò, auderent, gratiæ coercentis & refrænantis beneficium fuit, quò ipsò factum, ut alius esset Camillus, alius Catilina. Quæcunque igitur moratiorum Gentilium prædicentur virtutes, nemo è probitate naturæ profectas dixerit, nisi quæ Spiritus *καρδιογράφος* de universali, eaque insuperabili indolis humanæ pravitate passim in Scriptura S. præsertim Rom. 3: 10. 18. prodidit, in dubium revocare sustineat.

3. Causas præparantes secundarias dicimus Educationem, Institutionem &c. Intelligentes per Edu-

D

cationem

cationem non solum alimentorum vitæ sustentandæ necessariorum suppeditationem , sed & maximè , quæ eam comitari solet , animi & actionum puerilium familiarem & domesticam directionem. *Institutio & disciplina* est accuratior illa informatio , quâ pueritiâ & adolescentia à Præceptoribus , bonis , commodisque moribus imbui solet. *Exempla* sunt facta moralia in sensus incurrentia , quæ vel imitamur vel fugimus : quorum utramque in partem , ad mores sive emendandos , sive corrumpendos , magnam esse vim , plus satis constat.

4. Quæ causæ præpar. secundariæ nobis dicuntur , ad rectam morum informationem tûm demùm profunt , ubi Deus illas veluti adminicula , gratiæ suæ subservire jussit , secus per indolis humanæ indomitam malignitatem non profuturas.

5. Quæ de *causis Impellentibus* brevissimè monuimus , difficultatem non habent. Id modò tenendum ; Gratiæ divinæ necessitate nec libertatem Voluntatis minui ; nec *suasionis* , *hortationis* &c. usum tolli. *Illæ enim verè liberos* , quippe quàm maximè volentes efficit : *Hæc verò sunt adminicula moralia Naturæ rationali* , quæ sic duci amat , attemperata. Adde , quòd , cum Virtus sit officium obedientiæ , *suasio* , *hortatio* &c. cui , qua in re , quâ ratione , quo fine &c. obediendum sit , ostendunt.

§. 2.

Finis moraliter agentis est Boni alicujus , veri vel apparentis , consecutio : est finis operis alius esse possit. Hinc adeò finem propriæ , mediæ non nisi propter finem amamus.

E X P L.

1. **F**inis moraliter agentis in genere spectatus est Boni alicujus consecutio , puta , nisi actio pro-

prorsus fuerit temeraria. Boni autem consecutione complectimur & mali declinationem, quæ boni rationem habet. Finis enim ad agendum non movet nisi ratione boni, quod sæpè sæpius veri specie agentis affectui sese commendat, reapse & in se malum. Actionis interim ipsius finis à fine agentis longè diversus esse potest.

2. *Finem* absolute & propriè; *media* non nisi propter illum amamus: imò casus fert, ut *media* per se suoque nomine non nunquam oderimus. Qui studiis vacat, ut doctus evadat, non tam studiorum & lucubrationum, quàm eruditionis amator est. Quod si eruditionem consecetur, ut Publico prosit, Reipublicæ veriùs, quàm eruditionis, amator perhiberi merebitur. Rursus, si & prodesse cupiat Reip. ut honorem & dignitatem, aut opes, aut amicos sibi conciliet, harum potiùs rerum, quàm commodi publici, amator erit. Adeò ut finis & speciem & nomen det actibus nostris. Æger, sanitatem utique amans, pharmacum sæpiusculè odit: eò nihilominus utitur, sanitatis, quæ una in votis est, cupidissimus.

§. 3.

Distinguitur Finis Operis & Operantis.

Ille est, ad quem res quæque suâ naturâ conducit.

Hic est, propter quem quis operatur.

E X P L.

1. **E**xemplis præceptum hoc tantisper illustremus. Studiorum finis est Eruditio, ad quam comparandam suâ naturâ valent: hic finis est Operis: qui & Operantis esse potest. Sed & longè diversum esse contigit non rarer, ut vel jam dicta arguunt. Virtuti finis operis est felicitas, quam suapte naturâ conciliat: idem tamen non est finis O-

perantis, in quo sistat *Vir bonus*, quippe non propter felicitatem, sed propter obligationem operans, alioqui seipsum veriùs, quàm virtutem quæsiturus. Cæterùm, an liceat bene agere intuitu mercedis, videlicet in prolegomenis nostris ad Catechesin Palatinam.

2. In hoc genere præcellere videtur *finis Operis*, quippe per naturam, vel ut veriùs dicam, à Deo constitutus, qui alius quàm ipse Deus esse nequit, propter quem est atque fit, quicquid rerum bonarum est: neque frustrationi hîc locus est ullus. *Finem Operantis* quisque sibi constituit, quò etiam haud rarò frustratur.

§. 4.

Finis porro est *Cujus* vel *Cui*.

Finis Cujus dicitur, ad quem assequendum adhibentur media. *Finis Cui*, in ejus gratiam adhibentur media.

Finis Cui vel *Beneficentia* est, vel *Obedientia*.

Ille, cum agendo id intendimus, ut alicui bene sit.

Hic, ut præstemus, quod quis jubet, moti jussis ejus, sine benefaciendi proposito.

E X P L O

1. **C**olendarum artium *finis Cujus* est *Eruditio*; *Finis Cui*, est *Cultor* ipse. Hæc distinctio cum in fine Operis, tum Operantis locum invenit: Exemplo sit illud Horatii,

Serm. 1.

Filius aut etiam libertus ut ebibat hæres,

2. Sat. 3.

Dîs inimice senex custodis, ne tibi desit.

Senex avarus opes undique cottadens & recondens, ipse sibi *finis Cui Operantis* est: sed *finis Cui Operis*, sunt hæredes, quibus sordida senis avaritia prodest.

2. In-

2. Inter hos fines antecellit *finis Cui*, quoniam *finis Cujus* non nisi propter *finem Cui* expeti solet; quò obtentò voluntas ulterius non tendit, sed velut in motionis suæ terminò sistit.

3. Inter Naturæ humanæ Vitia est, quòd vulgò homines se ipsos *finem Cui-Operantis* constituunt; cuncta ad se referentes, suique gratiâ quidlibet facientes. Atque hîc philautia facillimè imponit parùm cautè seipsos observantibus: ut quando non nisi aliud hominem *finem Cui* habere sibi videntur; reipsa tamen veriùs suâ, quàm alterius gratiâ egisse deprehendantur. Ex. gr. adivit quis periculum, liberaturus fortè pereuntem: quid proclivius, quàm videri hoc casu nullam suâ habuisse rationem, qui præsentissimum periculum pereuntis gratiâ subivit? Excutiat animum, numquid fortè, ut gloriam, existimationem, lucrum, & quid non, consequeretur, vel affectui cuicunque satisfaceret, se tam strenuum præbuerit? fucus apparebit. Rarissimum est, ut nos veritatis amor, Deumque glorificandi studium, stimulet, eaque sola sit actionis nostræ causa. Sic, quæ Parentes propter liberos; quæ homines alii inter se devinctissimi propter necessarios, agere videri volunt, ut plurimum studiò suâ & propter se agunt: quandoquidem propter se agere & satis velle facere suis passionibus, reipsa unum idemque sunt.

4. Ex adverso Vir bonus *finem Cui* suarum actionum habet unam Veritatem sive legem & gloriam Dei. Proprietas Dei est, ex infinita ejus perfectione fluens, esse *finem operis* & *Cui* omnium rerum creatarum: Veritas etiam æterna est, non alium *finem Cui-Operantis* habendum esse homini Cujus veritatis amore Vir bonus unicè delectatur.

5. Si *finem beneficentiæ & obedientiæ* ex moribus hominum spectemus, hic quidem non periunde propriè, ac ille, *finis Cui* videbitur. Cui enim benefacimus, propriè in gratiam ejus agimus. Contrà

sæpè sit, ut qui cui obedit jubenti, non tam jubentem diligat, quàm eum, in cuius gratiam & favorem iussa ejus exequitur. Sic servo *finis obedientiæ* est Herus; numquid verò propriè est *finis Cui*? Atqui ea est verpilitas servi, ut iussa heri capeffat propter se, nimirum, ut sibi benè sit, saltem ne vapulet. Sic Cives amore suū parent Magistratui, imperata facientes spe commodi, metuque pœnæ. Hominibus actum, quàm animum magis, & obligationem potiùs, quàm intentionem, quærentibus, servitus ista externa satis esse solet. Idem verò ad causam Dei ejusque legem transferre ineptum pariter & impium est: Deo, vero quippe & uno Domino, & actum & animum requirente.

6. Quòd si substantiam istorum finium consideremus, longè nobilior est finis obedientiæ, quàm beneficentiæ: quia finis beneficentiæ illum, in quem beneficium conferre velis, re aliqua indigere & re ipso hoc in casu inferiorem arguit: hinc adeò Patroni, quàm clientis; benefactoris, quàm beneficii accipientis persona potior habetur, & superiores atque potentes operam sibi nostram etiam summa humanitate addici vulgò ægrè ferunt, nolentes, ullo nomine nobis inferiores atque adeò tales videri, qui re vel ope nostra juvari queant.

7. Præpostera igitur est pietas Deo ipsi gratificari ac benefacere volentium. *Numquid, Deo utilis est homo?* *numquid voluptas est Omnipotenti, quum justus fueris?* *Et an lucrum, ubi integras esse feceris vias tuas?* *Vos, inquit Servator, amici mei estis, si faciatis, quæ præcipio vobis.* Summus amor, quò Christum complectaris, in eo versatur totus, ut facias quod ille jubet. Deus igitur finis non beneficentiæ sed obedientiæ est, intelligendo finem Operantis. Agendum igitur hoc, omittendum est illud, eò solum, ut Deo obedias.

§. 5.

Finis denique vel ultimus est, vel ultimo subordinatus.

Ille in alium finem non ordinatus, voluntatis motionem in se sistit.

Hic ad ulteriorem finem assequendum suo loco & ordine dirigitur.

E X P L.

1. **A** Nimum doctrinâ excolenti, ut existimationem sibi compareret apud alios, finis ultimus est honos: subordinatus est doctrina, quâ laudem venatur.

2. In hoc genere citra controversiam finis ultimus est præstantior, cum finis subordinatus *medium* veriùs quàm *finis* dici debeat. Unde consequitur, nos finem subordinatum non absolute & propter se velle atque amare, voluntate in eo non acquiescente, sed in ulteriorem finem tendente.

3. Finis ultimus est subordinatus etiam in fine Operis & Operantis, itemque in fine Cujus & Cui, locum inveniunt. Vir bonus, exempli causâ, sibi ipsi potest esse finis Cui, sed subordinatus: quid enim verat, Virum bonum sibi parare, quæ corpori commoda, & animo suavia sint, modò hæc ad ulteriorem, & tandem ad ultimum illum finem obedientiæ, Deum, puta, ejusque legem, referat.

4. Deus, sive gloria Dei, finis absolute summus est, idque modò præstantissimo; quod vel è dictis colligere licet: quia ipse est *finis Operis*, qui *sine Operantis* præstantior: ipse est *finis Cui*, qui *sine Cujus* finis *Obedientiæ*, qui *sine beneficentiæ* excellentior. Porro cum Deus sit summè perfectus & independens, ex quo solo, quicquid rerum est atque sit, originem suâ ducit, aliorum, quàm ad Deum

Rom. 11:
36.

ejusque gloriam quicquam esse vel fieri, repugnat. *Ex ipso. & per ipsum, & ad ipsum sunt omnia. Ipsi gloria in secula.* Hunc etiam finem Operantis ultimum intendere convenit agenti: idque ea ratione, ut quocunque demum media fini supremo consequendo destinata fuerint, nihilominus quovis mediò seorsim urienti semper, quod ultimum est in executione, primum sit in intentione atque adeò finis ultimus irretitò quasi oculò, pariter vigescente desiderio, spectetur. Hòc autem studiò nihil est rarius, philautia hominem usque adeò excecante & infatuante, ut finis ultimi, qui gloria Dei est, securus semetipsum ubique quærat, nec tamen usquam inveniat.

§. 6.

Actiones morales non solo fine distinguuntur, quasi illicò bonæ censeantur, quæ bono fine suscipiuntur: quemadmodum ex adverso malæ sunt, quæ malo fine fiunt.

E X P L.

Phil. 1:
15, 18.

1. **D** Ubium non est, quin mala sit actio, malo fine suscepta: qualis erat illorum, qui ex contentione Christum annunciabant, non castè, putantes, se afflictionem addere vinculis Pauli: nimirum, ut increascens numerus, non Christianorum, sed Pauli osorum, singulos ad insectandum Apostolum audentiores redderet. Ea re tamen lætabatur Paulus, quòd boni quid inde rediret, cognitione Christi ad plures propagata, tametsi animus præconum omnibus non innotesceret, neque adeò magnoperè fraudi vel damno esse posset.

Rom. 3:
8.

2. Finis interim bonus se solò actionem nequit reddere bonam. Quis ceu bonum factum probaret, furtim abstulisse opulentioribus, quod posthac erogeretur in pauperes? *Neque enim facienda sunt mala,*

ut

ut eveniant bona : estque verissimum tritum illud in scholis ; Bonum est ex integra causa ; malum ex quolibet defectu. In genere morum ex causis & circumstantiis non tantum Varietas graduum , verum etiam speciei , pendet : adeo ut circumstantiæ actionibus moralibus essentielles sint , neque hæc citra illas considerari queant. Secus comparatæ sunt res Physicæ : circumstantiis enim variantibus ipsæ manent immutatæ.

C A P. V.

De Speciebus actionum moralium,
& Norma.

§. I.

Actio moralis distinguitur Vel ratione Principii , ex quo proficiscitur : Vel ratione Regulæ , ad quam conformanda est.

Ratione principii vulgò triplex statuitur ; Voluntaria, Invita, & Mixta.

E X P L.

Actionis in Voluntariam , Invitam &c distinctio in moralibus utilis & necessaria est , ut constet, quæ actiones homini imputari queant. Actionum enim humanarum , quæ ab Intellectu & Voluntate proficiscuntur & diriguntur , hæc præcipua affectio est , quòd *imputari* , h. e. homo pro earum Authore rectè haberi , redundantibus in ipsum effectibus , qui ex istis actionibus proveniunt , ac proinde de iisdem ratio posci queat. Nulla enim propior ratio est , quare alicui actio quæpiam imputeretur , quàm quia ab ipso sciente & volente , mediare aut immediate , profecta est , seu quia penes ipsum fuit , ut fieret vel non fieret.

§. 2.

§. 2.

Actio Voluntaria est, ubi quis sciens & lubens agit, adeoque præeunte rei & circumstantiarum cognitione.

E X P L.

1. **A**ctio Voluntaria etiam dicitur libera & spontanea indiscriminatim: unde Cicero pro spontaneo dicere solet *voluntarium*. Qui spontaneum latius patere volunt, quàm liberum, falsò supponunt, libertatem in sola indifferentia esse sitam, & circa media solùm, in quibus electio & deliberatio locum habet, versari.

2. Ut actio sit libera sive spontanea, requiritur, 1. Ut agendi principium sit in ipso agente, adeoque ut volens agat. Cui tamen non repugnat aliunde, puta, efficaci gratiâ Dei, vel rationibus suadentium & exhortantium, ad agendum moveri. Modò enim, quia velis, agas, sive aliunde ad agendum inductus ita velis, sive secus, actio erit spontanea & libera. 2. Ut actio suscipiatur præeunte cognitione rei & circumstantiarum, quæ pervagatò continentur versiculò;

Quis, Quid, Ubi, Quibus auxiliis, Cur, Quomodo, Quando?

Quæ circumstantiæ singulæ varia concurrendi ratione & combinatione suâ ad actionum variationem, exaggerationem, extenuationem &c. plurimum conferunt, in quibus discernendis, & ad regulam accurandis & exigendis potissimum circumspectio occupatur. Hæc porro rei atque circumstantiarum cognitio vel ideo necessaria est, quia ignorantia actionem nonnunquam facit esse invitam, uti posthac patefcet.

3. Adopinantur ergò, veri specie, similitudine, puta, actionum externarum delusi, qui brutis animalibus *sponte agendi facultatem* tribuunt: etsi motus, qui in brutis impetu & conformatione organorum

orum ciuntur, *actiones*, sed *physicas*, dici nihil vetet; quemadmodum motus in quolibet corpore respectu principii moventis consideratus, etiam *actio* appellari consuevit. Morus autem illos animantium Naturæ Author & Arbiter in finem quemque suum haud minus providè dirigit, ac sagittarius sua tela, scopi in quem feruntur ignara, vibrat.

§. 3.

Actio Voluntaria vel præviâ deliberatione, vel sine deliberatione suscipitur.

Deliberatio est ratiocinatio, quâ mens præstituto fine, pluribus inetr se collatis, quid omninò vel non, magis vel minùs &c. ad finem assequendum conducat, disquirat, & tandem quod conducibilius visum fuerit, sequendum statuit.

E X P L.

1. **Q**Uoniam ea est agendorum & omittendorum natura, ut sua multitudine, similitudine & difficultate sæpissimè nos incertos reddant: eaque insuper est mentis nostræ imbecillitas & hebetudo; ut, quid agendum sit, quid omittendum, quid cum quo differat, quid cui præster, illicò rescire non valeat, necesse habet deliberare. Quoties verò quid agendum, omittendumve sit, jamjam compertum habemus, aut alioqui vel necessitati præcipitis negotii, vel opportunitati temporis moram deliberationis non ferenti, parendum est, sine deliberatione erit actio, neque tamen inconsulta, quo sensu inconsultum dicimus, quod temerè fit.

2. Ut quid deliberatio sit, & qualiter institutam oporteat, rectiùs intelligatur, deliberationis consideranda sunt cum *Objectum*, sive res deliberanda; tum *Modus*.

3. Res

3. Res, quæ in deliberationem cadere queat, conditiones habet duas. 1. Non oportet eam naturâ suâ esse determinatam, quin aliter atque aliter fieri possit. Sic frustra deliberes, quò pactò faciendum, ne trigoni cujusque anguli tres æquent binos rectos: ne latus subtendens angulum rectum, potestate æquivalet lateribus cæteris &c. Unde Aristoteles, *In electionem non cadit quod factum est: non enim consultat quisquam de eo quod factum est, sed de eo, quod futurum est, esseque aliter potest.* Idemque de fine negat esse deliberationem. Non deliberat Medicus, utrùm sanitatem sibi debeat proponere finem, an non. Nec militiæ Præfectus consultat, victoriam intendere velit, nec ne, sollicitus uterque de mediis fini consequendo idoneis, in quorum disquisitione quicquid consilii sui habet infumit. Istuc saltem de fine summo negari nequit, nemine an felix esse velit, nec ne, deliberante. 2. Rem deliberandam oportet esse talem, in quam Voluntati aliqua sit potestas. In causa verò Boni moralis supponimus voluntatem esse sanam, & servitutis suæ compedibus expeditam. Sic nemo deliberat, quò pactò Solis cursum sistere, ad astra subvolare &c. velit: quandoquidem Voluntas humana, etsi perinde recta foret; ac fuit Voluntas hominis integri, in hisce & similibus nihil possit. Neque enim, ut tale quid præstes, satis est voluisse. In solo Deo velle & posse unum & idem sunt: quare & quæ facta extitere unquam, quæ fiunt & porro fient, ex solo voluntatis divinæ decreto provenisse atque provenire credendum est. *Tu condidisti omnia; & propter voluntatem tuam sunt, & condita sunt.* In moralibus quidem deficiente, citra culpam nostram, materiâ, occasione &c. rectè voluisse satis est, Deo animum spectante: nihilominus ut actio Voluntatis foràs quasi dimanet, & destinata fiant, potentiam à voluntate diversam accedere necesse est. Deliberationi igitur locus est in rebus, quas voluntatis huma-

*Nicom.
VI, c. 2.*

*Apoc. 4.
11.*

humanæ imperio modò quòdam suò subesse vult Deus. Quo de suprâ nobis pro necessitate dictum est.

4. *Modus deliberandi* in duobus spectatur, nempe in *Constitutione finis & disquisitione mediorum*. Primum igitur deliberanti certum finem, in quem veluti scopum collineet, constitutum oportet. Proximum huic est, cogitare de mediis, quorum consideranda sunt *qualitas & numerus*, de quibus ubi de prudentiâ.

§. 4.

Actio invita vel per se talis est, vel talem esse accidit. Per se invita est, quando quis ad agendum cogitur. Invitam esse accidit ex ignorantia, cujus causa in agente sua non est.

E X P L.

1. **Q**uia ad *Voluntarium* requiritur, tum ut agens voluntatis suæ impulsu ad agendum accesserit; tum ut quid ageretur, sciverit; apparet, alterutro horum, aut utroque deficiente, actionem reddi invitam. *Videntur, inquit Aristot. invita esse, quæ aut vi, aut ignorantia efficiuntur.* Nic. III. c. 1.

2. *Coactum* stricto significato dicitur, ad quod ab externo principio validiore quis adigitur membra sua applicare, aversionem ac dissensum suum signis, præcipue renixu corporis, ostendens. Sic Lucretiam amici, data fide, haud impune adultero fore, consolantur, *egram animi, avertendo noxam ab coacta in auctorem delicti: mentem peccare, non corpus: c. 58.* Liv. I. 1. 1. Unde consilium absuerit, culpam abesse. Actio hoc sensu, rem ex natura, non ex sermonis usu, æstimando, veriùs passio, quàm actio diceretur, quemadmodum motus in mobili non ut actio, sed passio sive modus considerari solet. Neque tamen, quod dicimus indistinctè capiendum est. Potest enim quid

quid coactum esse in se, quod idem non sit in sua causa: Veluti si quis nunc in tali rerum statu versetur, ut vim illatam repellere nequeat, suam tamen culpam in istum statum devenerit: quod referre possis stuprum Dinæ illatum, Gen. 34. Inconsiderantia & temeritatis fuit, Virginem inter ignotos nulla necessitate, peregrinari. Ceterum, si cui munere injunctio fungenti, vel jure suo aliàs utenti, nec quicquam inconsulto præter officii aut prudentiæ leges suscipienti, vis ingruat, actio invita censetur simpliciter.

Herod.
in Clío.

3. Actio, cui accedit esse invitæ, dicitur imprudens, quippe id ipsum, quod esse dicitur, ex imprudentia, vel ignorantia, habens: talem verò oportet esse, quam dolor & facti poenitentia insequatur. Sic Adrastus vibrato in aprum jaculo, Cræsi filium frustrato ictu interemit. Quod factum cum vehementer doleret, seque ipsum super exanimati cadaver mactandum, offerret, à Cræso hoc inter alia responsum tulit; Neque tu hujus mihi cladis author es, nisi quatenus id fecisti imprudens, sed Deorum quispiam qui jam mihi ventura significavit. Vicit nihilominus dolor Adrastum. Etenim ubi silentium fuit ad sepulchrum, ignoscentibus ei hominibus, ob quæ ipse gravissimè afflictabatur, sese super bustum transfodit.

of 101
82

4. Differunt autem inter se, per ignorantiam agere, & ignoranter agere. Priori modo agenti ignorantia actionis causa est: exemplo sit, qui cognatam ducit in matrimonium, nescius. Ignoranter agit, cujus actio non quidem ex ignorantia profiscitur, attamen cum eadem est conjuncta. Velut qui ebrius perpetrat cædem. Sic vini vitio & amoris stuprum nequicquam excusat Lyconides apud Plautum, cui scitè respondet Euclio;

Anul.
act. 4.
scen. 10.

Homo audacissime,
Cum istacini te oratione huc ad me adire ausum, impudens?
nimis vile est vinum atque amor,
Sic ebrio atque amanti impune facere, quod libeat, licet.

5. Ut

5. Ut autem , quæ ignorantia factum excuset , quæ non excuset , rectius etiamnum intelligatur , sequentia teneantur præcepta.

1. Ignorantia spectari potest duplici modo : Uno quidem , prout aliquid ad actionem confert. Altero , prout invito , aut culpâ non prorsus vacanti oborta est.

2. Prioris intuitu , Ignorantia *efficax* distinguitur à *comitante*. Efficax est, absque qua fuerat, actio non esset suscepta : cujus exemplum suprà allatum est , de matrimonio. Comitans est , quæ licet abfuisse , actio tamen suscepta fuisset. Velut si quis hostem interficiat ignorans , quem nihilominus interemptum cuperet , vel maximè sciens.

3. Posterioris respectu Ignorantia est *voluntaria* vel *involuntaria*. Illa est , quam quis vel ultrò affectavit , rejectis veri cognoscendi mediis ; vel per indiligentiam obrepere sibi passus est. Hæc , nempe Involuntaria , est ejus , qui ignorat , quod scire nec poterat , nec tenebatur. Atque hæc rursum duplex est ; *Vel* enim quis in præsens quidem ignorantiam exuere non potuit , sed quò minùs posset , suâ culpâ fecit ; Ut qui in bello , ad quod sponte conduci passus est , amicum , vel fratrem interficit. *Vel* non solum in præsens ignorantiam vincere nequit , sed nec ullâ suâ culpâ ad talem conditionem devolutus est.

4. Ignorantia Voluntaria dicitur *culpabilis* , *affectata* , *vincibilis*. Involuntaria contra : quæ sæpius saltem invincibilis & inculpabilis est. Utraque porro vel *Juris* est , vel *Facti*. Ignorantia voluntaria *Juris* est , cum quis legem , cujus addiscendæ causam & occasionem habuit , ignorat. Estque vel *Juris universalis* , sive legis moralis , cujus præcepta per summam evidentiam suam , nullius hominis , qui hætenus mentis non impos sit , notitiam effugiunt. Unde merito voluntaria & vincibilis dicitur. *Vel* est *Juris particularis* , humani & civilis ,
cujus

cujus tenorem scire tenentur & possunt, qui in societatem civilem, legum imperiis retinendam, vivere.

5. Ignorantia Voluntaria Facti est, cum quis factum, factive circumstantiam ignorat per oscitantiam & locordiam, cum nōsse deberet & posset. Sic qui lapide per fenestras projecto prætereuntem ferirer, factum malè excusaret, causando, se nescivisse, quempiam præteriturum.

6. Ignorantia Involuntaria Juris est, ubi quis nullā suā culpā jus, puta, particulare ignorat. Huc pertinet, quod Suetonius de Caligula refert. *In Calig. 5. 41.* *Hujusmodi vectigalibus indictis, neque propositis, cum per ignorantiam scriptura multa commissa fierent (in causam commissi caderent) tandem flagitante Pop. Rom. proposuit quidem legem: sed & minutissimis literis, & angustissimo loco, uti ne cui describere liceret.*

7. Ignorantia Facti involuntaria, cum quis factum quaecunque factive circumstantiam ignorat, cum scire nec posset, nec deberet.

8. Notandum interim, non omnem actionem ex involuntaria ignorantia profectam illicò invitam censerì posse, nisi ubi re cognita dolor insequitur, factique poenitet authorem. Ergò non invitusegit, qui cum lapide canem petere veller, novercam suam feriit, & plaudendo, quasi re benè gesta, dixit; *Euge! ne sic quidem malè.* Sic enim actio, quæ hæcenus involuntaria est ex accidente, voluntaria fit per se, morali æstimatione, subsequente approbatione.

9. Ignorantiæ proximus est Error. Quando non solum cognitio veri deficit, sed & ejus loco falsa persuasio animum occupavit, in errore versari animus humanus dicitur: De quo breviter sequentia præcepisse sufficiet.

1. Error Vel Vincibilis est, quando quis attentione & diligentia, quam adhiberi par erat, cavere poterat ne in eum incideret. Vel Invincibilis, quem quis

quis adhibita omni diligentia, quàm vitæ communis ratio fert, evitare non poterat.

2. Observandum non indiliger, *Erroris* diversos esse effectus: *Alios* quidem circa actiones, quas homo pro lubitu suscipere vel intermittere potest. *Alios* circa actiones, quæ Superioris Authoritate circumscripæ, & legibus præceptæ vel interdictæ sunt.

3. Circa *Actiones prioris generis* Error consensus intercipere intelligitur, non sequentibus illis effectibus, qui ex actione, in quam consenseris, provenire solent: præsertim, ubi iste error non ex supina nimis incuria obrepserit. Hujus præcepti usus in foro civili insignis est. Ubi error in pactis & contractibus circa rem ejusve qualitatem, cujus intuitu quis ad contrahendum inductus fuit, pactum reddit invalidum. Quo de videndus illustris Grotius de Jure B. & P.

Lib. II.
c. XI. §. 6.

4. Quantum ad *Actiones posterioris generis* Error vel circa *theoriam* & in eo quod *juris* est; vel circa *praxin* & in eo quod *facti* est, versatur. Aliquando enim quis falsum opinatur de actionum necessitate &c. intermittendum putans, quod erat faciendum, & vice versa. Quò casu errores, quippe vincibiles, non impediunt, quominus agentis sua imputetur actio, prout cum norma præscripta congruere, aut non congruere videbitur. Huc pertinet, quod vulgò fertur; *Si conscientia versatur in errore vincibili circa rem malam, peccat homo, sive secundum sive contra eandem agat.* Qua de re videsis Dialogum nostrum de Conscientia. Sæpius autem errari contingit circa *praxin*, errore in exercitio actionum legibus præceptorum interveniente, puta, si objectum actionis legitimum fuerit subtractum, aliò substitutò; item circa tempus, locum &c. Hinc vulgatum illud; *Error interveniens prohibet, ne actio alicui in alterutram partem imputetur, neque tanquam bona, neque tanquam malitiosa.*

E

Sic

Sic cùm aliàs obligatione libereris, si solvas, cui debes; Ubi per errorem solveris, peccatum non admisti: prior tamen obligatio non fuit sublata. Excipe tamen casum, ubi quis præcisè objectum, locum aut tempus explorare fuerit iussus, vix effugere poterit, quo minùs ipsi effectus actionis pravè adplicitæ imputentur, nisi errorem moraliter invincibilem demonstraverit. Velut si servo præceperis, ut certâ te horâ noctis excitet, non admitte-
tur erroris excusatio, si pulsus æris non rectè abs se numeratos dixerit: culpâ tamen cariturus, si horologium ipsum aberraverit. Sic haud rarò contingit, ut in exercenda actione error intercurrat, dum ab objecto, quod sibi quis destinaverat, deviat. Quo casu agentis malitiâ eâdem manente, actio pro objecti, in quod incidit, ratione gravior aut levior habebitur. Sic qui inimicum suum telo petere destinaverat, si alium quempiam casu percuss-
erit, homicida nihilominus erit: cæde eò plus minusve atrocitatis habiturâ, quò præstantior aut vilior fuerit, qui alieno vulnere cadit. Ubi verò in objectum licitum fuerit aberratum, actio id habebit vitii, quod ex prava agentis intentione profluit.

*Lib. quòd
in Sap.
non cad.
injuria.
c. 7.*

Huc pertinet illud Senecæ; *Si quis cum uxore tanquam cum aliena concumbat, adulter erit, quamvis illa adultera non sit. Ibidem: potest aliquis nocens fieri, quamvis non nocuerit. Tanquam si quis rem, cùm è villa mea surripuit, in domo mea ponat, ille furtum fecerit; ego nihil perdiderim.*

In quibus & similibus errorum generibus & casibus alia judicandi ratio in foro humano, alia in foro conscientie.

§. 5.

Actio mixta dicitur ejus, qui incumbente graviore necessitate aliquid tanquam minus malum eligit & suscipit, à quo ceteroquin extra necessitatem constitutus vehementer abhorrebat.

Ex-

E X P L.

1. **A**ctionis mixtæ exemplum in jactura, quam nautæ faciunt, urgente gravi tempestate, allevata nave vitam servaturi. Probare non possum exemplum quod Eustratius, Metropolitæ Nic. ad Aristot. Nicom. III. c. 1. proferre sustinuit; *Rem habere cum aliena uxore turpe cum sit, efficitur non turpe, si interficiendi tyranni causa fiat.*

2. Tales actiones vulgò mixtæ dicuntur ex spontaneis & invitis. Hactenus enim spontaneæ sunt, eò quòd Voluntas pro præsentis tempore & necessitate in eas feratur, tanquam minus malum aut partem mali, cum alioqui totum aut saltem majus malum foret subeundum. Quo casu duobus malis imminetibus, cum utrumque simul declinari non possit, eligitur quod minus est, & naturam boni imitatur. Ex invito autem ejusmodi actiones id trahunt, quod ad eas contra suam inclinationem voluntas adigatur, nunquam susceptura easdem, si alia gravius malum effugiendi via pateret.

3. Id fortè quæri possit; *an Actio talis rectè dicatur mixta?* Resp. Hujusmodi actio si consideretur physicè, qualis per se & naturâ suâ est, Voluntaria veriùs appellari videtur: quia licèt talem rem, qualis est jactura mercium &c. nudè spectatam nunquam vellemus, tamen positis his circumstantiis eam spontè eligimus, tamen si ratione cum affectu luctante. Sunt enim rationes gravissimæ, quæ nos ad hoc potius, quam aliud agendum determinant, alioqui non acturos. Atqui non desinit spontè agere, qui rationibus, quantumvis gravibus inductus agit. Quare & Aristoteles, has actiones *spontaneis similiores* esse affirmat. Quod ipsum *Nic. III.* haud obscurè videre est in exemplis actionum, quas ^{6. 1.} Ethici in censum mixtarum referunt. Qualis fuit illa Solonis, qui insaniam simulavit, ut legem patriæ

Just. lib. trix perniciosam abrogaret, teste Justino. Item
2. c. 7. Zopyri, qui eodem referente, *domi se verberibus*
lib. 1. lacerari toto corpore jussit, *nasum, aures & labia sibi*
c. 10. præcidi: ut Babyloniorum urbem Regi Dario traderet.

4. Quòd si hoc genus actiones *Ethicè* considerentur, mixtæ dicuntur, quippe id cum in vitis commune habentes, quòd effectus morales, qui actiones merè voluntarias consequuntur, in hisce omnino aut ex parte saltem deficiunt, quantum ad judicium fori humani. Etsi enim nonnunquam tam rigida obligatio alicui injungatur, ut ne per intentatam quidem mortem ab ea discedere debeat: tamen ubi ista expressè non adparet, haud quicquam facile præsumitur, tanquam conditione humana asperior, & ubi illa deest, stultum fuerit, non minima quaque parte mali velle defungi, siquidem per conscientiæ religionem fieri queat. Unde quæ aliàs extra talem casum perpetrata reprehensionem erant incursura, si necessitate vincente suscipiantur, ab æquis hominibus, si non omnino laudentur, saltem commiseratione magis quàm indignatione digna haberi; alia penitus, aut ex parte excusari solent: in quibus invidia actionis & culpa in alium devolvitur, facti executore innocente declarato. Tenendum verò, etiam hîc haud paulò exactius esse judicium fori conscientiæ, quàm fori civilis: quia Veritatis amor, Virtutis studium & Conscientiæ religio omnibus præsentis vitæ commodis antehabenda sunt.

Atque hæc de distinctione Actionum moralium ratione principii dicta sufficiant, unde, quid cuique imputari, seu cujus actionis, eventusque Author quisque possit haberi, non segniter attendenti constabit.

§. 6.

*Actio moralis ratione Regulæ, vel Bona est, vel Mala.
Illa demùm verè honesta & laudabilis : hæc inhonesta
& vituperabilis dicitur.*

Actio bona est, quæ per omnia ad normam congruit.

Mala est, quæ vel in uno à norma discrepat.

E X P L.

1. **B**onitatis & malitiæ actionum proæreticarum ratio formalis, quam vocant, consistit in habitudine convenientiæ vel disconvenientiæ ad normam dirigentem & obligantem, quam dicimus *legem*. Supponimus hîc ceu verissimum & evidens, de quo & animus cuique suus testis est locupletissimus, *hominem non esse sui juris*, ut quocunque animi libido incitârit, sequatur : sed à nutu Dei, Creatoris & Domini sui suspensum, in eo solo consistere debere, quod illi placuerit.

2. Quemadmodum autem norma motum agentis dirigens, exempli causâ, pyxis nautica, hætenus causa dicitur rectitudinis itinerariæ, quâ fit, ut in portum pervenias, non tam quia navis eum tenet cursum, qui cum directione ejus coincidit, quàm quia ex indicio ejusdem Naucerus cursum dirigit : Ita Lex est causa rectitudinis in actione, non tam quia actio, quacunque intentione suscepta, ad illam quadrat, quàm potissimum, quia ex legis dictamine, cum intentione obedientiam eidem præstandi, proficiscitur. Unde si quis casu, citra intentionem obsequendi, quod lege præcipitur agit, haud magis *Benè* egisse dici potest, quàm qui fortuita sclopeti dispositione feram stravit, peritè & artificiosè jaculatus dicitur.

3. *Legis nomine generatim intelligimus omnem Veritatem practicam menti cognitam, quæ vim obligandi in & per conscientiam exerit. Atque huc quidem pertinet Ratio homini reliqua, sive lex illa interior omnium cordibus inscripta: etsi per eam solam homo errorum caligine obvolutus, suique amore excæcatus vix tenuiter degustet, quis Deo acceptus sit cultus, & quod præstandum in omnibus obsequium, quinimò à recta ejus ratione longissimò intervallò distet. Cur alioqui concupiscentiam esse peccatum Apostolus se cogniturum negasset, nisi lex, nimirum scripta, dixisset; non concupisces? Proinde, quod tùm hebetudini, tùm contumaciæ nostræ necessarium erat, Dominus legem scriptam nobis posuit, quæ & certius testificaretur, quod in lege naturali nimis obscurum erat; & mentem, memoriamque nostram excusso torpore, vividius ferirer. Quicquid ergò Veritatis practicæ, tùm in Decalogo, legis compendio; tùm in ejusdem explicatione, per universum Scripturarum S. Codicem diffusa, occurrit, pro actionum nostrarum norma agnoscendum est.*

Rom. 7.
7.

4. Congruentiam actionis cum norma oportet esse exactam in omnibus, quæ lege determinantur, puta, in *qualitate*, sive *dispositione agentis*, *Objecto*, *Fine*, & certis denique *Circumstantiis*. Hinc Actio moraliter erit *Bona* aut *Mala*, Vel quia Agens ita est dispositus, uti lex requirit, aut secus; exempli causâ, agit ex certa cognitione, intendit obedire legi &c. aut secus. Vel quia actio dirigitur in *Objectum*, eo fine, iisque circumstantiis, prout lege est definitum, aut contrà. Sic laudari non meretur, qui, dum nocere intendit, prodest. *Tuber Lib. II. quidam tyranni, inquit Seneca, gladio divisit, què de benef. ad eum occidendum venerat. Non ideo illi tyrannus c. 19. grâtiâs egit, quòd rem, quam Medicorum manus reformidaverant, nocendo sanavit. Vides non esse magnum in ipsa re momentum. Quoniam non videtur de-*
disse

disse beneficium, qui malò animò profuit. Casus enim beneficium est, hominis injuria. Sic qui potestate sua legitima malo fine utitur, velut iudex, potestate puniendi noxios, ad satiaudam libidinem suam, peccat. Ita apud Carthaginienses in crucem tolli Imperatores dicuntur, si prospero eventu pravo consilio rem gesserunt. Verba sunt Cn. Manlii apud Livium. Lib 38. Scil. quod & suprà nobis est notatum, Bonum est ex^{ca} 48. integra causa, malum ex quolibet defectu. Vanum igitur, quod nonnulli dicunt, actionem quoad substantiam Operis esse bonam, etsi finis legitimus non intendatur: quia finis, haud minus ac circumstantiæ quævis aliæ, ad actionis moralis essentiam pertinet. Inde adeò peccat, non tantùm qui malo, sed & qui aliò, quàm legibus præscripto, fine agit. Quale est precari in trivis, ut appareas hominibus. Matth. 6.

5. Etsi autem actionum moral. norma semper sit eadem; cùm lex moralis æternæ & inde mutabilis in Deo veritatis & sanctitatis sit ἀποσκομιάντων: nihilominus diversitas aliqua hîc notanda venit in conditione hominis. Alia enim erat ratio hominis integri sub fœdere operum constituti; alia peccatoris, respectu qualitatis in agente requisitæ. Qui in homine integro erat amor Dei, ejusque legis, unde proficisci debebat studium glorificandi Deum per obedientiam exactam & perseverantem, in peccatore locum habere non potest absque fide in Christum Redemptorem, in quo solo Deum sibi amabilem cognoscit, alioquin osor Dei, qualis suapte natura est peccator omnis, in æternum mansurus. Per Spiritum S. qui datur, quando fides salvifica datur, quippe Spiritus fidei, Charitas Dei effusa est in^{2. Cor. 4:} cordibus nostris. Amati igitur à Deo redamamus^{13. Rom. 5. 5.} eundem, aliàs æternum non amaturi. Non quòd^{1. Joh. 4. 10.} nos dilexerimus Deum, verum ipse dilexit nos. Absque hoc amore Dei prævertente & trahente sit, quicquid homo tentat, meram φιλαυσίαν redoler, neque boni operis laude ornari potest.

6. Non immeritò igitur Catechesis nostra ea demum bona vocat opera. 1. Quæ proficiuntur ex vera fide, quâ recumbimus in Christum, tum, ut ne desit amor Dei in operando: tum, ut absit fiducia in opere suo, tanquam iustitiæ causa. 2. Quæ secundum legem Dei fiunt. Quo significatur, partim, quòd bona operanti hæc una tenenda sit, regula, ejusque mens diligenter investiganda. Partim, quòd bona operans debeat bonam habere conscientiam, quâ studiose & in timore Dei meliora probaverit, certa habens apud animum suum: Et voluntatem Dei scrutatus, facta sua cum ea comparaverit. 3. Quæ ad Dei solius gloriam referuntur: exclusò studio gloriandi operibus coram Deo, placendi hominibus, captandi commoda vana &c. Hisce argumentum dicit Apostolus; *Finis denunciationis est amor ex puro corde, & conscientia bona, & fide non fucata.*

Phil. 1: 10.
Rom, 14: 5.
1. Tim. 1: 5.

§. 7.

Actionis moralis in Bonam & Malam divisio est adæquata. Proinde non datur actio, quæ in genere morum sit indifferens.

E X P L.

1. **N**onnulli quidem distinguunt Actionis speciem & individuum, concedentes dari actiones liberas secundum speciem indifferentes, non item in individuo. Indifferentiam secundum speciem dicunt, quam actio habeat ab objecto, præciso fine externo, & aliis circumstantiis accidentalibus. Indifferentia verò secundum individuum ipsis est, quam actio habeat à fine externo & circumstantiis singularibus. Ex. gr. lavare manus, movere pedes &c. actiones per se & sua specie dicunt esse indifferentes, bonas tamen fieri à fine externo & circumstantiis, si nim,

nim. ordinentur ad bonum finem, loco suo, tempore, modo &c.

2. Alii contrà actiones ratione finis externi & circumstantiarum, indifferentes dari existimant, eò quòd finis ille externus & circumstantiæ possint esse indifferentes: qualis est ambulatio, suo tempore & loco animi relaxandi gratiâ, instituta.

3. Nos arbitramur, nullam dari actionem liberam, quæ sit indifferens. Omnis enim actio ordinatur ad debitum finem, vel non ordinatur. *Si ordinatur, cum ordine rationis convenit, unde boni rationem habet.* Si non ordinatur, exorbitat ab ordine rationis, eoque ipso mala est: sic concludit Thomas. Distinguere actionis speciem & individuum, ^{12. 9. XVIII. Art. 9.} quid juvat? cum actio secundum speciem in rerum natura non detur, & non sit nisi modus cogitandi. Apostolus de tota hac causa decidit, quando sic jubet; *sive igitur editis, sive bibitis, sive aliud quid facitis, omnia in gloriam Dei facite.* Hinc clarum est, ^{1. Cor. 10: 31.} quòd tamen si *βελωματα* non commendent nos Deo, ut ^{1. Cor. 8:} alibi inquit idem Apost. & ipsum edere ac bibere suâ naturâ sit adiaphorum, tamen usus cibi ac potus sit vel bonus vel malus. Quemadmodum omnium rerum, quas naturâ suâ indifferentes esse constat, usus non indifferens, sed lege fidei & charitatis circumscriptus est.

§. 8.

Ut Actio, sic omissio in genere morum Bona vel Mala est.

E X P L.

1. **Q**uia peccatum, quâ tale, non res est, sed privatio rectitudinis, quæ inesse deberet, etiam peccari potest, omitiendo quod est faciendum. *Ei enim, qui noverit rectè facere, nec facit, Jac. 4. 17*
pec.

peccatum est. Quinimò nullum est peccatum commissionis, quod ipsum alio respectu non sit peccatum omissionis. Dum enim quis fecit, quod factum non oportuit, omisit quod faciendum erat, Quæ ipsa causa est, cur in præcepto negativo continetur affirmativum, & vice versa.

2. Omissio bona est, qua omittitur actio mala, occasione perpetrandi oblata. ex amore Dei & studio obediendi ejus legi. Mala verò est, quâ omittitur actus lege præceptus, quem per occasionem, facultatem &c. præstare posses.

C A P. V I.

De Affectibus in Genere eorumque usu & incommodo.

§. I.

Ad Materiam virtuti subjectam pertinent etiam Affectus, quorum breviter exponenda Natura, Usus & Incommodum.

Naturam dabit Affectus definitio, & definitionis explicatio.

Affectus est, nescio quæ, animæ meæ commotio, quæ ad eam speciatim refertur, & per motum aliquem Spirituum animalium producit, conservatur & corroboratur.

E x p l.

1. **Q**uid Affectus sit veriùs sensu, quàm verbis consequi licet: unde ex sensu loquens, affectum dico esse, nescio quam, animæ meæ commotionem. Quòd verò motu spirituum animalium producat &c. ex penitiori inspectione œconomiae ani-

animalis utcumque constat Physicis: quorum industria etiam accuratior naturæ affectuum indagatio ex eorundem causis, effectis, propriis & signis, relinquenda est. Satis instituto nostro fuerit, definitionem propositam breviter explanâsse.

2. Affectum dicimus animæ commotionem; quia sentimus, ex omnibus cogitationibus, quibus animam occupari contingit, nullas eam perinde agitare, atque affectus: quos inde etiam vulgus Philosophorum, *motus, passionēs & perturbationes* appellare consuevit.

3. Malè igitur Stoici pertendunt, affectus esse *opinionēs & iudicia levitatis*, nec tam naturâ insitos, quàm prava opinione susceptos. De illis Cicero; *Omnes, inquit, perturbationes iudicio censent fieri & Tusc. l. 4. opinione. Sic agritudo ipsis est opinio recens mali præsentis, in quo demitti, contrahique animo rectum esse videatur. Latitia opinio recens boni præsentis, in quo efferri rectum esse videatur. Metus opinio impendentis mali, quod intolerabile esse videatur &c.* Hanc sententiam oppidò falsam esse patet. 1. Quia opinio est actio iudicii vel voluntatis: affectus verò est passio quæ animæ volenti volenti ut plurimum obrepit, & ex quo natura nostra peccatò depravata est, in nobis, quasi sine nobis est. 2. Affectus etiam corpus ipsum vehementer sæpè concutit, sanguine, spirituque animali concitatis & perturbatis: id quod de opinione dici nequit, cum sit languidum quoddam iudicium de re non satis explorata. Unde etiam opinione falli rarum non est. Affectus verò, animæ intimus, alius nunquàm est atque sentitur, & ne somniantem quidem eatenus falli contingit.

4. Causa sententiæ tam insolentis haud dubiè Stoicis fuit Paradoxum illud decantatissimum, quò statuerunt, *sapientem suum esse ἀπαθῆν* sive imperturbabilem. Zeno, inquit Cicero, omnibus his, affectibus, quasi morbis voluit carere sapientem. Quam ἀπαθῆσαν cum jactari veriùs, quàm obtineri vulgò cla-

Acad.
Quæst.
lib. 1.

Tust.

l. 4.

Rom.

19.

2. Pet.

1: 4.

clamarent Peripatetici, Illi ex adverso *passiones prava opinione susceptas* dixere, ut *intelligeretur, non modo quàm vitiosa, sed etiam quàm in nostra sint potestate*. Sic hypocrisis Stoica *infirmi- tatis carnis, & corruptionis, quæ in mundo est in concupiscentia, oblita vel ignara, & longanimitate Dei omnimodè abusa, sapientiam & libertatem crepat, quando insolubilibus turpissimæ servitutis nexibus innodata stultitæ vanitatis pœnas dat.*

5. Affectus porrò dicitur commotio, *quæ speciatim ad animam refertur*, ut constet, multum interesse inter affectus & alias animæ sensationes, velut visum, auditum &c. quæ ad res externas; item, famem, sitim, dolorem &c. quæ ad corpus, referri solent. Accedit, quòd vulgò res sensui subjectas simile quid suū per sensum nobis ingerere existimemus, speciebus sensilibus per aerem diffusis & ad sensoria appellentibus. Ita videntes lumen, luminis simile quid soli, igni &c. inesse arbitramur. Idem autem de affectu opinari non solemus. E. G. Quando inimico obviam facti, odio ejus atque ira exardescimus, aut metu percellimur, non dubitamus quidem in ipso esse, quod talem affectum exciter, neque tamen affectu nostro tanquam simulacro inimicum, vel aliquid ejus repræsentari putamus.

6. Reliqua definitionis habent affectuum causas, *tum proximam, tum remotam*. Illa est *motus Spirituum animal.* quo affectus producuntur, conservantur & corroborantur. Hac ratione affectus distinguuntur à nostris *volitionibus*, quæ ipsæ etiam motiones animæ, ad eam referendæ, vocari possunt, sed ab ipsa anima *ἀνέως* proficiscuntur. Unde rursus, quantum cum opinione discrepet affectus, colligere licet. Remota causa affectuum est Impressio, quam objecta, prout bona vel mala visa fuerint, in cerebro faciunt. Eò etiam referri debet varia cerebri temperies vel intemperies, sive in utero materno, sive consuetudine, sive casu aliquo par-

ticu-

ticulari contracta. Hinc adeò fit, ut idem objectum alios in aliis affectus moveat: E, gr. quod uni terrorem incutit, alteri animum & audaciam addat. Sic multum diversa, etsi ferè nescii, patiuntur sanguinei, biliosi, melancholici, phlegmatici.

7. Ut quo ordine & modò affectuum causæ agant, rectius intelligatur, sequentia, quæ in quolibet affectu, excepta admiratione, occurrunt, haud obiter attendisse juvabit.

1. Judicium mentis, quod insequi solet confusam vel distinctam perceptionem rationis, quam habet Objectum quodvis ad nos.

2. Novam determinationem Voluntatis in Objectum particulare, quod bonum vel malum esse judicatur.

3. Sensum amoris, odii, cupiditatis, lætitiæ, tristitiæ &c. qui judicium mentis atque determinationem voluntatis continenter excipere ac comitari solet.

4. Novam determinationem cursûs spirituum & sanguinis ad viscera membraque corporis exteriora. Priusquam enim objecta quæque moveant sensum, spiritus animales per universum corpus diffusi, singularum ejus partium conservationi impenduntur. Sed objecto bono vel malo præsentem suâque insolentia sensum movente, universa istæ œconomia tantisper quasi turbatur, tribus hisce ferè supervenientibus. 1. Plerique spiritus animales in musculos faciei, brachiorum, crurum &c. citato cursu derivantur, ut corpus in eum componant habitum, qui præsentem passioni convenit, & acquisitioni boni, vel fugæ mali inservit. 2. Sin est, ut sui cujusque corporis vires ad id præstandum non valeant, spiritus animales certam illi vocem atque clamorem *αἰσθημάτων* exprimunt, certoque vultu & habitu corpus inducunt, quibus alii ad simile *παῖς* commoveri faciliè queant, ut laborantibus auxilio esse velint. Id quod singulare providentiæ divinæ argumentum est.

est. Quod reliquum est spiritus animalis, ad pulmones, cor, hepar, lienem, cæteraque viscera, impetu fertur, ut novum inde commeatum sanguinis, materiam generandis spiritibus, ad actionem præsentem corpori necessariis, eliciat.

5. Sensibilem illam animæ Commotionem, qua per inopinatam hanc spirituum exundationem agitari se persentiscit. Sicut enim spiritus animales in corpore cientur, simul ac mens objecti boni malive novitate afficitur: Ita vicissim ipsa mens motu eodem spirituum animalium vehementer agitur, ut excitata, iis, quæ sibi corporique profunt, tantò vigilantius intendat.

6. Sensum denique gratum sive voluptatem quandam interiorem, quæ animum blandè detinet, ut passioni præsentis tantisper indulgere velit, imò eam quasi iustificet & defendat. Hinc videas, invidiosuam non displicere invidiam, metuenti suum placere metum &c. Hinc iratus iræ suæ non irascitur. Causa hujus videtur esse, quia passio quæque præsens eum arguit statum, in quo animam, hujus illiusve objecti consideratione occupatam, versari, convenit. Atque hæc de affectûs natura breviter dicta sunt.

§. 2.

De Usu Affectuum in genere tenendum est, quod sapientissimò Dei consiliò destinati sint cum ad conservationem sanitatis, vitæ animalis, & societatis humanæ: tum ad acquisitionem bonorum, isti conservationi subservientium.

E X P L.

1. **Q**uia Virtutis non postrema pars est, rectè uti passionibus, necesse est intelligi, quem in finem Deus, Naturæ parens, passiones nobis in-

seve-

severit. Neque enim à nobis ipsis sunt affectus; neque à liberis nostris cogitationibus aut commentationibus profecti; nec quòquam aliò modò sponte nostra assumpti, vel industrià quæsit, cùm omnem actionem, cogitationemque nostram prævertant.

2. Affectus conservandæ vitæ animalis & sociali &c. destinatos, cùm mox dicenda, tum maximè enumeratio & usus præcipuorum affectuum, suò locò, docebunt. Id verò nôlle plurimum in re Ethica habet momenti: quandoquidem virtutis sit, quidvis ad suum referre finem, & rem quamlibet suò æstimare pretiò, quod ipsum ex fine & usu rei definitionem habet.

§. 3.

De Affectuum utilitate paulò specialius dicturi, distinguamus Usus tùm universorum communes; tùm singulorum proprios.

Communes sunt sequentes. 1. Affectus sanitati fovendæ adminicula sunt. 2. Animum disponunt ad expetendum, quæ natura nobis dictat esse utilia. 3. Corpus, ejusque membra ad eos componunt motus, qui rerum utilium prosecutioni inserviunt. 4. Ad præsentis vitæ felicitatem vel miseriam plurimum conferunt. 5. Affectuum interventu fructum vel damnum è rebus utilibus vel noxiis percipimus.

De usibus singulorum affectuum propriis videbimus cap. seq.

E X P L.

1. **A**ffectus, ad minimum ubi per impotentiam animi effœminati modum non excedunt, vehementi spirituum agitatione idem in homine, microcosmo, præstare videntur, quod venti majori in mundo. Quemadmodum hi aërem expurgant

gant &c. ita illi sanguinem quasi ventilant, ne stagnans putrescat.

2. Quando animum affectibus disponi dicimus ad expectandum utilia, intelligi volumus, non quæ menti seorsim, sed quæ nobis, quatenus mente & corpore unitis homines sumus, vitamque vivimus animalem & socialem, prodesse queant. Sensus enim bonorum & malorum, ubi affectu aliquo incitatus & quasi animatus fuerit, multò vividior & acrior erit. Hinc affectus *animi alas & quadrigas* dixit Plato. Quoniam objecti imaginem altius animæ imprimunt, & quasi inurunt, mentique commodorum corporis aliàs securæ, & pro salute *totius compositi* segnius excubituræ, & stimulos addunt, eamque in proposito prosequendi bonum & avertendi malum tantisper detinent. Quapropter, etsi affectus in consilium rerum agendarum adhiberi non debeant, Ratione, non Affectu, eum in usum data; consiliorum tamen executioni intervenire possunt debentque. Quo sensu Peripatetici affectus dixerunt *Ardores animorum*, *Cotesque virtutum*. Si enim pectus *ἀπαθείς*, affectu prorsus exutum gestaremus, virtutis exercitium in multis, quæ ardui quid habent, nobisque aut societati magnoperè utilia sunt, languesceret ac successu frustraretur.

3. Spirituum alteratio, quæ affectum producere solet, corpus nostrum, ejusque membra ad eos componit motus, qui prosecutioni vel aversioni rerum, quas sive naturæ instinctus sive ratio nobis prodesse vel nocere docet, subserviunt, ea quidem dexteritate, quam Voluntas & consilium humanum non tantum nulla arte & industria imitari possit, sed interventu suo vel maximè retardaret. In quo sanè nobis Providentia Dei, ex usu ejusmodi motuum haud minus quam ex structura organorum corporis nostri elucescens, admirandum sapientiæ & bonitatis suæ spectaculum offert.

4. Affectus, quia sensus sui indubitatum ingerunt

runt certitudinem, ad præsentis vitæ felicitatem vel miseriam plurimum conferunt. Exemplo sint læritia, quæ veritatis amorem; & acquiescentia animi, quæ virtutis studium, præsc̄ consequi solent, mira quadam dulcedine atque voluptate animum mediis in adversis permulcentes. Rursum, anxia rerum nihili cupiditas, tristis malefactorum conscientia, pœnitudo, metus &c. animum majorem in modum discruciant & miserum reddunt. Neque hîc, quantum ad sensûs veritatem & certitudinem quicquam interest inter affectum somniantis, & illum Vigilantis: quem enim nocturna perterrent insomnia, metu suo perinde infelix est, ac qui diurni mali metu & sollicitudine vexatur. Addam egregium Ciceronis locum; *Ergò is, quisquis est, qui Tusc. 4. moderatione & constantia quietus animo est, sibi quæ ipse placatus, ut neque tabescat molestiis, neque frangatur timore nec sitienter quid appetens ardeat desiderio, nec alacritate futili gestiens deliquescat, is est sapiens, quem quærimus, is est beatus: cui nihil humanarum rerum aut intolerabile ad demittendum animum, aut nimis lætabile ad efferendum videri potest. Et ali-* *Tusc. 5.* *bi; Quem, inquit, libidinibus inflammatum & furentem videmus, omnia rabide appetentem cum inexplebili cupiditate, quòque affluentius voluptates undique hauriat, eò gravius ardentiusque sitientem, nonne rectè miserrimum dixeris? Sic Deo placuit, in virtute ipsa quoddam esse præmium, in vitio pœnam: Ut virtutis cultor sua virtute felix, Virtutis osor suò vitio miser vivat.*

5. Affectuum interventu verè demùm ex rebus utilibus, quæ nobis afferre possunt fructum; & vicissim ex noxiis, quod dare possunt, damnum percipimus. Cum enim jucunda & utilia, quæ sensum afficiunt, nullam convenientiæ rationem habeant cum anima, neque verum animæ bonum contineant, ea, nisi affectu aliquo amplexa fuerit, ne quidem possidere dici potest. Sic quæ injucunda &

F

noxia

noxia sixo

noxia in rebus externis habentur, non nisi doloris & tristitiæ sensu calia sunt atque nocent.

6. Atque hinc patescit, quomodo affectus conservandæ sanitati, vitæque animali & sociali inserviant. Id verò nobis cavendum, ne illos ab usu & fine, in quem dati sunt, exorbitare patiamur. Sicut sensus dedit Naturæ Parens Opt. non eò, ut regulæ loco essent indaganti veritatem; id enim officium est intellectûs, cui sensus suò quique locò & modò subserviunt, commodò corporis præcipuè dati. Sic affectus in se viridem, non ut normæ vel ducis vicem præstarent agenti; id enim legis, conscientiæ & rationis munus est, cui affectus subesse oportet. Totò igitur cœlò aberrant, qui affectibus verum solidumque animæ bonum acquiri, possiderique posse autumant; obliiti vel potius signari hujus veritatis certissimæ; *Quicquid est ex corpore, idem est pro corpore.* Cum passionibus nobis obveniant à corpore, proclivem esse ad agendum propter illas, est velle agere propter corpus, eique servire.

7. Ex dictis consequitur etiam, oppidò falsam esse Stoicorum sententiā, qui affectus omnes naturā suā malos, & à sapiente alienos, *morbos quippe animi, motus inimicissimos mentis, vitæque tranquillæ, tabificas mentis perturbationes, æmentiam, insaniam stultorum, & quid non? dixere, ex immoderato Peripateticis contradicendi studio, & impotenti inanis gloriæ affectatione, qua Stoici sapientis imago pellucet. Sententiæ isthæc. 1. Stultia est.* Dum enim, obtentu concordiæ beatæque tranquillitatis animo conciliandæ, affectus omnes, tanquam naturā malos, exterminari jubent, perinde ineptè faciunt; atque si quis metuens, ne ulla intemperie corpus infesteretur, omnes inde humores pharmacis purgantibus expelli: vel metu dissonantiæ omnes lyre chordas discindi vellet. Idem scitissimā fabulā adumbratum ab Herode Attico videlicet apud Gellium in Noctib. Atticis. 2. Noxia est. Periculosa

culosa plenum opus alex est, istam Stoicorum sententiam Religioni & Societati humanæ obtrudere. Numquid enim periculô careret, si quis obtentu studii, nescio ejus, affectatæ & imaginariæ tranquillitatis ferre posset sine ulla animi commotione, quod turpissimè & perlicenter contra communia humani generis jura, & æternas virtutis leges, committitur? Quid? quod insolentissimi dogmatis audacia virtutem exarmet, Oratoris vires elidat, Poëticæ gratiam auferat, & tantum non omnia societatis humanæ vincula dissolvat. 3. *Impia est.* Cum enim Affectus unâ cum sensibus & imaginatione, quos insequi solent, ipsum Naturæ Parentem Opt. Sapientiss. habeant authorem, mali suâ naturâ, citra impietatem, dici nequeunt. Nihil pestilentius, pietatique magis inimicum fingi potest nequissimâ illâ opinione, quæ Veteres quosdam Hæreticos infatuavit, *Deum quoquô modô mali esse authorem.* Sic enim necesse est, procul omni amore & pietatis sensu horreri tantum, quem ut authorem mali, & simul vindicem ejusdem acerrimum considerari & credi vellent. *Deus non est author ejus, cujus est ultor.*

8. Atqui affectus, inquit Stoa, pervertunt rationem, & irritamina sunt malorum. Resp. Distinguendæ sunt passionibus ab effeminatione & proclivitate ad agendum ex passionibus: labes & turpitudine non in illis, sed in hac residet. Animus velut conubiô quodam cum corpore copulatus proclivitate illâ suâ se quodammodo virum præbet uxorium, in quem quadrat illud Poëtæ; *Uxori nupsit turpiter ille sue.* Sed de his plura suô locô.

Dicenda restant incommoda, quæ ab affectibus in corpus atque mentem redundant, ubi non admissio vel excessus Rationis jugo enormiter & licenter tamallatur. Ea igitur recensebimus, posthac etiam malorum fontem reclusuri.

Affectus abnormes

1. Incommodant corpori, turbando æconomiam animalis, vastando sanitatem &c.
2. Incommodant menti, dum 1. Tenebras q. offundunt intellectui, ut quod verum est cernere non possit.
2. Judicium corrumpunt.
3. Rationem de throno dejectam in servitutem redigunt abjectissimam.
4. Tranquillitatem animi interturbant, vel omnem interceptum.

E. x. p. l.

1. **Q**uemadmodum ad corporis sanitatem fovendam, vel, si cubi ea fuerit afflicta, restituendam, non parum valent affectus, præcipue qui justam sanguinis & spirituum temperiem consequi solent: sic vicissim ad eam atterendam & debilitandam non parum momenti habent iidem, ubi modum excedunt. Id quod de tristitia, metu, ira, invidia &c. plus satis constat.

2. Tanto graviora sunt, quæ mens inde facit damna, quò ipsa præstabiliior est corpore. Primam affectus exorbitantis culpam luit intellectus. Turbant enim affectus effrenes animum hæud secus atque venti mare, procellæ undas: ut mens disciplinam veritatis non magis, quam imaginem turbata admittat aqua. Quod exemplis amoris, philautiæ, invidiæ &c. facile ostenderim. Hinc verissimum illud Euripidis;

Ple-

Plerosque morbus vexat hic mortalium
 Dant ut sapientes, non tamen sententiam
 Mutare, amore victi amicorum, velint.
 Et illud Horatii;

Nil rectum, nisi quod placuit sibi, ducunt;
 Quia turpe putant parere minoribus, & quæ
 Imberbes didicere, senes perdenda fateri.

Id verò de universis passionibus usque adeò verum
 est, ut vulgò plerique omnes, res non ex sua natu-
 ra, sed nostris affectibus æstimare consueverimus,
 mutatis affectibus, res ipsas etiam mutatas credere
 proclives: velut infantes, qui per vitra rubra pro-
 spiciunt, res visas eodem colore tinctas, sibi per-
 suadent. Nonne sunt, quibus nihil eorum, quos
 oderunt, laudandum probandumve videatur? quo-
 rum si vel opinioni, vel voluntati, vel commodis,
 adversatus fueris, illicò temerarius, arrogans,
 ignorans homuncio, cui nec fides haberi, nec ho-
 nor deferri debeat ullus, videbere? Quemcunque
 illi amaverint, eò nomine culpâ vacabit, exemptus
 omni labe & vitio: quicquid desiderant, justum e-
 rit & facile: injustum contra id, cujus nullò tan-
 guntur desiderio. Verum putant haud agere, quod
 valde expetunt. Ex affectu scil. suo, qui ipsos oc-
 cæcat, metiuntur omnia. Rectè ait ille; Impedit
 ira animum, ne possis cernere verum. Id quod in
 omnes quadrat affectus, unum nostris, omnes nostris.

3. Si lumen, quod est in re, tenebræ sunt, ipsa te-
 nebræ quantæ? Fieri igitur nequit, quin affectus e-
 normes offusa menti caligine etiam iudicium perver-
 tant. It. fit 1. In præiudiciis. Mens affectibus
 obnoxia facta iudicium de re qualibet, nec dum
 comperta, præcipitat. Logicæ analyticæ præcep-
 tum est, Ad lectionem hujus, illius, Authoris ac-

accessurus prius discipulus, quam censor esse velis. At qui bonam malamve de aliquo opinionem imbibit, affectui obsequens suo, scripta ejus etiam non lecta, nedum intellecta, probabit, vel improbabit. 2. In erroribus, quorum abundè satis ex affectuum enormitate nasci, maximo scientiarum, societatisque humanæ damno, quotidiana testatum facit experientia.

4. Affectus enormes Rationem, quæ primitus dux atque moderatrix data actionibus & moribus humanis, de præsidio dejiciunt, turpissimamque in servitutem præcipitant: unde Lerna malotum inexhausta. Affectuum enim licentia, indulgente sibi imbecillitate animi, vires usque & usque acquirit eundo, nec ubi sistat, facilè locum reperit. Hinc tot vitiorum mancipia: hinc tam fecunda culpæ secula: *hinc audax omnia perpeti Gens humana ruit per vetitum nefas.*

5. Denique sicut procellosa tempestas alto mari incumbens fluctus ad intimos usque littorum recessus & portus propellit, naviumque stationi incommodat, ut vel in portu naviganti vix liceat esse tuto: ita affectuum tempestas non in corpore tantum turbasciet, nec intra inferiorem illam, quam vocant, animæ regionem coercetur, sed ad intimum quasi mentis recessum penetrat, ipsumque tranquillitatis portum invadit, pacem ubique turbatura.

§. 5.

Fons istorum malorum in Genere quidem est Impotentia Carnis, sive universalis illa natura humana corruptio. In Specie est 1. Incuria, quæ fit, ut quod se affectui commendat, simpliciter & absolute bonum existimemus. 2. Defectus tum claræ cognitionis boni & mali; tum firmi propositi semper agendi & prosequendi, quod ratio & Conscientia probè informata optimum esse judicaverint.

EXPL.

E X P L.

1. **M**ala recensuisse satis non est: inquirendum, unde promanent; ut vel prævenias, vel prævenientibus certiora atque commodiora remedia invenias. Causam istorum malorum in genere secundum Scripturam S. agnoscimus *Impotentiam* carnis, sive universalem illam Naturæ nostræ corruptionem, per quam homo animalis, sibi permixtus, *le-* Rom. 3: *gi Dei non subicitur; nam nec potest.* Quapropter totus, voluntate, affectu, omnibus mentis facultatibus, corporisque membris, servitutis torpissimæ vinculis constrictus tenetur: imò *in phrygia in sepulchris*, in corruptione concupiscentiæ, quasi sepultus, cadaveris instar, malis verminat. Quò abundans Apostolus *corpus mortis, mortuus in peccatis*, & opera mortua, dicere solet. Pravi motus concupiscentiæ, appetitus & affectus habent instar verminæ in hoc cadavere. Cæterum impotentia carnis in regenitis quidem fracta & debilitata, nec dom tamen penitus extincta est: unde, quoad vivunt, adversus carnem, quæ per sensus & affectus scandalizantes maximè se prodit, indefinenter luctantur, sæpiusque peccant, non quidem ut non amantes bonum, nec exosi malum, sed præoccupati & abre- Gal. 6: *pti: bonum, quod volunt, non facientes &c.*

2. Corruptio Naturæ æqualis est in universis Adami filiis communi lege ex ipso satis; pariter corruptionis servi sunt omnes nascendi sorte, ad quidvis mali proclives, ad bonum inepti: cetero pro diversitate mixturæ corporis, ætatis, sexus, educationis, regionis, conditionis &c. alii ad hoc, alii ad aliud vitii genus insigniter pravi repèriantur. Velut in quibus bilis prævalet, iracundi; in quibus sanguis, libidinosi, habentur: tùm verò huc juvenus, illuc senectus propendet &c. Atque hæc non majoris minorisve corruptionis argumenta sunt, sed solummodo ostendunt, quàm maximè velut æstuans mare

Eesai. 57: prorumpat, sordesque suas egerat, vel oppositis
20. quasi repagulis coërceatur.

3. Specialis causa incommodorum, quæ ex affectibus existunt, *incuria* est. Ferè namque non animadvertimus, quod res externæ bonæ vel malæ affectum moveant non ratione, omnium qualitatum, quas habere possunt varias, sed solum ratione relationis, quam habent ad nos, & modorum, quibus prodesse vel nocere possunt. Hinc adeo fit, ut de æ qualibet ex affectu, non qualis in se est, sed qua facie se commendat sensui, judicantes, veritatem & utilitatem, quasi unum idemque forent, confundamus. Ergo veritatem indaganti malè affectus in consilium adhibetur. Quinimò tantum abest, affectu, quid simpliciter & absolute bonum malumve sit, nos doceri, ut contra bonorum atque malorum externorum speciem sensui oblatam amplificet. Unde quò quid jucundius apparet, hòc melius etiam judicatur, tantoque avidius expetitur, affectu voluntatem nullò rationis præsidio munitam in obsequium rapiente.

4. Verissimè igitur Affectuum incommoda etiam rejiciuntur in defectum claræ cognitionis, firmique propositi, id unum semper agendi, & prosequendi, quod ratio & conscientia optimum judicaverint. Ipsa enim cognitio rei, firmumque animi propositum haud dubiè affectui modum ponerent, ejusque impetum inhiberent. Si rem quamque suâ naturâ satis exploratâ & usu æstimaremus, citò deservesceret insanus affectus atque studium, quò vel vanissima sectari solemus, verorum bonorum securi. Mensura ejus quod res quæque valeat maximè naturalis est indigentia, quam quia vulgò non Ratio, sed affectus definit, etiam pretia rebus statuuntur iniqua.

In Verri Verissimè Cicero de signis, qui modus est, inquit,
Lib. 9. in his rebus cupiditatis, idem est æstimationis. Et *e. 35.* Plinius ait Conchyliis & purpuræ omnis hora cæterit, quibus eadem mater luxuria paria penè etiam margaritis pretia fecit. Malis mox enumeratis remedia opportuniùs quæremus alibi.

CAP.

C. A. P. VII.

De Affectibus in specie : eorumque
Ufu.

§. I.

*Affectus distribuuntur in Primitivos ; qui ex nullis aliis
orti , atque adeo simplices sunt : & Derivativos ,
qui ex quibusdam illorum variè componuntur , illo-
rumve species sunt.*

*Primitivi sunt sex ; Admiratio , Amor , Odium ,
Cupiditas , Letitia , Tristitia.*

E X P L.

1. **S**IC missa distinctione vulgata affectuum ex
Appetitu concupiscibili & irascibili , quæ ipsâ
vocum insolentiâ & caligine horrifera est , omnium
clarissimè & simplicissimè affectus distribuit maxi-
mus hujus seculi Philosophus , in tractatu auro
contrâ caro , de *passionibus animæ*. Hæc Philoso-
phiæ pars , usum habens præcipuum in Ethicis ,
etiam inter præcognita disciplinæ moralis quàm
maximè commendari meretur. Nobis constitu-
tum est , affectuum genera breviter perlustrare , eo-
rumque usum ostendere , prolixiori illorum ex-
plicatione ex Authore mox laudato repetendâ.

2. Affectuum primitivorum ordo & distinctio
hac ratione deprehenditur. Quamprimum novi
quid & insolentis occurrit , animam percellit & ex-
traordinariam in attentionem rapit , quæ *admiratio*
est ; passionum prima , quippe mentem occupans
prius quàm illi compertum est , gratumne futurum
sit objectum , an ingratum , bonum , an malum.

Idem

Idem verò posthac ubi sub ratione boni vel mali consideraverit, amorem aut odium excitat. Bonum porrò vel malum, si obversentur animo ut futura, accendunt cupiditatem, bonum quidem habendi, malum verò amoliendi. Si denique ut præsentia cogitentur, Bonum lætitiâ; Malum tristitiâ parit.

§. 2.

Admiratio est subitanea animæ commotio, quâ fertur in attentam considerationem objectorum, quæ rara & insolita videntur.

U S U S.

1. **A**dmiratio nova discendi & investigandi deditur atque ardorem acuit, scientiarum inde Mater dicta: ut vel hinc quem adolescentis studia profectum sperare jubeant, haud obscure contigijatur: quando ad admirationem nati deprehenduntur, quotquot Viri docti evasere.

2. Altius memoriæ imprimat observata. Pertinax illa inspiciendi diligentia, spiritibus ad locum impressionis in cerebro factæ confluentibus, mentisque attentionem in rem novam defigentibus, poros cerebri confertim adaperit: hinc spiritibus impressionis vestigia facile relegendibus, recordandi promptitudo existit, ut quod pueri didicimus, etiam adulti & senes haud difficulter in memoriâ revocemus.

3. Quare qui ingenio utcumque valent, nec magnificè de se sentiunt, omnium maximè in admirationem feruntur. Qui rem sive scientiâ, sive usu compertam habent, admirari desinunt: quando etiam quæ consideratione dignissima sunt, familiaritate vilescunt. Qui nova sine admiratione in-
tuetur, vel hebes est suapte naturâ & stupidus; vel

ar-

arrogans, qui magnificè nimis de eruditione sua sentiens, talis videri cupit, cui nihil rari & insolentis offerri queat.

4. Admiratione eò destinata, ut rebus investigandis serviat, qui cupidine tenetur contemplandi nova, eo solùm fine, ut admiretur, à fine hujusce affectus aberrat, ordinemque naturæ pervertit, &, admirandi studiò in morem vertente, tandem in *Mirionem* abit, qualvis vel minimi momenti res promiscuè cæca curiositate demiraturus.

§. 3.

Amor est commotio incitans animam ad se voluntate, i. e. consensu, jungendum cum objectis, quæ ipsi convenientia videntur. Imò amans seipsum considerat ceu jamjam junctum rei amatae, conceptò quòdam veluti rotò, cujus se unam, rem amatam verò alteram esse partem, arbitratur.

Odiù ex adverso animam incitat, ut separari velit ab objectis, quæ offeruntur ut noxia. Ita qui quid odiò prosequitur, se solum spectat ut totum penitus à re, quam aversatur, separatum.

Amor vel secundùm existimationem rei amatae apud amantem; vel secundùm boni amabilis differentiam, dividitur.

Priori modo; Alius est Amor Benevolentiae, quò amans seipsum re amata majoris facit: Alius Amicitiae, quò amatum apud amantem tantidem est, atque ipse sibi: Alius Devotionis, quò amans amatum majoris aestimat se ipsò.

Posteriori modo; Amor alius est Honestatis, virtute amati nitens: Alius Utilitatis, ex commodo percipiendi, vel percepto, natus: Alius denique Jucunditatis è re sensui jucunda progenitus.

Odiù duplex est: Unum, quò deformia, quæ sensus offendunt, aversamur: unde Horror; vel Aversatio dicitur. Alterum, quò mala, quæ Rationi talia videntur.

videntur, ut sunt vitia, averſamur. Hoc nomen generis retinet.

Cupiditas eſt agitatio animæ, quâ incitatur, ut aſſequi velit rem, quam ſibi conducibilem cognoscit. Hæc igitur in futurum, opinione ſaltem concupiſcentis, ſe exporrigit, boni abſentis poſſeſſionem, præſentis conſervationem, mali cum præſentis, tum ejus quod evenire poſſe creditur, averſionem, exambiens.

Cupiditatis eſt ſtudioſum Vulgi varietate diſtinctio innumeras propemodum pareret ſpecies. Sic alia eſt Cupiditas cognoscendi, Curioſitas dicta; Alia cupiditas gloriæ, ambitio; alia divitiarum, avaritia; alia vindicta &c. Sed notatu digniores, æque validiores ſunt Cupiditatis ſpecies, quæ ex Horrore & Complacentia naſcuntur.

Cupiditas ex Horrore facit, ut anima quicquid habet virium, ad evitandum malum explicet. Hæc ubique vehementiſſima eſt, horrore à Naturâ deſtinato ad repræſentandum mortem repentinam & inopinatam. Hinc tamen nonnunquam vel ſolus vermiculitactus, aut tremuli folii ſtrepitus, aut umbra noſtra horrorem nobis incutiat, nihilo minus primo obrutu perinde commovemur, ac ſi periculum mortis evidens ſeſe ſenſibus offerret.

Cupiditas ex Complacentia eſt, qua anima appetit quod ſenſibus arridet. Hujus pro bonorum expetendorum utilitate majorem minoremve contingit eſſe vehementiam. Segniùs cupiditatem movent, quæ ſola ſpectandi voluptate delectant, ut pictura, flores &c. Vehementiùs, ad quæ expetenda ſtimulat natura: qualis eſt cupido, qua homo ſatis habens ætatis fertur in perſonam alterius ſexûs, quam ſibi perſuaderi alterum fieri poſſe ſeipſum. Vehementiſſimè verò, quibus natura carere non poſteſt: qualis eſt cibi, potûſque appetentia.

Cupi-

Cupiditatis porrò ex hominum ingenio, mixtura corporis, aetate, sexu, conditione, metu &c. mira est varietas, alternantibus indidem etiam ferè de eo, quod conducit, sententiis. E. G. Juveni voluptas; Seni victus præcipuè in votis est: Illi futurorum securo, rei faciundæ vel servandæ studium est nullum: Hic metuens ne desit, quo victiret, ad rem præter æquum attentior est. Unde ex profusissima juvenia sæpè nascitur triparca senectus.

Lætitia est jucunda animæ commotio, orta ex bono præsentis, quod sibi ut suum repræsentat. In hac boni cujusque possessio consistit, animâ nullum alium è bono, quod possidet, fructum percipiente: adeò quidem, ut absque lætitia sit, non magis bonò fruatur suò, quàm si eo prorsus careret. Unde qui re sua tenui lætatur, reapse ditior est illo,

*Qui Nummos aurumque recondit, nescius uti
Compositis, metuensque velut contingere sacrum.*

Lætamur bonò nostrò, eoque præsentis. Quòd si quèmlætari contingat malò alterius, eum necesse est malum alienum reputare bonum suum. Si lætetur bonò alterius, id ex amore suum arbitratur. Si lætetur bonò futurò, id eventus certitudine præsentis æquiparat.

Lætitia, quæ passio est, differt ab illa Intellectuali, quam anima in semetipsa excitat, bonò ab intellectu cognitò. Hæc quàm illa propius animam tangit, penitus afficit, plenusque occupat; quippe ex ipsamet etiam volente enascens, non aliunde superveniens: quâ si fruatur, etiam in tristitia felix esse non desinit. Exemplo sit, quem malefactorum recordatio contristat: hic secum cogitans, eam ipsam tristitiam resipiscentis esse officium & argumentum, lætitiâ è tristitia concipit. Dul-
cissimi

cissimi demum, solidissimique gaudii intellectua-
lis mater & nutricula est Conscientia, quæ im-
properium non facit.

*Tristitia est injucunda commotio, orta ex malo præ-
senti, quod anima sibi ut suum representat. Hæc
ægritudo est & languor animæ, in quo omnis
consistit incommoditas, quæ ex malo quovis no-
stro provenire potest: imò mala demum reapse
sunt, quod esse dicuntur, ubi animo ægrè fa-
ciunt.*

U s u s.

1. **A**ffectuum istorum quinque primitivorum
usus non est obscurus. Quicquid grati ac-
cidit, lætitia sive voluptate permulcet animum;
hæc amorem conciliat boni, quod voluptatem af-
fert: Amor denique repetendæ, continuandæ, ad-
augendæ voluptatis cupiditatem accendit. Contrà
si ingrati quid accidit, tristitiam: tristitia odium:
odium denique mali amovendi cupidinem parit.
Atque in his ferè salus & incolumitas animalis ver-
satur.

2. Id verò, quod notatu non indignum, passio-
nes maximè omnium ingratarum non minus præstant,
quàm quæ gratissimæ sunt, odium intelligo & tri-
stitiam: quia non minùs ex malorum præsentia,
quàm ex bonorum defectu, vitæ periculum est.
Imò majori sollicitudine malis amoliendis, quàm
voluptati fruendæ Natura prospexisse videtur; ani-
malibus plerisque eloquentiâ quâdam efficacissimâ
instructis, ad movendam commiserationem, im-
petrandamque opem, quoties tristitiâ & dolore op-
primuntur. Hinc querulus ille flebilisque vocis to-
nus, vultus mœstus atque dejectus, ejulatus, ge-
mitus, lachrymæ, suspiria, & id genus alia, quæ
certè vim habent maximam ad permovendum mise-
ratione animum, quò promptiùs opem feramus,
aut

aut maturius ab injuriâ cœptâ desistamus. Quod e-
tiam Scena verum testatur. Rectè enim Poeta;

*Ut videntibus arident, ita flentibus adsunt
Humani vultus. Si vis me flere, dolendum est
Primum ipsi tibi: tunc tua me infortunia lædent,
Telephe, vel Peleu.*

Hor. de
arte Poet.

*Format enim natura prius nos intus ad omnem
Fortunarum habitum: juvat aut impellit ad iram,
Aut ad humum mœrore gravi deducit & angit.
Post effert animi motus interprete lingua.*

3. Neque tamen omninò deest Natura ea in parte,
quæ gaudium atque voluptatem spectat. Oculi e-
nim ludibundi lætantium, vultusque blandè relu-
cens, aspicienti multò gratiores sunt. Quod læti-
tiæ effectum ad morum urbanitatem, mutuumque
placendi studium, quoddam quasi Naturæ illicium
est. Ergò, ut rem in pauca conferam, si & hîc Na-
turæ vocem exaudire & interpretari velimus, *Amo-
re & Odio, Lætitia & Tristitia* submonemur, ut
quod nobismetipsis aliisque bonum est, quantum-
pote, procuremus & conciliemus: malum ex ad-
verso tum à nobismetipsis, tum ab aliis, quàm di-
ligentissimè & officiosissimè amoliamur.

4. Diligentia porrò animatur à cupiditate, passio-
num omnium excitatissima. Verùm si feliciter, &
pro voto eam ferri velimus, *ἡρώων τῶν πραγμάτων*
veteribus prædicatam amantes, potestate voluntatis
ita definienda est, ut *ne velis, ubi nihil vales*: ne-
que prius cupiditati indulgeas, quàm quod præme-
ditatum animò destinaveris exequi aggrediaris: ne-
que eiam, quæ imprudentium fiducia est, fortu-
nam tibi spondeas. Secus, si quid interveniat,
quod destinata prohibeat, malè sana cupiditas tantò
plus anxietatis, atque doloris, frustrationi, casu-
busque inassueto dabit, quò vehementiùs antè con-
cupi-

De
Tranq.
c. 13.

cupiveris. Neceſſe eſt, inquit Seneca, leviuſ ad animum pervenire deſtituta cupiditatis dolorem, cui ſuccellum utique non promiſeris.

5. Devotionis amor, quasi viva Naturæ vox, nos edocet, esse *aliquid*, quod nobismetipsis carius & antiquius habere debeamus, & pro quo vel capita devovere non dubitemus. Hujus ergo passionis usus in Religione & Politica insignis est: quando ejus officia Religioni, Principi & Patriæ, vel ut compendiô dicam, Deo atque virtuti, modô quæque suô & gradu, debentur. Amore amicitia, velut animorum coagulô Societas humana carere non potest.

6. Cupiditas ex complacencia & horrore ; cūm decori atque turpiſi diſcrimen ſuggerit , nequicquam reclamante Atheorum impietate , qui omnia habent promiſcua ; tūm verò providam Naturæ curam , proſingulorum ſalute , generiſque humani conſervatio-
ne excubantem , arguit. Id quod manifeſtò appa-
ret in *horrore* , quò veluti datò ſignò pericula cavere jubemur ; & in *amore* , quò juſtæ ætatis homo in ge-
neris ſui propagationem propendet , & ex ſe genitos amplectitur. Ille *amor* , etiam ſpeciatiim ſic di-
ctus , ſi ſit paſſio omnium importuniſſima , oſtendit Naturæ ſollicitudinem de continuanda humana ſpecie.

Mor.
*Ench.*⁹
Eth. l. 1.
 c. 9.

Quod sanè facit tanto astu & industriâ, ac si mallet præstigiatrix videri, quàm homines ad opus tam necessarium non efficaciter rapere. Sed cùm finis hujus ardoris tam conspicuus sit, monemur ad quam mensuram sit moderandus. Hunc porro amorem vulgandum non esse Natura ipsa docet. Quanquam homines sexu discreverit, & præterea tales esse fecerit, qui certa quadam ætate se considerent singuli velut mediam partem unius Totius, cujus persona alterius sexûs debeat esse pars altera: non tamen facit, ut plus unâ mediâ parte opus esse imaginentur. Erunt duo in carnem unam.

1. Cor.
6: 16.

§. 4.

Affectuum Derivativorum quatuor sunt Classēs.

Prima Classis admirationis species habet; quæ sunt Existimatio & Despectus: Veneratio & Dedignatio.

Existimatio est admiratio magnitudinis vel valoris rei.

Despectus est admiratio parvitatē vel vilitatis rei.

Utraque ad nos relata maximè observabilis est, in Generositate & Humilitate. Illa facit, ut quis seipsum æstimet & æstimari velit ex sola virtute. Superbia huic opposita facit, ut bonam quis de se concipiat opinionem ex quavis alia causa, præter virtutis conscientiam.

Humilitas est qua quis infirmitatis suæ & errorum conscius ita modeste de se sentit, ut nemini se præferat, & quos in aliis notat lapsus, imprudentiæ potiùs quàm malitiæ tribuat, similiter & se lapsum olim, & porrò labi posse persuasus.

Huic opponitur Abjectio, vitiosa illa humilitas, quæ quis se usque adeo imbecillem, parumque constantem sentit, ut existimet, se plurimis rebus, quarum acquisitio ab aliis pendet, carere nequaquam posse.

Veneratio est inclinatio animæ ad eminentiam alterius reputandum, viresque, quibus prodesse vel nocere possit, metuendum, cum obsequiosa subiectione, favoris impetrandi gratiâ.

Veneratio vel Religiosa est; vel Civilis.

Religiosa, ubi anima venerationis suæ objectum usque adeo supra se constitutum admiratur, ut nullatenus cum eo comparari se posse sentiat.

Civilis, ubi anima venerationis objectum hætenus se superius ita existimat, ut nihilominus commune quid cum eo habere se non nesciat.

Dedignatio est affectus inclinans animam ad contemnendum liberum Agens, quod etsi benè vel malè faciendi capax sit, adeo tamen infra nos esse judicamus, ut neutrum facere posse persuasum habeamus.

Veneratio igitur affectus ex admiratione & metu;

G

hæc

sicut dedignatio ex admiratione & audacia sive securitate, compositus est. Neque nisi causas liberas venerari vel dedignari solemus, quas benè vel malè nobis facere posse constet; tametsi, utrum sint facturæ, nos lateat. Gentilitas quidem sylvas, montes, flumina, fontes &c. devenerabatur, Numina, quæ mortalibus benè vel malè faciendi potestatem haberent, illis adesse, stultè persuasa.

U S U S.

1. **N**on omnia promiscua habenda: alia pluris, minoris alia: quædam magni, nonnulla nihili: singula suo ex ingenio & utilitate esse æstimanda, docent mox enumerati affectus. Cum primis hominem quemvis aliquid esse, cõque numerari locò debere; quo sit supra omnem injuriam & contemptum, argumento sunt *Existimatio sui*, & *Despectus*. Cum enim tam facilè adducamur, ut nosmetipsos aliquid esse credamus, tametsi non ferè multum differamus ab aliis, æquum utique est, alios etiam homines non pejore esse loco apud nos.

2. Generositatis insignitior est *Uusus*. Parata enim semper exequi, quod Ratio & Conscientia probè informata præscribit, & *cuncta putans una virtute minora*, summæ felicitatis assequendæ studium acuit, animumque in adversis, nequicquam virtutem tentantibus, invictum præstat. Eadem quoque *Venerationis* & *Dedignationis* usum moderatur. Generosus enim, nihil virtute majoris, nilque vitio minoris faciens, quemque ex virtute æstimat atque veneratur, memor ejus quod habet Poëta;

*Aut virtus nomen inane est,
Aut decus, & pretium recte petit experiens Vir.*

Atque sic Generosus non solum demississimè & subjectissimè Deum venerabundus adorat, verum etiam uni-

unicuique pro ordine & loco, quem inter homines obtinuerit, honorem habet.

3. Contrà qui animi sunt abjecti & imbecillis, quia virtuti quævis alia antehabent bona, iniquissimi honoris dispensatores sunt, reverentes ut plurimum eos, qui solo contemptu digni sunt, & insolenter dedignant, quos omni laude cumulari oportuit. Tales sæpe ab extrema impietate ad superstitionem subito prolabuntur, mox per occasionem ab hac ad illam relapsuri, quippe à nullo vitii genere alieni.

4. *Venerationis* in Religione & Societate politica utilitas est permagna: nec obscure indicat eadem, esse Deum cunctis rebus, in primis autem homini, providentem, summe & religiosissime venerandum. Potestati deinde Civili, *ministra divinitus ordinata* Rom. 13. & gladio armata, necesse esse nos subjici, non tantum 4. 5. propter iram, sed etiam propter conscientiam.

5. *Designationis* usus maxime spectabilis est, ubi Vir amans veri, æqui, & iusti, nec minis, nec pollicitationibus, à laudabili proposito dimoveri se patitur. Sic Socrates Anitum & Melitum despersisse perhibetur, certus, quòd etsi occidere innocentem, lædere tamen non possent injuriæ exortem. Malim ego exemplo nobis esse Martyres, qui Christum impavidi quondam cecidere professi.

§. 5.

Secunda Classis habet affectus ex amore & odio nascentes.

Amoris species sunt Favor & Gratitude.

Favor amoris cum cupiditate conjuncti species est, quæ bonum cupimus evenire illi, in quem prona ferimur voluntate.

Gratitude amoris est species, excitata ab Actione alterius, qua nobis benefecisse, vel benefacere in animo habuisse, credimus.

Odi species sunt Indignatio & Ira. Illam nobis concitat, qui mali quid facit, quale quale est. Hanc concipimus in eos, qui non promiscue quibusvis, sed nobis speciatim malefecere, vel minimum, malefacere conati sunt. Eò igitur ab indignatione differt ira, quòd proficiscatur ab actione mala, quæ nos tangit, & cujus ulciscendæ cupiditate tenemur.

U s u s.

1. **E**X usu vitæ humanæ & civilis esse hosce affectus palàm facit eorundem definitio. Favor & Indignatio idem ferè significant, quippe affectus inde orti, quòd quædam rectè, alia secus ab hominibus fieri arbitremur. Universæ autem istæ passionēs Justitiæ, quæ commutativæ sive Explettricis, quæ distributivæ, sive Attributricis, indices sunt adèò diserti, ut partes quædam ejus videri possint. Cæterum morosi est & difficilis, indignari multum de rebus parvi momenti: Injusti est, indignari de rebus, quæ vituperari nequeunt: Inepti absurdique, non contrahere hunc affectum ad actiones humanas, Deoque indignari velle: quod audent, qui, *quam sibi sortem seu ratio dederit, seu fors objecerit, illa non contenti regimen Mundi & arcana Providentiæ carpunt atque maledictis insectantur.*

2. Iram utiliter à natura datam esse pluribus argumentis contendunt Peripatetici apud Ciceronem, ubi inter alia, *cotem fortitudinis esse dicunt, multoque in hostem, & in improbum civem vehementiores iratorum impetus esse: leves autem ratiunculas eorum, qui ita cogitent; prælium rectum est, hoc fieri: convenit dimicare pro legibus, pro libertate, pro patria. Hæc nullam habent vim, nisi irâ excanduit fortitudo &c. Addit tandem; Virum videri negant, qui irasci nesciat. Iram hæcenus usui esse, nemo prorsus cum ratione negaverit, dum vires ministrat, animumque* addit

addit propulsandi injurias, *Virtutis*, ut ille ajebat, non dux, sed *verus custos*, *rigidusque satelles*. Atamen nusquam facilior quàm in ira, nusquam periculosior, est excessus. Est enim in lubrico, incitataque semel in proclive labitur, sustinerique nullo modo potest: Unde judicium turbans sæpè sapius ad faciendum impellit, quod post fecisse pœniteat: quinimò haud rarò accidit, ut irâ incitato non perinde facile, atque irâ vacuo, minùsve commoto, injuriarum propulsatio succedat.

§. 6.

Tertiæ Classis affectus derivativi sunt, quos ducit Cupiditas. Eorū duæ sunt Species.

In prima numerantur *Spes*, *Metus*, *Securitas*, *Desperatio* & *Zelotypia*.

Spes est Cupiditatis gaudio mista species, qua moti nobis persuademus, id eventurum quod cupimus.

Metus contra est cupiditatis mœrore quodam mista Species, quâ nobis persuademus non eventurum, quod in votis est.

Securitas est spes consueque vigoris proficiens, ut omnem metum expellat.

Desperatio contra metus est omni spe destitutus.

Zelotypia ex cupiditate, tristitia & existimatione confata passio facit, ut quis sola suspitione ductus metuat ne bonum aestimabile, quod habet, vel habere concupiscit, pereat.

U S U S.

1. **S**pes impellit ad agendum. Cum verò spei fomes sit bonum sæpè possibile verius, quàm futurum, & insuper impetratu arduum, quo nomine metum asserre solet, Optimus Naturæ Parens animum spe obfirmatum adversus difficultates luctari voluit. Hinc ibi spei nullus est usus, unde

Heb. 6. *19.* omnis exulat metus. Quapropter spem eleganter anchoram dixit Apostolus: Anchoræ, nisi mari ventorum vi agitato atque turbato, usus non est.

2. Metum Natura dedit, ut cautè agamus & diligenter. Unde ejusdem in Civitate usus est præcipuè conspicuus, quando hominum sic est ingenium, ut spe præmii, metuque pœnæ duci ament; & adversus improbum, qui numerò vincunt semper, licentiam Reip. securitati vix aliter, quàm justæ ultionis metu consuli queat. Indigna autem Principe Viro vox est, oderint, dum metuant. Verissimum contrà illud Terent.

Adelph. 1. l. 41. ——— errat longe meâ quidem sententiâ
Qui imperium credat gravius esse aut stabilius
Vi quod sit, quàm illud quod amicitia adjungitur.

Ann. VI. 36. Exemplo sit Artabanus savus in pace & adversis præliorum exitiosus, de quo inter alia Tacitus; Adfluentibus paulatim qui metu magis, quàm benevolentia subiecti, repertis auctoribus, defectionis, sustulerant animum.

3. In securitate remedium est curis supervacuis. Desperatio animum ab instituto non successuro revocat; studiisque melioribus spem non frustraturis curas impendi jubet.

4. Zelotypia Custos est Boni, quæ maximi fieri merentur, tutandis addita. Sic laudabilis est Zelotypia, quæ Matronæ honorem integrum atque illibatum servat. Vix satis laudanda Præsidis Zelotypia, quæ ipsum Vigilacem, urbemque vel arcem, fidei atque tutelæ ejus commissam, inexpugnabilem reddit. Ex adverso turpis est & ridicula, exempli causâ, avari Zelotypia, qui thesauros, splendorem terræ lutum, irretortò oculò perditius spectat, iisdemque pernox indormit: cum falsè ridet Poëta,

Horat. l. 2, Ser. 3. Si quis ad ingentem frumenti semper æcervum
Porrectus vigilet cum longo fuste; neque illinc
Audeat esuriens dominus contingere granum.

Alte-

Alterius speciei affectus in tertia Classe annumerandi, sunt *Animi fluctuatio*, *Animositas*, *Audacia*, *Emulatio*, *Pusillanimitas* & *Consternatio*.

Animi fluctuatio metus est species, quæ animam, quid agat incertam, quasi in dubia lance retinens impedit, ne quicquam exequatur.

Animositas Cupiditatis latitudo fons species est, incitans animum ad agendum viriliter in executione rerum, quas meditatur, cujuscunque sint generis.

Hujus genera sunt *Audacia* & *Emulatio*.

Audacia animositas est, disponens ad viriliter agendum cum periculo.

Emulatio animositas est pro causa externa habens exemplum.

Pusillanimitas, animositati opposita, est languor sive frigus à rebus aggrediendis & gerendis avocans.

Consternatio, audaciæ opposita, stupor est animæ facultatem resistendi malis imminuentibus intercipientis.

U s u s.

1. **U**Sui est animi fluctuatio in dubiis, quoties deliberandum est diu, quod statuendum est semel, ne præcipites. Cavendum verò, ne animo indulgente affectus invalescat, tempusque rerum executioni dandum occupet. Cui malo remedium est in cognitione rerum, usu firmanda. Veri enim falsique notionum inopiam, varietatemve & obscuritatem, quæ fit, ut mens huc illuc impulsæ dubiis se expedire non possit, etiam Consilii penuriam consequi necesse est. Mature igitur vitæ totius in-
eunda est ratio talis, quæ extrema primis, media utrisque, omnia omnibus respondeant, & quid ex quo sequatur, quid usu venire possit &c. haud omnino incompertum sit.

2. *Animositatis* & *audaciæ* usum arguunt præclara gesta Virorum pro salute & libertate Principis, Patriæ, Religionis &c. asserenda. Audaciam spe-

Flor. l. i.
cap. 14.

sustentat, si non superandi periculi, saltem Boni
cujuscunque, quod etiam difficillima ausos & vel
mori certos consequi solet. Decius Mus Cos. *quasi*
monitu Deorum, capite velato primam ante aciem Diis
Manibus se devovit: ut in confertissima se hostium tela
jaculatus, novum ad victoriam iter, sanguinis sui se-
mita, aperiret. Unde & successus omen è fortuitis
accipit animosus, & Virgilio dictum, *audentes For-*
tuna juvat. Quod Providentiæ Divinæ casus for-
tuitos occulta ratione regentis argumentum est. In
certis igitur fluctuantem consiliis, utraque pro parte
rationibus æquo pondere certantibus, in eas propen-
dere posse, quæ animositate juvantur, haud abs re
arbitror. Hic Socratis fuisse videtur *Genius*: quod
quæ, suadente demùm animositate, agenda susci-
peret, auspiciò fieri crederet. Superstitionis au-
tem foret, huic in tantum parere affectui, ut quod
Plato Socratem fecisse meminit, domi delitescere
velis, non exiturus, donec animi alacritas ad ex-
eundum inviter. *Emulationis usum* commendant
præclara Virtutum exempla, ad quæ imitanda hoc
ipso affectu nos stimulat Natura.

3. *Puſillanimitatis usus*, si quisquam est laudabi-
lis, cernitur in rebus haud magni sanè pretii, quan-
tavis fortè ab aliis æstimentur. *Consternatio vox*
quædam videtur esse Naturæ quasi exprobrantis &
monentis, quàm turpiter eâ animi præsentia & ro-
bore careamus, quò adversus vim & incursum for-
tunæ inopinatum nos munitos oporteret: tametsi
imbecillitati nostræ arrogare non audeamus, quod
Sapiens ille Stoicus, de quo Poëta;

οὐρανὸν

καταβρύσσει

καὶ γὰρ

Si fractus illabatur Orbis,

Impavidum ferient ruinae.

Satis nobis cautum putamus, adversus istam animi
ægritudinem, primùm si meditata nobis sint hu-
mana, *Nihil*, inquit Seneca, *nobis improvisum esse*
debet.

debet. In omnia præmittendus est animus: cogitandum-
que, non quidquid solet, sed quidquid potest fieri. *Epist. 91.*

Deinde si hominem ad humana paremus, & assue-
scamus futuris malis, & quæ alii diu patiendi levia
faciunt, nos diu cogitando. *Idem R-
pist. 76.*

§. 7.

Quarta classis habet affectus derivativos ex lætitia &
tristitia variè combinatos. Unde quatuor existunt
species. Primæ speciei sunt; Irrisio, Invidia,
Commiseratio & Congratulatio.

Irrisio lætitiæ odio permixta species est, quam excitat
leve malum, quod non indigno accidisse putamus.

Invidia est tristitia cum odio, quæ concipitur è bono,
quod indigno contigisse arbitramur.

Commiseratio species & tristitiæ amore mixta, è ma-
lo nata, quò indignos constictari credimus.

Congratulatio lætitiæ est cum amore, orta è bono,
quod illi, quem eo dignum arbitramur, evenisse no-
strâ quodammodò interfit.

U s u s.

Irrisio ad leviculas humanæ vitæ sordes exter-
gendas maximè prodest. Hinc nata Poësis Sa-
tyrica: ut ex amore, Epica; ex Audacia, Tragica:
nec enim Satyrica tam ipsa vitia, quam eorundem
circumstantias, quæ ridiculi quid habent, insecta-
tur. Irridens autem odio habet malum, sed levi-
culum: læratur id accidisse non indigno. Sic me-
ritò suò ridentur, qui affectatâ morum insolentiâ
leve sibi malum accersunt, ipsa irrisione cautiore
posthac futuri. Velut si Thraſonem composito ad
fastum incessu offensantem & lapsantem rideas.
Illum verò, qui gravius patitur malum tanquam eò
dignum deridere; praviæ indolis & odii in personam
inexcusabilis, argumentum est. Qui de fatuorum
aut

aut maniacorum spectaculis & deliriis voluptatem capit, sanitatem mentis non magno satis æstimat, alioqui mente captos non minùs quàm alios calamitate quavis afflictos, miseraturus.

2. Invidia ferè dolorem significat de rebus alterius secundis. *Invidus alterius macrescit rebus optimis.* Quo sensu vitium communi hominum odiò dignum, & perversæ indolis indicium est. Hic autem loci nobis affectus est, quem genere suo vitiosum negant Philosophi, usum ejus ad rectam munerum & honorum distributionem referentes. Quæ ratione justam incurrere censetur invidiam, cui indigno & inhabili munus publicum defertur. Injustissimâ autem invidiâ laborat, qui dote quavis Naturæ locupletatus alios antecellit: rem enim, ut par est, æstimanti satis ad eam dignitatis habere videbitur is, in quem Deus illam conferre dignatus est.

3. Commiserationis affectum T. O. Naturæ Parens nobis ingeneravit, Primùm, ut homines humani nihil à nobis alienum putemus, alique alios, quòcunque malò conflictantes, aut consolando, aut consilio, aut re juvemus. Numquid ergò & peccantis miserescet, qui suo scelere, malorum maximo non indignus est? Quidni? Distinguan enim hominem ab humanitate, vel personam à natura. Ut enim qui peccat homo scelere suo dignus sit, indigna tamen est humanitas, quæ turpitudine foedetur. Si nequam homo, quem sua culpa mendicare cogit, stipem roget, non homini sed humanitati, dabo. Deinde justitiæ & innocentiz, in qua per improbos seculi mores viro bono non semper satis est præsidii, hoc affectu utcunque cautum voluit Natura. Anne enim sine cordis ægritudine infontem opprimi, indignè tractari, supplicio plecti &c. videam? Quid æstus ille viscerum, quid gemitus, querimoniz, suspiria ab imo pectore petita commiseranti, nisi horrantis quasi Naturæ voces ineloquaces,

ces, ut innocentī advocatus adesse velim ? Sic invidia pariter & commiseratione, tanquam ipsius Naturæ voce commonemur atque doceimur, esse aliquid *justum, & injustum; æquum & iniquum*, hocque esse fugiendum, illud amplectendum.

4. Qui benefaciendi studiō præcellit, illi prosperitatis suæ communis omnium congratulatio & applausus debetur. Quapropter hujus affectus is maximè usus est, ut ad mutuum beneficentiæ certamen provocet homines.

Secundæ speciei sunt *Satisfactio, Pœnitentia, & Morsus conscientiæ.*

Satisfactio est plausus quidam animæ rectè factorum conscientia exultantis.

Pœnitentia mœror est animi è malefacti conscientia dolentis.

Morsus conscientiæ est tristitia dubitantis, utrū quod facit, fecitve, honestum sit, an diversum.

U s u s.

1. **S**atisfactio, sive Acquiescentia in seipso, dulcissimus est fructus, quem animus è rectè factorum conscientia percipit. Ex adverso pœnitentiæ dolor, quem peccata inurunt animo, tantus est & tam acerbus, ut miserius nihil fingi queat homine, cui fervens æstuat occultis animus, semperque taceñdis. Peccanti dolet peccasse, quia voluntate peccat, quâ nihil magis suum habet, & inde quæ turpis facti malitia est, eandem & suam esse persuasum habet conscientia testimonio, ejus tam sancta fides, ut nulla argumentandi arte labefactari, vel eludi possit. Scilicet in impium, cui sæpè flagitii impunitas est in foro civili, hæc à Deo pœna certissima constituta. Quapropter Acquiescentia & Pœnitentia non solum libera voluntate fieri quàm plurima; quem enim pœniteat ejus, quod nullatenus è voluntate

tate pendet? *Sed etiam honestum à turpi naturâ discrepare*, manifesto ostendunt. Imprimis autem utraque studio integritatem & tranquillitatem conscientia tuendi inservit.

De passionib.
Part. III
Art.
190.

Cæterum è factis inutilibus, parvi momenti, parumve profuturis, vel indubitate turpibus, quæ sita satisfactio solidæ pietati plurimum obest: inanis quippe fiduciæ, stultæ arrogantia & hypocritæos nutricula. Quod, inquit Philosophus suprà laudatus, specialiter observari potest in iis, qui, cum se religiosos putent, hypocritæ demum & superstitiosi sunt, id est, quicquid sapè frequentent templa, multas recitent preces, capillos tonsos habeant, jejunent, eleemosynas largiantur se plane perfectos putant, & sibi imaginantur, se ita in gratia apud Deum esse, ut nihil facere queant; quod ipsi displiceat, & omne quod ipsis sua passio suggerit, bonum zelum esse; etsi quandoque suggerat maxima crimina, quæ in homines cadere possint, ut prodere urbes, trucidare Principes, exterminare integros populos, ob id solùm, quod suas opiniones non sequantur. In quos hæc dicta velit, ignorari non sinunt tristissima experimenta.

— quid rides? mutato nomine de te

Fabula narratur.

3. Morsus Conscientiæ usum præbet duplicem. Primum enim veri indagationem juvat, animò fluctantem ad expendenda rerum momenta incitans, ut quid honestum, quid turpe, quid amplectendum, quid fugiendum sit, constet, deinde impedit, ne quid dubitante conscientia fiat, vel factum repetatur aliàs, quamdiu quale sit non liquet. Neque tamen hac sua utilitate adeò commendabilis est, quin ejus sentiendi nullam dari causam præstet: quia qui dubitans agit, peccandi periculo se objicit, eoque ipso jamjam peccavit, summum malum, puta peccatum, non summò odio aversatus. Unde & Ratio probat illud Apostoli; *Unusquisque in animo suo* Rom. 14. *plenè persuasus esto. Et quicquid ex fide non est, peccatum est.* 5. & 23.

Ter-

Tertiz speciei sunt Gloria & Pudor.

Gloria ex opinione vel spe laudis apud alios obtinenda:

Pudor ex opinione vel metu vituperii proficiscitur.

Illa lætitiæ, amoris sui ipsius & existimationis;

Hic tristiitiæ, amoris sui ipsius & qualiscunque despectus, species est.

U s u s .

1. **Q**Uàm præstabilis sit horum affectuum usus, facile est, attendentem penitus videre. Primum enim virtutis sunt incitamenta. *Gloria* quidem ad præclara suscipienda & gerenda stimulat spe: *Pudor* à turpibus absterret metu. Sæpè enim videmus fractos pudore, qui ratione nulla vincerentur. Ut proinde arx quædam virtutis atque vallum videri queat. *Diogenes* adolescentulum videns rubore perfusum, confide, ait, fili; huiusmodi est virtutis color. *Laert.* in *Diog.* Unde nec in pessimos, nec in optimos cadit pudor. Virtutis enim cultores strenui contemptu superiores contemptum ipsum contemnunt. Rursus autem, nullo moveri contemptu, in improbis summus improbitatis est apex: *Impunitas* *Tusci* 4. enim peccatorum data videtur eis, qui & ignominiam & infamiam ferunt sine dolore.

2. Deinde cùm uterque affectus indicent, communi hominum iudicio potius, quàm proprio, standum esse in rebus quæ ad morum venustatem & obedientiam civilem pertinent, tum maximè pudor ille naturalis, sive verecundia, voluptates corporis homine, qui cæteris animantibus longè præstat, indignas, atque ea propter meritò contemptui esse oportere, docet.

3. Porro quia instinctus ille gloriæ atque pudoris etiamnum vim qualemcunque in nobis obtinet, etsi ubique terrarum quasi maximum quendam Turpitudinis Magistrum atque Fautorem habeamus populum, ac omnem undique ad prava consentientem mul-

multitudinem, id ipsum indicio est; humanum Genus, è statu, quò quidem optimò conditum erat, concidisse. Tautum, ut res nunc sunt humanæ afflictiſſimæ cavendum, ne pudore subacti, vel popularis gloriæ aucupio illecti quod verè honestum est deseramus, qui perniciosissimus harum passionum foret abusus. Rectè Cicero, *mihî quidem*, inquit, *laudabiliora videntur omnia, quæ sine venditione & sine populo teste sunt: non quo fugiendus sit (omnia enim benefacta in luce se collocari volunt) sed tamen nullum theatrum virtuti conscientia majus est. Quæ si tibi ob rectè facta plaudit, cæterorum mortalium sibilos & obloquia facilè contemnit. Illos æquum est pudore suffundi, qui prava faciunt, non qui ob benefacta malè audiunt, aut iniqua patiuntur. Est enim vera virtus paucis contenta iudicibus, multitudinem consultò ipsa fugiens, rursumque ei ipsi suspecta & invisa.*

Quartæ Speciei sunt, *Fastidium, Desideriū & Hilaritas.*

Fastidium tristitiæ species est, ex eadem re, quæ ante nobis latitiam dedit, enascens.

Desideriū tristitia est ex privatione vel amissione boni, quo frui quondam voluptati erat, desperata ejus recuperatione.

Hilaritas latitia est ex recordatione præteritorum malorum, quibus nos velut onere levatos sentimus.

U S U S.

1. **F**astidii utilitas ad temperantiam refertur. Ferè tandem fastidio esse solent, quorum usui justò plus atque diutius indulſimus. Comparata namque est ita hominum natura, ut pleræque omnes res, quas possidemus, bonæ non sint nostri respectu, nisi ad tempus, diuturniorique usu fastidium pariant. Id quod maximè apparet in cibo & potu, qui

qui profunt donec viget appetitus, mox obfuturi, ubi iste defecerit. Adeò nihil suave, quod perpetuum, in hoc rerum genere, ut etiam voluptates commendat rarior usus. Monent igitur, animum ad ea convertendum esse bona, quorum nulla est satietas.

2. Desiderium curam acuit atque diligentiam servandi bonum, cujus amissio tam graviter cruciat animum. Hoc affectu, & sæpè sæpius ignavo questu prosequimur fato functos Amicos, benè de nobis meritos, aliosque formâ, morum elegantia, animi dote &c. præstantes; unde Poëta;

*Quis desiderio sit pudor aut modus
Tâm cari capitis —————
Multis ille bonis flebilis occidit :
Nulli flebilior, quàm tibi.*

*Hor. l. I.
Od. 24.*

Hæc passio prima docuit mæstos mortales, pompam instruere funebrem lamentabilibusque vocibus & threnodiis dulcem illam & decoram animi amaritudinem majorem in modum accendere: memoriam mortuorum elogiis & monumentis æternitati consecrare; tandemque (quod omni funere magis dolendum est) eò insanix proficere, ut templa defunctis & aras exstruere non dubitarent, & tanquam si dii facti essent, simul ac homines esse desissent, cultu eisdem religioso venerari, vota iisdem nuncupare, ipsamque adeo vitam humanam, atque Religionem fœdissima superstitione & idololatria, conspurcare. Qui omnium pessimus est hujus passionis abusus.

3. Hilaritatis usus præcipuè ad tolerantiam spectat. Eò enim lubentiùs & modestiùs incommoda nobis ferenda sunt, quòd olim meminisse juvabit, & tantò suaviori voluptate quæ fecimus damna, compensantur. Jucundi sunt acti labores: unde & senibuscam vitæ suæ scenam, quæ casibus fortunæ ad-

ver-

veræ distincta est, subinde explicare quàm maximè volupe est. Eo argumenti genere ad socios usus esse videtur Æneas; *Durate & vosmet rebus servate secundis.*

C A P. VIII.

De Habitu Animi.

§. I.

Ad materiam Virtuti subjectam etiam pertinet Habitus: quo nomine omnes complectimur animi dispositiones atque inclinationes, easque sive adnatas, sive contractas, quæ modò quocunque iudicium mentis pervertere, moresque corrumpere valent.

E X P L.

1. **Q**uia *habitus* nomen latiori significato acceptum Latinis *qualitatem & formam* cujuscunque rei denorat; eadem notione liceat nobis comprehendere quasvis animi dispositiones, undecunque inductas, quæ ad iudicium flectendum, moresque mutandos plurimùm valent, variisque characteribus in vultu, gestu, sermone, actionibus &c. sese produnt.

2. Cui rei argumentum dicimus illam opinionum de rebus maximi momenti varietatem, quâ factum olim, ut Vulgus Philosophorum studia in contraria scinderetur, dum naturæ quisque suæ & indolis inclinationem veriùs quàm Rationis ductum in vero dijudicando sequi mallet. De summo bono atque fine hominis quisque prout animo affectus esset, ferè sentiebat: unde tanta sententiarum morumque coorta est varietas, ut locum inveniret illud Poëtæ;
quot

quot capitum vivunt, totidem studiorum
millia. . . .

Qui ingenio erant severo, rigido, moroso, querulo, & arroganti, Stoæ placita amplexi sunt. Qui ingenio erant molli, ac tranquillitatis & otii amantes, Epicuri sectam sequebantur. Tandem quibus ingenium erat civile, modestum & liberale, illi Peripateticis operam dabant.

3. Moribus autem variandis & distinguendis plurimum valere habitum animi, prudenter observant Historici: qui acta Principum enarraturi, indolem illorum atque effigiem, quam natura & educatio iniecit, perpetuo intuentur, nec unquam ferè res ab ipsis gestas commemorant, quin de animi qualitate, quam actiones exprimere solent, nonnihil aspergant. Affectus quisque in animo prævalens omnes ejus actiones & decreta, tanquam hedera, circumsepit, neque ferè quicquam purum invenias, quò illa claviculas suas non imprimat. Hinc illæ de rebus gestis descriptiones *Africani & Catonis Majoris* apud Livium: *Tiberii, Claudii & Neronis*, apud Herodianum &c. Qui etiam Historiæ usus quidam est in moralibus.

2. Ex proclivitate judicandi de re qualibet, ut sensus dictat, velut è fontis vena plerique omnes vitæ humanæ errores promanant. Inde fit, ut id ipsum, quod sensu percipitur, ejusve simile quid rei cuique naturâ inesse nobis persuadeamus, E. C. colorem tabulis pictis, odorem aromatibus, saporem cibis; dolorem pedi allisu fortè vulnerato &c. quo casu vera falsis, sensum sensûs causis, confundentes idem erramus quod infans, qui ex aciculæ punctu dolens, aciculæ dolorem aut dolori non absimile quid inesse persuasum habet.

3. Atque hæc quidem errata hæctenus levia videri possunt, nisi nobis nimio plus amoris rerum corporarum servientibus turpissimæ servitutis jugum adstringerent, eoque nos tandem insanix adigerent, ut quem cultum amoris & fiduciæ Creatori debemus, inconsideratissima temeritate in res creatas transferamus.

4. Idem & in *Imaginatione* usu venit. Propendet enim animus ad credendum, esse vel fore, quæ nec sunt, nec erunt unquam. Quemadmodum igitur sensu exteriori incautus fallitur animus circa rerum naturam; sic imaginatione circa earundem existentiam: de qua si securus reddatur, errandi nec finis nec modus erit. Atque hinc nati sunt Somniorum interpretes, Enthusiastæ, Fanatici, Manes, Umbræ post fata redeuntes, & quid non? Hinc etiam vulgò homines ex se suoque ingenio æstimant alios quosvis. Homo simplex parem in aliis simplicitatem fingit: astutus similem aliis astutiam inesse credit. Sic Deus improbo, hæc, inquit, fecisti, & filii: *Psalm. putasti, me omnino tui similem exiturum.* Quo errore cæcati nonnulli Deo affectus vehementiores, desideria inania, velleitates &c. adscribere non erubescunt.

5. Quando naturâ ita est comparatum: quid mirum, si toto animo propendemus ad expetendum, quæ animali prodesse putamus, nihil non ad corpo-

ris commoda referentes? Unde existit turpis illa nostri effeminatio, qua vix unquam satis ad Rationem & Legem, *viatu quidque petity sit melius docentem*, attenti, non jam modò vacillamus incerti, num ductui ejus obsequi, an nuncium mittere velimus; sed usque & usque magis eò, quò sua quemque passio trahit, inclinamus. Atque hoc quidem nunquam satis dedignandum vitæ humanæ propudium est.

6. Quòd si originem istius propensionis aliùs repetere lubeat, insignes quosdamprehendemus naturæ humanæ defectus, quibus à lapsu communis omnium parentis, Adami, laborat. 1. Mei non amplius ita est promptum, ut erat olim, proponere sibi cognoscenda: quinimò, in quarum rerum notitiam quàm maximè incumbere expediat, sæpius non discernit, in disquirendis supervacuis ac nihili rebus ridicula curiositate se torquens, & ad res maximè cognitu necessarias aut non advertens, aut contemptim & raro despectens, aut studium certè suum vix unquam seriò applicans. 2. Insitas rerum notiones non amplius ita, ut fieri oporteret, distinctè & separatim perpendit. 3. Cogitanti non perinde facilè, ac velit, nec sponte succurrunt, quæ notionibus illis comprehenduntur. 4. Nec amplius eadem cura atque diligentia ad ea, quæ primis rerum notionibus continentur, attendit; tametsi nec revelatio Prophetica Scripturæ S. segnitiei nostræ hac in parte desit. 5. Non amplius eam sui potestatem habet, ut liberam judicandi eligendique facultatem intra limites claræ & distinctæ perceptionis cohibeat. 6. Corpus sibi junctum corporisque motus non amplius ita prorsus in potestate tenet, ut ad ejus voluntatem proutque se convertant, Rationisque imperio obsequantur. Eò accedit, quòd infantes nati, & ante Rationis usum solis sensibus & casui, velut actionum nostrarum ducibus, assuefacti imperium

assuefacti imperium

affectui in nos permittimus, idque longo usu, nostrâque indulgentia magis magisque stabilimus.

7. Hisce tot incommodis reperiri medicinam, testes sunt, quorquor veritatis amore, virtutisque studio delectantur: quod tamen non humanæ artis vel industræ specimen; sed gratiæ divinæ beneficium est. Ut enim res quæque in eum statum, quem non ex se, sed alterius beneficio obtinuit, seipsam restituere nequit: sic homo, quas primitus sibi non dederat imaginis divinæ dotes, reddere sibi non valet.

§. 3.

Habitus nativi singulorum proprii sunt impressiones corporeæ ex alimenti & sanguinis temperie in utero matris factæ, quas similia sequi iudicia & mores, exempla probant.

Tales sunt Ἰδιοσυγγεγούα & Ἰδιονόμια.

Illâ est impressio ex totius fere corporis temperamento pendens, quæ animi perceptionem quibusdam in rebus contemplandis impedit vel pervertit.

Hæc est impressio, qua quis re quæpiam singulariter, eumque in modum afficitur, ut summam fere humanæ felicitatis & perfectionis in ea positam esse, cæterosque mortales, qui ea carent, miseros, aut saltem turpiter mancos, existimet.

E X P L.

1. **E**xemplis hæc breviter illustrâsse satis habebimus, altiore horum pathematum indagatione Physicis relinquendâ. Ἰδιοσυγγεγούας exemplum præbent illi, quibus ad Mathematicas scientias quasi natis, earundemque non vulgariter doctis lavum planè & ineptum est ingenium ad Theologica & Metaphysica, adeò quidem, ut quid mentis notio

sibi velit, ignorare se liberè profiteantur, vel percipere posse negent.

2. Ἰδιοπαθείαι; exemplum est in illis, qui unam aliquam artem sic depereunt, ut quicquid reliquarum est artium ipsis sordeat, earumque cultores contemptui sint. Hinc undique arti suæ defensores & laudatores parant, omnibusque de rebus ex ipsa iudicant. Is animi morbus ferè habet Alcumistas, ut etiam Scripturam Sacram instituto suo faventem somnient: universam Naturæ Scientiam è fornacis experimentis petendam existiment &c. Eòdem pertinent Sympathia & Antipathia, & alia propemodum innumera Idiopathias genera, quibus naturâ homines in amorem hujus, odium illius, veluti rapiuntur, & pro insito affectu diversum à rebus iudicant.

3. Dicat fortè aliquis; quæ naturâ nobis insunt, nulla ope humana esse superabilia, frustra proinde esse, qui in Ethicis de hisce præcipere velit. Id equidem fateor esse verissimum de iis, quæ legibus universi corporum ambitus quasi peremptoriis tenentur: quale est, quod Aristoteles de gravitate lapidis hîc objicit, qui vel millies in altum projectus, sponte tamen naturæ sursum ferri non assuescet. Scûs res habet in iis, quæ vel ex unione animæ & corporis in homine; vel ex relatione motuum organorum ad objecta sensibilia, pendent. In his enim moderandis vel inhibendis industriam & usum non nihil valere, experimenta testatum faciunt. Sic algorem & æstum consuetudine tolerari, quis nescit? Et alterum illud, de relatione motuum organorum ad objecta sensuum, vel in bestiis observare est. Canis visa perdice naturali impetu in eam fertur: displosi sclopeti crepitu ad fugam incitatur. Attamen constat, arte humana assuesci canes venaticos, ut visa perdice intra vestigia sua consistent, & posthac audita sclopeti displosione in eam incurrant. Quòd si motus cerebri in animantibus Ratione destitutis

haud

Nicom. 1.
2. 6. 1.

haud ita magna industria mutari possunt; quidni idem faciliori negotio in hominibus procederet, cum primis accedente ad industriam longo usu?

§. 4.

Habitus acquisitus dicitur Consuetudo, quæ est Impressio usu firmata, animam inclinans ad judicandum res esse veras, bonas, decoras &c. eò solum quòd sapius sic existimavit, & juxta eandem opinionem egit.

E X P L.

1. **C**onsuetudine fit, ut E. C. Antropophagi humana carne vescantur sine horrore; quem morem alii plus quàm ferinum detestantur: lupo lupinam non est, nisi rabida fame subactus. Consuetudinis utramque in partem maximam esse vim, nemo nescit: unde *altera natura* vulgò dici consuevit. Inveteratæ opinionès communium notionum locò habentur apud plerosque, & vivendi ratio in morem vertens, quantumlibet mala, vim legis cujusdam naturalis obtinet.

2. Moris induendi vel exuendi ratio in eò vertitur tota: nimirum, quia mens & corpus in homine non alio, quod sciamus, vinculo continentur, quàm mutuarum actionum & passionum reciproca-tione, de qua suprà Cap. 11. §. 3. n. 17. 18. Mirabili quadam actionum & passionum serie & catenatione certi motus corporis certis cogitationibus animi junguntur ita, ut motuum illorum cogitationumque crebrior iteratio nexum magis magisque adstringat. Inde adeò fit, ut eodem motu spirituum, vestigia cerebro impressa relegendium, repetito, menti quoque eadem denuò succurrant cogitationes & affectus. Quapropter sciri nostrà haud parùm refert, quos motus quibus cogitationibus jungamus,

mus, vel pridem junctos, usque familiares factos
sejungamus, atque ita consuetudinis vim infringa-
mus. In eo namque ad morum sive emendationem,
sive corruptionem plurimum inest momenti.

§. 5.

*Habitus sive mores pro sexu, ætate, fortuna &c. va-
rios contrahimus, viventes vel privi & singuli; vel
aliis quacunq; societate conjuncti: quod præcipue per-
tinent mores, quos educatio & conversatio concili-
ant.*

E X P L.

1. **M**orum diversitatem è sexu, ætate, fortu-
na, vitæ conditione &c. longum foret e-
disserere. Argumentum hoc prolixè executus est
Aristoteles, & ex ipso D. Amyraldus. Super hac re
quoque Poëtam sic instruit Poëta;

Rhet. 1.

2. 6. 12.

13. &c.

Ethic.

Christ.

Tom. 2.

pag. 654.

&c.

Hor. de

Arte

Poët.

*Ætatis cujusque notandi sunt tibi mores,
Mobilibusque decor naturis dandus, & annis
Reddere qui voces jam scit puer, & pede certo
Signat humum, gestit paribus colludere, & iram
Colligit ac ponit temerè, & mutatur in horas.
Imberbis juvenis tandem custode remoto,
Gaudet equis canibusque, & aprici gramine campi:
Cereus in vitium flecti, monitoribus asper,
Utilium tardus provisor, prodigus æris,
Sublimis cupidusque, & amata relinquere pernix.
&c.*

2. Quod ad consuetudinem attinet, quam in so-
cietate viventes contrahimus, nemo ignorat, quan-
tum hinc valeant educatio & institutio, amicitia, fa-
miliaritas, patriæ mores, studiorum ratio, libro-
rum lectio, per quam cum absentibus, imò vivi-

cum,

cum mortuis quasi conversamur. Educationis, quippe cum notabili aliquo affectu conjunctæ, præcipua vis est, solent enim qui puerorum mores formant, amorem illis & existimationem earum ingenerare rerum, quibus animos ipsorum imbutos velint; quasi permultum intersit, affectu prius imbui animum, quam cognitione rerum. Unde persuasi quæ didicere, verissima & optima esse, non solum magno studio ardoreque animi eadem defendere religioni habent, sed etiam contradicentem & meliora monentem ferre non possunt. *Acclinis falsis animus meliora recusat.* Quô pacto quam plurimi homines fœdissimis erroribus & moribus, è prava educatione contractis, insenscunt & immoriuntur. Hinc tandem imperitiâ magisttorem primi virtutis veritatisque igniculi in alumnorum animis quasi sepeliuntur, vel penitus extinguuntur, ut vanitati veritas, & opinioni confirmatæ natura cedat.

3. Promiscuam librorum lectionem, insuper habito discrimine, utilia præcipiant, an inutilia, ad judicium & mores corrumpendum valere, plus satis comprobatur experientia. Ex præproprio & nimio studio legendi libros controversiarum de Religione, quosdam videas evadere impudenter audaces, fastidiosè superbos, molestè garrulos, pertinaci maledicentia, perpetuoque contradicendi studio intolerabiles: ut quicquid dicas veri bonique, sive ajas, sive neges, ipsi tendant in contrarium: in quovis vitæ genere contentiosi & refractarii manentes &c. Poësin Gentilium non nemo Veterum appellavit *Vinum Daemonum*, eò quòd aureò quasi poculò venenum propinet incautæ juventuti. Poësis quidem Saryrica, nisi justò sit dicacior & acerbior, extergendis humanæ vitæ sordibus conducit. Comica, modò absit lasciva & scurrilis petulantia, *vita humane speculum* dici meruit. Verùm quotulusquisque adolescentum hîc satis est cautus & providus? *Heic qui*

qui cavet ne decipiat, vix cavet, cum etiam cavet.
 Et cum cavisse ratus est, saepe is cautor captus est.
 Utplurimum enim, quos designo, Scriptores tur-
 pium rerum sunt διδασκαλοι, quod ipsimet non
 1. Cor. 15. ignorant. Menandri Comici versus est, quem A-
 33. Me- postolus citat;
 mander in
 Thaide.

Mala verba mores haud malos adulterant.

Nec enim dictu facile est, utrum mala exempla
 pejus noceant, an malorum exemplorum elegans &
 artificiosa expressio, quâ præter turpem spectandi
 & audiendi voluptatem vix aliud obtinetur, quam
 ut artificiosè peccare docearis. Hic spurcissimus
 In Raris. Aristophanes in se, dum taxat Euripidem, testimo-
 nium dicit. Cum enim Euripides, quem cum Æs-
 chylo in scenam induxerat, interrogâset, defen-
 dendæ Phædræ suæ;

*Num carminibus fortasse meis, qua fecit Phædra, re-
 clamant?*

Respondet Æschylus;

*Minime verò: sed oportet quod sordum est, celare
 poetam.*

*Nec producere vel describere, nam qui audit dicere,
 Doctor*

*Pueris existit, sed pubem ingeniosam carmina ducunt.
 Bonæ dicere nostrum est omnino.*

Hinc Xenocrates apud Plutarchum lepide suadet ea-
 propter juvenibus magis quam athletic amphotidas
 dari; ut enim illorum aures plagis, itidem & horum
 mores sermonibus vitari.

§. 6.

Animi dispositio & affectio certis characteribus & signis in vultu, gestu, totoque corporis habitu, sese patefacit.

E X P L.

1. **A**Rctissimum fœdus, quo mens & corpus in homine sociantur, & strictissimus ille actionum mutuarum nexus, faciunt, ut affectus animi certis sui indiciis & signis corpori impressis se prodatur. Non vides, inquit Seneca, si animus languet, trahi membra, & pigre moveri pedes? si ille effœminatus est, in ipso incessu apparere molli-Ep. 114. tiem? si ille acer est & velox, concitari gradum? &c. Unde nata Physiognomia, ab inquinamentis, quibus vana superstitio artem fœdavit, repurgata non omninò damnanda videtur.

2. Artis usum exemplò commendat Pythagoras: de quo A. Gellius; Jam, inquit, à principio adoles-Noë. centes, qui sese ad discendum obtulerant, ἐφύσιοντο Attic. lib. 1. cap. 9. μόνας. Id verbum significat, mores naturasque hominum, conjectatione quadam de oris & vultus ingenio, deque totius corporis filo atque habitu, sciscitari. Eum qui exploratus ab eo idoneusque fuerat, recipi in disciplinam statim jubebat, & tempus certum tacere; non omnes idem, sed aliud aliis tempus pro æstimato captu solertia. Quemadmodum autem corporis lineamenta animi inclinationem & habitum universè dignoscendum præbent, ita oris, oculorum, aliarumque partium motus & gestus, insuper aditus & tempora, & præsentis dispositionis voluntatisque signa declarant. Ut enim lingua aures ferit, sic gestus oculos alloquitur. Id quod Veteratores, hominesque astuti, quorum oculi vagabundi frequenter in aliorum vultu & gestibus hærent, in commoda sua vertere nòrunt: in quo etiam prudentiæ civilis pars non postrema versatur.

CAP. IX.

De Bono & Malo.

§. 1.

Bonum dicimus, quicquid naturæ vel societati humanæ conservandæ & perficiendæ aptum & conveniens est. Malum, quicquid in diversum tendit. Unde illud amari, hoc odio esse solet.

E X P L.

1. **U**sque adhuc de Objecto Virtutis interno. Externum sunt bona & mala, quæ vitæ nostræ sortem distinguunt. Non immeritò Socrates, referente Seneca, hanc summam dixit esse sapientiam, bona malaque distinguere. Quia sine ea notitia, nec illa appetere aut sequi recto pede liceat, nec hæc fugisse.

2. Quia vulgò bonum non tam Ratione & ex se, quàm sensu affectuque nostro & ordine ad aliud, cujus consecutionem juvet, æstimari solet, hinc quæstio de bono, quod nemo non quærit, subdificilis & obscura fit. *Varia*, inquit Seneca, *eius interpretatio fuit. Finivit hoc alius alio modo. Alius illud aliter expressit. Quidam ita finiunt: Bonum est, quod invitat animos, quod ad se vocat. Alii, bonum est, quod appetitionem sui movet, vel quod impetum animi tendentis ad se movet. Cicero, bonum, inquit, si opus fuisset, definisses, aut quod esset naturæ appetendum; aut quod prodesset; aut quod juvaret. Quæ definitiones boni sunt ab effectu & caractere, qualis est, prodesse. Stoici omnia ad animum referentes, perinde ac si sola mente homines simus, com-*

modaque corporis & Totius illius, quod sumus, in bonorum numero & loco poni non debeant, solam virtutem dixere bonam, solum vitium malum. De iis Cicero, *Qui nihil aliud in bonorum numero, nisi honestum esse valuerunt.* De Helvidio Prisco, Tacitus, *Doctores sapientia secutus est, qui sola bona quæ honesta, mala tantum quæ turpia: potentiam, nobilitatem, ceteraque extra animum, neque bonis, neque malis annumerant.* Scilicet, quæ extra honestum sunt, Stoicis adiaphora habentur: eaque pro sua definiendi subtilitate *περὶ ἡμετέρας & ἀπερὶ ἡμετέρας*, id est interprete Cicerone, producta & rejecta, vel præponenda & rejicienda dixerunt, nullum ad felicitatem, quippe sola virtute terminandam, momentum afferre arbitrati. Vera vel Veris proxima sentirent Stoici, si homo non nisi mens esset, nullum habens cum corpore commercium: quo sanè casu bona extraria homini perficiendo beandoque nihil valerent. Inde verò, quod olim, notante Cicerone, etiam Carneadi visum est, facile probaverim, in omni hac questione non esse rerum Stoicis cum Peripateticis controversiam, sed nominum, sive logicam machinam. Interea itidem ut alia Stoæ placita, ad acuendum Virtutis studium opinio ista comparata videtur. Unde illud Lipsius ex Disciplina Stoica, *Nihilne interest, utrum Bona, an Producta appellemus? Si Bona; incitor & præsumo jam appetenda. Sin autem Producta; disco fines boni tangere; sed iudicio debere induci.* Ipsa voce igitur admoneor, non nimis & statim inhiare. Idem in iis, quæ Mala vulgò dicunt, ipsi Rejecta: intelligo non nimis fugienda esse, & interdum, si virtutis in iis materies, appetenda.

3. Qui sic definiunt, Bonum est, quod amamus; Malum, quod averſamur. Bonum & malum non nisi denominationes externas esse existimant: quoniam quæ uni bona, alteri sæpe sunt mala: quod in genere Boni iucundi quàm maximè usu venit: unde illud; *Trahit sua quemque voluptas.*

Istis

is zin.

Istis Authoribus si objicias, Atqui homines sæpe amant, quæ mala sunt & noxia; oderunt quæ bona & opportuna. Difficultatem expediri putant distinctione generum amoris: nempe alium dicentes esse amorem Dei, alium amorem mei, sive Virtutem & Philantiam. Quod per virtutem amamus, honestum; quod per philantiam, jucundum. Fieri ergo ex facili, ut quod uno istorum amoris generum amamus, id si ad alium amorem comparatur, illum minime mereatur, sed verius odio amori isti opposito dignum sit. Atqui inquam ego, hæc ipsa plus satis arguunt, bonum & malum non meras esse denominationes: quia quod per virtutem amatur, dignum utique est quod ametur. Id igitur tenendum; quod judicio Rationis bonum apprehenditur, simpliciter tale est: quod sensu tantum & affectu, id tibi, mihi, alii, hie, nunc &c. non sapienti, non semper, non ubique, tale creditur. Hoc pacto fieri potest, ut quod reapse bonum honestum est, huic, illive, malum sit injucundum. Et vice versa, quod bonum est jucundum, revera malum sit turpe. Hinc illud Poëtæ ex avari judicio.

omnis enim res,
 Virtus, fama, decus, divitia, humanaque pulchritudo
 Divitiis parent: quas qui construxerit, ille
 Clarus erit; fortis, justus, sapiens etiam, & rex;
 Et quicquid volet.

4. Quanquam autem à studio querendi Boni honestum abesse non debeat, alia tamen est ratio Boni, quò Totum illud, quod quique sumus; alia Boni, quò alterutra nostri pars; alia Boni, quò singuli; alia Boni, quò universi, societate conjuncti, conservari atque augeri possunt. Quapropter Bonum paulò comprehensius definitum oportuit.

§. 2.

*Usitata est distinctio, quâ Bonum trifariam dicimus,
Utile, Jucundum & Honestum.*

*Utile, quod amanti conducit ad assequendum majus
bonum.*

Jucundum, quod amantem delectatione juvat.

*Honestum, quod amor Veritatis convenit, atque capro-
pter solum amatur, quia Ratio, sive Veritas menti
cognita, jubet.*

E X P L.

1. Sic Bonum distinguitur, non ex oppositione
rerum, quasi quod honestum est, idem non
sit utile: vel quod sua jucunditate bonum est, ad-
versum sit utilitati & honestati: hæc enim distin-
ctio amantium errori tribuenda est, qui conjuncta,
studio suo cæcò separant. Verum triplicis nominis
usum facimus, cum ex rerum distinctione: cum
ex diverso ejusdem rei bonæ respectu, quod quidem
aliò & aliò eadem res jucunda pariter & utilis &
honestæ est.

2. Utile ex Bono majori, ad quod confert, x-
stimari solet. Si E. G. oborta tempestate salus sit
bona mercatori (enimverò esse quis dubitet?) ja-
cturam fieri, utile erit, quia navi servandæ con-
ducit. Bonum igitur utile non per se & suo nomine
expetitur. Idemne ergò sunt utile & medium;
bonum & finis? Sic videri possit minus attentis.
Idem esse contingit, si nimirum idem sit medium
Operis & Operantis; ita ut quod Operans in certum
finem destinat, etiam suâ naturâ illi fini assequen-
do sit aptum. Id igitur interest, quòd non omne
medium illico sit utile: ut sane non esse, necesse
est, quoties Operantis aliud est medium, quàm
Operis. Velut qui oleum addit camino, putans
esse

esse aquam restinguendo incendio idoneam. Quapropter ut aliquid sit utile, satis non est esse medium: oportet, sit medium boni, quod amatur.

3. Jucunda sensui blandiuntur. Unde Latinis jucundus dicitur aspectus, jucundus odor, sapor &c. Sic jucunda, quæ in deliciis habentur, & voluptati sunt. Bonum jucundum ab utili & honesto se junctum amare & sectari alienum est à Viro bono. Quo sensu delicias, voluptates, res secundas, & quicquid amorem concupiscentiæ mover, in bonis habenda recte negant Philosophi. Etsi autem Viro bono propositum non sit jucunda sectari, nihilominus lætitiâ verâ & jucunditate ex amore veritatis percipiendâ identidem affluit. Improbis jucunda consectans amore concupiscentiæ, facit se finem. Cui voluptatis suæ, ubique se veriis, quàm quidvis aliud, amans & quærens.

4. Honestum cō solò constat, quod amore veritatis & proposito obediendi sit, quod lex divina jubet. Quare Vir probus, qui, nulla sui ratione habita, Deum facit finem. Cui & obedientiæ per omnia, non se, sed Deum unice amat, paratus exequi, quicquid lege sua jusserit. Vide suprâ cap. 4. §. 4. 5.

Bonum porro vel suum est, quod Scholis Individuale dicitur, vel Communione.

Illud est, quod ad suam ejusque naturam conservandam & perficiendam consert.

Estque Activum, vel Passivum.

Bonum Activum sunt omnes actiones nostræ, nobis ipsis augendis, ornandis, atque beandis susceptæ.

Bonum Passivum est usus & perceptio rerum naturæ nostræ conservandæ & perficiendæ utilium.

E x p l.

1. **H**ominem fecit Deus sociabilem, insito societatis appetitu, additoque sermonis usu & orationis vi, *humanae societatis conciliatrice*. Unde tandem Caino parricidae hominum consortiō carere perinde molestum & intolerabile fuit, atque supplicium, etsi impunitatem nactus primū aliter sentiret. Quapropter homo, si quō natura ducit sponte sua sequi velit, duplici bono se natum arbitritur: Unum quidem vocabit *Suum*, se tanquam totum aliquod in ejus quærendi studio respiciens: Alterum verò *Communione* esse dicet, se velut partem spectans alicujus *Totius*, cujus à salute & suam pendere persuasum habebit. Id quod priori longè excellentius est, atque ideò à Viris virtute præstantibus nunquam non antelatum. Enimverò hominem inter homines viventem, nullā societatis curā tactum, suis duntaxat inservire commodis, laude atque honestate caret.

2. Cū hominis natura non tantū accipiēdo, sed etiam agendo perfici possit, Bonum suū *activum* à *passivo* doctrinæ gratiā distingui placet. Posterior autem perficiendi ratio, quæ in actione consistit, priore hæctenus nobilior est, quā beatius est dare, quā accipere.

3. Ad Bonum *activum* pertinent studium literarum, honesta recreatio, monumentorum editio, liberorum procreatio, in quibus, quasi alteris nobis ipsis, etiam mortui vivimus, in iisdem denuō morituri: Acta item vitæ varia, instituta & ambitiones, vocabulō absque invidia sumptō, sine quibus vita humana verè languida & vaga foret.

4. Bonum *passivum*, quod nobis perficiendis conducit, præstare videtur bono, quod conservandis prodest: quandoquidem morali saltem æstimatione, minus quiddam est, statum veri suū, quā

cundem augere & amplificare. Fecit quoque Natura hominem utriusque appetentissimum, eaque propter iis instruxit affectibus, qui studio conservandi se & perficiendi commodum subserviunt.

§. 4.

Bonum passivum vel ad animum; vel ad corpus; vel ad totum hoc, quod sumus, præcipue tuendum & perficiendum pertinet. Unde tralatitia distinctio Bonorum animi, corporis & fortunæ.

E X P L.

1. **I**N animi Bonis numerandæ veniunt omnes bonæ artes & disciplinæ, quibus animus excolitur. Cum primis doctrina Scripturæ S. quæ secundum pietatem est, utilis ad institutionem, ad redargutionem, ad correctionem, ad disciplinam quæ est in justitia. Ut perfectus sit Dei homo ad omne bonum opus perfecte exaptatus. Dona item Gratix Divinæ, charismata Spiritus S. quæ cum zelo flagrantibus, que cupiditate affectari jubet Apostolus: utpote sine quibus nulla satis idonea tot incommodis malisque animi humani remedia inveniri possunt: neque ulla arte humana ad animi perfectionem proficitur.

2. Bona corporis appellamus Sanitatem, sensuum incolumitatem, robur, pulchritudinem, & quæ ad ista concilianda, fovenda, augenda pertinent, cibum, potum, somnum, vigiliam, motum, quietem &c. quæ omnia quo fine, quo delectu, qua moderatione, sint appetenda Ethica præcipit.

3. Bona, quæ Vulgi error Fortunæ tribuit, sunt Honor, Divitiæ, Amici. Honore significamus affectum existimationis in eum, qui virtute suâ, vel officio benè meretur de aliis, affectum restantes

verbo,

verbo, opere, gestu, aliisque signis communiter usu receptis. Ea testificatio si pauciorum sit, *Laus*; si plurium, *Bona Fama*; si non modò vivum comitetur, sed etiam mortuum sequatur, *Gloria* specialiter dici solet.

4. Divitiæ vocantur, quæ Dominorum usibus necessariis & magnificentiæ inserviunt. Earum partes, recensente Aristotele, sunt Nummi, Agri, 1. *Rhet.* Prædia, Supellex, Pecora, Mancipia. Quæ aliis 5. ita distingui solent, ut quasdam divitias dicant *Naturales*; quasdam *Artificiales*. Illas Natura hominum indigentia paravit, ut sunt, quæ ad victum, amictum & domicilium pertinent. Has arbitrium & usus hominum, necessitate res commutandi postulante, introduxit: qualis est pecunia, communis rerum utilium, quæ in commercio sunt, mensura. Vide *Pufendorf. de Jure Nat. & Gent. lib. 5. cap. 1.*

5. Amicos dicimus, qui mutuo ac manifesto amore ob bonum honestum, jucundum & utile, se prosequuntur. Equidem quod in amicitia est Bonum, non *suum*, sed *communione* esse videri possit: nihilominus amicis singulis ut *suum* hîc spectari potest. Cùm enim amoris ea sit indoles, ut amantium uterque pars sit alteri, ad constituendum totum, unde amicus mihi est *anima dimidium meæ*; haud dubiè amabili illa coalitione pars partem perficit, singulis quod desit, supplendo. Id quod in amore amicitia, qui amantem amanti per omnia æquat; item in conjugio, quod duos unam facit esse carnem, maximè locum habet.

Bonum Communionis est, quicquid ad tuenda & augenda Societatis commoda sectari virtutis officio convenit. Malum contra, quicquid Societatis commoda retardat, intervertit, aut quoquo modo publicam tranquillitatem turbat.

E x p l.

1. **H**Uc spectant, quæ cuique servanda vel agenda incumbunt, pro vitæ suæ instituto, conditione, statu & loco, quem in Societate Civili obtinet. Qualia sunt, ediscere, profiteri & exercere artes liberales & mechanicas, unde publico profis: servare leges societatis civilis, conjugalis, herilis: sancta habere jura amicitiae, fraternitatum, collegiorum, viciniratis &c. ferre quæ imponuntur onera publica, subsidia belli, & id genus alia: in quibus rectè constitutis salus & tranquillitas universorum versatur. Quæ etiam omnia è Societatis appetitu, quem Naturæ Author homini juxta Rationem iniecit, satis evidenter deduci possent, nisi studio nobis esset brevitās. Cum enim cuilibet homini, quantum in ipso est, colendam & servandam velit socialitatem, hinc consequitur, quia qui vult finem, vult etiam media, sine quibus finis obtineri nequit, omnia ad istam socialitatem necessario & in universum facientia ipso naturali jure præcepta, quæ eandem turbant, aut abrumpunt, vetita intelligi.

2. Sicut in Architectura aliud est, postes, trabes, columnas, tabulas &c. efformare, & ad structuræ usum præparare: aliud, partes partibus aptare & deligare. Ita hic aliud est, doceri, quò pacto colendæ societati præparare, quod Ethica præstat: aliud, qua ratione homo hominibus societate civili

con-

conjugaris, & quibus legibus devinctus societatem pro tua virili, & loco, tuearis &c. de quo Prudentia Politica præcipit. Ut adeò non sit metuendum, ne aliena ab instituto agamus.

3. Quæ in distinctionem *Boni sui à Bono Communione* hæctenus nobis dicta, ostendunt

1. Olim à vero Philosophiæ usu aberrasse, qui specioso prætextu vitæ pacatoris procul turba hominum degendæ, negotiis rebusque civilibus sese subdixerunt: utut id ab antiquissimis quibusdam, qui virtutis suæ meritò cæteroquin justam habuere venerationem, factitatum legamus.

2. Pejùs peccare, qui nihil honestæ artis exercent, vitæque per silentium transita, animam pro sale habent, ne putrescant, *numerus tantum, & fruges consumere nati*. Neque culpâ vacant, qui opibus per majores relictis contenti impunè abs sese ignaviæ litari credunt, quòd aliorum industriâ jam sit partum, unde victitent, immunes ad aliena pabula fuci. Et *qui divitiis soli incubuere repertis, nec partem posuere suis*. Et porcorum instar neminem nisi morte sua exhilarant. Et id farinæ alia otiosa terræ pondera.

3. Vitam contemplativam, quam vocant, activæ non esse præferendam. Octo rationes Aristotelis, *Nicomach. lib. 10. c. 7.* quibus ignavæ vitæ institutum nonnulli defendunt, nonnisi pro Bono suo & propria animi voluptate pugnunt.

H

ARETOLOGIÆ

PARS POSTERIOR.

D E

Virtute ejusque officiis , & Virtutis
acquirendæ adminiculis.

CAPUT I.

De Virtute & causis ejusdem
procreantibus.

§. I.

*Virtus generatim spectata , est amor Veritatis unicus ,
quam Conscientia legem in faciendis & omittendis
præcipit.*

E X P L.

1. **H**Actenus de materia Virtuti subjecta , cui
prior Aretologiæ pars , quæ generalis
est , destinatur. Nunc dicenda sequi-
tur ipsa Virtus &c. Propositam Virtutis definitio-
nem paucis pro necessitate explanabimus , post ar-
gumentis etiam veritatem ejus adstructuri.

2. *Amorem* intelligimus non *affectionis* , qui pas-
sio , etsi & hunc comitem Virtus habere possit ; sed
affectionis & obedientiæ , quò animus totus in studium
Veritatis propendet , eam ubique pressè & conti-
nenter sequendam firmiter sibi proponens. *Veri-
tatem*

etatem puta, quæ sive per revelationem Scripturæ Sacræ, sive per Rationem homini ad Conscientiam notificatur, & præxim vitæ humanæ instruit: qualis est; Deum esse finem, Bonum; Exemplar, Dominum &c. hominis, ex toto corde, totâ animâ, tota cogitatione & omnibus viribus; proximum item non aliter atque seipsum, cuique esse amandum &c. è quibus tota Lex & Prophetæ pendent.

3. Virtus autem est amor non cæcus, sed oculatus, rationalis & liber, ex cognitione & iudicio enascens. Hinc illa N. T. promissio; *Dans leges Heb. 8. meas in mentem eorum, & in corda eorum inscribam 10.* Quod Deus facit dando intelligentiam, fidem & amorem legis suæ: quæ inde fidelium cuique Lex Rom. 7. 1. mentis suæ fit, per ascensum, voluntatemque, quâ 23. v. 12. & Legi Dei condelectatur, & non aliam, quam hanc, legem sibi dicit, vicem Dei subeunte Conscientia, juxta illud Hieropsaltæ Deum alloquentis; *Tibi (i.e. Ps 27. 8. pro te, vel vicem tuam, confer Exod. 4. 16.) dixit cor meum; quærite faciem meam.* Viden' legem mentis? Cui etiam sese obsequentem illicò præbet, ut intelligas amorem, quo legem amplexus est, quando subjicit; *faciem tuam, Jehova, quæro.*

4. Amor ille Veritatis est unicus. Virtus solam Veritatem, velut sponsum, sinu complexuque suo dignatur, huic soli se committit, totamque se addicit: eam solam judicandi agendique regulam inconnivis quasi oculis respicit, & continenter additeque sequendam statuit, non spectans voluptatem, honorem, lucrum, aliave sua commoda. Voluptuarius rerum jucundarum sensu capitur: ambitiosus passione sua transversus agitur: Vulgus opinionem vel consuetudine vivit, aut quod in proclivi est facit, semper quò sensus & imaginatio ducit, sequi paratus. Contrà Vir bonus, sensuum turbis consilescere jussis, unam veritatem consulit, & ubique sive intus, sive foris, loquentem audire anhat, probè gnarus, non ex virtute fieri, neque adeò

laudi fore, nisi quod ex uno Veritatis amore & studio proficiscitur. Quòd si aliud amare velis juxta Veritatem, eam hòc ipsò non amabis; quia falsum est, Virtuti conveniens esse, aliò, quàm ut Veritati obedias, animò agere. Ex quo & illud consequitur, amorem Veritatis, qui virtutem constituit, esse constantem: Veritas enim est; Deum semper esse finem. Cui & obedientia, Bonum & Exemplar hominis. Hanc qui, ut par est, amat, constanter amabit.

5. Veritas æternæ, indemurabilis & inviolabilis justitiæ, æquitatis & ordinis interpret, vim obligandi conscientiam obtinet & exerit apud amantem suū. Hinc eam legem dicit affectibus, actionibus, motibusque membrorum Viro bono id curæ est; ut nihil ex affectu, quidvis ex amore veritatis, agendum suscipiat, affectum, quantum pote, obsequentem habeat, in agendo verum finem, modumque teneat, & motus membrorum ad bonæ mentis obsequia temperet, atque ut compendiò dicam, disciplinam veritatis legem vitæ putet, sibi ipsi verum cernenti obtemperet, & decretis suis pareat. Virtus igitur intra veritatis amorem non subsistit, sed actione & exercitio sese spectandam profert. Unde Sapientiæ præcepta non tantum tabulæ cordis inscribenda sunt, ut scias & ames, verum etiam digitis alliganda, ut iis opereris.

Prov. 7.

6. Hic sic explanatis nunc paucis fidem firmemus argumentis. Primum, in eo nobis cum aliis Authoribus non malè convenit, quòd Virtutem ponimus in amore Veritatis &c. Sunt enim, qui Virtutem definiunt amorem Rationis unicum: Sunt, qui, amorem Ordinis dominantem: Sunt, qui constans animi propositum vitam componendi ad legem: Sunt qui aliter &c. Nobis dicitur Amor Veritatis &c. 1. Ut, quæ definitiones istæ exhibent singula, nos communi nomine amandæ veritatis complectamur universa, 2. Ut declinemus contentiones super Ratione hominis peccatò corrupti. Causantibus, Rationem
solam

solam, quippe corruptam, ad vitæ informationem non sufficere; satis non est respondisse; Rationem depravatam non esse Rationem: quemadmodum impurum aurum non est aurum, sed aurum & scoria: sic depravata ratio non est ratio, sed ratio cum præjudiciis, captionibus & affectibus. Rationem enim adæquatam vitæ normam non esse peccatori, jam supra nobis notatum est: quanquam si quæ sola Ratio docet curarentur, res humanæ melius haberent.

3. Doctrinam morum Verbô Dei scriptô eò traditam & per universum terrarum orbem publicatam, ut certior vitæ dirigendæ norma esset, quis verò dubitet? Accedit, quòd quanquam plerumque quid honestum, quid turpe sit, naturâ constet, Deus nihilominus, lege solenniter lata, quid faciendum, quidve omittendum sit, edicere voluerit, ut palam fieret, virtutis officia non ideò solùm esse præstanda, quia præstare honestum sit naturâ, sed quia Deus præcepit. Virtus igitur amore præcepti divini & obedientiæ continetur. 4. Nostra definitio etiam in virtutem Christianam, quæ sola *φειρομένη* virtus est, quadrat. 5. In amore veritatis concurrunt, quæ boni operis laudem complent, qualia sunt, *Conscientia & Voluntas bona*, *files non fucata*, *intentio veri finis*, *studium comparandi vitam ad legem &c.*

7. Deinde quia Virtus haud dubiè decus est, & splendor imaginis divinæ, de qua certior Deo *καρδιῶν* testis audiri non potest, consulenda nobis sunt Oracula Scripturæ divinæ, quæ benè multa definitioni nostræ illustrandæ & confirmandæ suppeditat. Ibi *beatus* (qualis est Virtutis cultor) prædicatur, *cujus in lege Jehovæ voluptas est*. Qui timet *Psalm.* *Jehovam*, & præceptis ejus se oblectat valde. Id 1: 2. & 112: 1. *studium suum passim proficitur David*, cum primis totò *Psalmô 119.* verbis hujusmodi frequenter in- *Psalm.* *geminatis*; *In statutis tuis delictior. Testificationes* 119: 16. *tuas* 22. 24.

Joh. 14: tuas amplexus sum. Testificationes tuæ oblectamentum
15. 21. meum, consiliarii mei &c. Christus discipulos, quos,
23. 24. si ipsum diligant, demum præcepta sua servaturos
& 15: dixerat, in veritate Dei, h. e. cognitione & amo-
10. re Veritatis sanctificari petit: ut sint inculpabiles,
Joh. 17: & tanquam *φωστῆρες* virtutis exemplò luceant in
17. mundo. Enimverò Christum reapse diligit, qui
 veritatem, quam velut lucem, ipse Lux æterna,
 mundo intulit, totò animò amplexus in deliciis ha-
 bet, lucemque amat & in ea ambulat. Contrà pra-
Joh. 3: va facienti lux odio esse dicitur: *Et si dicamus, nobis*
20. *1. Joh. 1:* communionem esse cum Deo, qui lux est, & in tene-
5. 6. bris ambulemus, mentimur, & non facimus verita-
1. Joh. tem. Unde qui præceptum charitatis, quod verum
2: 8. in Deo, & in nobis, totiusque legis compendium
Matt. est, servant, ex veritate esse perhibentur. Qua-
22: 37-- propter & refragantes veritati & obsequentes injustitiæ
40. ex *ὁ ἀλλήλων* ponuntur, veritasque & injustitia op-
1. Joh. 3: ponuntur. Nimirum justitiæ est obedire veritati,
19. h. e. eam amare, juxtaque eandem agere. Ex ad-
Rom. 1: verso injustitia est, amare mendacium, cumque amo-
18. & rem agendo ducem sequi. Bonum igitur opus, A-
2: 8. postolo designatum, est veritati obedire, & juxta
Rom. 2: eandem agere. Unde nullò negotio conficitur, vir-
7. tutem in amore veritatis, eoque unico & perpetuo,
 rectè constitui. Accedit, quòd inter elogii chari-
 tatis, quæ virtus dubio procul est nobilissima, imò
 omnium officiorum virtutis breviarium, numera-
 tur; non gaudere injustitiâ, sed congruere veritati:
1. Cor. nosque *ἀληθεύειν ἐν ἀγάπῃ* vera sentire, loqui &
13: 6. agere, in dilectione jubet Apostolus.
Eph. 4:
15.

8. In primis consideratione dignum quòd Aposto-
 lus imaginem Dei in homine novò etiam constituit
Eph. 4: in *ὁμοίᾳ τῆς ἀληθείας* quod sanctum est studium verita-
22. 24. tis, oppositum concupiscentiis deceptionis. Hebræa vox
Jer. 2: *Hhasad*, cui Græca in textu etiam ex usu LXX. Inter-
2. pretum respondet, *πῦν* notat studium. Unde Hasidæi
Hof. 6: religiosi, pro lege zelantes, dicti Israelitæ, in Macca-
4: 6. bai-

baicis. Certè ὁσόν est, qui facit ὅσον δύναται, πᾶν
 ὅσον ἐν δίκαιον καὶ ἐπαινετὸν quantum potest, quicquid
 justum est & laudabile. Et Aristoteles dixit, ὅσων
 ἀρετῶν τὴν ἀλλήλους. Sanctum esse, veritatem ami-
 cis in honore antepone. Ἐμφάσιν Apostoli exte-
 nuant, qui sanctitatem veritatis per Hebraismum
 pro vera & non fucata sanctitate dictam volunt.
 Quis dubitet, utrum, si sanctitatem solam dixis-
 set, aliam à vera & genuina intelligi vellet? Cæte-
 rum justitia & sanctitas eò differunt, quòd quæ san-
 cta, i. e. ex amore veritatis facta sunt, eadem &
 justa dicantur, quatenus adversus criminationem
 omnem sustineri atque defendi possunt: eadem
 deinde sanctitas, ubi perfecta legis impletionem
 contulerit, qualis est illa servatoris nostri, justitia de-
 nominatur ex jure, quod affert in præmium lege
 promissum.

9. Peripateticis & Scholasticorum vulgo Virtus
 dicitur *Habitus electivus in mediocritate consistens, fre-*
quenti bonarum actionum exercitio comparatus. Quod
 quominus ipsis assentiamur, sequentia impediunt
 argumenta. 1. Ista definitio Virtuti veræ, quæ
 gratiæ divinæ donum, non industriæ humanæ laus,
 & præterea luctantis, nec tamen unquam deficien-
 tis est, accommodari nequit. 2. Virtus agendi ha-
 bilitatem usu comparandam anteverrit. Unde enim
 actio bona, ex qua quæri velint habitum, nisi ex
 virtute? Quid, quòd bonè agendi facilitas virtutis
 quotidiano auctu proficientis præmium sit, Deo o-
 pus suum non destituyente sed perficiente, & dona
 sua coronante? tamen cæteroquin amorem veritatis
 perpetuum in virtute requiramus, usuque firmari
 non negemus. 3. Adde, quòd non sit insolens,
 repente bonum evadere, hæctenus qui nequam fuit,
 recepto Veritatis amore, à quo usque huc animum ha-
 buerat alienum, delectatus injustitiâ. Satis porro fa-
 cilitatis habet, qui magno animo, quem præstat
 Veritatis amor, difficilia superat. Inter consuetu-
 dinem

Mich. 4.

8.

Neh. 13

14.

1. Mac-

cab. 2:

42. &

7. 13.

2. Mac-

cab. 14.

6.

Nicom.

l. 1. c. 4.

2. Thess.

2: 10.

12.

dinem verò & amorem latum sapienti *discrimen est*. Callum habet consuetudo, incommoda non sentiens: Amor contrà, sensu vivax & tener, in ommoda perrumpit, vincit & obterit. Ut igitur fortè felicior sit *habilitas*; at certè generosior est *amor*.

*Nicom.
lib. 2.
c. 9.*

4. Virtutis quidem est *invenire & eligere medium*, in actione & passione tenendum: veruntamen ipsam virtutem appellare *medium* vel *mediocritatem* perinde foret, atque si Mesolabium dicas duo illa media proportionalia, quæ ejus ope inveniuntur. Eatenus igitur Virtus in mediocritate consistit, quatenus *Veritatis amor* in quibusdam modum sequendum dicitur, in quibusdam ad summa incitat: nam Deum, exempli causâ, nimium colere non possumus: superstitio enim non eò peccat, quòd nimium, sed quòd perversè colat: neque ipsam veritatem undecunque effulgentem nimium amare, neque mendacium nimium odisse possumus. Rectè A. Gellius:

*Noct.
Att. 1. 4.
c. 9.*

Esse quædam, inquit, ut virtutes, *quorum amplitudines nullis finibus cohibentur; sed quanto majora auctioraque sint, etiam tanto laudatiora sunt*. Quod etiam vulgò Virtutem utrinque oppositis stipatam vitis Excessus & Defectus, & quasi rosam inter spinas efflorescentem, introducunt, perbelli quidem spectaculi speciem præbet, sed quæ usquequaque locum habere non potest. Quo de videlicet Grotii Prolegomena in libros de J. B & P. §. 43. &c.

§. 2.

Virtutis causa procreans principalis est Deus, qui unus Author omnis boni Virtutem homini, velut imaginem sui imprimit, dando

1. Νόητι, quâ utiliter animadvertuntur, quæ virtuti colendæ argumenta & adminicula suggerit natura & conscientia.

2. Intelligentiam verbi Fœderis Gratiæ, quò solò Deus peccatori amabilis in Christo Salvatore cognoscitur.

3. Assensum fidei & adstipulationem in Verbum fœderis, ex qua sola amor Dei, ejusque sanctitatis, rectitudinis, justitiæ, omnisque veritatis concipitur.

4. Operando ipsum velle & perficere, propter Phil. 2: beneplacitum suum. 13.

Causæ administræ morales & externæ sunt; 1. Doctrinæ & legum institutio. 2. Exemplorum consideratio, & cum Bonis Consuetudo. 3. Exercitatio.

E X P L.

1. **T**Urpem suâ ignorantiam prodidere Gentilium Sapientissimi, quando hoc se divini muneris habere dixerunt, quod viverent: sui verò, quòd benè viverent: metuentes ne sibi periret gloriandi materia. Propter virtutem enim, inquit Cic. jure *De Nat. laudamur, & in virtute rectè gloriamur. Quod non Deor. 13.* contigeret, si id donum à Deo, non à nobis haberemus. At verò aut honoribus aucti, aut re familiari, aut si aliud quippiam nacti sumus fortuiti boni, aut depulimus mali, cum Diis gratias agimus, tum nihil nostræ laudi assumptum arbitramur. Num quis, quòd bonus vir esset, gratias Diis egit unquam? At quòd dives, quòd honoratus, quòd incolumis. Verriginosam Senecæ imaginationem sapit impia vox; Est aliquid, *Epist. 53.* quò sapiens antecedit Deum. Ille naturæ beneficiò, non
fuit

Lib. 2.
c. 2.

Sen.
Ep. 3.
Bias a-
pud
Laert.

suò, sapiens est. Ecce res magna, habere imbecillitatem hominis, securitatem Dei! Fuere quidem Philosophi, qui virtutem nasci dicerent: quemadmodum de Scythis Justinus, hoc illis naturam dare, inquit, quod Græci longa Sapientium doctrina, præceptisque Philosophorum consequi nequeunt. Plerique virtutem, etsi semina ejus natura dedisset, arte & industria comparandam dixere. Rarissimis, & quasi fortuito excidit; Nulla sine Deo mens bona est. Item, si quid boni egeris, ad Deum referto.

2. Nos, si verum amamus, in eo hæsitare non sinit Verbum Dei *καθογνώσει*, cui uni deplorata naturæ nostræ conditio penitus est perspecta: Proximum videlicet adipiscendæ virtutis gradum esse suæ cognitionem, & ut quisque maximè suæ inopix, impotentix, ignominix & turpitudinis conscientiam dejectus est, ita optimè in suæ cognitione profecisse. Neque hinc periculum, ne sibi nimium adimat homo; dummodò recuperandum in Deo discat, quod sibi deest.

3. Virtutem porrò veram sui esse muneris, Deus ad conscientiam nostram demonstrat, cum disertis, iisque quàm plurimis Scripturæ S. testimoniis, tum verò operosâ illa Legis æconomiâ atque disciplinâ, quâ populum Israeliticum non modò arctè contemteque habebat, sed etiam verbò docebat, factis mirabilibus & beneficiis alliciebat, exemplis justorum invitabat, castigationibusque reprimebat, eo in plerisque ejus gentis successu, ut tandem cum carne contendens, de ejus *ἀδυναμία*, plus satis evicta, diceret; *Quid faciendum amplius vineæ meæ, quod non fecerim in ea? Quare expectavi quidem, ut faceret uvæ, & fecit labruscas? Cæteris interim gentibus in corruptione sua quasi sepultis. Umbra virtutis in Gentilium moratioribus, argumentum est σωφρονισμῶ & disciplinæ, qua Deus se non passus est esse ἀμάρτυρον. Vide supra Cap. 2. Part. 1. §. 3. n. 2.*

4. Fu-

4. Fundo igitur tam infelici & sterili, qualis suapte naturâ est animus noster, non alium quàm Dei Spiritum cultorem exposcimus. Is *bonum opus in nobis orsus etiam consummat*, dans *νόησιν*, intelligentiam, fidem *δι' ἀγάπης ἐνεργουμένην*, ut in Theoremate *παχυλῶς* saltem adumbramus, alibi eadem pertractaturi accuratiùs. Quis verò intelligentiam dabit, quis amorem veritatis, nisi qui fons est & exemplar omnis veritatis? Quis imaginem suâ in animo hominis refinget, nisi qui hominem primitus ad eam formavit? Hinc adeo Virtus *justitiæ fructus per Iesum Christum ad gloriam & laudem Dei*: fructus item Spiritus S. dicitur. Phil. 1: 6.
Phil. 1: 11.
Gal. 5: 22.

5. Obj. Sed carni suapte sponte ad veri bonique studium torpent; hōc pactō nil nisi desidīæ occasionem præbemus, hominisque officio locum excludimus. Resp. Sunt, quæ hominem totum occupare possint debeantque, causæ nim. administræ, morales & externæ, quæ Theoremate exhibentur: quantum, propter soli maligni infœcunditatem, nec illis quidem ad rectam virtutis culturam sine Deo proficere detur. *Neque is qui plantat aliquid est, neque is qui rigat, sed qui incrementum dat Deus.* 1. Cor. 3: 7. Plura videsis, ubi de virtutis acquisitione.

6. Quas vulgò Virtutis causas administras internas dicunt, puta Notiones honesti, veluti virtutis semina innata, Synteresin & Conscientiam &c. non tam causæ sunt procreantes, quàm subjectum *διὰ τὸ*, hominem scilicet disciplinæ capacem, arguunt.

C A P. I I.

De Proprietatibus Virtutis, Diligentia, Obedientia, Justitia correctrice, & Humilitate.

§. I.

Virtutis propria sunt, Diligentia, Obedientia, Justitia correctrix, & Humilitas.

Primum, quod ex Amore Veritatis proximè manat, est Diligentia, sive studium totò animò attendendi & inquirendi veritatem.

Ejus partes sunt Aversio mentis à rebus; quæ veritatis studium impediunt: & Conversio mentis ad se suamque conscientiam.

E X P L.

1. **Q**Uatuor ista ex amore Veritatis proximè profluunt. Si enim ames Veritatem, sequitur, ut eam auscultes, quæ est *Diligentia*. Utque facias, quod illa jubet, quæ est *Obedientia*. Porro si ames veritatem unicè, facies id unum, quod illa jubet, neutrò despectens, quæ est *Justitia correctrix*, nec rationem habebis tui commodive tui, quæ est *Humilitas*. Hæ quidem totidem virtutes distinctæ, quasi Cardinales, seu Primitivæ videri possent, nisi necessariò in virtute simul inessent, & ad nullam externam circumstantiam speciatim referrentur.

2. Quia Veritas practica, sive Ratione, sive Scripturarum S. traditione pernotescat, in eo est tota, ut dicter, præscribat & suggerat, liquet eam à nemine adamari, qui non auscultet, eorumque animu

munum ad ejus dictata applicet. Hinc *Sapientia summa publicè clamans, in foris edens vocem suam, in summa turbarum perstreptentium prædicans, in ostiis portarum, in urbe dicta sua proferens, nusquam non auditores attentos sibi parat & exposcit.* Legantur in hanc rem priora capita Proverbiorum Salomonis. Hoc opus, hic labor est, ut mens cogitatione à rebus externis avocata, intrò quasi ad se & sua adyta jugiter secedat, Rationem & Conscientiam è Verbo Dei informatam consultura & auditura, nequicquam interstreptentibus sensuum, affectuum & inclinationum turbis, quæ animum distrahunt, menti caliginem offundunt, & veri cognoscendi viam intercludunt.

3. Duo igitur Veritatis studioso curæ sunt. I. Secum habitare, animumque à rebus externis, quæ sensum movere & concupiscentiam inescare solent, avertere, præjudiciis, erroribus, opinionibus vulgò receptis & servitute, quam affectus & mos, quòvis tyrannò peiores, imponunt, expedire assuescit. Quia Veritas, undecunque demùm suggeratur, non nisi intus & in mentis penetrali percipitur, ut quæ de Intellectu nobis dicta sunt, plus satis comprobant. II. Animum contrà ad Veritatem convertit, eam unam instituto suo Magistram expetens. Eò pertinent

I. *Assidua Attentio ad Rationem*, quæ notionibus veri bonique præceptis & insitris, quid ex quo efficiatur concludit, & quæ officii sunt nostri definit. Opus quidem nimìò plus laboriosum imperamus, quod vulgò vix tentatum tædio esse solet, imaginatione, sensu, affectu, opinionibus inolitatis, vitæ negotiis & institutis attentionem illicò interturbantibus. Ut ramen ferendo attentionis labori assuescat juvenilis ætas, inter quotidiana pietatis exercitia, iis primùm imbuenda videtur disciplinis, in quibus sola Ratio & Demonstratio valent, quæque minimum habent contentionis, nec affectum

K

fovent,

Sen. Ep.
88.

fovent, sed arti nos præparant meditandi notiones
claras & experimenta indubia, in quibus sunt, ut
cum Poeta dicam, *fundamenta quibus nixatur vita
salusque*. Facessant artes, quarum consecratio mole-
stos, verbosos, intempestivos, sibi placentes facit: &
ideò non discantes necessaria, quia supervacua didice-
runt.

2. Sam.
12: 7.

2. *Lectio & Meditatio Verbi divini*, auditu præ-
conii ejus juvanda. Enim verò nulla Ethica Scriptu-
ræ S. æquiparabilis est. Cum usus Ethicæ sit affe-
ctus subigere, & animum ad felicitatis consecutio-
nem effingere, qui eam tradidere Gentiles Philoso-
phi, animi facultates ac motus parùm videntur ex
vero intellexisse: in nostris, qui indagando mentis
naturam ingenium præstitere suum, multa etiam-
num desiderantur. Atqui Scripturarum Author a-
nimorum humanorum fabricam, facultates, vires,
unà cum defectibus & vitiis, penitissimè perspectas
habens, modum in ipsos operandi accommodatissi-
mum validissimumque minimè nescit. Quidni ve-
rò horologium, si vitium facit, ab horologiopæco
melius, quàm ab artis imperito, gestitui possit?
Scriptura S. etiam, quæ admiranda ejus ubertas, ita
diversis hominum ingeniis attemperata est, ut vix
ulla reperiaturs tam insolens animi indoles aut rerum
conditio, in quam non ita planè quadret aliquis
Scripturæ locus, ac si ex omni mortalium genere
huic soli fuisset comparatus, & quod olim Propheta
Nathan dixit Davidi, huic itidem dictum foret, *Tu
es homo*. Quapropter Scripturarum S. lectio & me-
ditatio, auditu præconii adjuvanda, Virtutis cul-
tori utilitate sua nunquam satis commendari potest.
Utinam verò discendi studium docendi officio hac in
parte responderet!

3. Superest, ut eadem sæpiùs apud animum revol-
vamus, ruminemus, & usu familiaria reddamus, in
quibus aliquando veritas liquidò nobis affulsit. Perpe-
tua enim illa & familiari consuetudine complexuque
veri.

veritatis tandem etiam ibi assequemur eandem, ubi vel maximè vim intelligentiæ fugere videtur. Quemadmodum Convictores, qui te quotidie multum utuntur, etiam in crepera luce versantem, aut habitu peregrino indutum, facile & ad primum subinde obrutum agnoscunt, id quod vicinis, qui te rariùs conveniunt, non æquè expeditum est. Cui autem veritas obvia & aperta vilis & contemptui est, nunquam sanè fruetur eadem, ubi recondita & cara fuerit. *Derisori quærenti sapientiam, ea non extat.* *Prov. 14: 6.*

§. 2.

Secundum, quod ex Veritatis amore nascitur est Obedientia, h. e. Executio ejus, quod Veritas, æternæ justitiæ, aqutatis & ordinis interpret, præscribit. Obedientiæ partes sunt, facere quod juberis; & Omittere quod vetaris.

E X P L.

1. **U**Bi Diligentia Veritatis auditorem te fecerit, eamque audiendo perdidiceris, proximum est, ut, eodem amore instigante, quod veritas faciendum docuerit, exequare. Absurdum enim fuerit, veritatis amantem, simulque, quid ipsa te velit, intelligentem videri velle, id ipsum tamen, cum res postulat, effectum non dare.

2. Ut Legis, sive veritatis practicæ, itidem Obedientiæ, duæ sunt partes. Illius quidem partes sunt *Jubere & Vetare*: hujus *Facere & Omittere*. Quod jubet sive Ratio, sive Lex Scripta, præstandum est, quoties ita restulerit. Quod verat omittendum est semper. Jubet Ratio sumere cibum, reficere corpus: hoc igitur aliquando faciendum: nimirum, ubi, quando, & quomodo faciendum Ratio præceptis Scripturæ S. instructa docuerit. Ea-

dem vetat seipsum interimere : id ergò omittendum semper. Hinc illa Scholis usitata distinctio inter *Præceptum Negativum & Affirmativum*. Illud ad quodvis tempus obligat, quod Scholis dicitur *semper & ad semper* : hoc non item.

3. Ut nos ad obediendum componamus, juvabit, animum paulatim abducere ab agendis iis, quæ Vulgi solummodò institutis, moribus & consuetudine contineri certò scimus : quin etiam quàm studiosissimè cavere, ne quid unquam faciamus ideò solum, quia sic facere moris sit, aut usu receptum & consensu hominum ac auctoritate firmatum : Sed tantum, quia Deus jubet, & amorì veritatis convenit. Lex humana & Consuetudo vim legis obtinens per se non obligant : faciendum nihilominus est, aliquando saltem quod homines jubent vel consuetudo fert, sed ea duntaxat ratione, quia amorì veritatis convenit, & Deus in hoc illoque casu iis morem gerere jubet. Finem enim ultimum Cui & Obedientiæ non alium Operanti habendum esse, quàm Deum, æterna veritas est.

*Nicom.
l. 1. c. 1.*

4. His insuper habitis, quam vel Ratio, vel Scriptura S. docet Veritatem proclive est obscurari, & cum iis, quæ usu & legibus humanis constituta sunt, confundi. In quo etiam Aristotelem cum vulgo errasse contigit, quando *honestà*, inquit, & *iusta*, quæ civilis scientia considerat, tantam differentiam, tantumque errorem in se habent, ut lege, non naturâ esse videantur. Unde ex communi iudicio pleraque definit, & ad popularem sensum accommodavit. Quod ipsemet etiam, incertus animi, se facturum sequentibus verbis non obscurè professus, latam communivit viam vitiis popularibus, quæ passim in Ethicis suis pro virtutibus venditat. Atqui sanè virum bonum ea maximè cura habet, ut quæ hominum moribus, placitis atque institutis constant, ab iis quæ rationis iudicio vera compariuntur, cautè discernat.

§. 3.

Tertium, quod ex Amore Veritatis consequitur, est Justitia illa διοδωλική, quæ tùm quod nimium, tùm quod minus est, seu excessum pariter & defectum ab actione obedientis præcidit.

Ejus partes sunt Puritas, quod nimium est resecans: & Integritas, quod justò minus est, supplens.

E X P L.

1. **Q**uia Virtus est Amor Veritatis unicus, Virtutis cultor à veritate, quam Ratione verboque Dei scriptò compererit, non deflectet, neque adeò plus justò, minusve faciet vel omitter. Utrùm verò Justitia Obedientiam præcedat, an sequatur, non faciliè definiverim. Justitia actionem, quam suscipit Obediens, supponere videtur, quippe cum excessum & defectum resecet. Rursus tamen & hoc verum video, actionem non fore Obedientis, quam justitia non antè castigârît, præcisò eò, quod verum excèdit, & suppletò, quod defit. Sed non multum referre videtur, quem istæ sorores, Virtutis filix; natalium suorum ordinem habeant, modò universas comuni parente natas, mutuoque amplexu & indissolubili nodo implicatas, pari affectu & studiò prosequamur.

2. Justitiæ duæ quasi manus sunt, *Puritas & Integritas*. Illà gladium gerens, quò quod nimium est, resecat; Hæc bilanciæ, quâ quod minus est supplet, actionem velut ad æquilibratam reducit, διοδωλική Directrix & Correctrix inde dicta. Quod nimium est, peccatum *Excessus*; quod minus est, peccatum *Defectus* appellatur. Quare si nomini moris vel actionis particulam *nimis* vel *minus* adjunxeris, eo ipso vitium in excessu vel defectu significaveris:

velut si nimis vel minùs liberalem pro prodigo, vel avaro dicas.

3. Istud autem probè tenendum, particulas *Minùs* & *Nimis* nominibus morum vel actionum additas perinde *alienantes* esse, atque si adjungantur notis numeralibus, aliisve rebus, quibus si quid addas, vel demas, natura mutatur. Quemadmodum qui plus quàm quatuor, non jam quatuor, sed minimum quinque: & qui minus quàm quatuor, non jam quatuor, sed ad summum tria significat. Et falsum alienat aurum; ut non jam aurum, sed aurichalcum, vel simile quid, dici debeat. Sic qui nimio plus & qui minus, quàm par est facit, non jam ex virtute facit. Qui nimis & qui minùs, quàm oportet, castus est, nequaquam castus est. Qui tantillò plus minusve facit, quàm faciendum docetur, non jam Veritati, sed mendacio & concupiscentiæ obsequitur & peccat. Parum absuit, fateor, quin obediret: atqui ad id, ut non obedivisse, vel peccasse dicaris, quid refert, procul, an propè à vero absueris? Stas in præcipitio vel crepidine saxi; vacillas, pedem inde moves: quid refert, pedem non majori movisse intervallo? quando hoc solum, pedem movisse, horribilis tibi lapsio & certissima nex est. Quid refert, circa portum naufragus intereas, an in alto mari, ubi nihil est nisi pontus & æther? Breve tamen istud justì & injusti confinium non impedit, quominùs delicta & specie & gradu differant. Cùm enim malum existat ex quolibet defectu, quò plures, iique insigniores in actione quampiam defectus notantur, hòc ipsa pejor haberi meretur.

4. Idem porrò vitium diversa ratione consideratum & Excessus & Defectus esse potest. Ex. c. Avaritia liberalitati opposita vitium est defectus: eadem verò opposita frugalitati & parsimoniæ est excessus. Quod etiam in aliis quàm plurimis observare est, quæ propterea ad *disparatorum* categoriam referri solent

lent à Logicis, quanquam Virtus & Vitium in *ad-*
versis numerentur.

5. Adminiculum justitiæ erit, si diligenter perpendamus, *res non esse, quod esse dicuntur*, si tantillum desit, vel superet. Vulgus jactat & prodigit nomina, extenditque ad res, quibus minimè conveniunt: quod propemodum est. *esse* dicit; quod vix est, *esse* negat. Atque hæc nominum vitia hætenus fortè tolerari possent, nisi ex nominibus res ipsas, in maximam Virtutis fraudem, æstimare assuescerent. Cacoëthes sic satis commune est, etiam sceleribus nonnullis speciosa indere nomina. Sordes & Avaritia frugalitatis nomine veniunt. Impietas ipsa, mascula pietas appellari amar. Cædes, incendia, rapina, bellicæ virtutis laude commendantur: cædes singulæ quidem puniri, occisarum gentium, velut gloriosum facinus, triumphis ostentari solent. Adulatio & obrectatio, certissimæ pestes in Republica, diversis viis, sed pari malignitate & damno, grassantur. Illa vitiiis virtutum, hæc virtutibus vitiorum nomina imponit: unde saltem incerto, si non penitus sublato virtutis atque vitii discrimine, proclive est rudioribus, virtutem nomine sinistro suspectam vel invisam odisse; vitium contra specioso nomine decoratum & exemplis commendatum imitari.

6. Quæ si maturè sæpiusque animò revolverimus, defectus atque excessus etiam minus notabiles pro virili cavere studebimus. Decebatum fuit paradoxum Stoicorum; *Æqualia peccata esse*. Cic. placet Stoicis, *omnia peccata esse paria*. Quod *Acad. 5.* non modo Philosophis aliis, sed & Patribus Eccles. inter errores Novatianorum merito damnatum. Dogmatis tamen finem & fructum non celat Hieronymus; *Stoicorum quidem est, inquit, De Instit. Ma-*
delicta omnia paria judicare, nec ullum inter scelus & trisfam.

erratum discrimen facere! Nos verò, etsi multum inter peccata distare credimus; tamen satis pròdesse ad cautionem dicimus, etiam minima pro maximis cavere. Non citò ad majora procidet, qui etiam parva formidat. Judicis est, delictorum differentiam, quoad ejus fieri potest, accuratissimè examinare; ut intra meriti modum pœna consistat. Virtutis cultor, judiciò de peccatorum qualitate hætenus liberò & salvò, omnia pari studio & affectu fugit. Qui delictorum discrimina scrupulatim expendit, ut leviorum impunitatem sibi promittat, Conscientiæ Religionem & integritatem curæ non habet. Hinc etiam, quia peccatorum fœditatem, nisi ubi palpabilis est, diluere & speciosis prætextibus inducere solent homines, eò consiliò Deus in Legis suæ compendio, quod erat in unoquoque transgressionis genere deterrimum & scelestissimum exemplaris locò proposuit, cujus ad auditum sensus quoque exhorresceret, quò majorem peccati cujuslibet detestationem animis nostris imprimeret. Ex. gr. Ira & Odium in fratres, non usque adeò execranda putantur mala; quum suis nominibus appellantur, quia quæ nostra vœcordia est, non putamus occidi, quem exosi vellemus non esse, nisi & injecta manu faciamus, ne sit: at tùm interdicuntur nobis sub homicidii nomine, rectiùs intelligimus, quanta sint in abominatione apud Legislatorem, cujus voce in tam horrendi flagitii ordinem rejiciuntur, atque sic judiciò Dei permoti, delictorum, quæ priùs levia videbantur, gravitatem melius reputare assuescimus.

§. 4.

Denique ex Amore Veritatis etiam fuit Humilitas, quæ est incuria & neglectus sui præ amore Veritatis. Partibus illa constat duabus; Inspectione sui; & Despectione sui.

Illâ, quis ac qualis sim, identidem inquirô.

Hâc, nulla mei ratione ducor, meipsum abnegans, derelinquens, totum Veritati, totum Deo dedens docendum, ducendum.

E X P L.

1. **H**UMILITAS etiam genus suum proximè ducit ex amore Veritatis, Diligentia, Obedientia ac Justitia Soror, Virtutis filia. Utrum verò natu maxima, an minima dicenda, quove ordine numeranda sit, judicatu difficile est. Etenim propius inspicienti, nunc diligentiam ortu suo antevertere, nunc ipsa justitia, nunc obedientia esse videtur. Quomodo enim diligentem Veritatis auditorem se præbebit, qui sui curam habet? se qui audit? secum qui garrit, mussitat, imò vel hincit? Rursus, se qui negligit, quid aliud, quàm gladium illum justitiæ stringit, quò superflua rescinduntur? Et cum inter Veritatis præcepta sit illud; *nullam sui rationem esse ducendam præ amore Veritatis*: nonne huic qui obedit, seipsum negligit? Nunquid ergò humilitas unum atque idem erit, quod Justitia & Obedientia. Vix equidem mihi consto, non habens quod dicam; nisi Sorores istas, justa necessitudine devinctas, artisque benevolentia brachiis se invicem amplexas, mutuâ prærogativâ impensius, quàm suâ gaudere: ut hætenus universæ quidem simul exambiri velint, quælibet tamen sibi quamlibet anteferri, non jam solum molestè non ferat, sed id fieri seriò gelliat.

2. Hu

2. Humilitas est Neglectus, vel contemptio quædam suâ, sensu non affirmativo, sed negativo, intelligenda. Nec enim ut humilis perhibearis, necesse est, teipsum infames, malè accipias, indignis modis tractes, Veritatis lege *per se* nihil horum injungente: *per se*, inquam: ex causa enim fieri potest, ut horum aliquid præstare tenearis. Velut si è gangræna laboret membrum, uisionem vel sectionem admittis, quia *immedicabile vulnus ense recidendum est, ne pars sincera trahatur*. Humilitas contemptus est suâ *negativus*, quò Philaretus de se non laboret, se non curet, nullam suâ rationem ducat præ amore Veritatis. Potest sanè quidem Vir bonus parare, quæ corpori commoda sint & animo suavia, attamen ut ne suâ, sed veritatis causâ & amore agat, cautio est. Verissimum namque est, vitam non esse prodigendam, sed servandam: corpus quandoque esse reficiendum, animum relaxandum, ut quod operis & muneris habes, ad laudem Creatoris exequare.

3. Nec temerè additum illud, *præ amore Veritatis*, vel, si malis, *Dei*, quem jam pridem Veritatis authorem & exemplar agnitum veneramus. Unde enim, nisi ex amore Dei & Veritatis illa suâ contemptio proveniret, philanthiâ homini adnatâ nusquam non se ingerente, nihil non vitante? Qui nullo Veritatis amore incenduntur, quando vel maximè seipsum contemnere atque negligere videri volunt, hoc unum agunt, ut se suaque curent. Qui rem familiarem oblimant, perpotant, in multam lucem, imò totos dies stertunt, suâ rerumque suarum securi, quid nisi de se laborant, suâ causâ desides, officiumque deferentes, ut genio indulgeant, laboris atque molestiæ vacui? Et qui mortem anticipant desperabundi, nonne suâ maximè causâ tantum audent nefas? scil. ut paupertatem, infamiam, supplicia, & quæ id genus sunt alia effugiant. *Succurrit etiam illud Apostoli; Quisquis totam legem servave-*

vaverit, impegerit autem in uno, damnas factus est omnium. Quî verò? Nempe non servat animò obediendi & amore præcepti, qui delectum habens vel unum ex omnibus præceptis reservat. Obedientiam enim suî vult esse arbitrii, obedire paratus, quoad placuerit: itaque totam legem pro lubitu servans, in uno pro lubitu peccans, suî veriùs, quàm legis amorì obsequitur, universæ Legis & Legislatoris contemptor.

4. Ante omnes scientias unam homini necessariam, nempe scientiam suî, identidem nos meminisse jubet jam Priscis decantata, imò Pythicis Oraculis adscripta vox, *Nosce te ipsum*. Tantò quippe fœdior suî est ignorantia, quò pluries & turpiùs hallucinandi peccandique causa existit. Hinc priorem Humilitatis partem facimus *Inspectionem suî*: cujus duo præcipua sunt præcepta, *Quid videlicet, & quo fine nobis sit inspicendum*.

5. *Primum* quod attinet, Homo & omnia hominis sunt excutienda, Intellectus, Voluntas, sensus, affectus, habitus, inclinationes &c. ut quæ singulorum vires, quis usus & abusus, qui defectus, quæ vitia adnata & contracta: quid item nostrum, quid alienum sit &c. Quid Deo, quid nobis, quid aliis, naturâ, dependendi necessitate, conditione &c. debeamus; compertum fiat. Hæc secum identidem meditari ad vitam tum emendandam, tum rectè formandam, quàm maximè expedit. Largam meditationi materiam suppeditare possunt, quæ supra de Intellectu, Voluntate, affectibus & habitu disseruimus.

6. Quantum ad *Alterum*; Cavendum est sedulò, ne quod Philosophis quàm plurimis accidisse videmus, utilissima præceptione, *Nosce te ipsum*, propriam in fraudem abutamur, velut nos ipsos nôsse moniti, ne dignitatem quique suam & excellentiam nesciremus, cujus inanis præsumptio atque fiducia ad rectam & sapiendi & agendi meram per-
tingere

tingere volenti nimio plus nocet. Nullus equidem nego inditam esse naturæ nostræ aliquam nobilitatem, quæ ad justitiæ honestatisque studium merito nos expergefacerere deberet; attamen Philosophos eam tacuisse, quàm tot elogiis ambiciosè conquisitis extulisse, in re Ethica longè præstiterat. Quid enim hîc benigna Oratio aliud, quàm sponte prurientem in hominis medulla superbiam suis illecebris titillet, suis blandimentis foveat, hominem in seipso acquiescere doceat, & præclusis tandem vitiorum emendationi viis, miserum pessimè perdat? Placet illud Chrysostomi; *Fundamentum nostræ Philosophiæ est humilitas*: non illa quidem, ubi homo aliquantæ virtutis sibi conscius à superbia fastuque temperat, sed ubi talem se verè sentit, qui nullum habeat, nisi in humilitate, refugium. Ad hanc rectè demùm componemus animum, si subinde intra nos ipsos descenderimus, defectus & vitia, quibus ab utero matris usque illaqueati tenemur, ad serium examen deposcentes.

7. Humilitatis altera pars est *sui Despectio*, quâ multimodæ impotentia, imbecillitatisque meæ conscius, quinimò & inopiæ, ignominia & turpitudinis sensu confusus haud aliter, atque rei veritate & ista mea tenuitate dignum est, de me sentio: Atque ita I. Meipsum Deo, cujus, ut suò vidi locò, totus sum à conditu (totus, huc veniendo; totus, hîc agendo; totus, hinc abeundo,) relinquam, dedam, transcribam, nullam meî rationem ducturus, nisi quoad obediendi officium permiserit, certè rationem meî saltem posthabiturus: & cum nihil juris ullam in rem, nedum in me ipsum habeam, ut quæ suprâ cap. II. III. intelligendi & volendi facultatem insipienti succurrebant, abundè comprobant, etiam juris istius nihil mihi arrogabo, non quod affectui lubet, sed quod Deus jubet, curaturus; nec de commodo, sed officio meo laboraturus; meque adeò, meaque omnia arbitrio
ipsum

*Hom. de
Perf.
Evang.*

ipſius reſignans vitam non meò conſiliò componam, ſed omne ſtudioſum juiſſis ejus fideliter impendam.

8. 2. Cùm me meaque omnia in lucem produ-
cens, & ad amuſſum verbi atque judiciì divini in-
ſpiciens, nihil planè mihi ad vitam rectè institu-
dam, & animum ſolida pace tranquillandum, re-
linqui videam, inopiæ & turpitudinis meæ ſenſu
confuſus, omnique fiducia ſapientiæ, probitatis,
juſtitiæ & meriti prorſus abdicatus, meipſum ab-
negabo, evacuabo, exuam, abjiciam, alius, ar-
que hætenus mihi videbar, futurus, à me ipſo de-
migraturus, & quaſi in nihilum rediturus; ut inſi-
pientem erudiat, nudum veſtiat, inopem dicit,
ſordibus peccati ſqualentem perpurget, amiſſum
inveniat ille, qui nobis factus eſt ſapientia à Deo, *1. Cor. I.*
& juſtitia, & ſanctificatio, & redemptio. *30.* Atque
hæc etiam eſt illa noſtræ abnegatio, quam diſcipulis
ſuis à primo tyrocinio mandat Servator. *Matt. 16.*
Quæ ubi *24.* ſemel in animo obtinuit, neque ſuperbiæ, neque
faſtui, neque oſtentationi, neque aliis, quæ ex
Philautia generantur, malis locum ullum relin-
quit.

adeò divina bonitas in ea demonstretur, cum unione similitudinis, tum communione beatitudinis, in peccato aperta Veritatis illius abnegatio est, peccatore suum exemplar abnegante, alium sibi finem constituyente, aliudque bonum quærente. Unde peccato qui operam dat, mendacium facere, & Dia- *Apo. 21.*
 bolus generi nostro peccandi author in Veritate non *27.*
stetisse dicitur. Videtis etiam suprà Part. II. c. I. *Job. 8.*
 §. 1. n. 7. 44.

3. Quare non nisi Libertinis & Atheis probari potest, quod inter scita Theodori Athei refert Diog. Laertius; furto quoque & adulterio & sacrilegio, In Arcum tempestivum erit, daturum operam Sapientem. Nil stip. hil quippe horum turpe naturâ esse, si auferatur de hisce vulgaris opinio, quæ stultorum, imperitorumque consensu constat. Et illud ejusdem de Archelao & Aristippo. Iustum & turpe non naturâ constare, sed consuetudine ac lege.

§. 2.

Inclinatio ad agendum, non ex studio Veritatis, sed ex amore sui unico, Vitium est Virtuti oppositum.

E X P L.

1. **A** Mor sui ipsius simpliciter spectatus vitio dandus non est, suâ quemque naturâ sibiimet ipsi conciliante, & nemine suam ipsius carnem odio habente. At amor sui unicus est amor mendacii, quò quis à vero fine & Bono aversus seipsum sibi finem constituit, in quo Veritatis abnegatio & contemptus, atque omnis ordinis eversio est.

2. Hinc igitur non ipsa passio, sed inclinatio & propensio ad agendum vel omittendum propter passionem, vitiosa est. Amare, cupere &c. jucunda, per se vitio caret: at propendere ad consecrandum jucunda propter amorem jucundorum, quò blandè afficiaris & delecteris, turpe est, quippe cum te
 ipsum

ipsum studii illius finem habeas. Unde tametsi alii ad vindictam; alii ad cupidinem, alii ad metum &c. proni dicantur, corporis mixturâ, ætate, conditione, vitæque institutis passionibus multum variantibus: non tamen alia & alia, sed similis in omnibus proclivitas est ad obtemperandum passionibus, vel agendum propter passionibus. Errant proinde, in Naturæ Parentem injurii, qui ad ulciscendum injurias, irâ; ad stuprum, cupidine; ad fugam, metu &c. festimulari dicunt. Quod enim ad agendum concitantur, non istarum passionum, sed amoris sui ipsorum unici, & indulgentis, effrenati que animi, culpâ fit.

§. 3.

Hostes Virtutis Capitales sunt Caro, Mundus & Diabolus, in oppugnationem Virtutis pari studio, diversa fraude, conspirantes.

Caro stimulat ad sectandum jucunda ideo solum, quia voluptatem afferunt seipsum amanti.

Mundus sui amantem infatuat opinione & existimatione aliorum de actionibus ejus.

Diabolus homini carnis & mundi illecebris capto, & à Veritatis tramite seducto præcipue pertinaciam & studium perseverandi in cæptis suadet & urget.

E X P L.

1. **E** Carne est proclivitas ad jucunda, quæ voluptati esse possunt, citra respectum ad alios, i.e. non attentò, quæ sit aliorum de nobis opinio, vel existimatio. In jucundis autem numeramus non solum quæ corporalem, quam vocant, & animalem voluptatem afferunt, ut sunt, bona valetudo, robur, forma, vigor sensuum, agilitas membrorum: pascus, Venus, grati odores, contentis, spectacula; sed etiam quæ ad humanam Voluptatem, spe-

speciali nomine sic dictam, pertinent, & avaritiæ, ambitionisque irritamenta & fomenta sunt; ut dignitas & potentia, honoribus, opibus, gratiâ, amicorum numero & populi favore spectabiles. Hinc Apostolus carnis operibus accendet non modò *Gal. 5.* quæ cum charitate, concordia, castitate, temperantia & iustitia configunt, verùm etiam quæ Religionem & Cultum Dei oppugnant, velut hæreses, quarum mater ut plurimum est ambitio. Imò ne quidem illa excludimus, quæ non tam suapte vi, quàm consuetudine, stultaque hominum persuasionem, oblectationem habent. Quæ enim facere consuevimus, etsi molesta veriùs quàm jucunda sint, tandem tamen facere juvat. Sic multis Indias, quas vicibus aliquam multis addivere, per tot discrimina rerum repetendi voluptas non perit. Hisce nunc jucundis qui solùm voluptatis causâ inhiant, ut affectui obsequantur suo, *Carnales* sunt, suî amore cæcati, à Veritatis amore alienissimi.

2. Unde & illud consequitur; eos, qui rudi Adolescentiæ, quam literis formandam susceper, nihil nisi Musarum delicias prædicant, Veritatis & Honestatis amorem neglectui habentes, non procul à lenonibus abesse. Adolescentes quidem ad studia literarum nisi pellice aliqua voluptate induci vix possunt: incautè tamen faciunt Magistri, quando segnitiam istam expulsuri blanditiis Poëtarum fabularumque illecebris eosdem arctiùs illaqueant.

3. *Mundi* certè idem quod *Carnis* est studium, quando in eo est totus, ut concupiscentiæ carnis escam & fomenta quærat. Unde & concupiscentia *1. Jo. 2.* *carnis, cupiditas oculorum & fastus vitæ ex Mundo 16.* esse dicuntur. Speciatim tamen *Mundus* suî amantem sollicitat spe gloriæ apud alios obtinendæ. Hinc adeò fit, ut qui *Mundi* studio tenentur, sæpè sint benefici & munifici, libenter aliis gratificantes, aliorum affectui obsecundantes, de civibus suis &

Rep. benè merentes &c. neque tamen omni illo studio aliud, quàm seipsos quærant; puta, gloriam suam, existimationem, statum decorum; pompam, & consimilia imaginationis ludibria & umbras.

4. Hactenus igitur cō differre videntur Carnis & Mundi studia, quòd Caro se tantum respiciat, sua voluptate contenta: Mundus verò oculos aliorum rapiat & circumferre jubeat. Unde Carni pronus est in Mundum descensus. Sæpè enim videas vitæ genus & institutum amplexos, solum quòd placeret, & volupe satisque animo faceret, postea, omni oblectamenti sui condimentò per usum diuturniorem decoctò; eidem vitæ instituto pertinaciter inhærere; scilicet, ne malè elegisse, neve varii & parum constantes videantur aliis.

5. A Mundo autem ad Carnem non perinde facilis est reditus, hominibus Mundi studiò detentis rarò ex sola delectatione & animi gratiâ in eo, quod admirationis & existimationis causâ agere cœperant, perseverantibus. Unde cū Diogenes olim nudum se in luto ac nivibus volutaret, eoque spectaculò multos ad se converteret, totosque raperet: nonnullis miseratione permotis hominem inhibere properantibus, Plato Spectatores discedere jussit, brevi futurum pollicitus, ut Spectatoribus dilapsis Diogenes sponte desisteret. Hòc Mundi contagiò etiam præstantissima Heroum facta sæpè vitari videmus. *Offic. l. 1.* *Vix invenitur, inquit Cic. qui laboribus susceptis periculisque aditis non quasi mercedem rerum gestarum desideret gloriam.* Imò cū vix quisquam laudis cupidine magis arderet, quàm Cicero, teste Plutarcho, vanitatis studium defensurus non dubitavit affirmare, *Optimum quemque maximè gloriâ duci.* Quasi, quod Vulgi dictèrium est, Virtuti proficere & ad ardua conitti non detur, nisi comitante & stimulante Vanitate. Sed falluntur, quotquot alio,

alio, quàm Veritatis amore ducuntur: *repperunt enim*, ut Veritas ait, *mercedem suam.* Matth. 6: 2: &c.

6. Quos carnis oblectatio & Mundi gloria in servitute amplius retinere non possunt, deficientibus illecebris & lenociniis, Diabolus manumissos nolle, quâ coeperunt pergere jubens. Pergunt igitur solum quia inceperunt: *Perseveramus*, inquit Seneca, *in variis, ne videamur cœpisse sine causa*: nisi foris infamia, tedium, paupertas, morbi, aliæ damnorum agmina miseros insecuta duræ servitutis vincula rumpant. Exempli causâ; Adolescens in turbam sodalium incidit, consortii & vini suavitatem illectus compotare incipit: hinc carnem intelligit. Hac delectatione per satietatem ablata nihilominus potare pergit, quia priorem aliis à turba discedere, indecens; contra nocturno certare merô, putere diurno, & vincere velle, gloriosum habetur: hinc Mundum audis. Tandem verò & hoc retinaculo abrupto, insequente non jam solum fastidio, sed etiam infamia ex vinolentia & crapulæ sordibus, quibus & hospiti stomachum, & adstantibus risum movet, nihilosecius perpotare pergit: usque adeò desistere incepto difficile est. Hanc pertinaciâ, velut operis sui caractere, agnoscitur Diabolus, præcipue senes infestans, quippe qui ipsa ætate in prævum indurescunt. Scilicet suo more facit, suoque indicio se prodit Spiritus malignus. Superbiâ primum præcipue peccasse Diabolum, arguunt ejusdem studii vestigia. Honores divinos etiamnum affectat erectio saltem pristini statûs idolò: & in criminis societatem usque & usque homines incitat. *Homicida erat Joh. 84 ab initio*: primo hoc opere, homicidiò, cognitus 44. est, & in eo perseverat, quia incepit. *In veritate non stetit*: hæc secta studii ejus est deinceps, ut, quando loquitur mendacium, ex suis loquatur, quippe mendax, & pater mendacii.

7. Hinc patescit, hostium virtutis terribilissimum, infestissimum & maxime horribilem esse Diabolum. Caro & Mundus hominem blanda fucata voluptatis compede detinent: Diabolus sibi mancipatos non aliò remuneratur præmiò, quàm morte, & ædiò & desperatione. Pergere quidem illis volupe est, quia incepere: sed, si tamen hæc dicenda est voluptas, tetra planè & execrabilis est. Deinde quos Caro & Mundus Diabolo emancupant, tristi sub auctoramento, missionem nunquam habent, quoniam hæc quasi symbolò; *perge, quia cæpisti*, auctoratis ratio perseverandi nunquam deest. Denique Diabolus hòc infestior est hostis, quòd non aperto Marte, ut Caro & Mundus, sed astu hominem aggreditur, Virtutis fautor & promotor videri volens, ingeminato quasi carmine Imperatoris timido animum addentis;

I bone, quòd virtutis tua te vocat; I pede fausto, Grandæa daturus meritorum præmia, quid stas? Et illud

Quòd bene cæpisti, fac pede semper eas.

Hinc adeò ignaros modi atque finis à defectu ducit ad excessum, ut, dum stulti vitant vitia, in contraria currant. Exempli gratia, *avarum cum vetat fieri, vappam jubet ac nebulonem*. Nusquam consistendi locum dans, semper pergendum suadet, & captum urget.

CAP. IV.

De Virtutis ab Officio Distinctione,
Unitate, Æquabilitate &
Simplicitate.

§. I.

Virtus ab Officiis caute distinguenda est.

E X P L.

1. **O**fficium dicimus, quod unumquemque in re qualibet *efficere* convenit, pro conditione personæ, loco, tempore &c. Est verò Virtutis officium aliud *Internum*, quod animò absolvitur, velut, inquirere Veritatem, obedire Veritati &c. imò vel ipsa Virtus inter Virtutis officia est. Aliud *Externum*, quod extra animum in corpus, aliasque res sese diffundit, Virtute legem affectibus & actionibus imponente, ut quantum ex parte nostra valeamus, etiam in externis velimus.

2. Atque hujus posterioris generis officia à Virtute distingui oportere, hinc satis innotescit; quia quod facere officii est, non semper ex Virtute fit, cum sæpè officia Virtute vacua & informia sint. Ex Virtute non agit, qui vel indole sola & naturæ propensione, vel consuetudine, facit, quod officii ducit: velut qui offensæ veniam dat, vindictâ abstinens, quia naturâ mollis, timidus, stupidus, aut perditè vivendo famæ prodigus est, vel stultâ suâ fiduciâ semet omni contemptu superiorem putat. Liberalis non est, qui ut auram popularem capter, avaritiam occultet &c. largè donat. Fortis non est,

L 3

qui

Seneca
Epist. 32.

qui vel ad mala obduruit, vel ambitione, aut sanguinis æstuantis impetu ad pericula trahitur. Enimvero non aliam quàm Veritatis & ordinis legem sibi sequendam sancire, Virtutis est. Omnis res, omne officium, quod non habuit decus Virtute addita sumit. Officium præstitum, & puro corde, conscientia bona, fide non fucata, quæ in amore Veritatis unico insunt, boni demùm operis laudem consequitur. Unde conficitur, officium à Virtute non tantùm distingui, sed etiam divelli & separari posse. Quemadmodum vicissim & Virtus sine officio est, deficiente nimirum materia vel instrumento: quo casu tamen Vir bonus virtute non magis carere dicetur, quàm arte sua artifex, cui exercendæ artis materia & instrumenta desunt.

S. S.

Virtus secundùm se considerata Una est: in varia tendens Officia, quæ informat, Virtutum particularium nomina sortitur.

E X P L.

1. **V**irtus cùm sit amor Veritatis unicus &c. in diversa semper propendet officia, facere parata, quod cuique debet, quoties occasio fert, & materia officii exequendi suppetit. Ipsa ramen secundùm se considerata Una est, in quodcunque demùm exeat officium, ut patet virtutem inter ac officia rectè distinguenti. Seclusis enim cogitatione omnibus à virtute officiis, unum quid & simplex superest, quod in alia resolvi nequit, nempe Amor Veritatis unicus, sive studium faciendi, quod ipsa jubet. Hoc studium etsi in diversissima tendat, nunc ad dandum, nunc ad retinendum: ad loquendam modo, tùm ad tacendum &c. inclinans; idem
ramen

tamen atque unum quid in omnibus istis respicit, puta executionem ejus, quod Veritatis amor unico convenit. Quemadmodum castigare & consolari filium officia Patris sunt diversissima; utrumque tamen è re nata facit, eodem amore ductus.

2. Nihilominus plures dicere solemus Virtutes, considerata varietate cum officiorum, quæ una Virtus informat, tum circumstantiarum, in quibus ipsa exercetur: inde adeò etiam Virtutum particularium nomina sortitur. Sic Virtus, ubi refertur ad officia Deo debita, *Pietas*; ubi ad officia, quæ suo quemque proximo devinciunt, *Liberalitas*, *Comitas*, *Aequitas* &c. dicitur. Omnes tamen illæ Virtutes particulares in Amore Veritatis unico, tanquam Virtute una, Principali, Universali & Matre, conveniunt, unde etiam proficiscuntur, alioquin nomen, quò gaudent, non merituræ.

3. His, ut oportet, attentè consideratis, non obscurum erit, quod aliàs esse solet, Interpretibus, quare Apostolus Petrus Virtutem Unam agnoscere, & à Continentia, Patientia, Pietate &c. distinguere videatur, *suppeditandam injungens in fide virtutem*, 2. Pet. 1. *in virtute cognitionem, in cognitione continentiam, in conti-* 5. 6. 7. *nentia autem patientiam, in patientia pietatem* &c. Plures interim Virtutes ponente Apost. Paulo, quando in hunc modum hortatur Philippenses, *Quod reliquum est*, Phil. 4. *Fratres, quæcunque sunt vera, quæcunque gravia, quæcun-* 8. *que justa &c. si quæ virtus, & si quæ laus, hæc animo versate.* Nec mirabor, Scripturam S. frequentissimè *Bona Opera*, rariùs *Virtutem* dicere, quando vitæ sanctitatem atque probitatem inculcar. Unam enim Virtutem, *ὁσιότης ἀληθείας* sanctum Veritatis studium, ceu legem menti inditam, agnoscit, eamque ad officia Virtute informanda refert, unde & eadem ex Virtute præstita bonorum Operum laude ornat.

*Hinc facile est decidere cum Stoicis super Paradoxo ;
Virtutes individuas, itemque pares esse.
Virtus quia Una, etiam in officiis, è quibus particu-
larium virtutum nomina accipit, individua est.*

E X P L.

*Stob.
Eclog.
Laert.
l. 2.
Zenon.
Thsc. 2.*

*1. Offic.
c. 27.
l. 22.
Moral.*

1. **H**Oc Stoicorum est, Ἀρετὰς εἶναι πλείους, καὶ ἀχωρίστους ἀπ' ἀλλήλων, Virtutes plures esse, atque eas inseparabiles. Unde consequitur, unam qui habet, omnes habere. Et Cicero, Si unam, inquit, virtutem confessus sis te non habere; nullam necesse sit te habiturum. Idem è Christianis senserè nonnulli, ut Ambrosius, Virtutes individuas esse, sed opinione Vulgi sejunctas. Itemque Gregorius, Una Virtus sine aliis aut omninò nulla est, aut imperfecta est. Hæc Stoicorum sententia quia non tantum communem hominum opinionem, sed & experientiam impugnare videbatur, virtutem veram à fictitia, perfectam ab imperfecta distingui placuit ita quidem, ut fictitias & imperfectas semet comitari negent. Neque tamen ea distinctione efficiunt, quominus insolentia dogmatis offendat. Quid enim vulgo absurdius, quàm eum, qui comis est & facetus, castum etiam necessariò, & pium & religiosum haberi? nec posse eum, qui gravis sit atque severus, avarum & sordidum esse?

2. Virtutes particulares sensu, quo suprâ, intellectas solitarias esse negamus. Vulgo officit præjudicium, ex quo distinguenda confundit. Plurimum enim Virtutem inter & officium interesse è superioribus liquet: unde non modò alterum ab altero distingui, sed utrumque ab altero divelli posse, ostendimus. Inde ergo urbanus credi potest, qui castus

non

non sit, quia sæpè urbanitatis officium facit, qui castimoniz officium deserit. Atqui cùm Virtus una sit in omnibus officiis quæ pariter informat, urbanitatem à castitate, ut virtutem à virtute divelli negamus. Qui enim in casu dato urbanitatis officium exequitur, castitatis non item, is sicuti castus non est, ita nec urbanus: quia urbanitatis officium informe & virtute vacuum est. Aut quare demùm urbanitatis partes explet? Anne quia Veritatis amor unicus suadet? Cur igitur castitas, quam æquè suadet, neglectui est? Scilicet quod urbanitatis esse videtur facit, quia sic facere placet, vel ad faciendum libidine sua fertur.

§. 4.

Virtus cùm una sit, etiam æquabilis suique semper similis est in diversis, quæ informat, officiis.

E X P L.

1. **I**N Stoæ paradoxis est, *Virtutes inter se pares esse;* quod etiam ad Virtutum Cultores, & rectè facta extendunt. Unde Seneca, *Virtutes*, inquit, *inter se pares sunt, & opera virtutum & omnes homines, quibus illæ contigere.* Et Chrysippo par virtus visa, patriam fortiter servasse, & muscæ morsum viriliter sustinuisse. Hanc sententiam meritò expolunt, qui Virtutes specie distinctas etiam excellentiâ disparant.

Epist. 66.

De com-

mun. Not.

apud

Plato.

2. Nobis minùs probanda videtur eo maximè nomine, quòd Virtutem & officia confundit. Utur enim Virtus suâ similis hætenus & æquabilis sit ubique, majus tamen haud dubiè officium est servare parentem, quàm servum: Remp. à servitute vindicare, quàm civem &c. Unde patrè & servo in pari discrimine versantibus, utrumque si servare non possis, hòc desertò pro illo periclitandum esse quis verò dubitet?

3. Qua-

3. Quapropter etsi officia & opera virtutis alia aliis longè majora, urgentiora & excellentiora sint, virtus tamen ipsa in omnibus illis sui similis, neque ipsa se major minorve est. Secus si foret, minor virtus certo casu, non jam virtus, sed vitium, h. e. lux tenebræ, esset. Servate enim famulum deserrò patre, nemini non scelestum videbitur. Patri igitur quum succurris, & servum destituis, non majorem virtutem amplecteris, sed scelus omittis. Contrarium si facias, non minorem exerces virtutem, sed minus officium virtute vacuum & informe amplexus gravissimè delinquis. Adde quòd vulgò constet Philosophis, Fortunæ veram in virtutem nihil esse juris. Atqui si virtus virtute major sit, jam à fortuna pendebit, optimusne sim, an paulò deterior. Mihi enim occasio est famuli servandi, patris non item, quippe cum de vita non periclitetur. Tibi datur occasio & servandi patrem, & liberandi Remp. quod mihi privato negatur. Tu igitur non virtute, sed casu, fortunâ, occasione, me melior, neque adeò melior, eris; cum sola virtus bonum, meliorem, & omninò quicquid hinc gradus est, efficere possit, fortunâ, quam Vulgus intelligit, ad id nihil valente. Numquid verò absurdum videbitur, te aliò meliorem esse nulla tua virtute? Cæterum erronea opinione, quâ vulgus imbutum sibi persuadet, virtutem è fortuna pendere, tandem eò proficitur, ut virtute è fortunæ bonis æstimata, hòc quique probiores videri incipiant; quò vulgò magis fortunati habentur. Qua persuasione confirmatâ, virtus quid nisi profligata jacebit? Unde Poëta; *Virtus nisi cum re, vilior algæ est.* Et illud ejusdem de avaro;

Quoad vixit, credidit ingens
 Pauperiem vitium, & cavit nihil acrius: ut si
 Fortè minùs locuples uno quadrante periret,
 Ipse videretur sibi nequior.

S. 5.

In Virtute porro ut sui semper simili etiam inest Simpli-
citas, seu Integritas, quâ Voluntas integrè fertur in
id, quod Veritatis amori convenit, & simpliciter
optimum deprehenditur.

E X P L.

1. Hoc primum quasi Virtutis condimentum est,
absque quo non modò insipida, sed ne qui-
dem virtus est. Hæc illa in S. Codice toties & ver-
bis & exemplis commendata ἀπεργιότης, ειλικρίνεια,
ἀπλότης &c. Integritas & Simplicitas, duplicitati
cordis & perversitati viarum opponenda. Velut in
illo Salomonis; *Ambulans integrè salvus erit, & Prov.*
perversus duabus viis cadet in una. Ex. gr. Coortis 28: 18.
in civitate turbis ex tyrannide & injustitia, tutius
salutis præsidium non fuerit, quàm servare integri-
tatem morumque probitatem. Verissimum est Gal-
lorum verbum; *Il n'y a plus grande finesse, que*
d'être homme de bien. Ex adverso qui duplici via u-
tuntur ἀλλοπράσταδοι, temporarij servientes, moribus-
que & voluntati eorum, qui in civitate plurimum
possunt, sese accommodantes, semper obsequiosi,
in hoc, vel illo instituto cadant, necesse est.

2. Significat autem Simplicitas illa & integritas
S. Literis laudata soliditatem quandam & partium in-
teriorum & exteriorum conformitatem. Solidum
enim suū plenum, ἀκίβδηλον, non fucatum, non
corruptum, non aliud, atque esse videtur, sed in-
tegrum & sincerum est, sine fuco & fictione. At-
que talis est virtus, unico veritatis amore contenta.
Neque enim vel lucri famæque illicitiō, vel damni &
ignominie terriculō corrupti, neque ἐτερογενεία
commisceri, vel ὁμογενεία dividi patitur, suū ubi-
que

que similis, à seipsa nusquam discrepans, unum finem ac metam secundum unam regulam constanter sequens.

3. Ei opponitur *Hypocrisis*, Scripturæ S. Cor duplex, vel *Cordis & viæ duplicitas*, dicta, quâ quis bona dicere & facere eligit per concupiscentiam; mala verò omittit, non quia odio sint, sed quia mentiri probitatem placeat. Recta igitur facit Hypocrita, & vir bonus videri vult, suū, commodique gratiā, quò negatō, vel ademptō, alius est multo, quā solebat. Virtutis ergo umbram quæstui habet, *personasque admiratur utilitatis causā.*

Jud. v.
16.

Job. 15:
34.

4. Hypocritarum porro non unum genus est. Sunt, qui & esse, & facere videri velint, quod nec sunt nec præstant, *introversum turpes, speciosi pelle decora*: qui haud dubiè omnium sceleratissimi sunt, quippe hominum, quā Dei, reverentiores. Sunt qui faciendorum delectum habent, amantes quædam & facientes non sine zelo; omittentes alia pro arbitratu suo: quod si quædam deposuere mala, nihilominus alia in deliciis habent, & in sinu fovent, ubique sibi dissimiles.

C A P. V.

De Pietate.

§. I.

Officia Virtutis partim in Deum respiciunt ; partim in Nos ; partim denique in alios Homines.

Quæ in Deum respiciunt Pietatis & Religionis nomen complectitur.

Pietas est de Deo sentire , eundemque colere , quemadmodum Veritatis amori convenit.

Rectè de Deo sentit , qui non tantum quæ Ratio , sed & quæ Verbum Dei scriptum de ipso docet , indubitata agnoscit & citra hesitationem , demisso atque pronò animi obsequiò , amplectitur.

E X P L.

1. **S**IC Apostolus , quando gratiâ Dei salutari nos Tit. 2: 11. 12.
 Serudiri dicit , ut abnegatis impietate & cupiditatibus , quibus seculi homines serviunt , temperanter & justè & piè vivamus : tribus verbis breviter omnes officii nostri partes conclusit ordine , quo ipsa ad Deum conversio & Gratix fides sese testatam facit. Cui enim gratia salutaris affulsit , ab iis , in quæ Mundus ceu vera sua bona insanit , aversus justitiam colit , & cum omnes promiscuè , tum in primis gratix consortes pronò charitatis affectu prosequitur. Quæ quidem indubia veræ ad Deum conversionis atque ingenuæ pietatis argumenta sunt.

2. Pietatis ante omnia est , sentire de Deo , quemadmodum veritatis amori convenit. De Deo , inquit Aug.

Aug. *optimè existimare, pietatis est exordium. lib. 1. de lib. arb.* Neque non magni refert, vera & recta de Deo sensisse. Cum enim id ipsum per se pars est pietatis, quæ judicio mentis, conveniente motu & affectu voluntatis, & ut officii fert natura, actione corporis constat; cum verò prout de Deo senseris, ita animum ad ejus cultum & obsequium religiosum compones.

3. Tenenda autem de Deo non solum quæ Ratio, sed etiam quæ Scripta divina docent; quandoquidem instruendæ pietatis praxi in Ratione, vel *γνώσι τῆ Θεῶς*, neutiquam satis est præsidii. Eò enim pertinet, rectè sentire de Deo, de Attributis, Virtutibus, Operibus atque Personis divinis: in quibus plerisque Ratio vel caligat, vel penitus deficit. Atque in his cumprimis illæ nobis meditandæ sunt Virtutes divinæ, quarum sensus, velut idoneus pietatis Magister, ad officia, quæ inde pendent, facienda nos deducat. Quales sunt Potentia, Sapientia, Bonitas, Sanctitas & Justitia, Gratia item Misericordia & Longanimitas. Quæ alia huc pertinent benè multa de Deo, ejusque Providentia &c. videsis supra lib. 1. cap. 3. & 4. Ubi de notionibus insitis, & imperio voluntatis nostræ.

I.
Potentia Dei.

I. DE POTENTIA DEI non satis est tenuisse, eâ Deum immensâ pollere, Mundumque ut semel condidit, identidem sustinere: verum etiam eâdem solâ nos esse, vivere & moveri in singula momenta: per eam solam nos cogitare, velle, sentire, atque omnino agere: absque ea sit, nihil etiam sensui nostro gratum molestumve accidere, nobisque adeò vel prodesse, vel nocere posse; usque eò; ut nulla res creata quamlibet sive commendabilis, sive formidabilis videri soleat; ex se quidem benè aut malè nobis facere queat: id quod capitibus mox citatis dicta abundè comprobant.

Unde consequitur, 1. Non nisi Deo, seu Auctori

thori unico & causæ felicitatis & prosperitatis cuiuscunque nostræ, amore unionis esse adhzrendum: neque nisi in Deo, ut perenni bonorum fonte deliciandum. Secus qui facit, alium felicitatis suæ authorem recognoscit. Quod iudicium, cum sit falsissimum, inordinatos consequi motus concupiscentiæ, necesse est. 2. Solam Dei Potentiam formidandam, nec ignavo questu & mœrore prosequenda adversa, quæ miseros, sed lugenda esse peccata, quæ malos reddunt, Deique in nos Potentiam atmanr. 3. Cum & voluntas & actio hominis nisi per Dei Potentiam ad nihil valeant, Lege divina omnes hominis motus & actiones contineri oportere. Turpissimum igitur esse Potentiæ divinæ abusum & inexcusabilem profanationem, eam ubi voluntate ejus usque deque habita, concupiscentiæ tuæ ac peccato servire velis. Etenim, quod observatu dignissimum, nihil eâ Potentiâ divinius est, nihil Sanctius: quod ejus est sibi arrogare, eamque voluptatis, intemperantiæ & libidinis suæ obsequio addictam velle, scelus est, cujus enormitatem, quanti quidem est, solus Deus cognoscit & punir.

II. DE SAPIENTIA Dei non satis est ita sensisse, ut eam in Deo infinitam residere, & universalem Mundi majoris & minoris fabricam quoddam quasi theatrum mirificæ sapientiæ spectaculis instructum, agnoscas: tenendum porro, nihil usquam sapientiæ ac lucis, nihil sinceræ veritatis reperiri, quod non ab isto fonte fluat, & cujus ille, qui Sapientia Dei est & Lux illa vera illuminans omnem hominem, non sit causa. Hominem sanè suam sibi lucem non esse, neque ex se sibi vel aliis vera & recta sapere, vel eò evidenter arguitur, quòd id ipsum, quò sapit, omnibus creaturis intelligentibus commune, universale, indemutabile, necessarium & æternum est. Non minor est stupor, sapere sine Deo,

I I.
Sapientia Dei.

Joh. I:
9.

Deo, quàm posse quid sine Deo, opinari. Videsis quæ in hanc rem dicta lib. 1. c. 3. §. 8. n. 2. Cur tamen sic vulgò opinemur, in causa est, quòd laboris nimio plus molesti, quem veritati indagandæ impendi necesse est, probè consciis, eundem interim laborem *admiraplas*, infirmitatis & dependentiæ nostræ multimodæ argumentum esse non animadvertentibus, operatio Dei, qua menti lucem affundit, nullum sui sensum ingerit. Inde adeò fit, ut temerè & insolenter industriæ & labori nostro transcribamus, quod divini beneficii est.

Unde conficitur. 1. Verum illum Doctorem, qui lucem sapientiæ & veritatis animo nostro invergit, non esse inter creaturas, cum quibus homini commercium esse potest. *Sapientia unde invenitur?*
Job. 28. Non novit homo, quanti ea sit, & non invenitur in
12. 13. terra viventium. Abyssus ait; non est in me illa; &
14. mare ait; non est apud me. Unum igitur nobis agnoscendum esse *Magistrum, Christum*, Dei Sapientiam, qui & intus per lumen intelligentiæ, & extrinsecus in Scripturis S. per lumen fidei, revelante Spiritu, respondeat consulentibus. 2. Hunc igitur utrobique frequenter nobis adeundum & audiendum in rebus, quæ ad veritatis cognoscendæ & virtutis colendæ profectum spectant. Neque acquiescendum iis, quæ vel sensus & affectus suggerunt, vel quamlibet plausibilis consuetudo & hominum auctoritas suadere videntur, donec consulto uno illo Doctore Veritas sive Rationis evidentiâ, sive infallibilis fidei testimoniò sese conscientiæ probaverit. 3. Cavendum, ne si quid scientiæ usu vel industriâ comparâsse videris, cò fretus intumescas, & quod divinæ largitatis est, atque ea propter studio amplificandæ gloriæ Dei impendendum, tuis meritis arroges: nedum, qui aliis ad capeSSenda sapientiæ præcepta ducem te & adiutorem præstare debes, Magister esse, & quod de re qualibet pronunciaveris, oraculi

raculi vice haberi velis. 4. Maximi faciendam esse veritatem, cœlestis sapientiæ prolem, summô studio ambiendam, ardente amore amplectendam, exosculandam. *Pretiosior est unionibus, & omnia Prov. 3: oblectamenta tua non æquiparant eam. Non cum auro 15. asservato commutabitur, neque appendetur argentum pretii ejus. Non est auro Ophirino contrâ cara, vel Job. 28: 15. &c. Solum pretioso & sapphiro &c.*

III. DE BONITATE DEI tenendum 1. In- III. exhaustam ejus opulentiam residere in Deo. 2. Eam, *Bonitas Dei.* ut decet divitem, potentem, nullaue re indigentem, sed juxta Sapientissimum, liberè & largiter communicare cum rebus omnibus, quas præter se esse jubet ad gloriam suam. Mundum proinde majorem & minorem omni bonorum copiâ locupletatum quid nisi monumentum divinæ Bonitatis laudi dicatum esse? 3. Ex eadem Bonitate profluere quicquid utilitatis & suavitatis sensu vel affectu percipitur è rebus sensui & usui humano subjectis. Quapropter *gustanda & videnda offertur Bonitas Dei ab Psalm. Hieropsaltes: quia etiam id ipsum, quod gustu quid 34. 9. suave & visu jucundum sentitur, non rei sensibilis qualitas, sed Bonitatis divinæ effectus est. Confer quæ suprâ lib. 1. c. 2. §. 3. n. 18. 4. Bonis igitur creatis hætenus sic utendum, ut solo Deo, uno illo, vero & summo Bono frui velis.*

Unde concludas; 1. Iterum non nisi Deo, ter Optimo, amore unionis, quô ipse bonus sis atque beatus, esse adhærescendum. Omnem proinde amorem, quæ animus à vero suo bono aversus effertur in bona caduca, divitias, honores &c. quibus pro seculi more beatus haberi, magni fieri & admirationi esse cupias, inordinatum & abominabilem esse. 2. Cum innumeris à Deo cumulati bonis nihil habeamus nostri, unde vicem rependamus, eam fore nostram gratitudinem, si beneficia Dei non obiter transmittamus, sed ex vero sic æstimemus,

ut animus vivido illorum sensu tactus & lætitiâ perfusus Bonitatis Dei veluti formam impressam habeat: Bonis porro, Deo Providente, paratis & obviis ad gloriam Dei largitoris utamur. 3. Quia ne quidem Mundus in tanta bonorum copia, ex se inops, habet, quod necessitati nostræ ministrer, suppliciter à Deo petenda, quæ nobis desunt, vitæ & salutis adjumenta. Preces aurem nostras & vota, ut Deo sint grata, ad sanctam ejus voluntatem, sive amorem, quo in se suamque gloriam fertur, conformari oportere.

IV.

IV. DE SANCTITATE DEI sic sentiendum.

*San-
ctitas &
Justitia
Dei.*

1. Eam voluntatis divinæ primam esse virtutem, in eo sitam, quod verba & facta congruunt voluntati quod verum est amanti.

2. Deum, quia est *mentiri nescius*, & seipsum abnegare, aut virtutes suas dissimulare, aliumve, atque est, se præbere non potest, quippe Exemplar & Ἀρχέτυπος creaturæ intelligentis, quam ipse amat veritatem, etiam à nobis amari, quod odit mendacium & nobis odio esse velle. Secundum eum, qui

1. Pet. 1: 15. 16. vos vocavit, sanctum, etiam ipsi sancti in omni conversatione estote. Quia scriptum est: Sancti estote; quia ego sanctus sum. 3. Inde & necessario Creaturæ suæ intelligentis esse Judicem, qui judicans secundum veritatem, gloriam, jus atque nomen suum peccatō violatum & abnegatum asserit, seque veritatis amantem, peccati odorem, peccatorique dissimilem ostendit. Unde consequitur 1. In Deo eam esse justitiam, quæ peccatum adversus summam ipsius Majestatem commissum non patitur inul-

Rom. 2: 2. 5. Esai. 42: 5. Psalm. 50: 21. tum: neque non interesse gloriæ Dei, ut poena meritō digna reperatur ab eo, qui quantum in se est, Deum suum Dominum, Exemplar, Finem, Bonum, Benefactorem &c. abnegat: Quando enim qui delinquit, Deum summum suum finem atque bonum esse negat, anne iniquum videbitur, eam veritatem

boni-

homini testatam fieri sensu summi mali? Quando peccator abnegat Dominum potentissimum, nonne convenit, eam abnegationem vindicari iudiciò potentia, adeoque pœnâ tali, quâ se potentissimum offendisse sentiat? II. Legem Dei, ut sanctam, quippe expressam purissimæ naturæ Dei imaginem & æternæ veritati congruentem, sic esse justissimam, quippe quæ debitum exigit, verò & justò iudiciò per præmii promissionem & pœnæ comminationem sancita. *Qui fecerit ea, vivet in eis. Ma-* *Levit. 18: 5.*
ledictus qui non permanferit in omnibus. III. Deum, Dent. 27: 26.
 Sanctissimum, Justissimumque Judicem atque Vindicem, cum idem sit potentissimus & omniscius, necessariò arbitrum & inspectorem esse operum, consiliorum, mentium. *Omnia sunt nuda & re-* *Heb. 4:*
supinata oculis ipsius. Quapropter, monitore Se- *13.*
neca, sic vivendum est, tanquam in conspectu viva- *Epist. 83.*
mus: sic cogitandum, tanquam aliquis in pectus inti-
um inspicere possit; & potest. Quid enim prodest
ab homine aliquid esse secretum? nihil Deo clausum est.
Interest animis nostris, & cogitationibus mediis inter-
venit. Idem verissimum sentit Captivus ille apud
Comicum; Est profectò Deus, qui, quæ nos geri- *Plant. Capt. 2.*
mus, auditque & videt. *2. 63.*

Hic qui gubernat omnia :

Qui terram inctrem, qui mare temperat
Ventosum, & urbes, regnaque tristia,
Divosque, mortalesque turbas
Imperio regit unus aquo.

Horat. III.
Odor. 4.

Nec enim securâ quies illum similisque sopori,
Detinet.

Ovid. 1: de Arte.

Sed ille est, qui viget, qui sentit, qui meminit, Cic. in
qui regit & moderatur. somn.

V. *Gratia*, V. Sed ne nulla Spe veniæ peccatori proposita Religionis studium intercidat, id porro nobis persuasum oportet.

Miseri-
cordia &
Longani-
mitas
Dei. 1. Esse & hanc perfectionem Dei, quod decenter largiri potest, atque vult, ubi nullum est meritum. Quam S. Literæ *Gratiam* appellant, eaque propter Deum *Gratiosum* prædicant.

2. Inde & *misereri* posse atque velle peccatoris, eumque condonata pravitate ad communionem suæ beatam reducere, quam primùm turpitudinis suæ sensu verè dejectus ad hanc *Misericordiæ* aram, quò par est resipiendi animò confugit. Hanc sufficientiam habere, Deo naturale, sed exercere, liberum est, haud minùs, quàm vocare, quæ non sunt: quandoquidem habet Filium, quem potest mittere in similitudine carnis peccati, & pro peccato, & sic in carne condemnare peccatum. 3. Justitiam Dei, quamlibet ex se formidabilem, locum nihilominus relinquere *Longanimitati*, quâ Deus potest decenter tolerare peccatorem, eique insuper benefacere. Neque enim Deus, quia per justitiam & sanctæ legis postulat peccatori impunitatem dare non potest, necesse habet punire peccatum, quantum potest, & statim atque potest, & in ipso peccatore: dummodò *Jehova*, Deus *Exercituum* exaltetur in judicio, & Deus ille Sanctus sanctificetur per justitiam. Quod utique semel ad condemnationem peccati factum, si per verbum gratiæ semper notificetur, satis est.

VI. *SS. Trinitatis Mysterium.* VI. Quia præterea cultori Numinis, ne quod nescit adoret, exploratum oportet, Quis sit ille verus, potentissimus, sapientissimus &c. Deus, etiam certa fide tenenda sunt, quæ de augusto SS. Trinitatis mysterio Sacris Literis prodita leguntur. Non ignorat equidem *Quis sit*, cui perspectum est, *Quid sit* Deus: quandoquidem Summus ille, Potentissimus, Sapientissimus, Optimus &c. nisi unus & unicus esse

esse non potest. Quæstiones igitur *Quid sit, & Quis sit*, distinguere hęc locò supervacuum foret, nisi vulgò hominibus esset persuasum, Deum cum populo cultore suū familiariter agere, eique peculiari ratione favere. Hinc diversis populis pro veritate Numinis, quod quisque colit, cultique favorem præ aliis sibi vendicat, contendentibus, veritatis studio inquirendum est, Quis sit verus Deus; quibus operibus innotescere; quo ritu coli amet; quibus legibus cultores suos sanctificari; quò verbò instrui; quò bonò beari velit, & quis populus, qui istis *αἰσθημασι* jure optimo gloriari queat. Quod primò Decalogi præceptò cautum de non habendis Diis aliis, verò Deo suis veluti characteribus è nomine & opere descriptò, duo illa, Quid nimirum, & Quis sit Deus distingui postulat. Scriptura S. in posterioris quæstionis decisione amplius occupata, ubi de natura Dei nos docet, ut plurimum etiam quis sit verus ille Deus, verbis designat.

Ut igitur paucis complectamur omnia, sciendum porrò est; 1. Illum verum esse Deum, qui *cælum & terram in principio creavit*; qui se Deum *Abrahami, Isaaci & Jacobi* dixit, & reipsa demonstravit; qui populo Israelitico ex servitute *Ægyptiaca* asserto legem dedit in Sinai; qui verbò & operibus quâ gratiæ, quâ judicii, missis usque & usque Prophetis, voluntatis solis internunciis, innotuit &c. & ne alius, quicquid id laudis divinæ est, falsò sibi attribuens, pro vero Deo agnosceretur, inter Cherubinos *Psalms. 80. 2.* *residens* responsa daturus adiri voluit. Dii igitur alieni sunt, qui operibus istis paria non faciunt. Unde consequitur, Jesum Christum, Servatorem nostrum in secula Benedictum, eò ipsò se Filium Dei, verum illum cum æterno Patre Deum ad conscientiam hominum probavisse, quòd *quæcunque Pater facit, ipse ea pariter faceret.* *Joh. 5: 19.*

2. Verum illum Deum ita *Unum* esse atque *Unicum*, ut Deum esse & habere socium, inter se repugnent.

M 3

Hæc

Hæc Unitas etsi Ratione comprobetur, vix tamen est, quod ejus fide clariùs & crebriùs inculcetur in S. Literis: quippe cujus tanta est necessitas, ut plures unò Deos colenti religionis suæ fructus pereat omnis, cum Religio in unius soliusque Dei Glo-

Joh. 17: riam converti debeat. *Hæc est vita æterna, ut te*
3. *agnoscant illum solum verum Deum &c.*

3. Verùm illum Deum esse Patrem, Filium & Spiritum Sanctum: huncque, non alium, nobis esse querendum, adorandum, gratiarum actione glorificandum, ut creatorem hominis recti, & Redemptorem atque Sanctificatorem corrupti. Cui rei plurima lux à S. Literis. Id modò tenuisse sufficiet, Verum Deum non rectè cognosci, nisi cognoscatur ut Pater, æternum habens Filium, quem dare Sospiratorem, & Spiritum, quem tanquam salutis paratæ arrhabonem dono mittere, atque adeò, ut qui peccatori in Deum fieri, eique justitiam, vitam, ac consummatam lætitiàm & gloriationem in se & per se ipsum impertiri possit. Hinc illa Servatoris nostri effata; *Creditis in Deum, etiam in me creditis. Si cognovissetis me, etiam Patrem cognovissetis. Ut omnes honorent Filium, quemadmodum honorant Patrem. Qui non honorat Filium, non honorat Patrem, qui eum misit.*

Joh. 14:

1. 7.

Joh. 5:

23.

Silins.

IV.

Atque hæc talia non fas solum, sed necesse tibi mihi que scire: quia ut verè Poeta,

— prima scelerum causa mortalibus ægris
Naturam nescire Dei.

Tacit. in

Germ.

Serm. in

scire. Can. D.

Sed scire temperanter: quoniam & hoc verum, Sanctius ac reverentius esse de actis Dei credere, quàm scire. Expetunt mysteria, inquit Bernh. simplicem creditorem, arguunt impium discussorem: & ideò credi oportet simpliciter, quod investigari non potest utiliter.

§. 2.

Atque sic fuit prior pietatis pars in recto de Deo sensu: Altera est rectus ejusdem cultus, qui non aliud, quam cogniti Numinis veneratio legibus ab ipso præscriptis devincta, sub spe certa divinæ remunerationis. Hac vulgò speciatim Religio appellatur.

E X P L.

1. **D**eum coli velle, & huic fini natum esse hominem, nec gentiles latuit. Cicero, *Omnes*, *V. in* *inquit, religione moventur, & Deos patrios, quos à Verr. majoribus acceperunt, colendos sibi diligenter & retinendos arbitrantur.* Unde religionem imperiosam, publicè & privatim habendam agnovere, persuasi, omnia prosperè evenire sequentibus Deos, adversa spernentibus. *Liv. V. 51.*

2. Cultus Dei legibus ab ipso præscriptis definitur. Neque enim aliò, quam Deo præceptore novit homo, quid Deus de se sentiri, & quò pactò grata sibi fieri, velit. Omnes enim Religionis actus obedientiæ præceptò continentur, & hinc in S. Scriptura superstitionis damnatur, quicquid ad inventionis humanæ religioni admiscetur: & verò Deum qui colit ex suo arbitrio, sibi veriùs, quam Numini parer. Adde quòd vulgò homines animo scelerum conscientiam & iræ divinæ sensu exagitato delinimenta quærant è Religione. Atqui ut nemo nisi Deus conscientiam inquietare: ita idem solus æstuantis animi motus componere, & conscientiam inquietem sedare potest. *Job. 19: 11. 12. Jac. 4: 12.*

3. Religionis studium spe præmii animatur. Unde illud additum, *sub spe certa remunerationis.* Neque enim Deus frustra queri vult. Quare accedentem ad Deum credere oportet, Deum esse remunerato- *1. Job. 3: 20. Esai. 45: 19. Heb. 11: rem 6.*

Lib. de
ira D.
cap. 6.

Lib. 1.
de nat.
Deor.

rem querentibus se. In eo, inquit Lactant. Summa
omnis & cardo religionis, pietatisque versatur, nim.
irasci Deum & gratia commoveri: neque honos ul-
lus deberi potest Deo, si nihil præstat colenti: nec ullus
metus si non irascitur non colenti. Idem Conscientia
docuit Ciceronem; Dii quamobrem colendi sunt non
intelligo, nullò nec acceptò ab iis, nec speratò bonò.
Neque tamen virtutis cultor præmium votorum
suorum summam atque metam facit. Vide suprà.

§. 3.

*Actus Religionis sunt vel Interni solum, qui animò
concipiuntur: vel ex his & externis compositi, qui
animò pariter & corpore per verba, ritus, gestus
& actiones expromuntur.*

*Illi sunt Æstimatio, Amor, Fiducia, Patientia, Ti-
mor &c.*

*Hi sunt Adoratio, Invocatio, Gratiarum actio, Obe-
dientia, Nominis divini sancta usurpatio &c.*

E X P L.

1. **C**larum est, actibus illis contineri officia, ad
quæ attenta proprietatum virtutumque divi-
narum consideratio nos deducit. Cum enim Deum
Potentissimum, Sapientissimum, Justiss. Sanctiss.
Optimum &c. mente cogito, quidni totus in de-
votam ejus admirationem & æstimationem ra-
piar?

2. Ex quo deinde fluit, ut eundem etiam debeam
amare, hoc est, ei tanquam summo & unico meo
Bono, omnisque boni unico auctori & datori sincerò
communione desiderio toto corde, tota anima,
tota cogitatione &c. inhærere. Ut adedò modus dili-
gendi Deum sit ipsum diligere sine modo. Atque hic
amor unionis *ἡ ἀγάπη* dici meretur per quem judi-
ciò,

eiò, voluntate & affectu nos unimus cum Objecto, tanquam *Fine* & *Bono* nostro, solidæque felicitatis causa unica. Quo amore non nisi Deum prosequendum esse, constat. Alius verò est *amor* ille *benevolentia*, quò propter & in ordine ad Deum, quippe finem bonumque nostrum, æstimò, quò par est, & benevolentia amplectimur fratres, proximos quosque nostros. qui Boni nostri imaginem ferunt, vel ferre possunt.

3. Unde & hoc consequitur, in Deo reponendam esse *fiduciam*, quæ est illa animi in Deum reclinantis securitas absque pavore, cum ex recognitione virtutum, puta, potentia, sapientia, bonitatis, gratia, & omnino sufficientia ejus: tum ex fide gratuita promissionis, quæ divini propositi de salute hominis notificatio est, passim in verbo Dei facta, enascens. Quæ duo quasi fiduciae nostræ fulcra sunt.

4. Acquiescendum porrò in ejus Voluntate, quæcunque demùm fuerit rerum nostrarum facies. In quo sita est *Patientia*, qua animus fiducia & spe veri Boni munitus terrorem in adversis ita subigit, ut ne facere impediat, quod sui intelligit esse officii: persuasum habens, Deum pro sua Bonitate salutem nostram quàm optimè consulere, & nisi quæ maximè expediant, non immittere: interim Deò, ut suò, in mediis tribulationibus læratur, honori ducens, quod datur Deum per eas glorificare.

5. Ex recognitione potentia, sanctitatis, justitiae &c. existit *timor* & *reverentia*, quâ Deum peccatis offendere sollicitè cavemus, non ea solum moti ratione, quòd ejus quippe potentissimi & justissimi offensa maximum sit malum conciliare apta, sed etiam eo, quòd libero & liberali favore usus, se dicere voluit Deum nostrum in Christo Jesu. Atque sic vera Numinis reverentia *timor est cum amore conjunctus*, qui & hoc nobis præstat beneficii, ut, quod divini

Phil. 2.
12.

Pf. 111.
10.

Prov. 1.
7. & 9.

10.
Esai. 33.
6.

divini muneris habemus, quale est Verbum Dei, salutis partæ pignora &c. arcè teneamus, æternæ salutis, cum timore & tremore operanda, identidem intenti. Unde timor Dei veluti custos virtuti additus, atque initium vel præcipuum sapientiæ, & thesaurus vel arca, asservandæ possessioni salutis, sapientiæ & scientiæ, dicitur in Sacris Literis.

6. Qui, quò fieri par est modò, gloriam Nominis atque Virtutum divinarum reputat, illicò & hac lege se teneri sentiet, ut eosdem illos Religionis actus per verba, ritus, gestus & actiones, quæ animum Numinis sensu permotum deceant, expromat, atque adeò

1. Ut Deum adoret. Habet autem adoratio 1. agnitionem infinitæ υπεροχῆς & Excellentiæ virtutum divinarum, quarum nullam ne minimâ quidem parte, vel homo, vel quævis res alia creata æquiparare valeat. Atque hoc maximè interest inter Adorationem religiosam, quam vocant, & civilem. 2. Devotam admirationem, & defixum quendam animi stuporem, qui sensum hominis ponderi gloriæ divinæ ferendo minimè parem profiteatur. 3. Laudis divinæ celebrationem, in quam omnes animi corporisque facultates conspirent. 4. Profundam submissionem, corpore prostrato, aliove gestu decoro, testandam.

2. Ut Deum invocet, h. e. profunda animi demissione, & indigentia, indignitatis peccatorumque sensu & confessione in Dei fidem atque opem tanquam unum illud salutis suæ præsidium sese recipiat, & admissorum veniam aliaque bona, quæ sperari & expectari iussit, cum sibi, tum aliis ab eo expetat, & mala deprecetur, idque in nomine unius Servatoris nostri J. Christi. Enimverò frustra speres veniam delictorum, quæ confiteri & sic non commisisse nolis: frustra expectes levamen miseriæ, cujus nullo premaris sensu. Cavendum verò

verò cumprimis, ne quid vanitati & voluptati suæ petatur. *Petitis, & non accipitis, ex quòd malè petatis, ut in voluptates vestras insumatis.* Quidvis agere, atque omninò etiam preces fundere paranti illud certum & constitutum oportet, *finem-Cui & Obedientia, primum, item & ultimum, sibi propositum habere Deum.* Jac.4. 3.

3. Ut Gratiâ agat, h. e. ut bonorum, quæ unquam evenere nihi suis meritis arroget, sed Deum unum, eumque liberum & liberalem omnis boni authorem & largitorem agnoscat, eaque propter verbis & factis celebret.

4. Ut Deo obediat, id est, ad Voluntatem Dei, sive Conscientia suggerente, sive mandatis & interdictis S. Scripturæ, notificatam, omnes actiones suas, totumque vitæ tenorem componat, amore veritatis & studio glorificandi Deum incensus.

5. Ut si res tulerit per solum Deum juret, & jurandum religiosissimè sernet, id postulantibus Omniscientia, Potentia & Justitia Dei. Ut de Deo consideratè loquatur, verbis utens, quæ summam Numinis reverentiam testentur. Ex quo consequitur, non esse utendum Dei nomine temerè & frustra: utrumque enim inconsideratum: nec esse jurandum ubi non sit opus, est enim frustra: nec curiosè & petulanter disputandum super natura & providentia Dei: quippe cujus præposterè & temerarij studij non alius potest esse successus, quàm ut Deus, ejusque viæ ad modulum humanæ rationis exigantur, eoque factò Deus insanientis sapientiæ consulto incomprehensibilis, ineffabilis, atque omninò adorabilis esse desinat. Porro, ut quidquid Deo præstandum est, in suo genere sit eximium atque tale quod honorem Numine dignum exprimere sit aptum. Nec non, ut homo Deum non solum in secessu, clam omnibus, verùm & palàm atque in cætu publico colat. Hic enim occultare aliquid, perinde foret, ac si quem Deo debe-

debemus cultum, exercere pueret: qui quidem pudor omnem stultitiam superaret. Contra Cultus publicus non modò de nostra devotione testatur, sed & alios exemplò incitat. Illud denique tenendum, quòd, sicut imperium Dei parvipendere contumeliarum omnium maxima est, ita è contrario omnibus sacrificiis acceptior sit obedientia: & verissimè dictum illud; *Cultum Dei esse optimum, eundemque castissimum atque sanctissimum*, ut eum semper purà, integrà, incorruptà & mente & voce, addo, & opere bono, veneris.

Cic. de
Nat.
Deor.2.

Cæterùm accuratiùs de singulis hisce Religionis actibus, ut & oppositis Pietati vitiis, videbis in nostris Cateches. ad Præcepta & Summam Decalogi.



CAP.

CAP. VI.

De Temperantia, Sobrietate, Castitate, Frugalitate, Modestia &c.

§. I.

Officia Virtutis, quæ in nos respiciunt, Temperantiz & Fortitudinis nomine generatim comprehenduntur.

Virtus enim, ubi exercetur in secundis, Temperantia: Ubi in adversis, Fortitudo est.

Res secunda dicuntur, quæ percipienti voluptatem afferunt.

Virtutis autem est, rebus secundis sic uti, ut nihil propter voluptatem, quam nobis afferre possunt, sed omnia ex uno amore veritatis faciamus, vel ubi opus est, omittamus.

Unde Virtus virtutis particularis, nempe Temperantia, nomen sortitur.

E X P L.

I. **Q**UOD in Sacris Literis est σωφρονας ζην, temperanter vivere, omnia Virtutis officia, quæ in nos ipsos tendunt, complectitur. Notum enim est, τὸν σωφρονα dici, cui οἷός ἐστιν ὁ νῦς, καὶ ἡ φρεν, sanamens est, & οὐκ ὁ σωφρονισμὸς sanus sensus atque studium: cui ratio, sensus & affectus in secundis pariter & adversis constant. Quapropter σωφροσύνη ad fortitudinem simul & temperantiam extendi, nihil vetat. Quò etiam pertinet celebre illud Epicteti præceptum,

ptum, ἀνίχῃ καὶ ἀπίχῃ sustine & abstine, quò totius Philosophiæ moralis Summam contineri voluit.

2. Temperantia virtus est in secundis exercenda. Secunda autem vocamus, quæcunque sui generis voluptatem afferunt vel *per se*, vel *per accidens*. *Per se*, velut quæ suapte naturâ ita comparata sunt, ut vel vitam animale, quæ corporis; vel vitam humanam, quæ totius compositi est, quò homines sumus, adprimè juvent. In priore genere sunt Pastus & Venus, quibus Natura comitem dedit voluptatem, ut animal ad suâ conservationem, generisquæ propagationem tantò acrius extimularetur. In posteriori genere sunt spectacula, concentus Musici, suffimenta &c. quæ voluptatem visu, auditu & olfactu percipiendam afferunt. Commoda deinde, quæ conditionem vitæ humanæ quoquò modò meliorem atque ampliorem reddunt, eaque propter voluptate affectum inescare solent. Eò pertinent *dignitas & potentia*: Illa quidem in honoribus, officiis ac muniis publicis, aliorum existimatione, assurrectione, cessione &c. Hæc verò in divitiis, Virorum Summatum gratia, amicorum multitudine & populi favore, sita. *Per accidens* voluptati sunt, quæ usu, opinione & persuasione hominum duntaxat bona habentur. Sic jucundum repetere pericula maris, quibus assueveris. Aranearum esu delectabatur puella Alexandro M. muneri missa. Sic jucunda benè multa, quibus non indigentia, sed luxuria, pretium fecit.

3. Peripatetici *Temperantiam* definiunt *virtutem, quæ mediocritatem servat in expetendis & fugiendis corporis voluptatibus, quæ gustu & tactu percipiuntur*. Verùm jamjam modum excessit, qui voluptatem voluptatis amore experit: neque alia mediocritas laudi ducenda est, nisi quæ amorem veritatis sponte sua consequitur. Ratione etiam solida caret, quòd
Tem-

Temperantiam ejus tantum Voluptatis, quæ gustu & tactu percipitur, moderatricem faciunt. Intemperans enim est omnis φιλήδων, qui quidamore voluptatis undecunque percipiendæ facit vel omittit. Unde Cicero Temperantiam dicit, quæ in rebus aut expetendis, aut fugiendis, ut rationem sequamur, ^{1. de finib.} monet. Idem alibi, Temperantia, inquit, est ratio- ^{lib.2. art. vet.} nis in libidinem, atque in alios non rectos impetus animi, firma & moderata dominatio. Distinguere hîc continentiam & temperantiam est λογομαχεῖν. Latine loquentes iis promiscuè utuntur: ut Cornel. Nepos; Nam & non intemperanter concupiscere, quod à plurimis videas, continentis debet duci. ^{Attic. XXV.12.} Quod verò continentia locum inter virtutes perfectas negant, cau-
santes, eam veriùs dispositionem ad virtutem, quàm virtutem esse dicendam, ex falso fuit principio; Virtutis nimirum rationem in mediocritate totam consistere.

4. Temperans ad voluptatem negativè se habet, ejus causâ nec faciens, nec omittens quicquam: quia solo Veritatis amore ducitur ubivis. Temperantia, inquit Sen. voluptatibus imperat, nec unquam ad illas propter ipsas venit. Veritas Virtutis cultorem ad temperantiam instruens speciatim hæc est;
1. Res omnes præter Deum esse dona Dei, bonitatem & longanimitatem largitoris testantia, & ad Deum quærendum incitantia. 2. Jucunditatem, quâ sensui & affectui nostro sese commendant non in ipsis inesse, sed ab ea Dei providentia, quâ mentem & corpus arctissimo fœdere copulavit, & copulata conservat, totam pendere. 3. Neque adedò felicitatem nostram in iis rebus reponendam, neque iis fruendum & deliciandum, sed in ordine ad finem, cui serviunt, utendum esse cum gratiarum actione. 4. Præposterum esse studium, velle se rebus, non res sibi, submittere. Quibus intellectis, non difficile est judicatu, quare Scripturâ
Sacra

Sacra φιλονεικία scortationem : & avaritiam idololatricam puta, affectatam, appellet, & cum, qui Voluptati obsequens suæ omnia ad eam comparat, ventrem suum Deum habere dicat.

5. Temperans proinde non est, qui inopia voluptatem negante jucundis abstinet: id quod sensit *Adelph.* Mitio Terentianus; Hæc, (scil.scortari, potare, 1. 2. fores effringere)

— *si neque ego neque tu fecimus
Non sivit egestas facere nos. Tu nunc tibi
Id laudi ducis, quod tūm fecisti inopiā.
Injurium est. Nam si esset unde id fieret,
Faceremus.*

Scilicet is fortiter temperans est, quem parata copia corrumpere non potest. Nec temperans est, qui morbo vel senio ita extabuit, ut jucunda illi amplius non sapiant. Quod necdum sibi contigisse gloriatur senex ille Plautinus;

Mil. Et ego amoris aliquantulum habeo humorisque meo
Glor.3.1. etiam in corpore.
*Neque dum exarui ex amœnis rebus & voluptariis.
Vel cavillator facetus, vel conviva commodus
Item cro.*

Nec temperans est, qui sibi inimicus voluptatem fugit naturâ solū, quanquam omnes ei paremus. Nec qui cō tantūm jucunda spernit, quod nocet empty dolore voluptas. Nec denique, qui moderata victus ratione sanitatem tuetur, ultrā, quā ut rectē valeat, nihil intendens.

6. Virtus est amor Veritatis & Honestatis unicus, quem si auctorem atque ducem sequamur in usu rerum jucundarum, id ipsum, pro quo Schola Peripat. tantoperē contendit, facili impetrabimus; ut nimirum præsentibus voluptatibus moderatē
ura-

utamur, absentesque non nimium desideremus, &, quod Poëta jubet, *aequam rebus in arduis servemus mentem*, non secus ac bonis ab insolenti temperatam *latitia*. Interim à Viro bono non alienum est, interdum quærere *laborum dulce lenimen*, animumque curis levare edacibus, ut gravioribus, quæ facere sui sentit esse officii, suppetere queat. Vide Parte I. cap. 2. §. 3. n. 19.

Hor. l. 2.
Od. 3.

§. 2.

Temperantiæ in Excessu Stupiditas; in Defectu Intemperantia opponitur. Hæc insana voluptatis prosecutio: illa male sana voluptatis fuga est.

E X P L.

1. **V**irtus, præsertim particularis, media consistit inter bina extrema, quorum unum *Excessu*; alterum *Defectu* à medio virtutis abit. Idem & hic usu venit. Temperantiæ in excessu *Stupiditas*; in defectu *Intemperantia* opponitur; etsi secus videatur Scholæ Peripateticæ. Quia enim temperantis est, non voluptatis, sed veritatis, officium præscribentis, amore moveri, *Intemperans* deficit, quippe quoniam parum temperans voluptate ducitur, sive præsentī fruatur, illi se totum addicens, quæ intemperantia est strictiore significato dicta; sive absentem avidè prosequatur, quæ propriè cupiditas est. *Stupidus* verò excedit, quia nimium temperans, voluptatem quoque licitam contemnit, eam, si solo officii amore duceretur, nec prosecuturus, nec averfaturus.

2. Stupiditatis, ejus puta, quæ non naturæ vitium, sed *πρωαισις* est, diversi sunt gradus. Alia enim est *Stupiditas plus quam Cynica* eorum, qui non modò voluptatem non sectantur, sed contrà

N

etiam

etiam seipſos malè mulctant , dolores atque cruciatuſ gratis & ſpontè nulla neceſſitate ſibi accerſentes. Alia eſt *Stupiditas Cynica* , Diogenem illum Cynicum habens exemplum, quæ & delectationem ipſam & delectabilia , velut Rhetoricam , Poëticam , Muſicam &c. pariter oderat. Alia eſt *Stupiditas Stoica*: fatebantur Stoici , delectabilia quidem , cùm ita ferret officii ratio , non eſſe rejicienda ; ipſam tamen delectationem à Sapiente , quem affectuſ expertem eſſe jubent , alienam exiſtimabant. Hiſ paulò ſaniora tradunt Peripatetici , qui delectationem & delectabilia admittunt , tantum quod excedit , recidi jubentes , quod vocant *moderari paſſionibus*. Id tamen peccant , quod voluptatem affectare , & omninò ex affectu agere , non improbant , quam neutrum temperantis ſit , quippe qui , dolore & delectatione hætenus inſuper habitis , id unum agit , quod amor veritatis jubet. Haud dubiè , qui Ratione neglecta paſſionis impetu ad agendum fertur , peccat , ampliùs etiam peccaturus , ubi ipſa ſibi imbecillitate indulgente locum conſiſtendi non repetit. *Anne vitium nullum eſt , non patere Rationi ?*

§. 3.

Pro rerum secundarum varietate, diversa sunt Temperantiae & Intemperantiae nomina.

Temperantia circa pastum versans, Sobrietas: circa Venerem, Castitas: circa sumptus, Frugalitas: circa honores, Modestia: circa res cognoscendas, Temperantia generis nomine contenta est.

Sobrietas Temperantia est in usu cibi & potus, utriusque modum, quantum ad qualitatem & quantitatem attinet, desiniente non Voluptatis, sed Veritatis, amore.

Ejus Opposita sunt, Nimia Abstinencia & Ingluvies.

E X P L.

1. **Q**ui non voluptatis, sed veritatis amore ducitur, nã ille corpori alimentum, non libidini fomentum quærit, atque ideò in cibi potusque usu facilè modum tenet. Veritas porrò, quam hîc ducem sequi oportet, hæc est: 1. Edendum est, ut vivas, quia vivere jubet Summus ille vitæ Arbitrator. 2. Sed vivas, Deum glorificaturus, & proximo profuturus. 3. Adjumenta igitur vitæ quærenda sunt tibi, & usurpanda, eo fine, ut viventi & mens & corpus ad officium faciendum supersint. 4. Quapropter & cupiditati hac in parte modum statuit Natura, paucis contenta & ægrè superflua ferens.

2. Hujus Veritatis amans modum tenebit cum in quantitate cibi potusque, ut ne justò plus, nec intempestivè, nec prolixè nimis, nec festinanter & rustica aviditate liguriendo modum excedat: tum in qualitate, ut ne lautiozem & rariorem experat, quam valetudinis & laudabilis instituti ratio postulat, memor ejus, quod habet Poëta:

Horat.
Serm.
l. 1. 2.

Nonne Cupidinibus statuit Natura modum? quem
Quid latura sibi, quid sit dolitura negatum,
Querere plus prodest, & inane abscindere soldo?
Num, tibi cum fauces urit sitis, aurea quæris
Pocula? num esuriens fastidis omnia, præter
Pavonem, Rhombumque?

Luc. 21:

34.

Gal. 5.

21.

1. Theff.

5. 8.

1. Tim. 3.

2. 3.

1. Pet. 4:

7. & 5.

8. &c.

3. Edendum porrò esse ut vivas, sed vivas officium factururus, non obscurè docet ipsamet Natura bonis illis, quæ sobrietatem benè multa consequuntur: qualia sunt; prospera valetudo, vigor corporis, gratia vultus, vegeta & longa senectus, serenitas mentis, firmitas memoriæ, alacritas in obeundis negotiis civilibus & domesticis, assiduitas in studiis, bona fama, rei familiaris incrementum &c. Quare & Scriptura S. in eo multa est, ut sobrietatem commendet ab officio, quod hominì Christiano, quàm Patrifamilias, quàm civi, quàm ministro in Ecclesia, quàm iudici in foro &c. faciendum incumbit.

4. Ingluviosus & ebriosus, luxui & saginæ mancipatus, omnem Rationis ordinem pervertit, vivendum sibi putans, ut edendi bibendique voluptate fruatur. De Menio eleganter Poëta;

Horat.

Epist.

l. 1. 15.

Pernicies & tempestas barathrumque macelli
Quicquid quæsierat, veniri donabat avaro.

Et paulò post.

Quicquid erat nactus prædæ majoris, ubi omne
Verterat in fumum & cinerem, non Hercule miror
(Aiebat) si qui comedunt bona, quum sit obeso
Nil melius turdo, nil vulva pulchrius ampla.

5. Ingluviosorum ut abundè satis reperire est ubique: sic qui nimia abstinentiâ se macerent vix sunt alii, quàm quos superstitio, error in Religione, aliufve animi morbus tenet. Quales olim Encrati-
tæ & Manichæi, qui vinum, ceu abominabile quid, detestati feruntur.

§. 4.

Castitas Temperantia est in appetitu generandi, modum illi statuente veritatis amore.

Ejus opposita sunt nimia abstinentia & libido.

E X P L.

1. **Q**ui non voluptatis, sed veritatis, amore ducitur, etiam in hoc cupidinis genere modum tenet. Veritas est. 1. Deo, dum conderet hominem, fuisse decretum, multiplicare genus humanum *ab uno sanguine*, ut, quod summæ bonitatis & justitiæ erat, in plurimis glorificaretur, & homines ipsi patrum, filiorum, fratrum atque conjugum officiis inter se devincerentur. 2. Hinc homini primo individuum vitæ sociam addidit, ex carne ejus exstructam, ne illi esset aliena. 3. Sed uni unam fecit conjugem. *Ammon unum fecit, quum ipsi superesset, Spiritus? Et quid unus ille? Quarebat semen Dei.* 4. Ergò ad semen Dei, h. e. imagine Dei præditum, Deoque dignum, quærendum, uni unam jungi necesse fuit. Ut adeo Polygamix cum rectitudine imaginis Dei malè conveniat. 5. Ea-
que de causa Deus homines tales nasci voluit, qui ætate generationi apta se considerent singuli velut mediam partem *unius Totius*, cujus pars altera debeat esse persona alterius sexûs, quam enixo amore tanquam alterum seipsum amplectantur. Vide *Part. I. c. 7. §. 3. n. 6.* Unde etiam dictum;

N 3

Erunt

A^g. 17.
26.

2. 15.

Gen. 2. *Erunt duo in carnem unam. Quam veritatem profanat scortator, quia, qui conglutinatur cum scorto,*
 24. *unum cum scorto corpus est.* 6. *Uxor non habet potestatem corporis sui, sed vir: similiter & vir non habet potestatem corporis sui, sed uxor.* Neutri ergò amorem alteri debitum vulgare licet. 7. Inprimis tenendum, finem conjugii esse *querere semen Dei: extra quem scopum etiam conjunctio viri & feminae nefaria est.*

2. Qui hujus veritatis amore sibi temperat ab illegitimo amore, legitimique amoris abusu, ejus demùm castitas sincera est, quippe cui *nec nox pudorem adimit, & quæ mentem quoque servat illibatam. Coacta igitur castitas, nec tuta satis, nec laudata, nec omninò virtus est.* Optimè Poëta;

Ovid. l. 3.
 amor.
 eleg. 4.

*Dure Vir, imposito teneræ custode puella
 Nil agis, ingenio quæque tuenda suo est.
 Si quæ, metu dempto, casta est, ea denique casta est,
 Quæ, quia non liceat, non facit, illa facit.
 Ut jam servâris benè corpus, adultera mens est,
 Nec custodiri, nî velit, ulla potest.
 Nec mentem servare potes, licèt omnia claudas,
 Omnibus exclusis, intus adulter erit.*

3. Cui firmum stat animo, non voluptatis, sed veritatis amorem sequi, cupiditati ex amore nascenti citò parabit, imò & in amore veritatis exprompta habebit, remedia: quia si ulla, hæc certè cupiditas in lubrico est, incitataque semel in proclive labitur, sustinerique amplius non potest. Ad primum igitur mali sensum expedienda sunt remedia;

*Dum novus est: cæpto potius pugnemus amori,
 Flamma recens parvâ sparsa resedit aquâ.*

Eam

Eam in rem profuerit 1. avertere cogitationem à re amata, ne motus spirituum animalium, quos excitare solet, usu roborentur, & familiaritate mentem devinciant. 2. Rem amatam ea spectare parte, quâ vilescat. 3. Commeditari incommoda, quæ amorem, ubi animò fueris remissò, agminatim consequuntur. Juvat hîc tantisper audire adolescentem illum Plautinum amore insanientem, *Cisell.* qui confusa oratione satis ostendit, quas vecordix 2. 1. det pœnas;

*Credo ego amorem primum apud homines carnisficinam
commentum:*

*Hanc ego de me conjecturam domi facio, ne foris
quæram,*

*Qui omnes homines supero atque antideo cruciabilitati-
bus animi:*

*Factor, crucior, agitor, stimulator, vorzor in amoris
rota miser.*

*Exanimor, seror, differor, distrabor, diripior: ita
nubilam mentem*

*Animi habeo: ubi sum, ibi non sum: ubi non sum,
ibi est animus:*

*Ita mihi omnia ingenia sunt: quod lubet, non lubet jam
id continuo &c.*

4. Cautè fugere occasiones. Sunt autem inter occasiones Oculi vagi, illicita circumspicientes: unde Vir Sanctus, *sædus*, inquit, *pepigeram cum Job. 31.* oculis meis, & quid advertissem aurium ad virginem? 1. Impudici sermones & conversatio cum libidinosis. Sumuntur à conversantibus mores: & ut quædam in *Sen. de* contactos corporis vitia transiliunt, ita animus mala *Ira 1. 3.* sua proximis tradit. Ebriosus convictores in amorem 7. vini traxit. Impudicorum catus fortem quoque & si-liceum *utrum* emolluit. Imaginum impudicarum contemplatio. Hôc amoris illiciô seductus fuit *Chærea* apud Terentium

Eunuch.
3. 5.

Egomet quoque id spectare cœpi: & quia consimilem
luserat

ſam olim ille ludum, impendio magis animu' gaudebat
mihi &c.

Not. ad
1. lib.
Polis.

Librorum amatoriorum lectio. Obscœnus Scriptor
omnium horarum leno est. Unde Lipsius Principem &
Aulicos instruens inter alia inquit. Atque hæc (Mus-
icen, Poësin) si arceo, quid de fabellis ad corruptelam fa-
ctis? In quo numero Amadæus est, ingeniosi nugatoris
proles, pestilens liber, si unquam fuit, & natus blandè
inficere, aut & interficere juventutem. 5. Sua libidini
fomenta subducere, qualia sunt, luxuria, otium &c.
Etenim verè dictum, sine Cerere & Baccho friget
Venus. Et

Otia si tollas, periere Cupidinis arcus.

Cedit amor rebus, res age, tutus eris.

Heb. 4.
13.

Otiosus non sibi vivit, sed quod turpissimum est,
ventri, somno, libidini. 6. Cogitare, Deo ubique
præſenti omnia eſſe nuda & intimè patentia, & ἵνδικον
ἀμυγᾶ, cernere Deum omnia vindicem. Quò unò argu-
mentò perditæ libidinis meretricem, Thaidem, non
Alexandrinam illam à Poëtis, amorum Doctoribus,

lib. 20.

nobilitatam, sed recentioreſ aliam, olim à Paphnu-
tio Episcopo ſanatam & ex Orci faucibus quaſi ex-
tractam, memorat Volaterranus. 7. Vincere velle
vincendi propoſitò, quod amore veritatis ſuſtineatur,
& timore Dei circummuniatur, quale fuiſſe Joſepho,
arguit hæc ejus Oratio; Qui ergò facerem malum hoc
maximum & peccarem in Deum? Durum fateor, & ar-
duum opus eſt, tam blandum debellare hoſtem, qui
dum maximè nocet, favere videtur. Verùm quid non
poſteſt animus, cui imploratò Dei auxiliò, ſemel de-
cretum eſt vincere? Imbelles ſunt, qui armis abje-
ctis illicò cedunt, & quid valeant Deo confiſi nun-
quam experiuntur, ignari, quanta ſit victricis caſti-
tatis laus, quis animi plauſus, quis triumphus: &
viciffim quis victi pudoris pudor, quæ pœnitudo.

Gen. 39.
9.

4. Qui

4. Qui veritatem suprâ expositam susque deque habent, in alterutrâ partem peccant, vel *nimiâ abstinentiâ*, vel *profusa libidine*. Nimiâ abstinentiâ: ut qui corpus suum inediâ perire patiuntur, itidem peccant, qui nullâ justâ causâ â conjugio abhorrent, & majus illud corpus Societatis humanæ suô quasi nutrimentô defraudant: quòd faciunt, qui sui commodi, aut licentiæ, aut honoris gratiâ, aut denique ut admirationem moveant plebeculæ, cælibem agunt vitam. Sic stulti veriùs quàm casti fuit, quod Diogenes visis mulieribus ex olea pendentibus & præfocatis, utinam, ait, *arbores ceteræ fructuum hujusmodi ferrent!* Et cum natura veriùs, quàm consuetudo amorem conjugii nobis conciliet, & porrò Deus adversus scortationes remedium esse velit in legitimo matrimonio, nullam homini cælibatûs legem imponit. *Bonum homini quidem est*, inquit Apostolus, *mulierem non tangere. Sed propter scortationes quisvis propriam uxorem habeat.* Qui donô continentix instructi non sunt, frustrâ obtentui habent Religionis & vitæ institutum. Unde illud Servatoris; *Qui potest capere capiat*; non tantum significationem *ἐπιταγή*, sed vim admonitionis habet, ut se quisque haud indiligenter exploret, an donum hoc acceperit, ne nimiâ suâ fiduciâ semetipsum in tentationem conjiciat.

Laert.

VI. in

Diog.

1. Cor.

7: 1. 2.

Matth.

19: 12.

5. Libidine peccant, qui veritatis obliti affectum conservationi generis humani destinatum ad suam voluptatem referunt. Quales sunt. 1. Qui vel alterius animum in turpitudinis suæ servitutem redigunt, corpore ejus abusuri: vel seipsos alterius libidini prostituunt: ut sit in scortatione, adulterio, incestu &c. ne dicam, nefanda venere. De quibus alibi, ubi ad septimum Decal. præceptum. 2. Qui aliis placere student ad jucunditatem vitiosam atque voluptatem, ex se, suis dictis, factisve, capiendani, & vicissim, *Αἱ δὲ ἀνδρῶν τοῦ ἀποστόλου*

δεῦν

*Sophocl.
Oedip.
Tyr.*

δρᾶν καλόν. Non est enim fatu, quod haud factu bonum. Quæ facere non est honestum, iis dicendis aures inestantur pudicæ, libidinisque fomes accenditur; in primis ubi peccandi Magister rei turpis addit *ὑπεύθυνον*. Sanè verò quæ in homine sunt propagando generi, & multiplicandæ Dei imagini, instituta, ad oblectandum audientes narrari, vel joci gratiâ dici, vel cum risu accipi, non convenit: siquidem nihil in ipso risu dignum est. Quod si quid à fine suo abit, flendum id est, non ridendum.

3. Qui libidini fomenta quærunt: qualia sunt; perniciosum ventris obsequium, improba Siren desidia, choreæ, ludi scenici, imagines obscenæ &c.

§. 5.

Frugalitas Temperantia est, quærenda & dispensanda rei familiari ex amore veritatis modum ponens. Et adversantur Avaritia & Prodigalitas.

E X P L.

*Matth.
6. 33.*

1. **V**eritatis amor studio quærendi & quæsitæ dispensandi faciliè modum definit. Veritas porrò est. 1. Bona externa non tantum sunt faciendæ, ut iis possidendis felicitatem tuam metiri velis.

2. Quærendum, est primò regnum Dei, & justitia ejus. Commoda vitæ præsentis accessionis & auctarii vicem habeant. 3. Si quærenti, quod primum & unum illud necessarium est, contingant, iis ne fruatur, tanquam Bonò suò, sed utatur tanquam adminiculis ad finem suum ordinandis. 4. Finis, cui serviunt bona externa, cum pretium ipsis, tum modum desiderio nostro statuit. 5. Quærentur vitæ præsentis commoda, tum tibi tuisque pro statu & loco, quem obtines, sustentandis; tum aliis, qui ope tua indigent, sublevandis. In hos usus di-

spen-

spensare quæsitâ frugalitatis est. 6. Rei familiari ut servias rectè, opus tibi faciundum est, pro honesto vitæ genere, quod semel fueris amplexus.

2. Qua veritate cognita, quæ viri frugalis partes sint, haud difficile est judicatu. 1. Alieni abstinentissimus, sui diligens, non sumit, unde non oportet, neque ad eò aliena vel vi, vel fraude ad se pertrahit, nec turpem illiberalemque quæstum facit. Id enim non frugalis, sed sordidi est, qui nescit, quò valeat nummus, quem præbeat usum? Quales sunt, qui alienis serviunt voluptatibus, lenones, agyræ, lycophantæ, adulatorès &c. quibus odor lucri bonus è re qualibet. Contrà vir frugalis quæsitis parcendo, & operis quid honesti faciendo Catonem illum Senioremi imitatur, qui duobus proventibus se, agebat, rem familiarem regere & augere: parsimoniâ & agriculturâ, quarum altera fructus præbet, altera modum usus adhibet. 2. In parandis & retinendis opibus avaritiæ tum crimen, tum suspicionem pariter vitat; pecuniæ quærendæ nunquam eò usque incumbens, ut ea cura animum distinens à cœlestibus ad terrena avocet, atque ad pietatis exercitium, virtutisque culturam, ineptum reddat. 3. Quia suum cuique rei, atque ad eò & præsentis vitæ commodis statuere novit pretium ex usu, ad quem valent, tantum quærit atque recondit, quantum usus ille postulat. Et rursus quæsitâ prudenter dispensat; ut sumptu supervacuo rem familiarem dilabi non sinat, neque tamen suis suorumque rebus necessariis non satis provideat. Utitur divitiis tanquam moriturus, itemque parcit iisdem tanquam victurus: sic

*Parcere divitiis qui tempore novit, & uti,
Ille modum servans inter utrumque sapit.*

4. Quærit & quæsitâ asservat, cum sui suorumque;
tūm

tum aliorum gratiâ. *Sui quidem, suorumque gratiâ,* ut habeat, tum quæ ad vitam & valerudinem pertinent, pura victum, vestitum & habitationem: tum quæ ad officia vitæ, vel artis, quam proficitur, ritè obeunda requiruntur. Sic Doctoribus libtorum, agricolis instrumentorum rustrium, aliis alia suppellex est necessaria. Tum denique quæ ad vitæ commoditatem & civilem quandam honestatem spectant, quorum inopia non conficit quidem omnino, at certè animum malè firmum affligit & dejicit, aut contumeliis opportunum facit, ac denique impedit, quominus pro vitæ conditione, aut ætatis munerisve ratione contemptum evitare, & conjunctum cum gravitate decorum servare queat. Unde dictum, multorum virtutibus obstat res angusta domi. Rursus frugalis quærit & quæsitâ asservat, in loco & tempore depromenda, *Aliorum gratiâ,* ut nimirum & aliis prodesse, eorumque usibus servire possit. Unde etiam præceptum; *Qui furatus est, ne furetur amplius; imò laboret, faciens bonum* (nemini noxium, sed utile; quo usus humanæ vitæ carere non potest) *ut habeat, quod impertiat opus habenti.* h. e. Ut non tantum ipse habeat, unde vivat, sed & insuper aliquid, quo egenos, laborate non valentes, adjuvet. Eò tendit tritum illud; *Bonus Servatius facit bonum Bonifacium.* 4. Quia magnum vectigal parsimonia, qui frugalis est maturè

Eph. 4:
18.

Epist. 1.

sibi suæque rei consulit. Nam, inquit Seneca, ut visum est Majoribus nostris, sera parsimonia in fundo est: non enim tantum minimum in imo, sed pessimum remanet.

3. Avaritia est intemperantia in studio quærendi & asservandi. Malum quo vix gravius ullum, imò omnium malorum radix. Avaritia enim, inquit Sallust. fidem, probitatem, ceterasque artes bonas subvertit; pro his superbiam, crudelitatem, Deos negligere, omnia venalia habere, edocet. Avaro magnas

magnas inter opes inopi curæ nescio quid semper abest rei. Et crescentem sequitur cura pecuniam, majorumque fames. Avarorum autem duo potissimum genera sunt: Quidam enim aliena non appetunt, in dando tantum restricti & tenaces. Quod vitium senibus familiare. Unde Mitio apud Terent.

*Solum unum hoc vitium adfert senectus hominibus, Adelpi.
Attentiores sumus ad rem omnes, quam sat est. 5.3.*

Alii ad accipiendum proni unde libet lucrum capiunt, etiam minimum, & è re turpi. Cujusmodi sunt, qui illiberales præstant operas, ob vile lucellum indigna facere aut pati non erubescences: ut lenones, aleatores, fœneratores, fures, grassatores.

4. Prodigalitas est intemperantia in sumptu faciendo. Prodigus patrimonium effundit vel inconsultè largiendo. Quid autem est stultius, quam quod libenter facias, curare, ut id diutius facere non possis? In proverbii consuetudinem venit, *Largitionem fundum non habere*. Etenim quis potest esse modus, cum & iidem qui consueverunt, & illud idem alii desiderent? Vel in voluptates suas & luxum Cic. Off. impendendo. Sic prodigi sunt, qui epulis & viscerationibus & gladiatorum muneribus, ludorum, venationumque apparatu, pecunias profundunt in eas res, quarum memoriam aut brevem, aut nullam sint relaturi omnino. Mala, inopiam puta, mendicitatem, contemptum, quæ luxum atque profusionem consequuntur, egregiè depingit Comicus, exemplo hominis & familiæ luxu perditæ.

*Conveni hodiè adveniens quendam mei loci hinc atque Ter. E.
ordinis nuch. 2.*

Hominem haud impurum, iidem patria qui abliguerat bona.

Videò

*Videor sentum, squalidum, agrum, pannis annisque
obsitum.*

*Quid istuc inquam, ornati est? quoniam miser quod
habui perdidit,*

*Hem quo redactus sum, omnes noti me atque amici
deserunt.*

Et alibi ;

————— O Jupiter !

*Adelph. 4.7. Hancine vitam? hosce mores? hanc dementiam?
Uxor sine dote veniet: intus psalteria est:
Domus sumptuosa: adolescens luxu perditus:
Senex delirans? ipsa, si cupiat, salus
Servare prorsus non potest hanc familiam.*

§. 6.

*Modestia & Temperantia honorum cupiditati ex amo-
re veritatis modum adhibens.*

*Ei adversantur animi tum abjectio, sive vilitas; tum
Elatio, sive ambitio, arrogantia, stolidus ferocia,
vanitas, superbia.*

E X P L I C A T I O

Ad He- ren. 1.1. 1. **M**odestiam hic cum Vulgo Ethicorum stri-
ctius diffinimus, etsi Latine loquentibus la-
tiori significatu dicatur in animo continens moderatio
cupiditatum. Qui autem veritatem amat, facile e-
tiam honorum cupiditati modum constituit. Ve-
ritas hic tenenda hæc est. 1. Virtuti & Authorita-
ti, quâ munus, quod geris, carere non potest,
honor est habendus. 2. Honor ille adversus con-
temptum, obrektionem & calumniam in loco &
tempore pro officii ratione asserendus est. 3. In-
coldmirati famæ, ipsique adeo virtuti studendum,
non

non propter honorem ut inde voluptatem captes, vel eò te beatum existimes: sed ut quem obtines locum tueri, & officium faciens prodesse queas. 4. Tanti se quisque fieri velit, quanti esse, ipsa propriæ infirmitatis conscientia testatur & officii ratio permittit.

Metiri se quemque sub modulò de pede, verum est.

5. Homo hominem quemque æstimet tanquam naturâ, & si fidei socius fuerit, gratiæ beneficiò sibi æqualem: neque nisi peculiare jus ipsi quæsitum sit, plus sibi quàm reliquis arroget, sed quemque æquo secum jure frui permittat. 6. Ut virtus laudabilem, sic vitium vituperabilem facit hominem. Quæ extra virtutem & vitium sunt, bona & mala, quæ vulgi error naturæ vel fortunæ transcribit, homini per se nec laudi, nec vitio verti debent. Bonorum laus Deo debetur: ob mala tristitia nemo contemnendus.

2. Hac veritate agnita non difficile est modestiæ officia definire: 1. Vir modestus reputans nihil esse, quamobrem homo laudari vel vituperari debeat, præter virtutem & vitium, virtute contentus de fortunæ casibus, vulgi opinionibus atque similibus, tanquam ad se non pertinentibus, parùm est sollicitus.

*Virtus repulsæ nescia sordidæ
Intaminatis fulget honoribus:
Nec sumit aut ponit secures
Arbitriò popularis auræ.*

*Hor. l. 3.
Od. 2.*

II. Nunquam ipsi deest voluntas suscipiendi & exequendi, quæcunque veritatis amore digna & optima judicârit. Quare & studio habet famam servare integram: quæcunque sunt vera, quæcunque gravia, *Phil. 4:* quæcunque iusta, quæcunque casta, quæcunque amabi- *8.*
lia,

Eccles.
7. 1.

lia, quacunque bonæ fama, si quæ virtus, & si quæ laus; hæc animò versat: memor, bonum nomen unguentò bonò esse melius. Neque tamen non sat esse putat, suum se officium fecisse, si non id fama approbat. Quis enim, inquit Seneca, placere potest populo, cui placeat virtus? Neque rursus, si quem virtuti vulgus honorem debet, forè consequatur, eò insolescit, seque felicem existimat, quia nihil suæ voluptati quærit, sed omnia veritatis amori tribuit nunquam rectè faciens, ut fecisse videatur. Neque offenditur, si virtuti honorem neget populus,

Hor.
Serm.
1. 1. 6.

qui stultus honores
Sapè dat indignis, & fama servit ineptus:
Qui stupet in titulis & imaginibus.

III. Alienus ab ambitu honores non petit, etiam cum ei patent propter vel gratiam, vel dignitatem. Delatos amplectitur, si se muneri haud impari, idque omninò è re publica futurum existimet. Et cum munus explere volenti auctoritas famæque incolumitas abesse non debeat, eam, ubi opus, adversus contemptum & obrectationem vindicat, cavens interim, ne vanitatis & æroddæiæ suspicionem incurrat.

IV. Cætera, nec majore se dignum honore iudicat, atque se esse infirmitatis suæ conscientiam comperit: nec bona æstimari solita sibi arrogat, quæ nulla in se esse novit: nec quæ habet, majora atque reapse sunt, credi cupit: nec quæ Deo, vel secundum Deum aliorum beneficentiæ, accepta sunt ferenda, suæ industriæ, virtuti & ingenio attribuit.

V. Publicis, non quas ipse fecit, mensuris se metitur: nunquam suū admirator, nusquam sibi suffraganeus. Quapropter nec laudis, quâ vel maximè dignus est, cupiditate effertur; nec seipsum laudat; nec ab aliis laudari se velle significat: non ignarus pro-

proverbii ; *Laus in ore proprio sordescit.* Nec immeritò. Cùm enim homines societati invicem colendæ nati , totidem corporis civilis membra haberi velint singuli , sed rursus postremam se corporis illius partem , vel saltem cæteris hactenus inferiorè , videri ægrè ferant ; certè quidem laudum suarum buccinatores eò ipsò , quòd aliis præferri , & nobiliora societatis membra credi volunt , cæteros sibi inconviliant. Turpis etiam est *παραλλόγησις* in facinorum & periculorum suorum intempestiva commemoratione. Nec enim , *ut tibi jucundum est tuorum meminisse certaminum* , sic & aliis suave est *tuos audire casus*.

VI. Neque tamen modesti est , seipsum palàm vituperare, suasque laudes & dotes justò plus extenuare : quod qui faciunt , obliquâ viâ ad pròprias laudes grassantur. Qui enim audiunt ipsos , ne eorum vituperationem approbare , eosque parvi pendere videantur , eorum dicta quoquò modò refellere ipso pudore coguntur , neque adeò committere audent , quin ipsorum in laudem aliquid dicant.

VII. Modestus ut magni fieri non petit ob ætatem floridam , formæ elegantiam , corporis robur atque vigorem , doctrinam , divitias , splendorem generis & nobilitatem &c. sic neminem , cui ista defunt præ se spernit , cùm extra virtutem & vitium posita sint. Neminem debita laude defraudat ; suas cujusque dotes agnoscit & colit. Ut homo hominis ope atque gratiâ indigere se sentit , juvari que posse persuasum habet , sic de quibusvis in loco & tempore honoris , observantiæ & obsequii cultu quàm optimè semper mereri studet. Quod postremum modestiæ officium cùm homo homini ; rùm maximè subditus principi , liberi parentibus , servi dominis , discipuli præceptoribus , clientes patronis , beneficiarii beneficiis &c. debent.

VIII. Modestiam denique ostendit sermone, gestu, incessu, totoque corporis cultu, & omni apparatu, quem sors, vitæ institutum, officii ratio & facultatis modus postulant: nusquam alius, atque est videri, nec propter vana, & quæ pretij nullius sint, æstimari volens: quia novit, & leve & parvum esse, animum quod laudis avarum — subruit & reficit. Juxta præceptum Apostoli, nihil per contentionem aut vanæ gloriæ studium agit, se superiorem facile ferens, de aliis magnificentius semper, quàm de se, opinans. Cautio tamen est ex præcepto Poetæ ;

Phil. 2:
3.

*De me supercilio nubem, plerumque modestus
Occupat obscuri speciem.*

3. Animi Abjectio nimia est modestia, quâ peccant, qui se omnibus honoribus, etiam licitis & necessariis indignos, vel saltem delatis longè inferiores, judicant ex ignavia, molitie, impatientia & metu periculorum atque ignominie seu repulsæ, ut & quia seipsos parùm rectè nōrunt. Hic eo maximè peccant, quòd apud alios animi malè sibi conscii suspicionem conticent, atque ob id ipsis se contemptibiles reddant, & occasiones præclara gerendi, aliisque benefaciendi sæpè sæpiùs negligant, sibi & aliis injurii. Cæterùm qui contempto honore nihilominus honore se dignos præstant, abjectorum censu eximendi sunt.

4. Elatio animi modestiæ defectus est, si vitium ex opposita virtute, non autem præcisè ex actionibus spectes, quod ipsum etiam *Immodestia* nomen, quò venire solet, arguit. Ipsa porro animi elatio diversa sortitur nomina. Ubi enim animus ipse nimia honorum cupiditate effertur, *Ambitio* dicitur:

2. de be- quæ, ut ait Seneca, non patitur quemquam in ea men-
nes. 27. jura honorum conquiescere, quâ quondam ejus fuit im-
pudens

prudens votum. Ubi quis temerè atque insolenter & falsò sibi tribuit, quæ nisi suū esset ignarus vel oblitus, aut stultus suū admirator, sibi deberi faciliè negaret, *Arrogantia* vocatur. Ubi quis è rebus extrariis, veluti robore & vigore corporis, divitiis &c. Item è dictorum & factorum assentatoria approbatione laudem aucupatur, è mustaceo laureolam quærit, ac studiò sibi placendi usque adeò effertur, ut nisi quod ipse facit, nihil rectum putet, *stolida ferocia* est. Sic *Agrippam* *Potestum* robore corporis *stolidè ferocem* dixit Tacitus. Ann. 1. 3.
In ista aula se jactavit, etiam Thraso ille Terentianus, quando sic est gloriatus.

Est istuc datum profectò mihi, ut sint grata quæ facio omnia.

Ubi simulata virtutis specie laus captratur, *Vanitas*: Ubi denique animi elatio, ore, vultu, gestu, incessu, corporis cultu & apparatu se prodit, *Superbia* speciatim appellatur. Superbi ferè difficiles, morosi & iracundi sunt ex opinione contemptus; quapropter etiam vulgò ex invidia laborant, & casus plerumque superbiam sequitur, juxta illud;

Alta ruunt, inflata crepant, tumefacta premuntur.

Superbus enim in Dei & hominum odio est: atqui necesse est cadere, quem nec Dei nec hominum favor tuetur & sustinet. *Ante confractionem est elatio, & ante offensionem celsitudo animi.*

Prov. 16: 18.

§. 7.

Temperantia in rebus cognoscendis, nomine generis contenta, cupiditati sciendi ex amore veritatis modum, præscribit.

Ei adversantur curiositas & sciendi tedium.

E X P L.

1. **T**emperantia in cupiditate sciendi, quia vulgò in virtutum moralium numero locum non invenit, speciali nomine caret. Attamen cum haud dubiè peccet, qui rerum scientiam solâ Volupratis gratiâ venatur, & nimia sciendi cupido ad mores mutandos, teste experientia, plurimum valeat, Temperantia, illi cupidini modum ponens, virtutum numero excludi non debet.

2. Cupiditas sciendi unde nascatur, & quomodo ad laudabilem usum, & sobriæ mentis obsequium componenda, prolixè exponit noster *Dialogus de Intellectus humani imbecillitate* &c. Ubi inter alia sequentia sive cavenda, sive tenenda præcipit.

I. Finitæ mentis tuæ, & infinitæ potentie Dei probè memor cavetis affectui indulgeas in sacris, quâ fidei mysteriis, quâ rebus miraculò gestis. *Non fastidienda in Scripturis aperta, nec quærenda in cælis clausa & obsignata: ne in his illicitè curiosi, in istis damnablem inveniamur ingrati.* Novitatis amore usque eò duci, ut nova secteris, amplectaris, moliaris in rebus fidei, quas à captu finitæ corruptæque mentis longè remotas, sacra clamat pagina; miracula quoque curiosæ temeritati suæ ad sensus humani modulum & naturæ legem hætenus non prorsus ignotam exigenda & censenda subijcere; id verò animi parum in fide firmi, irreligiosi, profanique judicium est.

II. Ca-

II. Cave putes, novitatem rei, veritatis esse argumentum. Hominis est parum sibi constantis, opiniones seu veras amplecti, quia novas, usque inauditas: bonisque tanquam solidis acquiescere, quia raris, necdum usu compertis. Attamen multi vel ipso curiositatis affectu excæcati, opinionum veritatem, rerumque bonitatem vix alio quam novitatis & raritatis nomine æstimant, veritatis inventæ argumentum facientes, quod demum inveniendæ debuerat esse incentivum.

III. Quia plus scire velle quam sit satis; intemperantiæ genus est, scienda æstimemus ex utilitate, quam si quæ nullam promittant, acius quidem illa studium, quale curiosorum esse solet, non merentur. Ea porro rerum conditio est, ut suæ plerumque utilitatis, inutilitatisve indubium illico attendenti faciant indicium. In sacris præter quod nescire velle, quæ Magister maximus nescire nos vult; erudita insciantia est, quidni libenter, quia utiliter, ignoremus, quæ non præbent *ὁμοδομίας Θεῷ τὴν ἐν πίστι* &c. Stultas quæstiones cohibe; viles enim sunt & 1. Tim. 1: 4. 5. Tit. 3: 9. vana. Quarum quanta luxuria & superfluitas apud Scholasticos, quos vocant: qui quicquid in Aristotelis & plus minùs trecentorum interpretum ejus. artibus supervacuum erat, transfudere in suam. Quanto temporum impendit, quantà alienarum artium molestia hæc illis laudatio constat? Sed ad nostros quoque cum perveneris, fortè ostendam multa securibus recidenda. In liberalibus studiis rejectaneum haberi rutò potest, quicquid nec percipiendæ virtuti locum parare, nec vitæ humanæ plurimarum egenti rerum prodesse queat. Rectè rursus Seneca; Quid? quòd, Epist. 88. inquit, illa liberalium artium confectatio molestos, ver-
bosos, intempestivos, sibi placentes facit, & idè non discentes necessaria, quia supervacua didicerunt? Quatuor millia librorum Didymus Gram. scripsit: miser, si tam multa supervacua legisset. In his libris de patria

Homeri quæritur, in his de Æneæ matre vera &c. & alia, quæ erant dediscenda, si scires. I nunc, & longam esse vitam nega.

IV. Ubi certum habes, saltem *moralis*, quam dicunt *certitudine*. Vera usque adeò abstrusa, ut indagatu impossibilia judicet prudens & non inexpertus quisque: rursus Bona adeò esse minuta & tenuia, ut nullam ad veri nominis felicitatem momentum adferre queant habenti; illa equidem talia esse negem, quæ vel curiosum fatigare, vel hiantem spe vana ducere debeant, qua demùm cunque novitate placeant. Hanc si in nosmet legem sanciremus, brevi, puto, futurum videremus, ut disciplinarum corpus resecta difficultium quæstionum superfluitate detumesceret, & efferus ille cupiditatum nostrarum impetus relaxesceret.

V. Cave rimeris, quæ nescire velle potius, quàm scire, tui sit officii. Turpe est fimbrias extendere suas, & alienis implicari negotiis, cùm tuis fortè nullus super sis. Turpius, cognoscere velle, ubi ignoscere debeas, *festucam in oculo fratris spectare, trabem in tuo non animadvertere*. Ad mala & aliena vigilax, hîc tantùm, in bonis, puta, & domesticis, urbana curiositas torpescit. Scitè Poëta;

Tert.

Apol.

6. 1.

Hor.

Serm. 1.

1. 3.

Quum tua pervideas oculis mala lippus inunctis,

Cur in amicorum vitiis tam cernis acutum,

Quàm aut aquila, aut serpens Epidaurius? at tibi

contra

Evenit, inquirant vitia ut tua rursus & illi.

Et non multò post;

Concute, num qua tibi vitiorum in se verit olim

Natura, aut etiam consuetudo mala.

Præ-

E T A T C A. 215
Præcepta ista singula fusè prosequitur Dialogus suprà citatus.

3. Inrita sciendi cupiditas naturæ vitiatæ contagiô in pravam sciendi libidinem degenerat ; unde *novitatis amor* sive *curiositas* vitio danda , existit. Est autem curiositas *inordinata sciendi cupido* : affectus , quò indomabilior , hòc nocentior , irrequietum malum , quod , ubi invaluerit ad nefanda perducit. Utenim in mala scabie est scalpendi quædam voluptas : sic curiositas quà quà potest , libenter invenit , quod oblectet. Quod suò exempliò plus satis docent scioli , nefariorum artium magistri , Hæretici , Athei &c. Nec dum tamen malorum est satis. Curiositas voluptati paratios habet omnes sensus. Multi occulta curiosis oculis usurpârunt , ut Bethsemitæ , Eudoxi , Plinii &c. eò spectaculi pretiò , ut miseri malè mulctarentur. Sunt qui velut æstrò perciti gregatim peregrino solò impluunt , principum aulas perreptant , secretâ rimantur &c. curiositati thronos erexisse domi , non satis habentes. Multos ad divagandum incitat novorum sitis , quam transennas , curiosorum latibula , obsidentes explere nequeunt. Sunt , ut breviter dicam , quorum curiositati nulla theatra faciant satis , nullæ tabernæ , officinæ nullæ artificum & artium sensûs voluptati servientium. Usque adeò omnes ista libido inficit sensus , ut adulteria ad *curiositatem alieni tori voluptates explorandi* retulerit Plutarchus.

4. Sciendi tædium , ex adversa parte Temperantiæ in studio cognoscendi oppositum , intelligimus quale est , tùm illorum , qui veritatem suò studiò dedignantur per ignaviam : tùm illorum , qui *Scriptis* Tert. de anim. c. II. 1 *similes manibus questionibus fatigati , dum latè querunt incerta , latius disputant præsumpta.* Hi quia culpâ ingenii , aut defectu manuductionis vel debiti studii discere & intelligere nequeunt , locò doctæ ignorantix artem dediscendi & obliviscendi quæ di-

dicerant , amplectuntur , & quasi *Saturnina fame* proprios conceptus devorant.

§. *Δοξοπασοφία* *præsumpta omnium scientia*, quâ nonnulli admiratione & amore sui infatuati , se totam scientiæ boni malique arborem absumpsisse somniant : & *Soliscientia* , quâ quidam constitutò quasi sciendi monopolio sibi soli sapere videntur , *stolida ferocia* est , de quâ *suprà*.

C A P. VII.

De Fortitudine.

§. I.

Virtus inter adversa est Fortitudo.

Adversa sunt , quæ sentienti dolorem inferre , ac metum , tristitiam , similesque affectus , qui animum malè habent , concitare apta nata sunt.

Adversa ex amore Veritatis ita æquò ferre animò , ut non impediunt , quò minus id unum velis & agas , quod amorì veritatis convenit , Fortitudo est.

E X P L.

1. **R**erum adversarum totidem ferè genera sunt , quor secundarum. Sic morbi atque dolores , quibus quasi virgis inittiamur ad mortis sacra , sollicitudines , ægritonia , mœror , pavor , paupertas , contemptus , fames , sitis , æstus , frigus , habitatio incommoda , nuditas , conjugium infelix , lues , tyrannis , bellum , incendia , annonæ caritas , oppressio egenorū , exactiones , vastationes , calumniæ , exprobrationes , persecutiones , exilia , verborum injuriæ &c. Mala tristitia cujusque generis & nominis , sive incumbencia , sive imminencia : mala tum animi , tum corporis , tum hominis , in rerum adversarum censu connumerantur. De quibus ex oppositione secundarum facile constat.

2. Sed meminisse oportet , adversa , injucunda & noxia , demum talia esse & haberi , ubi doloris & tristi-

tristitiæ sensum ingerunt, animumque malè afficiunt, secundùm illud, quod de affectuum usibus communibus dictum Lib. I. cap. VI. §. 3. Neque tamen, si animo dolorem, tristitiam, metum &c. injiciunt, illicò etiam calamitatem inferunt. Quod enim senex ille Terent. de Bonis, ut patria incolumi, amicis, genere, cognatis, divitiis, dixit;

Atque hæc perinde sunt, ut illius animus, qui ea Hæant.
possidet: I. 2.

Qui uti fit, ei bona; illi qui non utitur rectè, mala.

Idem etiam suo sensu de malis externis verissimum affirmari potest: ei demùm, qui iniquò fert animò, & adversa, utut suò bonò, immissa nollet, verè mala sunt. In hac enim pugna, quæ voluntati cum adversis intercedit, vera consistit animi calamitas. Unde rectè Seneca; *Non quid, sed quemadmodum* De Provid. Divin. 2.
feras, interest.

3. Virtus inter adversa animum præstat invictum, quia est amor Veritatis unicus, legem imponens affectibus & actionibus. Veritas hinc præcipuè tenenda hæc est; 1. Cum omnia prorsus, tum præcipuè omnes vitæ nostræ partes arbitriò & voluntate Dei gubernantur. 2. Sola Dei manus utriusque fortunæ arbitra est, & moderatrix. 3. Illaque non inconsiderato impetu ruit; sed ordinatissimâ justitiâ bona simul ac mala dispensat. 4. Cum ergò Dei manu exerceamur per afflictiones, in illis agnoscenda justitia primùm & æquitas, deinde salutis nostræ cura. 5. Porro si æquum est nos affligi; iniqui sumus, qui obmurmuramus: si saluti sunt adversa; ingrati sumus, nisi æquò placidòque animò suscipiamus. Justas autem esse afflictiones, quâ fronte negemus? Saluti esse easdem, quibus? unde? quò pactò? passim Scripturâ S. docemur, quam consulere necesse habet, quisquis patientiam rectè comparare velit. 6. Meminisse oportet; *Bono suo Bonum communionis longè esse præferendum.* Vide Part.

Part. I. cap. IX. §. 3. unde illud; *Dulce & decorum pro patria mori.* Et, *O fortunata mors, quæ naturæ debita pro patria potissimum est reddita!* 7. Meditanda quoque sunt illa tria, *Huc, Hic, Hinc.* Huc te, Deo vocante, venisse: Hic te, Deo iubente, esse: Hinc te, Deo evocante, abire. De quibus vide Part. I. Cap. II. §. 19. 8. Ab officio discedere spe commodi, vel metu incommodi, ejus est, qui sui curâ, studiô ac sollicitudine, non amore Veritatis, neque adeò amore legis & voluntatis Dei, ducitur.

4. Atque hinc patescit

1. Fortem esse non desinere, qui ingruentibus rebus adversis, puta, naufragiô, morte repentinâ &c. expallescit, & totis quasi artibus concutitur, etsi Vulgus, & Stoici diversum opinentur. Metu enim percelli in genere moris nec bonum nec malum est. Ast metu impellente officium deferere suum, & facere quid; aut omittere, quô amor Veritatis violeretur, id verò turpe & molle est: quippe quod non ad passionem, sed ad actionem voluntatis nostræ referendum est.

*Hor. l. 3.
Od. 3.*

*Iustum & tenacem propositi virum,
Non civium ardor prava jubentium,
Non vultus instantis tyranni
Mente quatit solida.*

*Lib. 5.
c. 14.*

Quô, inquit Lactant. nihil verius dici potest: si hoc ad eos referatur, qui nullos cruciatus, nullam mortem recusant, ne à fide justitiæque declinent. Qui non tyrannicas jussiones, non præsidum gladios tremunt, quominus veram & solidam libertatem constanti mente defendant, quæ in hoc solo tuenda sapientia est.

2. Rursus nec illicò fortem esse dicendum, qui rebus adversis aut imminentibus animò non angitur; aut præsentibus non dejicitur, rebus tristibus nec impallens, nec illachrymans. Possunt enim hæc

hæc aliunde, quàm à virtute proficisci : velut, ab ingenio duro, malorumve assuetudine, quâ contra fortunam & casum quemlibet obduruerit : qualis nauta,

*Qui siccis oculis monstra natantia,
Qui vidit mare turgidum, &
Infames scopulos, Acroceraunia.*

Quales etiam Lacedæmoniorum pueri, qui ad Dianæ aram loris ad sanguinem usque flagellati ne ingemuere quidem. Possunt etiam eadem à jactantia, vanitate, gloriæ studio, metuque ignominie proficisci. Sic fortes nego milites, quos vel prædæ gloriæve cupiditas ad arma pellicit, vel hoste circumdatos ipse metus audaces esse cogit. Quæ igitur ratio Temperantiæ, eadem & Fortitudinis est. Vir bonus temperans esse non desinit, etsi cor ei falliat, lætitiâ gestiat, totusque vultus & oratio hilaritatem spiret. Nec rursus illicò temperans est, qui in rebus secundis lætitiâ cohibet, hilaritatemque suppressit: cum & hæc ab animo vana cupiditate victo proficisci queant. Quapropter exterior ille apparatus, mœstitia, pallor, lachrymæ &c. ad fortitudinem nihil, quippe quæ in animum tota se recepit, propositio atque studio faciendi, quod amori veritatis convenit, unicè contenta.

§. Fortitudo igitur non in eo est, ut metum atque tristitiam moderetur, quod vult Peripatus: neque ut expellat, quod placuit Stoæ. Verum ut negativè potius ad illa se habeat, eorumque intuitu nec agat quicquam, neque omittat. Fortem igitur laudamus illum, qui inter adversa id unum agit, quod jubet Veritatis amor, ei soli auscultat, soli parer, neque ullâ sui, commodique sui curâ atque studio inde dimoveri patitur.

§. 2.

Fortitudo duplex est ; Patientia , & Fortitudo strictè sic dicta.

Patientia est Virtus inter adversa , quæ incumbunt.

E x p l.

1. **V**ulgò Fortitudinem dividunt in *Veram* , quam definiimus , & *Apparentem* , quæ non honestate , sed utilitate , jucunditate , aut alia quâpiam ratione ad pericula subeunda incitat. Quam deinde faciunt quintuplicem , *civilem* , *militarem* , *iracundam* , *fiduciariam* , & *inseciam*. Verùm hæc quidem non rei , sed nominis , distinctio est. Alii deinde fortitudinem dividunt in *Domesticam* , quæ in adversis prosperisque rebus animum præstat immotum : & *Bellicam* , quâ in Bello honestè occumbere vir fortis non dubitat. Atqui ea Objecti veriùs , nudè & in se spectati , quàm fortitudinis , divisio est. Ut enim objecti , id est , rerum adversarum , varietas , ipsam virtutem , ejusve potiùs officia variet , necesse est ea non simpliciter ut adversa spectari , sed ut talia , quæ animum diversimodè afficere , & alios atque alios in eo affectus ciere apta sunt , unde etiam consequenter diversa virtutis officia existunt. Adde , quòd prospera non fortitudinem , sed temperantiam occupant. Rectè Poëta ;

*Rebus angustis animosus atque
Fortis appare.*

Quod sequitur , temperantiæ est

*sapienter idem
Contrahes ventô nimiùm secundò
Turgida vela.*

2. Adversa igitur spectabimus vel ut *incumbentia*; vel ut *imminentia*. Illa tristitiam atque dolorem, & si, quod plerumque in malis contingit, iniquò animò ferantur, calamitatem inferunt. Hæc verò timorem, horrorem, &, ubi animus malè compositus fuerit, desperationem incutiunt.

3. Virtutem porrò inter adversa, quæ incumbunt, *Patientiam* appellamus, quæ animum ita præstat immotum, ut adversa non impédiant, quominus facias, vel omittas, quod fieri, vel omitti, veritatis amorì convenit. Videsis suprâ §. 1. n. 5.

4. *Patientiæ* igitur est 1. Ad tristitiam atque dolorem *negativè* se habere, non humanitatem exuere, & tristibus perinde ac lætis, nedum lapidis instar nulla re, affici. Nihil ergò ad eam Stoica indolentia & molestiæ vacuitas. 2. Animum in proposito sancto perseverantem exhibere. Atque hinc Apo. ^{2. Pet. 1:} stulus patientiæ pietatem, quæ ejus quasi anima & ^{6.} vita est, succenturiat. A vera igitur patientia longissimè abest durities illa desperatorum, qui nullo metu frangi & ab improbitate morum revocari possunt. 3. In adversis Deum sequi, ob rationes de quibus suprâ. *Optimum est*, ait Seneca, *pati quod Epist. emendare non possis, & Deum, quo Auctore cuncta* ^{107.} *proveniunt, sine murmuratione comitari. Malus miles est, qui Imperatorem gemens sequitur. Et paulò post ex Cleanthe;*

*Ducunt volentem fata, nolentem trahunt,
Malusque patiar, quod pati licuit bono.*

Quibus gemina vel eadem bene multa occurrunt ex Stoicorum disciplina, legenti Scripta Senecæ. Cave verò putes, patientiam non aliò niti fundamentò, quàm, quia frustrâ obluçteris vel inviolabili naturæ necessitati, cui, quicquid patimur, in-textum sit, vel Fortunæ ἀνάγκη, quæ cæcis oculis me-

merentes pariter ac immerentes vulneret. Secus enim de adversis sentiendum esse veritatis amanti, suprà docuimus. 4. Patientia Veritatis amore. & Scripturarum S. oraculis proficiente subnixà cò maximè insignis est, quòd facit, ut Deo tanquam Patri mediis in tribulationibus confidas, eòque tanquam unicò tuò bonò contentus jacturam commodorum seculi moderatè feras: quinimò & honori deputes, quòd detur, Deum per afflictiones glorificare.

§. 3.

Fortitudo Virtus est inter adversa, quæ imminet.

E X P L.

1. **F**ortitudo adversus pericula sive mala imminetia animum præstat invictum. Unde Vir fortis, quia solo veritatis & officii amore ducitur, pro gloria Dei, pro Religione, pro Patria, pro Principe &c ubi necessitas id postulat, periclitari, ardua & difficilia aggredi ac perferre & vel mortem oppetere non dubitat.

2. Fortem igitur facit animus infractus, non indolentia, non ingens corporis robur: Fortem facit veritatis & honestatis amor, non vana cupiditas, non quæ cæco impetu fertur, audacia. Quando autem Virum fortem postulante officii ratione etiam pericula refugere negamus, pericula intelligimus, superatu quidem difficilia, nec tamen impossibilia, φοβερά quidem, sed & θάρραλία, item quæ cum scelere & infamia non sint conjuncta. Cæterum ut fortis esse non desinit, qui mala imminetia metuit; sic fortis illicò dici non meretur, qui pericula contemnit & provocat: Vide suprà

Epist. 85. §. 1. n. 4. 5. Rectè Seneca, Fortitudo, inquit, non est

est inconsulta temeritas, nec periculorum amor, nec formidabilium appetitio.

3. Unde colligas, Viri fortis esse 1. Pensare vires & pericula: quia amoris veritatis malè convenit cum inconsiderata temeritate. Fortes ergò non sunt, quos periculi ignoratio reddit audaces, cognitio pavore dejicit. Omnem stultitiam superat, contemnere quæ prodigiola & supra hominem sunt.

2. Non suū, nec rerum externarum curā, nec placendi studiū, sed solo veri atque honesti amore duci. Temerarii igitur & audaculi veriùs quàm fortes habendi, qui sive domi, sive militiæ, ex causa injuriæ cujuslibet, vel ulturi aut defensori, vel provocantes aut provocati, ad certamina singularia præcipites ruunt: hinc quidem immodici æstimatores suū ipsorum atque honoris; inde verò vitæ, quā nihil carius habere sibi videntur, stultissimi contemptores. Aliter tamen sentiendum est de

Vide

iis, qui necessitate urgente, Republica jubente, Veritatis amore non prohibente, præliis se offerunt, quæ definitō numerō condicuntur, fatō & eventu populorum suorum decertaturi. Insanos, non fortes, dicam, qui placendi studiū, ut vivere, sic mori, è Principum suorum arbitrio obstinant: scil. institutō vitæ dignum invenientes exitum. Non fortem, sed φιλασλον sese probavit Cato Uticensis, quando violentas manus sibi intulit, ne vultum tyranni aspiceret. Impotentia, & invidia, non fortitudinis est, quod Poëta de Cleopatra canit;

*Grot. de
J. B. &
P. l. 3.
c. 20.
§. 43.*

*Ausa & jacentem visere Regiam
Vultu sereno fortis, & asperas
Traçtare serpentes: ut atrum
Corpore combiberet venenum:
Deliberata morte ferocior. &c.*

*Horat.
Carm. l. 1.
Od. 37.*

3. Viri fortis est, meditata habere rationes, quibus metum

metum sibi imminuere vel adimere, & ex adverso animum addere queat. *Semper item quicquid fieri potest, quasi futurum cogitare. Rebus demere tumultum, ac videre, quid in quaque re sit: sciet nihil esse in istis terribile, nisi ipsum timorem. Animum denique obfirmare in pericula, quæ rerum honestarum executionem remorari possunt: ita quidem, ut quanquam Vir fortis contra adversam fortunam luctetur, nihilominus animo nunquam decadat, ne ipsa quidem morte à sancto proposito dimovendus.*

4. Firmissimum porrò fortitudinis munimentum fides est, Dei donum, mundi, i. e. concupiscentiæ & tentationis victrix. *Per fidem Gedeon, Barac, Samson &c. devicere regna, obturaverunt ora leonum, extinxerunt vim ignis, effugerunt aciem gladii, convulnerunt ex infirmitate, fortes extiterunt in bello, castra verterunt, exterorum. Hac fortitudine inclyta fuit olim, quæ imbellis alioquin videri poterat, Christianorum turba, certatim ad lanienas ob religionis causam raptata. Cum videat vulgus dilacerari homines variis tormentorum generibus, & inter fatigatos carnifices invictam tenere patientiam, existimant id quod res est, nec consensum tam multorum, nec perseverantiam morientium vanam esse, nec ipsam patientiam sine Deo cruciatus tantos posse superare. Latrones & robusti corporis viri ejusmodi lacerationes perferre nequeunt: exclamant & gemitus edunt: vincuntur enim dolore, quia deest illis inspirata patientia. Nostri autem, ut de Viris taceam, pueri & mulierculæ tortores suos tacite vincunt, & exprimere illis gemitum nec ignis potest. Eant Romani, & Mutio gloriantur & Regulo, quorum alter necandum se hostibus tradidit, quod captivum puduit vivere: alter ab hostibus deprehensus, cum videret se mortem vitare non posse, manum foco injecit, ut pro facinore suo satisfaceret hosti, quem voluit occidere, eaque pœnâ veniam, quam non meruerat accepit. Ecce sexus femineus & fragilis*

atas

Sen. Ep.
24.

1. Joh. 5.
45
Heb. 11.
33-34.

Laëtant.
Instit.
drovin.
lib. V.
cap. 13.

atas dilacerari se totò corpore urique perpetitur, non necessitate, quia licet vitare, si velint; sed voluntate, quia confidunt in Deo.

§. 4.

Fortitudini opponuntur, in Excessu quidem Furor; in Defectu Mollities.

Ille dolorem quodammodò prosequitur; hac eundem fugit.

E X P L.

1. **V**Ir fortis dolorem, metum &c. hætenus non curat, nullòque numerò habet, quantum ad animi sententiam attinet, etsi in malis non sit ἀπα-
θής. Virtutis igitur modum excedit, qui dolorem vel res dolorem afferre, aptas natas prosequitur. Deficit, qui dolore vel doloris metu vincitur, & victus officium deserit, atque ideo quantum pote dolorem fugit.

2. Dolorem sanè metum atque tristitiam, quatenus animo ægrè faciunt, nemo sectari videtur. Timore quidem & periculo gestire atque delectari videntur audaculi præsertim & bellicosi juvenes: sed delectatio non tam ex ipso metu, quàm spe metum sustinente provenit. Unde etiam fiat, ut qui lachrymis & tristitiæ se tradunt, vix ullam admittentes consolationem, ipsâ suâ tristitiâ delectari videantur, causam videbis Part. I. C. 6. §. 1. n. 6. Sunt tamen, iique non rari, qui ultrò in ea se præcipitant mala, unde nil nisi dolorem consequuntur. Id quod ad furorem satis est.

3. Furor autem vel Patientiæ, vel Fortitudini strictiori sensu intelligendæ opponitur. Itaque Furor, Patientiæ excessus, est *Immanitas*. Sic immanes sunt, qui in seipsos sæviunt, mortem sibi

confeiscunt &c. Fortitudinis strictius dictæ excessus est *Audacia*, rebus ambiguis & periculi plenis temerè gaudens. Sic audax est, qui magna tempestate oborta sine causa se mari committit: qui temulentorum digladiationibus intercedit &c. Audax est, qui istiusmodi periculis quasi prurit, aut jactantiâ & vanitate in ea fertur.

4. Mollities Patientiæ in defectu opponenda *Impatientia* est. Sic molles & impatientes dicimus, qui afflictâ fortunâ, salute &c. officium deserunt, luctu turpi, questu ignavo, flebilibus modis sortem suam prosequentes. Mollities â fortitudine strictè sic dicta deficiens, *Timiditas* & *Ignavia* appellatur. Unde timidos & ignavos dicimus, qui, simul ut viderint hostem, stationem deserunt, abjectoque scutò fugâ se proripiunt. Rideretur Macedonum Rex Perses, qui, cum positus per abrupta castris ita Macedoniam suam armis vallâset, ut non reliquisset aditum, nisi â cœlo venturis hostibus videretur, securus nihilque mali metuens subita Romanorum irruptione per loca, quæ volucris quoque videbantur invia, tanto territus est opere, ut, teste Historico, pecuniam omnem in mare jusserit mergi, ne periret: classem cremari, ne incenderetur. Usque adeo timidus, ubi animo fuerit indulgentiori, nec consilii locum, nec auxilii copiam habet.

Flor. l. 2.
c. 12.

CAP.

CAP. VIII.

De Virtutibus reductitiis, ad Temperantiam & Fortitudinem revocandis.

§. 1.

Ad Temperantiam & Fortitudinem reducuntur Magnanimitas, Equabilitas, Ἀσάφεια & Mansuetudo.

E X P L.

Non obscurum est attendenti, illum, qui nihil voluptatis causâ facit, neque porro lætis vel adversis ab officio dimoveri patitur, Magnanimum, Equabilem, sorte sua contentum atque mansuetum fore. Quapropter virtutes istas haud immeritò reductitias appellaveris, è characteribus & officiis suis deinceps dignoscendas.

§. 2.

Magnanimitas honorum cupiditati in magnis & arduis ex amore veritatis modum ponit.

Ei adversantur audax Insolentia & Pusillanimitas.

E X P L.

I. **M**agnanimus suis è characteribus spectatur, quales sunt. 1. Veritatis & officii amore motus magna magnorum gratiâ suscipit & agit;
P 2 unde

Nicom.

.4. c.7.

unde & nomen illi factum. *Ipsa verò Magnanimitas circa magna vel ex nomine versari videtur*, inquit Aristoteles. 2. Magnanimus sola animi bona, sapientiam puta, & virtutem, in rebus humanis magni facit, cætera, quatenus cum ratione fieri potest, insuper habens, nec de iis sive parandis, sive retinendis, magnoperè laborans. 3. Præ cæteris honorem, tanquam bonorum extrariorum maximum, virtutis quippe & præclarè factorum præmium, hætenus ita æstimat, ut tamen voluptatis indidem capiendæ intuitu nunquam agat. 4. Non nescius, honorem, tanquam bonitatis testimonium, ab Optimis non nisi Optimis haberi, id operam dat, ut à Viris cordatis & optimis honorari dignus sit.

Nicom.

l.4. c.7.

Qui igitur revera magnanimus est, eundem & bonum esse oportet. Id Nævianus ille sensit Hector,

Cic. Tuscl.

4.

*Lætus sum**Laudari me abs te, pater, laudato Viro.*

5. Neque tamen bonorum laudes ambit, Veritatis & officii, quam famæ, rationem habens majorem. Quare si sua benè gestis laus negetur, non stomachatur. Cætera huc pertinentia videsis suprâ, ubi de Modestia. 6. Gravitate cum Viris magnis hætenus ita certat, ut ne vanam gloriolam captare, sed verò dignitatem servare suam videri velit, cum inferioribus contendere se indignum reputans. 7. Honores vulgi, imperitorum & improborum contemnit: neque si universa multitudo, majorve ejus pars in unum honoribus cumulandum consentiat, eam benevolentiam alia de causa sibi gratulatur, quàm quia consiliis & sermonibus ipsius auctoritatem conciliat, & ad res magnas præclarè gerendas auxilio, & adversus pericula præsidio esse potest. Unde quæ ad benevolentiam civium parandam pertinere videntur, ita curæ habet, ut vulgi

vulgi tamen & improborum sermonibus honestatem atque utilitatem publicam nunquam non anteponat, exemplo ejus, qui juxta Ennium,

Unus cunctando Romanam restituit rem:

Non ponebat enim rumores ante salutem.

8. Quapropter etiam vulgaria convitia & maledicta spernit, quippe quæ, ut Tacitus ait, spreta exoleſcunt, si irascere, agnita videntur: satis habens, ipso contemptu, vel ubi consultum videbitur, etiam beneficiis, iniquè dicta factaque vindicasse. Aristot. Magnanimum rectè negat esse *μνησίωνος* injuriarum memorem. Calumnias interim, quæ famam lædere & fidem apud homines non improbos invenire queant, verbis & factis refellit. 9. Magistratum & Imperia nonnunquam ambire, aut oblata amplecti, non alienum est à Magnanimo. Utrumque ergò pro re nata faciet, ut ne desint magnarum rerum gerendarum occasiones, utque cum universis in publicum, tum præcipuè Viris bonis præsidio esse queat, ipsemet etiam adversus injurias auctoritate sua munitior futurus. Cæterum in Magistratu gerendo nec honoribus oblatis effertur, nec eorundem cupiditate transversus agitur; nec Principatum affectat, quod vitium alioqui Magnis faciliè innascitur; nec lucripeta factus corrumpi, nec denique labore ullo vel periculo à studio commodisque Reip. advocati se patitur. 10. Accedit & illud; quòd Magnanimus vivere ad alterius arbitrium *Nicom.* non possit; nisi ad amicum, adde, & legis: est enim *l. 4. c. 8.* servile. Unde etiam omnes adulatores famulari & humiles. Plura si lubet vide apud Aristotelem in loco citato. Ubi tamen cautè inter ea quæ Magnanimitatis & φιλαυδίας sunt, discernendum est.

2. His contraria faciunt & audacter insolens & pusillanimis: quæ ex analogia eorum, quæ sub locò

de oppositis Modestiae & Fortitudinis nobis dicta
 fuere, satis utique intelliguntur. Id modò tenen-
 dum; Opposita Magnanimitatis ab Oppositis Mo-
 destiae & Fortitudinis gradu differre. Heic enim
 ex adverso vicissim peccant, & qui ad honores ma-
 gnos è magnis & arduis grassatur, & qui, cum
 pro vitæ conditione & dignitatis loco magna audere
 deberet, prout æquitas postulat, animò est ab-
 jectò.

§. 3.

*Æquabilitas est, quâ veri & honesti amans ita sibi
 constat, ut nec lætis insolescens, nec adversis dejectus
 ab officio desleat.*

*Ei opponuntur in Excessu Rigor animi; in Defectu In-
 constantia.*

E X P L.

1. **A**liud est, sibi constare; aliud esse ἀπαρῆ.
 Illud Viro bono datum: hoc cunctis morra-
 libus negatum est. Hic igitur promittere, quàm
 præstare facilius est Stoæ: cujus suo de Sapiente ina-
 nis est gloriatio; *Talem esse Sapientis animum, qualis
 est Mundus super lunam: ubi semper serenum.* Unde
 etiam Lucan. de Sapiente;

Seneca

Ep. 59.

Perpetuum nulla temeratus nube serenum.

2. Quia Virtutis cultor passiones non expellit, nec
 focillat, sed hætenus susque deque habet, ut earum
 intuitu atque ductu nec faciat; nec omittat quic-
 quam, hunc demùm dicimus Æquabilem sibi que
 constantem, qui rebus in adversis nec mœrore ta-
 bescit, nec timore frangitur: rursusque in prospe-
 ris nec alacritate futilem gestiens deliquescit, nec si-
 tienter

tienter quid appetens desiderio ardet, neque adeo ab officii tramite deflectit.

3. *Æquabilem* hunc animi tenorem præstat amor Veritatis ejus, quæ docet: 1. Quid tui, quid mei sit officii. 2. Res sive prosperas sive adversas divina manu, sapientissima ratione dispensari. 3. Rebus externis nec beatitudinem propriè, nec miseriam animi veram esse merendam, ac proin ex sensu vel affectu de neutra judicandum. 4. *Æquabilitati* in excessu oppositum damus *Rigorem*: quo sensu Plinius, postquam Socratem clarum sapientiâ eodem semper visum vultu, nec aut hilari magis aut turbato dixisset, exit, inquit, hic animi tenor aliquando in rigorem quandam, torvitatemque naturæ duram & inflexibilem, affectusque humanos adimit, quales apathes Græci vocant, multos ejus generis experti: quodque mirum sit, auctores maxime sapientiæ, Diogenes Cynicum, Pyrrhonem, Heraclitum, Timonem: hunc quidem etiam in totius odium generis humani evectum. Inconstantia ab *Æquabilitate* deficiens vitium est plus nimis familiare plerorumque omnium, qui sibi ut res dant sese, ita magni atque humiles sunt. Si quid in cultu corporis minus æquabile & insolens occurrat, illicò censorem feret. Levitas & inconstantia animi vulgò non perinde notabilis esse solet, atque frequens est. Scitè Poëta;

*Si curtatus inæquali tonsore capillos
Occurri, rides: si sôrte subicula pexæ
Trita subest tunica, vel si rōga dissidet impar;
Rides: quid, mea cum pugnat sententia secum?
Quod petiit, spernit: repetit quod nuper omisit?
Æstuat & vitæ disconvenit ordine toto?*

Hor. Ep.

l. 1.

§. 4.

Αὐταρξεία est, per quam Veritatis amans sua sorte, sive presentibus, contentus est.

Ei adversatur *πλεονεξία* sive plura, quàm necesse sit, habendi studium.

E X P L.

I. **E**T hunc animi habitum conciliat amor Veritatis, cum ejus, de qua suprâ, ubi de Frugalitate; tum ejus, quâ docemur 1. Nihil nos, quoad hanc vivimus vitam, habere posse, nisi quò utimur: omnia supervacua esse *ἀμάρτεια*, saltem non nostra. Neque enim vita juvatur ex eo, quod quis plus in bonis habeat, quàm satis sit ad naturæ desideria. Rectè Poëta;

Horat.
Serm. l. 1.
1.

*Millia frumenti tua triverit area centum,
Non tuus hoc capiet venter plus, quàm meus: ut si
Reticulum panis venales inter onusto
Fortè vehas humero, nihilo plus accipias quàm
Qui nil portarit. &c.*

2. Piorum est, hospites se in Mundo & inquilinos reputare. Ergò viaticò contenti thesauris non inhiant. Et verissimè istuc dictum ab homine Philosopho; Peregrinatio in victu acquiescentiam docet. Nam *Μαχα* & *Stibadium* famis & lassitudinis suavissima sunt remedia.

Democrit.
apud
Stob.
περὶ
ξένης.

II. Positam *Αὐταρξείας* descriptionem Gentium Apostolus suppeditat, & argumentò atque exemplò suòp̄te firmat. *Mores* sint absque avaritia: contenti estote presentibus. Quæstus est magnus pietas cum acquiescentia. Quidnū verò? Id enim est discere in Deum: & nullius rei indigere. Nihil enim

Heb. 13.
5.
Luc. 12.
21.

insulimus in Mundum: manifestum est, quòd neque ef-
ferre quicquam possimus. Habentes autem unde ala-
mur & regamur, his contenti crimus. Hinc Aposto-
lus & hoc divini muneris habere se dicit, atque exer-
citatione didicisse, quòd in penuria & abundantia re-
etè & commodè se gerere possit. Nòvi humiliari, Phil. 4:
nòvi & abundare, in rebus exiguis patienter me ge-
re, paupertatemque commodè ferre: & rursus re-
bus abundantibus cum modo uti: in omni & in
omnibus, omni tempore & iuter omnes homines,
iniciatus, doctus & assuetus sum & satiari & esurire,
ex magna rerum copia sumere, quantum satis est:
& rursùm non tenuiter tantùm pasci, sed & famem
æquò animò pati. Non ignata mali miseris succurre-
re disco, inquit illa apud Maronem. Ita Apostolus
profiteretur, se jam doctum esse aptè utramque ferre
fortunam, quâ semper variante statum ipsius inter-
polare divinæ visum fuerit Providentiæ.

III. *Αὐταξίας* officia hîc paulò distinctiùs no-
 tâsse iuvabit. Qualia sunt

1. Quæ vitæ & valetudini tuendæ conveniunt ita
 ex facili definire, ut iis quæ divina Benignitas largi-
 tur, & provida pii Patris familias cura atque indu-
 stria comparat, velis esse contentus, memor illius;
Melius est parum cum timore Jehovæ, quàm thesaurus Prov.
amplus, in quo est turba. Item, Melius est parum 15. 16.
cum iustitia, quàm copia proventuum cum violatione & 16:8.
judicii, vel, ordinis. Et illius, quod habet Poëta.

— Ne trepides in usum
 Poscentis ævi pauca. Et alibi;
 Contracto melius parva cupidine
 Vætigalia porrigam;
 Quàm si Mygdoniis regnum Halyattici
 Campis continuem. Multa petentibus
 Desunt multa. Benè est, cui Deus obtulit
 Parca, quod satis est, manu.

2. Ani-

2. Animum ad quamvis fortunam ita aptare, ut etiam egestatem patienter tolerare, & ex utroque statu, quam quidem oportet, utilitatem capere queas, purâ, ex penuria *experientiam* & *spem*: ex abundantia verò fructum bonæ conscientiæ per villificationem fidelem: dum *ueris Mundo*, ut ne *abutaris*, vel toto fruaris, tanquam satiari nescius.

Rom. 5:

3.

Heb. 12:

11.

1. Cor. 7:

31.

3. Confidere & persuasum habere, à Deo te nunquam iri desertum: *primò* interim, summoque studio, monitore Christo, *Regnum Dei*, *ejusque justitiam* *querere*. Qui sic est, reapse usurpare potest illud; *Nil cùm est, nil desit tamen*.

Matt. 6:

31.

Ὁ λυγρόν est, cùm in præsens habeas satis, futuri incertitudine cruciari. Stulti vota sunt

Hor.

Serm.

lib. 2.

Sat. 6.

————— *O si angulus ille*
Proximus accedat, qui nunc denormat agellum!
O si urnam argenti fors qua mihi monstret, ut illi,
Thesauro invento qui mercenarius agrum
Illum ipsum mercatus aravit, dives amico
Hercule?

4. Ad parandum, quæ vitæ non incommode ac sine dedecore traducendæ necessaria sunt, labori honesto incumbere, quatenus Regnum illud Dei ejusque justitiam quærendi studium permittit. Quis porrò sit modus rei faciundæ, ex iis, quæ de Frugalitate superius dicta fuere, repetendum est.

I V. His contraria sunt τῶ πλεονέκτι studia. Verùm præter illa, quæ suò locò in Avarum dicta, sufficiat nunc ipsi suggessisse triste illud carmen;
Quæ verò parâsti, cujus erunt? Q. d. Non tibi certè, qui ista moriturus non auferes, sed alii usum suū præstabunt. Non poterat efficacius derideri stoliditas avara, quæ conjunctam habet invidentiam, quàm cùm ostenditur, eventurum, quod malorum ipsi

Luc. 12:

20.

ipsi maximum videtur, ut rebus ejus fruatur alius.
Optimè Comicus ;

Avarus, nisi cùm moritur, nihil rectè facit :

Fœdæ nimirum suis instar, cujus nulla pars ullum suū usum præbet, nisi post mortem. Is interim mortales plerosque omnes tenet affectus, ut rem quærendi & habendi modum non ex necessitate, sed sua cupiditate, definiant, vel ut verius dicam, rem quærendi nec modum nec finem faciant, suū amantes, Deo diffidentes, felicitatem è divitiarum affluentia æstimantes, verorum bonorum ignari atque securi.

*Inde fit, ut rarò qui se vixisse beatum
Dicat, & exacto contentus tempore vitæ
Cedat, uti conviva satur, reperire queamus.*

*Hor.
Serm.
l. 1.
Sat. 1.*

§. 5.

*Mansuetudo amore veritatis iræ & vindictæ cupiditati
talem ponit modum, ut earum intuitu vel impulsu
Vir bonus nec agat, nec omittat quicquam.
Ei opponuntur hinc Iracundia, Immanitas & Crudeli-
tas ; inde Lentitudo.*

E X P L.

1. **Q**UOD de aliis dictum est virtutibus, quibus pro materia exercitii affectus aliquis subster-
ni videtur, idem etiam de mansuetudine notatum
oportet. Nimirum eam propriè non in eo sitam
esse, ut iram adhibito moderamine temperet, quod
Peripateticis placet: nedum ut eandem penitus ex-
terminet, quod Stoicis visum: verùm ut iram ha-
stenus non curet, neque ejus intuitu vel faciat omit-
tenda,

tenda, vel omittat faciendâ. Inde modus iræ, inde remedia. Cæterum de ira ejusque usu vide Part. I. Aretol. cap. VII. §. 5.

II. Quòd mansuetus injurias fortiter fert, atque ab ira temperat, id verò amorì debet Veritatis, tum ejus, de qua suprâ, ubi de Temperantia & Fortitud. quarum Virtutum proles quædam est mansuetudo: tum ejus, quâ docemur.

1. Affectum naturâ non datum esse hominì viæ ducem, consilii & actionis authorem &c.

2. Nihil agendum, quo noceatur hominì alteri, nisi id bonum aliquod habeat propositum.

3. In solo inimici dolorè ex se spectato nullum esse bonum, nisi falsum & imaginarium. Unde

Hist. l. 3. Tacitus sevirissimam Vitellii vocem dixit, Quâ se pavisse oculos spectata inimici morte jactavit.
6. 39.

4. Ultionem proinde, quæ nihil nisi doloris lenimen intendit, non modò Christianis doctoribus,

Lib. 2. sed & Philosophis meritò improbari. Inhumanum verbum est, inquit Sen. & quidem pro justo receptum Ultio, & à contumelia non differt, nisi ordine. Qui dolorem regerit, tantum excusatiùs peccat. Quare etiam quò minus quisque valet rationis usu, hòc ad vindictam est proclivior. Unde illud Juvenalis;
de Ira
6. 32.

quippe minuti

Semper & infirmi est animi exiguique voluptas

Ultio: continuo sic collige, quod vindicta

Nemo magis gaudet, quàm femina.

5. Ultionem in societate civili non privati juris esse & arbitrii.

Sen. l. 2. 6. Ad hanc porrò veniendum esse, non quasi dulce sit vindicare sed quasi utile.
de Ira
6. 32.

III. Mansuetudo, quæ privatorum est, Lenitas; quæ virorum Principum, Clementia, vulgò appellatur. De hac præcipere ad Politicam pertinet. Quis
modus

modus Judici sit servandus in pœnis remittendis, mitigandis, infligendis, opportuniùs edoceant, J.Cti. Vide si placet Liphium Civ. Doctr. l. 2. c. 12. 13. Grot. de J. B. & P. l. 2. c. 20. Lenitatem quod attinet, ea cum in *Superiores*, tum in *Pares* servanda est.

Prætori casu 1. Cavendum, ne si fortè superiores injuriam inferre cogitent, vi illis resistas: contrà id operam dabis, ut vel jure te tuearis, vel precibus injuriam avertas, vel fugâ aliave honesta arte declines, vel denique si hisce tentatis parùm aut nihil profeceris, injuriam patienter accipias & müssites, persuasus, extra officium esse tuum, velle, ubi nihil vales, καὶ ἐπεὶ τὸν πρὸς τὸν ἀντιπάλιν ἔχεις, postula- *Epiſt.*
re ea quæ fiunt arbitrato tuo fieri. Quia si sapiſ, ita *Ench.*
fieri quæque velis, ut fiunt. 2. Illatam injuriam ca- *13.*
ve vindices: satis habiturus, ubi damnum reparari, & de futura securitate tibi caveri postulaveris. 3. Neu facilè irâ commovearis in Superiores. Eam cave sermonibus vel vultu, præ te feras: imaginem supremi Numinis in Principe, ut par est, reveriturus. Propter voluntatem Dei, qui nos subesse vult, *1. Pet.*
Regem honorandum & in pretio habendum esse, S. do- *2: 13.*
cet pagina. Rectè Marcellus apud Tacitum, se me- *17.*
minisse, inquit, temporum, quibus natus sit, quam *Hiſt. IV.*
civitatis formam patres avique instiſuerint: ulteriora *8.*
mirari, præſentia ſequi: bonos imperatores votò expetere, qualescunque tolerare. Et quod Terentianus ille de parente, idem & de Rege intelligi convenit;

Nam matris ferre injurias me, Parmeno, pietas jubet.

Posteriori casu, ubi cum paribus tibi res fuerit, ne in Lenitatis præcepta pecces, Ante injuriã illatam momento, jure potiùs quàm vi agendum, legisque & fori præſidium, si res ita ferat, & aliter tuæ securitati conſulere nequeas, impiorandum, adversus
eum,

eum, qui injuriam intentat. Cautio tamen est, ne jamjam vicem tuam ultus videare, quando præter securitatem læsi & emendationem lædentis viro bono nihil hîc quærendum. Quod si Magistratus opem implorare nec locus, nec tempus permittat, & injuria, quàm alter meditatur, sit intolerabilis, servato, quod vocant, moderamine inculpare tutelæ, vim vi repellere licet. Hoc & ratio doctis, & necessitas barbaris, & mos gentibus, & feris natura ipsa præscripsit, ut omnem semper vim, quacunque ope possent, à corpore, à capite, à vita sua propulsarent. Post injuriam acceptam damni reparationem etiam in foro, ubi aliter jus tuum consequi non possis, requirere licet, dummodo id caveas, ne læso doloris remedium sit inimici dolor. Pœnam verò læsus postulare aliter non potes, nisi tùm securitatis quâ publicæ, quâ privatæ; tùm ejus qui deliquit emendandi gratiâ. Hoc semper, inquit Seneca, in omni animadversione servabit, (judex) ut sciat, alteram adhiberi, ut emendet malos: alteram, ut tollat. In utroque non præterita, sed futura intuebitur. Et alibi; Hîc unò medentibus, erit dissimilis, quod illi quibus vitam non potuerunt largiri, facilem exitum præstant: hic damnatum cum dedecore & traduptione vitâ exigit: non quia deletetur ullius pœnâ (procul est enim à sapiente tam inhumana feritas) sed ut documentum omnium sint, & qui vivi noluerunt prodesse, morte certè eorum Resp. utatur. Atque hæc quidem omnia mansueti animi officia sunt. Objicienti, Lenitatem hac ratione referri ad officia Virtutis, quæ in alios veriùs, quàm nos ipsos, respiciunt: Respondeo; Distingui oportere habitum animi & actiones indidem proficiscentes. Quia enim homines, ratione præditi, hoc ipsum nobis debemus, ut consiliû & actionis nostræ ducem atque authorem sequamur rationem probè informatam, non affectum diversè trahentem, etiam ad officia virtutis

in

*Cic. pro
Milone.*

*Lib. 1.
de Ira
cap. 16.*

*Lib. 1.
de Ira
cap. 6.*

in nos respicientia pertinet, animum sic componere, ut obsequentem superioribus, commodumque omnibus te præbeas. Quæ quidem præcipua mansuetudinis laus est.

IV. Ira affectus est maximè ex omnibus iræter & rabidus. Unde *brevis insania* dici consuevit Sapientibus. Sui enim ferè est impotens, decoris oblita, necessitudinum immemor, in quod cæpit pertinax & intenta, rationi consiliisque præclusa, vanis agitata causis, ad dispectum æqui verique inhabilis, ruinis simillima, quæ super id, quod appressere, franguntur. Id arguunt communia ferè irascen-
 tium & furentium signa; audax & minax vultus, tristis frons, torva facies, citatus gradus, inquietæ manus, color versus, crebra & vehementius acta suspiria, parùm explanatis vocibus sermo præruptus &c. Non ineptè Aristot. iram præproperis famulis assimilât, qui ad mandata herorum exequenda prosiliunt, priusquàm quid ferant, rectè exaudiverint. Itemque canibus pulsatò ostiò latrantibus, antequàm inspexerint, amicus adsit an inimicus. Quapropter non intempestivum fuerit docere paucis, quemadmodum possit ira leniri; quam in rem profuerit, sequentia sibi familiaria reddidisse præcepta.

Nicom.

l.7.c.7.

1. Animum probè imbutum oportet præceptis de Veritate illa, quæ Temperantiam, Fortitudinem & ex utraque nascentem instruit mansuetudinem.

2. Id tecum frequenter reputato, quoties & quanta tu te ipse in Deum deliqueris, quorum quidem veniam tibi fieri velis. Indignus verò es, cui delictorum gratia fiat à Deo, qui eam homini offendentem facere recusas.

3. Reputato, numquid non similiter & sæpè in alios deliqueris, vel delinquere possis. Imbecillitatis igitur tuæ conscius noli tantoperè sævire
 in

in alios: æquum utique est, qui tibi velis ignoscere, etiam aliis ignoscas.

Lib. 3.
de Ira.
c. 3.

4. Dum animò es pacatò, haud indiligenter reputabis iræ foeditatem, & gravissima quæ inde ad nos aliosque redeunt incommoda. *Necessarium est*, inquit Sen. *ante oculos ponere, quantum monstri sit, homo in hominem furens; quantoque impetu ruat, non sine pernicie sua perniciosus, & ea deprimens, quæ mergi nisi cum mergente non possunt &c.*

5. Considerabis quàm sæpè & nobis & aliis profuerit ignovisse potius quàm vindicasse offensas. Ut verè inverti possit tritum illud; *Veterem ferendo injuriam Vitas, non invitæ, novam.*

6. Cogita levitatem causarum, quæ sæpè nobis stomachum movent: frivolis & inanibus turbamur. *Taurum*, inquit Sen. *color rubicundus excitat, ad umbras aspis exurgit, ursos leonesque mappa provitat: omnia, quæ naturâ fera ac rabida sunt, consternantur ad minima. Idem inquietis ac stolidis ingeniis evenit, rerum suspitione feriuntur.*

7. Cave, externorum bonorum quicquam nimiooperè appetas, speres, ames, retinere cupias. Si quid ægritudinis obortum est animo, ut multa fert hujusmodi vita mortalium, fac protinus ejicias ex animo; cave quicquam offensæ inibi residere patiaris: si mederi queas, medere: sin minùs, cogita; Quid proderit me ringi, re nihilò melius habitura? Da operam, ut hoc mox impetret abs te ratio, quod paulò post tempus esset impetraturum. Nullus sit tantus animi dolor, quem patiaris tecum ite cubitum. *Ira scimini, & ne peccate: Sol ne occidat super exacerbatione vestra.*

Eph. 4.
26.

8. Tibi, ut irarum occasiones, itidem & contentiosi, morosi, superbi, agrestes &c. cautè fugiendi sunt.

9. Averte cogitationem à causa iræ, ne nisi amore veritatis ad castigandum, & omninò ad loquendum,

dum, faciendumve quicquam accedas. *Ad pœnitendum properat, qui iratus quid facit.* Verissimè Apostolus; *Ira, inquit, viri justitiam Dei non operatur.* Homo, etsi vir fuerit, id est sapiens & potens, si incitatus libidine ἀνὴρ ἐκλυπήςσῃς, iræ frænos laxet, fieri nequit, ut verum cernat, idque rectè dijudicet, & quod justitiæ divinæ legis atque officio hominis sit consentaneum, faciat & loquatur. *Maximum remedium est iræ, mora.* Nec ab illa pete initio, ut ignoscat, sed ut judicet. Desinet, si expectat. Quò tendit etiam illud Poëtæ; Jac. 1. 20.
Sen. l. 2. de Ira c. 28.

————— *Ne fræna animo permitte calenti,
Da spatium, tenuemque moram: mala cuncta ministrat
Impetus.*

Octavio Aug. Imperatori Athenodorus Philos. suavit, ne iratus quid diceret aut faceret priusquàm Græcarum literarum 24 nomina apud se recensuisset. Scil. hoc instar quoddam exercitationis est.

10. Ut lenitati sensim assuescas, circumstantias causarum iræ, personarum, modi & temporis, frequenter animo revolvās: ut hac ipsa meditatione Veritatis amorem, quò unò vera virtus constat, sustinere queas.

V. Iracundus iræ quidem modum excedit, non observatō, cui, in quid, quamobrem, quamdiu, quò modò, locò & tempore irasci conveniat: sed à mansuetudine eò ipsò deficit. Iracundorum gradus quatuor distinguit Aristoteles. Primos communi nomine *Iracundos* vocat. Alteros ἀκροχέλης, qui celerrimè & acerrimè inardescunt, ira citò deservescente. Tertios πικρὺς acerbos, qui plumbeas gerunt iras, tantum non implacabiles: quales sunt, qui non contenti, animo, quas sibi illatas putant injurias, infixisse, chartis insuper inscribunt, ut

Q

carun-

earundem, ubi casus tulerit, relectione memoria revocent, & cicatricem vulneri obductam refricent, odium, quò in proximum æstuant, non nisi cum ipsa anima evomituri. Quartos denique χαλεπαὶ & difficiles dicit, seu αἰγίοις feros, savos atque immanes, quæ priores illi singula habent, universa quasi in unum conflata pravo suo more exprimentes. Horum omnium ingenia nôsse, ad usum vitæ civilis non parum habet momenti. Cæterum Iracundia, hîc quidem non tam ut affectus, quàm ut habitus, spectata, ubi vires non desunt, sæpè in crudelitatem & immanitatem abit.

VI. Alterum vitium Mansuetudini opponendum, vulgò sua fortè raritate nomen non invenit. Aristoteli αἰσχρογνώσια quasi ira vacuitas, nobis *Lentitudo* dicitur, quæ nimia est mansuetudo. Quia enim ira suum esse usum vidimus, etsi in genere morum neque bona sit, neque mala; vitiò certè non caret is, cui lentius, quàm virum honesti amantem deceat, animus attollitur, neque adeò magnoperè curæ est, ut castigatione flagitia reprimantur, injuriæ, quantum jure atque officio fieri potest & debet, depellantur, res denique præclaræ quarum executio hunc animi ardorem postulat, strenuè gerantur. Certè

Joh. 11: Servator noster, cum jacturam hujusce vitæ dolentes, & de meliore non cogitantes, vidisset, *infremuisse seque commovisse* dicitur.

33.

C A P. IX.

De Justitia & Æquitate.

§. I.

Officia Virtutis, quæ in alios respiciunt, commune nomen Æquitatis complectitur.

Virtutis est, hominem quemlibet alium æquali secum loco dignari atque habere. Id verò facere ex amore veritatis, Æquitas est.

*Vitia Æquitati opposita sunt, Iniquitas, in defectu
& Amor perditus, in excessu.*

E X P L.

I. **D**icenda sequuntur officia virtutis, quæ in quoslibet alios respiciunt. Ea Apostolus phrasi *δικαιος ὅτι* expressit: nos communi æquitatis nomine (*Æquum enim justum & æquum est*) comprehendimus. Æquitas, quoslibet alios æquali nobiscum loco habens & amplectens, ex re ipsa nomen accipit.

II. Veritas porro cujus amor æquitatis studium animo inserit, his præceptis summatim continetur.

1. Natura homines hætenus fecit pares. Hinc *Exod.*
Scriptura S. non modò *proximum*, sed etiam *socium* 20: 16.
& *amicum*; imò *carnem nostram*, appellare amat *Lev.* 19:
quemvis alterum hominem: utpote quem vel ea 18.
comi appellatione affectui & studio nostro commen- *Esai.* 58:
datum vult. 7.
Rom. 13:
8.

2. Quisque igitur alterum quemque æstimet atque tractet, tanquam naturâ sibi æqualem, seu æ-

Q 2

quæ

què hominem, imò verò, ceu alterum seipsum : attentò, non esse nisi peccatum, quod in homine contemni mereatur.

3. Et ne quis, nisi cui jus peculiare quæsitum, plus sibi, quàm cæteris arroget, verùm alios æquo secum jure frui permittat. Quod igitur, cæteris paribus, quisque sibi juris vult esse in alterum, tantundem alteri patiatur esse in se. Ergò, exempli causâ, quisquis loqui parat, audienti suam judicandi libertatem relinquat, neque ejus usum verbis fallacibus, vel mendaciis, intercipiat aut deludat.

4. Quod quisque sibi bonum præstari optet, datis his, illis, circumstantiis, idem & alteri præstet in eisdem vel similibus circumstantiis. Et quod sibi malum fieri nolit, alteri ne fecerit ipse. Utrumque verò, quoad ejus fieri potest, servandum citra tertii injuriam.

5. Alterum quemvis unâ nobiscum eundem intendere finem, idem quærere bonum, ejusdem Creatoris ad gloriam vivere oportet.

6. Cujusque igitur est, societatem cum aliis colere religiosam & civilem, nec non quæ illi conservandæ intersunt, facere; quæ rursus turbant vel interrompunt eandem, cautè vitare.

7. Quicquid suo quisque proximo debet, ad officia communia & singularia, quibus perinde ac nos tenetur, referendum est: omne consilium & auxilium, quò proximus juvari potest, eò spectet, ut suo satis faciat officio. Quapropter non solum servile prorsus, sed & turpissimum est, proximo blandiri in peccatis, ejus libidini & oblectamenti servire, cumve facere ministrum impuræ voluptatis tuæ.

8. Jubet ergò Æquitas, ut quia proximus unâ nobiscum ad gloriam Creatoris vivere, & hîc, donec à Deo revocetur, manere tenetur, ei in persolvendo

vendo hocce debito opitulemur. Ergò, si in aquas inciderit, servemus: si in morbum, sanemus: si unde vivat non superest, suppeditemus: de conditione vitæ amplectenda moneamus, suadeamus, juvemus &c. Denique operam demus, ut quem nobiscum intendere finem, quod quærere bonum, jubetur, imperturbata alacritate & inoffensò studio consequi possit.

III. Atque hinc liquet, quamobrem Scriptura S. omnia quæ proximo debemus *Charitatis* nomini, & præcepto *diligendi proximum sicuti seipsum*, velut compendio saltem posterioris tabulæ legis, inclusa velit. Quid verò sibi vult verbum, *diliges proximum sicuti teipsum*? Respondeo 1. Modum atque mensuram amoris proximum amplexuri, facies amorem tuum. Mutatâ igitur personâ, exemplum amandi proximum statues identidem in te ipso, sic reputando apud animum; proximum tuò levare potes consiliò, auxiliò &c. quid fieri velis, si tu hic sis? Proximus abs te petit, hòc illòve locò haberi: cogita, si tu hic sis, &c. 2. Proinde ut, quod re æquum est facere, præstes, proximum noli considerare, ut alium à te; sed ut alterum teipsum, ut carnem tuam, ut rem Dei. Neque tamen inde sequitur, nullos fore amoris gradus, si promiscuè omnes eodem amore, quò nos ipsi prosequimur, quique non nisi unus est, complecti debeamus. Si enim quâ dixi ratione proximum non alienum à te reputans, ejus subeas locum, salvum manebit discrimen amoris & loci, quem quisque obtinet. Quia si pater ex. gr. veniat amandus; si frater; si vicinus; si alienigena &c. cogitabis, quid tute fieri velis, si hic sis? quò cupias tractari modò, si tu ejus sis locò?

IV. Quòd si occurrat casus, quò aut nos nostro, aut proximus ille suo satis non possit facere officio, illi potius rei, quam nostra fert obligatio, vacabi-

mus.

nus. Ut si unâ ambo in vitæ discrimen incidamus, habeamque satis, quod pro me agam, hæcenus illum deferam; non, quia charitas à me ipso incipiat, aut mei amori atque studio, quàm alterius, plus debeam, quod perversum vulgi iudicium est, meram arguens *φιλαυλίαν*: sed quia ad exequendum, quod meæ obligationis onus est, magis abstringor. Idem enim pluribus injunctum pro se quisque exequi magis tenetur, quàm socium in exequendo juvare.

V. Ex dictis porrò patescit. 1. Cum Æquitate, etsi homines supponat naturâ pares, quales in *statu libertatis naturalis* esse dicuntur Politici, non tamen pugnare officia illa, quæ *statu* aliquis *adventitius*, ex facto quopiam hominis antecedente pendens, imponit. Quò pertinent status conjugalis, Herilis, Civilis &c. & Officia Conjugum, herorum, liberorum, servorum, principum, subditorum. Attende modò, si placet, quæ paulò antè sub finem n. III. dicta. 2. Quæ Æquiritatis generaliter sic dictæ sint officia. De quibus tamen ampliùs constabit ex ejus speciebus mox exponendis.

VI. *Iniquitas* ab æquitate deficit, proximum nullo, vel deteriore locò & numerò habens. Sic iniquus, qui suo tantùm affectui obsequens, omnia ad se & sua commoda refert. *Amor perditus* æquitatem excedit. Sic perditè amat, qui alterius voluptati inservit, vel eòdem, reve ejus ad voluptatem mutuam quoquò modò abutitur, atque ad eò seipsum unâ cum proximo, quem odissè veriùs quam amare dicendus est, malè perditum it. Quæ omnia è dictis facillè intelliguntur.

§. 2.

Æquitas illa generalis dividitur in Justitiam, & Æquitatem strictè dictam.
Justitia amore veritatis suum cuique tribuit.

E X P L.

I. **R**atio dividendi Æquitatem illam generalem in *Justitiam*, particularem, puta, non cardinalem illam, quæ virtutis proprietas est, & *Æquitatem* stricto significato dictam, in eo sita est; quòd proximo tribuimus, vel quod *stricto jure* illi debetur, secluso favore: ut si locatori operæ suæ, pactam mercedem; si venditori rei suæ, pretium persolvamus: si rerum contractarum fidem impleamus, nihil tribuentes favori. Vel ex *aquo & bono* tribui par est: Ut si homini industriam tuam nobis probanti, & opus, de quo convenerat, diligenter absolventi, aliquid adjiciamus ultra mercedem, quam fuerat licitatus: in quo favor aliquis ac gratia elucet. Atque illud quidem justitiæ; hoc verò æquitatis proprium est.

II. *Justitia amore veritatis* suum cuique tribuit. Quòd ipsò ostenditur, justum non esse, qui quandoque justa facit, meru fortè pœnarum, vel spe commodi, vel amicorum gratiâ, vel simili quapiam ratione inductus. Verissimum est illud Philemonis; *Non justus illicò quisquis injuriâ abstinet, sed* *Apud* *qui nocere cum possit, abstinet.* *Stob.* *Nec qui recusat par-* *Serm.* *va, sed qui maximus tentatus, animi robur invictum* *IX.* *gerit.* *Nec quisquis illa quolibet præstat modò: sed qui dolosi nescius fuci, integra probitate, justus esse, non videri, studet.* Justus igitur perhibendus, qui justa facit amore veritatis, seu amore præcepti legis,

gis, injusta non nisi per infirmitatem. Planè ad mentem nostram Comicus; *Quod vos jus cogit, id voluntate impetret.* Unde vulgò Jctis Justitia dicitur, *constans voluntas suum cuique tribuendi.*

III. Veritas autem præcipua, cujus amore suum cuique tribuitur, hæc est; *Deus summus rerum, quippe suarum, arbiter, & dominiorum distributor, quemlibet possidere vult, quod suum, hoc est, bona fide & justò titulò quæsitum est.* Ergò qui alterum re sua fraudat, sive palàm, sive clàm: sive vi, sive specie juris, in jus Dei involat, rerum sese dominum & distribuendorum dominiorum arbitrum constituens. Unde qui furatur, *nomen Dei attrectare* dicitur. Quò ipsò præceptum de non furando juris perpetui & indemetabilis esse cognoscitur.

Prov.
30: 9.

L. 27.
S. 2. ff.
de aur.
arg.

IV. *Suum* vocamus, quod Jctis est *jus strictè dictum*, sive *facultas* habendi quid, vel agendi. Sic *suum*, quod vindicari potest. Sic, suum cuique tribuere: suum recipere: suum consequi. Sua tutela, suus hæres, passim in juris præceptis. Illa porrò *facultas* duplex est: vel *Vulgaris*, quæ usus particularis causâ comparata est, qualis illa privatorum in bonis suis: vel *Eminens*, quæ Communitati competit in partes, & res partium, boni communis causâ. De quibus Jurisconsulti.

§. 3.

Justitia vel Expletrix est, vel Attributrix.
Illa cuique tribuit vel permittit, quod habendi vel a-
gendi jus strictè dictum habet.
Hæc cuique tribuit, quod habere dignus est.
Illi opponitur Injustitia Lædens; huic, Deferens.

E X P L.

1. **J**USTITIA Expletrix dicitur eo significatu, quò
 Latinis *Explere* nonnunquam est *pensare*, *satis-*
facere. Sic Justinus, *Explens*, inquit, *contumelias Lib. V.*
honoribus, detrimenta muneribus, execrationes preci- 4.
bus. Dicitur Aristoteli *συμβαλλίση* vulgò *Commu-*
tativa. Hæc jus strictè dictum, sive facultatem,
 respicit, unde & propriè aut strictè justitiæ nomen
 obtinet. *Attributrix*, Aristoteli *διαμενέση*, vulgò
Distributiva, *ἀξία* dignitatem, sive meritum, spe-

ctat. Quo sensu Cæsar Dictator apud Sueton.
Commendo, inquit, *vobis illum & illum, ut vestro Jul. 41.*
suffragiò suam dignitatem teneant.
 2. Differunt igitur *Justitia Expletrix* & *Attribu-*
trix materiâ, circa quam versantur. Utraque verò
 quorumvis est in quosvis. Etenim & Civitas, quæ
 de communi reddit, quod civium quidam in pu-
 blicum impenderunt, ut illi apud Livium, nonnisi *Liv. lib.*
Expletrici Justitiæ officiò fungitur. Et si quis de re 31. c. 13.
 sua legare velit, attributrice justitia uti solet. Sic in
 pœnis, quarum jus penes Summos est Imperantes,
 primò ac per se exerceri justitiam expletricem non
 obscurum est attendenti. Unde qui deliquit pœnam
 debere, & dare, dicitur.

3. *Justitia Expletrix* suum cuique jus explet, ser-
 vans ubique, quam natura imperat, æqualitatem,
 ita quidem, ut ex æqualitate jus oriatur minus ha-
 bent.

benti. Id quod in contractibus & rerum commutatione maximè obviū est. Unde facta à potiori denominatione, vulgò *commutativa* vel *contractoria* dicta videtur. Æqualitas illa partim consistit in actibus contrahentium; partim in eo de quo agitur. In actibus cū præcedaneis, puta in intellectu; ut gnarus uterque vitii sit & commodi rerum, de quibus contrahitur; & in voluntatis usu, quantum ad consensūs causam: cū principalibus, ut ne plus exigatur quàm par est. Rectè Chrysost. Quoties, inquit, in contractibus, & ubi emendum quid aut dependendum est, contendimus omnique modo laboramus; ut minus æquò pretiò demus, nonne huic facto quoddam inest furtum? Æqualitas denique in eo de quo agitur hæc servanda est; ut etsi contrahentium neutri animus fuerit fallendi alterum, tamen ubi contigit alterutrum mactari infortuniò, inæqualitate in rebus ipsis deprehensa, ex vitio fortè latente, vel errore pretii, ea inæqualitas sit resarcienda, & demendum ei, qui plus habet, reddendumque minus habenti. Hæc autem æqualitas ut in contractibus commutatoriis & onerosis omnimoda, sic in beneficiis pro rei natura hætenus obtinere debet, ut ne quis ex beneficio damnum sentiat. Ergò Mandatarium indemnem præstari æquum est à sumptibus factis, & damno, in quod ex causâ rei mandatæ incidit. &c.

4. *Atributrix* Justitia dignitatem & merita prosequitur personarum, quibus tamen jus strictè dictum in re quæsitum non est: Velut si digno decernatur Provincia. Si Victori triumphus &c. Prudenter Cicero; Sed si contentio quædam & comparatio fiat, quibus plurimum tribuendum officii, principes sunt, patria, & parentes, quorum beneficiis maximè obligati sumus; proximi liberi; totaque domus; quæ spectat in nos solos, neque aliud ullum potest habere persugium; deinceps benè convenientes propinqui, quibuscum

De Offic.

1.

hiscum etiam communis plerumque fortuna est : quamobrem necessaria præsidia vitæ debentur iis maxime, quos antè dixi. Vita autem victusque communis, consilia, sermones, cohortationes, consolationes, interdum etiam oburgationes in amicitiiis vigent maxime.

5. In Scholis Peripater. tralatitium est Justitiæ Commutativæ & Distributivæ discrimen duplex : quando 1. Illam circa res singulorum : hanc verò circa res communes versari. 2. Deinde ab illa proportionem Arithmeticam, ab hac Geometricam respici volunt. Quæ ut intelligantur, paucis explicanda sunt. Proportio Arithmetica est comparata æqualitas differentię inter terminos ternos vel quaternos, prout continua vel discreta fuerit proportio. Ex. gr. $\div 3. 7. 11.$ vel $3. 7 :: 8. 12.$ differentia utrobique est quaternarii. Proportio Geometr. est comparata æqualitas rationis, ita ut tertius intelligatur toties continere quartum, vel ab ipso contineri, quoties primus continet secundum, vel ab eo continetur. Ut in $4. 2 :: 6. 3.$ vel $2. 4 :: 3. 6.$ aut si continua fuerit proportio, toties secundus contineat tertium, quoties primus secundum &c. ut $\div 8. 4. 2.$ Has proportionem instituto suo sic accommodant : ut Arithmeticam servari velint in Justitia Commutat. quippe quæ simplicem rerum commutandarum æqualitatem spectet, non attenda personarum qualitate vel dignitate. Unde quemadmodum in Proport. Arithmetica, ut augeatur terminorum quantitas, servata eadem proportionem, inæqualibus æqualia tribuuntur, ex. gr. $2. 4 :: 6. 8.$ adjecta singulis terminis unitate, manebit eadem proportio, $3. 5 :: 7. 9.$ Sic justitia commutativa inæqualibus personis æqualia tribuit, ratione habita rei ad rem, pretii ad pretium, rei ad pretium. Proportionis Geometricæ usum esse volunt in Justitia Distributiva, quippe quæ æqualitatem rerum attendat non omnimodam, sed ad personas relatam : ita quidem, ut

ut qualis est persona ad personam, velut Ajax ad Achillem, talis sit honor ad honorem. Item si quæ in præda sunt, bello capta, militibus dividuntur ratione meritorum, quemadmodum est Centurio ad Decurionem, & hic ad gregarium militem: sic est pars de præda, quæ illi, ad partem, quæ isti &c. cedit. Ergo sicut proportionem manente terminorum quantitas augetur inæqualibus inæqualia tribuendo, ex. gr. 2. 4 :: 3. 6. multiplicatione facta inde per binarium hinc per ternarium, eadem erit proportio 4. 8 :: 9. 18. Sic etiam Justitia distributiva inæqualibus inæqualia tribuit.

6. Interim ut hæc Veri speciem habeant, certè tamen per omnia nobis probari non possunt. 1. Etenim Justitiam distributivam circa res communes; Commutativam circa res singulorum versari, perpetuum non est, ut supra ostensum. 2. Quod de proportionum usu dicunt, ex eorum genere est, quæ sæpè locum habent, non semper. Itaque & contractus societatis, qui ad justitiam commut. pertinet, expletur proportionem nunc Arithmetica, nunc Geometrica, pro ratione partium, quas socii contulerint. Fac quatuor iniisse societatem: primum contulisse 200. secundum 400. tertium 600. quartum 800. Quia collatio sequitur proportionem Arithmeticam, eandem sequetur & lucris partitio. Quòd si primus contulisset 20. secundus 40. tertius 80. & quartus 160. Divisio lucris fieret proportionem Geometrica. 3. Justitiæ *συμβασιλική* nomen nimis est arctum. Ut possessor meæ rei, eam mihi reddat, non est ex commutatione, nihilominus ad eandem hanc justitiam pertinet. Neque incommodum hoc excusari meretur insolenti distinctione, qua Aristoteles Contractus alios voluntarios facit, alios involuntarios, & hos vel clandestinos, vel violentos. Neque enim hi clandestini & violenti cum illis *Quasi Contractibus*, quos vocant *ΙCΤΙ*, conferri

Nic. l. 5.
c. 5.

ferri possunt. Etenim *Quasi contractum* facit causa sine conventionione, ubi abest delictum, ut in *negotiorum gestione, tutela, re communi sine inita societate &c.* Id quod de furto, adulterio, veneficio &c. dici nequit. In his quidem injuria est, unde inæqualitas existit; sed hanc explens justitia veriùs & simpliciùs *Expletrix* quàm *contractoria* vel commutativa, appellatur.

7. Justitiæ Expletrici opponitur *Injustitia lædens*: quo nomine omne genus injuriarum comprehenditur. Injuria porrò committitur vel *dolò malò*, vel *vi aperta*. Dolus malus est, quando illicitis modis alius inducitur, ut faciat, vel fieri pariat non invitus, quod re cognita factum nollet; ut inde sua lædenti malitia sit lucrosa, læso autem sua simplicitas damnosa. Dolo malo proxima est *lata culpa*, quæ supina & affectata est negligentia in rebus alterius nostræ curæ demandatis: qualis est ejus, qui vel ignorat, quod nemo non intelligit; vel in re aliena saltem non solitâ versatur diligentia. Sic dolò facere censeretur depositarius, qui cistellam cime- lia habentem, vel incustoditam, vel reclusam esse pateretur. Injuria, quæ vi aperta committitur, sit effossione, manuum injectione, gladiatoria invasione &c. de quibus J.Cti, & Casuistæ.

8. Justitiæ Attributrici opponitur *Injustitia deferens*: quo nomine venit neglectus omnium officiorum, quæ justitia attributrix cuique pro statu suo atque vitæ instituto imponit. In hanc partem peccant, ex causâ, qui honores & munera publica indignis deferunt: qui egenos per immisericordiam sua ope destituunt &c.

§. 4.

Æquitate strictè dicta significamus studium illud favoris, quo in odiosis quidem intra juris æquebæarum consistimus: in favorabilibus ultra juris terminos progressi gratiæ nonnihil tribuimus.

E X P L.

1. **I**Ntra juris rigorem subsisto, si quod meo jure in alterum possem, non agam: si jus meum non persequar. Ultra juris terminos progressus id favori tribuo, quòd v. c. operam fideliter præstitam cumulatè penso: quòd ad rem tanti emptam, quanti esse etiam justus quisque judicer, auctarium adjicio.

2. Non nescio Æquitatis nomen diversa significare Authoribus: videntur tamen significatus isti aliquid habere commune, velut, quòd juris temperamentum & favorem quendam generis nostri inferunt. Sic Judices ex æquo & bono causam definire dicuntur, juri, inflexibilia exigenti, in gratiam rei temperamentum adhibentes. Privati æquitate rei utuntur, quando de jure suo remittunt. Ex æquo & bono judicium fit, quando lege civili non extante, vel legis extantis ~~æquebæarum~~ non attentâ, virorum bonorum arbitriò sententia fertur.

3. Cum primis verò notabilis est significatus, quando Æquitas dicitur *Correctio ejus, in quo lex deficit ob universalitatem*, ut alicubi habet Aristot. Vel certè, dextra legis interpretatio, ex naturali ratione ostendens, casum quempiam peculiarem sub lege universali non comprehendi, eò quòd aliàs absurdi, & præ quàm est æquum, incommodi quid inde sequeretur. Id quod etiam in Testamentis & pactis cautè observari ipsa jubet æquitas. Rectè
Quin-

*Nicom.
Lib. 5.
c. 14.*

Quintilianus; *Nulla, inquit, tanta providentia potest
tuit esse eorum, qui leges componebam, ut species cri-*
minum complecterentur. Nam & semper caventes ne-
quitia vicisset; & jus ita multiplex & diffusum esset,
ut pro incerto haberetur ignotum. Fecerunt ergo, ut
rerum genera complecterentur, & spectarent ipsam æ-
quitatem. Neque enim in legibus condendis omnes
casus vel prævideri, vel exprimi possunt, id prohi-
bente infinita casuum varietate. Quibus ergo in-
cumbit generalia legum decreta ad speciales applica-
re casus, opus habent libertate, per quam à lege
excipere queant casus, quos Legislator ipse, si vel
adesset, vel casus illos prævidisset, excepturus fue-
rat. De quibus multa videre est apud J.Cros ad Di-
gesta Tit. de legibus. Senatusque Consultis. Hinc illud
Celsi; Benignius, & pius est, leges interpretanda
sunt, quò voluntas earum conservetur. Neque tamen
temerè huc decurrendum, ne quis alieni sese actus
arbitrum faciat, sed sufficientia oportet indicia ad-
sint, de quibus docent Legum Interpretes. Quale
est exempli causâ, si non quidem per se & omninò
illicitum sit diserta legis verba sequi, sed tamen rem
humaniter æstimanti id nimis videatur grave & in-
tolerabile: sive absolutè spectetur communis huma-
næ naturæ conditio; sive comparetur persona &
res; qua de agitur, cum ipso fine actus. Sic, qui
auxilium fœderato promissit, cunctationem excusa-
bit, ubi periculò domi subnatò, copiis ad suâ de-
fensionem opus habuerit. Quò pertinet etiam illud
Ciceronis; Si constitueris te cuiquam advocatum in rem
præsentem esse venturum, atque interim graviter agro-
tare filius cœperit, non sit contra officium non facere,
quæ dixeris.

4. Potest etiam Æquitas ulteriùs extendi, quan-
do nihil vetat æquum dici, qui in meliorem partem
alterius verba & actiones interpretatur, quæ rigi-
diorem aliqui censorem naturæ pejùs accipi possent.
Modò

Mòdò interim cautio servetur ne conniventia exem-
plum fraudi sit: neve solutior & benignior inter-
pretandi ratio sanctionem vel cavillatorem arguere
videatur. Qualis foret furem excusantis, quòd
animò reddendi aliena invitis abstulisset: vel inva-
forem Regni Galliarum; quòd nec ambitione, ne-
que cupidine aliena rapiendi, Gallias peteret, sed
ut virtutem tactu medendi strumis sibi compa-
raret.

5. Premere literam juris vel pacti &c. rigor est
æquitati adversus: unde tritum illud; *Summum jus
summa injuria*. Quò peccat, exempli causâ, qui
legem neglectis circumstantiis interpretatur: qui
operarium super mercede pacta urget, tametsi fortè
alterum tantum operæ præstiterit, quàm convene-
rat. Sic ab eo, qui nescius formulæ contractûs
damni quid faceret, si steterint conventa & pacta,
strictè, quod stipulanti promissit, exigere velle, ri-
gor est iniquus, etsi verba legis generaliter conce-
pta exactori favere videantur. Pariter unam omni-
bus delictis constituere pœnam, plus quàm ini-
quum foret. Quo nomine Draconis leges, quo-
niam videbantur impendiò acerbiores (quippe, ut
Gell. 11. 18. Herodicus agebat, non hominis, sed Draconis; vel,
ut Demades, non atramentò, sed sanguine scriptæ le-
ges) tacito illiteratoque Atheniensium consensu oblite-
ratæ sunt.

CAP. X.

De Virtutibus reductitiis , quæ ad
Justitiam & Æquitatem revo-
cantur.

§. 1.

*Ad Justitiam & Æquitatem reducuntur Libera-
litas, Magnificencia, Gratitude, Veracitas, Ta-
citurritas, Candor, Fidelitas, Verecundia, Hu-
manitas.*

E X P L.

IStarum singularum principia è regulis Justitiæ &
Æquiritatis arcessenda sunt, quarum amor Virtus
est in alios homines respiciens : unde una & suâ ubi-
que similis ex officiorum diversitate diversa sortitur
nomina, qualia quædam sunt, quæ Theorema
propositum exhibet. Quapropter non obscurum
est attendenti, qua ratione ad Justitiam & Æquita-
tem reduci queant. De quô tamen clariùs etiam
constabit ex dicendis.

§. 2.

Virtus in alios respiciens Liberalitas dicitur , quando id tibi præstat , ut pro ratione opum lubens hilarisque sumptus facias , ubi , in quos , & in quem finem oportet.

Ejus Extrema sunt Prodigalitas & Avaritia.

E X P L.

I. **A**D definienda Liberalitatis officia , attendendum , 1. Quamobrem. 2. Quibus. 3. Quid & quantum. 4. Quomodo des. 5. Qua ratione datò beneficiò te geras.

II. 1. Causa ad dandum impellens , ne alia sit , quam veritatis & honestatis amor , quò unò tota virtus constat. Liberalem ergò negamus dantem alteri , unde vel genio indulgeat , vel instrumenta nocendi patet. Ambitiosus & avarus , non liberalis est , qui vel laudis captandæ gratiâ , vel lucri cupiditate , vel commodi ferendi spe , alteri sua largitur. Id enim creditum verius , seu mutuum , quàm beneficium est dicendum. *Non est beneficium , inquit Seneca , quòd in quæstum mittitur. Idem , viscata beneficia tutam agere vitam volenti devitanda , monet. Liberalitatem neque temporariam , neque callidam esse oportet : exemplò Attici , qui non florentibus se venditavit , sed afflictis semper succurrit.*

4. de benef. 14.
Epist. 8.

Corn.
Nep. in
Attico
cap. 11.

2. Ut des , quibus dari convenit , indigentiam reputa accipientis , mores atque conjunctionem vitæ. Indigentia alterius primùm tibi spectanda , ad quam explendam beneficium dari solet ac debet. Ea verò non est uniusmodi. Vel enim necessaria illi desunt ; Vel ea solùm quæ ad commodiorem vivendi rationem pertinent. Quo casu , quem cui præferas , pru-

prudencia liberalitatis dux atque comes docebit. Mores deinde spectandi veniunt. Ille namque potius ope nostra adjuvandus est, qui, cæteris paribus, benè quàm qui malè moratus est. Cæteris, inquam, paribus, quia haud rarò usuvenit, ut qui probior est, longè minùs indigeat, quàm qui virtute vincitur. Ad mores porrò nihil verat referri sapientiam, eruditionem, artificium humano generi utile &c. Cavenda hîc tamen scrupulositas. Rectè Cicero; *Danda omnino opera est, ut omni generi satisfacere possimus. Sed si res in contentionem veniet, nimirum Themistocles est Author adhibendus, qui cùm consuleretur, utrùm bono viro pauperi, aut minùs probato diviti filiam collocaret: ego vero, inquit, malo virum, qui pecuniâ egeat, quàm pecuniam, quæ virò.* Quod denique ad conjunctionem vitæ attinet, duo ejus præcipua sunt genera. Vel enim conjunctio ista prorsus humana est inter cognatos, affines, amicos: vel suò modò divina inter ejusdem religionis socios. Utriusque autem cùm varii sint gradus, prudentiæ est, quis cui in accipiendo beneficio præferri possit, discernere.

3. Quid, quantumque des tùm ex indigentia, moribus & conjunctione vitæ; tùm ex facultatum modo; tùm denique ex eo æstimandum est, quid is, qui beneficium exspectat, sine tua ope consequi possit, vel non possit. Danda igitur omnium primò necessaria: dandum nec plus, nec minus, quàm res tua familiaris ferat, & accipientis indigentia postulet. Nec largiendum, quod accipienti foret noxium, veluti frigida ægro, ferrum sibi irato &c. quādo omninò utilitas, non sola voluntas, beneficium exspectantis inspicienda est. Prudenter Cicero; *In illo, inquit, genere largiendi, quod à liberalitate profisciscitur, non uno modo in disparibus causis affecti esse debemus. Alia causa est ejus, qui calamitate premitur, & ejus, qui res meliores querit,*

Offic. 2.

Offic. 2.

nullis suis rebus adversis. Propensior benignitas esse debebit in calamitosos; nisi fortè erunt digni calamitate. In iis tamen, qui se adjuvari volunt, non ut ne affligantur, sed ut ad altiore gradum ascendunt, restricti omnino esse nullò modò debemus: sed in deligendis idoneis iudicium & diligentiam adhibere.

4. Neque tam ad beneficii gratiam interest, quid & quantum, quàm quò animò des. Animò scilicet perinde lubenti atque hilari dabis, atque accipere velles. Quare 1. Ubi alterius egestatem senseris, noli expectare, dum rogeris, quinimò precibus prævertens, voluntatem ejus inquiras & divines. 2. Rogatus amplioribus verbis rogare parantem interpelles, ne rogari velle videaris: certior factus illicò promittas. 3. Promissa ne differas, quasi, dum denuò rogeris, expectaturus. *Bis dat, qui citò. Et beneficium est, citò negasse.* 4. Hilari vultu, blandisque verbis beneficio addas gratiam. 5. Clàm potius, quàm in propatulo largiari: tùm ut ne amicum vel fratrem pudefacere: tùm ut ne gloriolam è beneficio aucupari videare. Id quod imprimis tenendum de eo beneficiorum genere, quæ infirmitati, egestati & ignominia succurrunt, & iis solùm, quibus prosunt, nota oportet.

5. Quà tandem ratione beneficiò datò te gerere debeas, sic accipe. 1. Cavendum, ne multis tibi patiaris agi gratias, cautione ista novam beneficio gratiam additurâ. Infra dignitatem accipientis te præstitisse significes, eumque, quod tuò beneficiò uti voluerit, collaudes: sic verbis beneficium ornatur. 2. Quantum in te est, dati beneficii obliviscaris: pertinax sit memoria debentium. *Sen. 2. de benef. 11.* Dedisti beneficium, taceas, nunc, qui accepit. 4. Beneficii fructum ne sequaris, nedum pensari petas, nisi gravissima urgeat necessitas. *Id. 1. de benef. 1.* Alioqui non turpius est inficiari, quàm repetere beneficium. 5. Magis tibi doleat, non dedisse, cui dandum fuerat, quàm fortè

fortè dedisse , cui beneficium fuerat negandum.

6. *Proposuit optimi viri & ingentis animi est, tam- Id. 5. de*
diu ferre ingratum, donec feceris gratum. benef. 1.

III. His accedit, quod Liberalitas non in dando duntaxat, sed sæpè etiam in accipiendo conspicua est, homine liberali à turpi quæstu, usuris & exactionibus temperante. *Convenit autem, inquit Cic. Offic. 2.*

tum in dando munificum esse, tum in exigendo non acerbum: in omni re contrahenda, vendendo, emendo, conducendo, locando, in vicinitatibus, & consuevis, æquum & facilem, multa multis de jure suo concedentem: à litibus verò, quantum liceat, & nescio an paulò plus etiam quàm liceat, abhorrentem. Est enim non modo liberale, paullum nonnunquam de suo jure decedere, sed interdum etiam fructuosum. Verissimè

Comicus; Pecuniam in loco negligere, maxumum interdum est lucrum. Quare & inimicis, juxta præcepta Evang. benefecisse ne pœniteat. *Si esuriat 2.*

inimicus tuus, ciba eum: si sitiat, potum da ei. Hoc enim faciens prunas igneas congeres in caput ejus. *Hoc Rom. 12. v. 20.*

Si- gnificat Apostolus, benefactis obruendum inimicum, quò tandem resipiscat, & beneficentia lenitateque nostra victus ex hoste fiat amicus. Quæ alia de hisce præcipiuntur Evangelio, videbimus aliàs.

IV. De Extremis, Prodigalitate & Avaritia videtur, quantum satis est ad Institutum, suprâ Cap. VI. §. 5. ubi de Frugalitate, & vitiis ei oppositis.

§. 3.

Virtus in magnis sumptibus, ubi, in qua & quo fine oportet, faciendis occupata, Magnificencia dicitur.

Ei adversantur, hinc quidem Luxus, inde Sorditudo.

E X P L.

I. **M**agnificencia & Liberalitas eò solùm differunt, quòd hæc in sumptibus mediocribus & quotidianis; ista verò in magnis & rarioribus, ut vel ipsum arguit nomen, sese spectandam præbet. Unde Magnificencia opulentorum tantùm, nobilium, clarorum, principumque Virorum est, quibus relicta potiùs, quàm labore parta resest.

II. Impensarum genera, quas, si res ita ferat, facere magnificum decet, duo sunt. Vel enim fiunt in *Res sacras*; vel in *res seculares*. In res sacras; veluti in ædes sacras, scholas, xenodochia &c. In eos, qui sacra obeunt, Theologiam docent, aut discunt: in Bibliothecas ad usum publ. instruendas: in libros de re divina typis vulgandos; in itinera Veritatis defensionis & propagationi destinanda & suscipienda. In res deinde seculares; velut in ædificia & ornamenta publica civitatis, & alia, quæ pacis, quæ belli tempore, in vulgus utilia: In eos, qui civitatem ordinant & gubernant; qui negotia civilia tractant; qui artes liberales docent aut discunt. In quibus tamen ea servanda est prudentiæ regula, ut divina humanis, necessaria utilibus, anteferautur, ratione tam personæ, quàm operis & finis semper habenda.

III. *Luxu* modus faciendi sumptus exceditur. Veluti cùm solius ostentationis causâ sumptus ingentes in vilia & non necessaria profunduntur. Quod in
Cali-

Caligula notat Sueton. *Nepotinis sumptibus in novum In Calibalnearum usum, portentosissima genera ciborum, histriones, equos, gladiatores &c. omnium prodigorum ingenia superavit, immensasque opes, totumque illud Tiberii Caesaris vices ac septies milles HS. h. e. 66. milliones & 5. myriades Philippicorum, non toto vertente anno absumpsit.* In Caligul. c. 37.

IV. Sorditudo à modo faciendi sumptus in magnis deficit. Sic peccant, quos parva in res præclaras impendisse pœnitet, impendio nec personæ nec operis dignitatem exæquante. Maximè verò qui è sordibus lucrum capessunt. Ut Vespas. Imperator, de quo Sueton. inter alia; *Negotiationes quoque vel privato pudendas propalam exercuit, cœmendo quadam tantum, ut plaris postea distraheret: imo & urinæ vestigal commentus. Scilicet sordido, ut Juvenalis ait, lucri bonus est odor ex re qualibet.* T. Fl. Vesp. 14. & 23. Sat. 4.

§. 4.

Virtus in alios respiciens, quando etiam id præstat, ut alterius beneficia ultro agnoscas, eaque, quoad potes, cum fœnore rependas, Gratitude dicitur.

Ei opposita Ingratitudo vitium est benefacta oblivioni dantis, aut certè dissimulantis.

E X P L.

I. **G**ratitudinis est beneficia agnoscere sensu, deprædicare verbis, & rependere factis. Illud vulgò *gratiam habere*; Illud, *gratias agere*; Hoc *gratiam referre*, dicimus. Gratiam habet, qui beneficii est memor. Qui meminit, inquit Sen. *sine 3. de benefic. 2. impendio gratus est. Hoc quod non operam exigit, non*

opes, non felicitatem, qui non præstat, nullum habet, quò lateat, patrociniū. Gratiās agit, qui beneficium fatetur, & quibus par est verbis collaudat. Cavendum verò, ne aut vilipendere videaris quod accepisti beneficium, aut nimis ambitiosè prædicando in adulationis suspicionem incidas. Ut illud in magnis, itidem & hoc in parvis vitandum.

Sen. 2. de benef. 25. Gratiām denique refert, qui statim dum accepit, de reddendo cogitat: & qui reapse pro facultatum modulo reddit. Ubi sequentia monendus es. 1. Ut

Idem 5. de benef. 40. ne quid præproperè: Qui festinat utique reddere, non habet animum grati hominis, sed debitoris. Et qui nimis citò cupit solvere, invitus debet: qui invitus debet, ingratus est. Et paulò antè; Ne illud quidem existimo faciendum, ut referre gratiām etiā invitīs his, quibus refertur, properemus, & instemus cedentibus. Non est referre gratiām, quod volens acceperis, nolenti reddere. 2. Ut, si queas, cumulatiùs majorique alacritate reddas, cū reddendi, quàm dandi beneficii, magis necessarium sit officium. Potior verò semper esto vicissim egentis ratio. At dicas fortè; Animum præstare gratum debeo: ceterum aliquando me referre gratiām non patitur mea infelicitas, aliquando felicitas ejus, cui debeo. Quid enim Regi, quid pauper divitiū reddam? Resp. Gratiām referre non possum. Quid ad rem? Non est per me mora, si, ut maximè velim, aut occasio mihi deest, aut facultas. Reddidit tamen beneficium, qui libenter debet. Adde & illud

2. de benef. 25. Senecæ; Nullò magis Cæsarem Augustum demeruit, & ad alia impetranda facilem sibi reddidit Furnius, quàm quòd cum Patri Antonianas partes secuto veniam impetrasset, dixit; Hanc unam Cæsar habeo injuriā tuā: effecisti, ut viverem & morerer ingratius. Quid est tam grati animi, quàm nullò modo sibi satisfacere; nec ad spem quidem exæquandi unquam beneficii accedere?

II. Benefactores, quibus gratitudinem præp-
 mis debemus, sunt *Deus, Patria, Parentes, Præ-*
ceptores. Deus nos, cum nihil essemus, creavit,
 lapsos nos sine nobis restituit, redemit, sanctifica-
 vit &c. innumeris beneficiis benignissimè auxit.
 Quam non merentur isthæc gratitudinem? Patria
 nos genuit, aluit atque tutata est: Cur non totos nos
 eidem vicissim debeamus? Parentes tantoperè bene-
 ficiis nos obœrârunt, *ut ne vultu quidem eos deceat* *Cic. pro*
lædere, pro quibus mori liberos, si res postulat, jura *Sexto*
divina ac humana cogunt. Præceptoribus denique *Amer.*
 haud magis quàm parentibus æquivalens reddi po-
 test. Parentum enim locò sunt, aded ut, quod *in* *Vitrav.*
salutem eorum à discipulis inhumaniter admissum sit, *Poll.*
speciem profectò parricidii habere videri possit. Non
 desunt discentes, qui Evathlum, ingratum illum
 Protagoræ discipulum, apud A. Gellium, imitati, *Noët.*
 docentes astutè eludant, in eos ipsos, à quibus ac-
 cepere, arma convertant, proque didactro gratiam *Attic. 5.*
 viperinam, maledicta, calumnias, aut ludibrium *10.*
 saltem persolvant.

III. *Ingratitudo* Vitium est ut omnibus meritò in-
 visum, sic nemini non notum. Verè Comicus;
Quod bonis beneficit beneficium, gratia ei gravis est bo-
nis. Mali ergò, imò nequissimi sunt ingrati.
 Unde tritum illud; *Si ingratum dixeris, omnia dixe-*
ris. Et nihil æquè concordiam humani generis dissociat *Sen. 4.*
ac distrahit, quàm hoc vitium. Nam quò aliò tuti *de benef.*
sumus, quàm quòd mutuis juvamus officiis? *18.* Ingrati-
 tudinis porrò tres potissimùm gradus retrò numerari
 solent: 1. *Beneficium acceptum non reddere.* 2. *Non*
prædicare. 3. *Non agnoscere.* Ingratus est, qui,
 cum possit, non reddit beneficium: Ingratior, qui
 ne quidem prædicat, aut laudat: Ingratissimus,
 qui nec agnoscit, oblitus; aut certè dissimulat, vel
 quod turpissimum est, negare sustinet.

IV. Sed & alii secretiores quidam ingratorum cha-
 ractere.

4. de ben. rañteres sunt. *Ingratum* voco, inquit Sen. quisquis
 18. 40. metu gratus est. Item, *Ingratus* est, qui invitatus debet. Et rursum; *Ingratus* est, qui in referenda gratia
 Ibid. 19. secundum datum videt, qui sperat, cum reddit. Ut
 Idem. 2. qui memor officii ægro assidet, quia testamentum
 de ben. conditurus est: captator est, hamum jactat. *Ingrati*
 23. quoque sunt, qui nolunt, nisi secreto accipere: testem
 beneficii & conscium vitantes, ut sua potius virtute,
 quam alieno adjutorio consecuti videantur. Furtivè &
 remotis arbitris gratias agere, non verecundia, sed inficiandi genus est.

§. 5.

Virtus dicendorum cum rebus mente conceptis consensum prudenter servans, Veracitas est.
Ei adversatur mentiendi libido, ex circumstantiarum & indidem nominum varietate etiam ipsa varia.

E X P L.

1. **V**eracitas dicendorum cum rebus &c. consensum servat: dicendorum, inquam, non actionum. Siquidem voces, & quæ vocum similes sunt notæ & nuntus, reperta usuque recepta sunt ad significandum cum mutua obligatione. Unde stratagemata, quibus consilia cautè occultantur, mendaciis annumeranda non sunt: quia quod inde sequitur nocuum licitum esse ponimus ex belli justitia. Cui rei illustrandæ exemplo sit ficta fuga, quam Josue suis præcepit, ad Hæm expugnandum. Fuga enim ex instituto nihil significat, quamquam hostis eam accipit, ut signum pavoris, quod alter cavere non tenetur, sua utens libertate huc illuc, hinc, illò modo, eundi. Quæ formæ infelicitatem fucò occultit, sine verbis mentitur, quia studiò placendi fallit, nullo suo jure nocitura. Hyperbole, quæ,
 ut

ut ille ait, *ad verum mendacio venit, incredibilia affirmans, ut ad credibilia perveniat*, mendacium non est, quia hyperbole in verbis, non in sensu est. Deinde & usus & affectus dicentis, quem vultu & verborum sonô præfert, verborum significationem juvant.

II. Consensum porrò servat dicendorum cum rebus, quâ mente conceptis. Quod enim primò & *ἀπὸ τῶν* verbis, similibusque notis indicatur, mentis sunt conceptus. Unde consequitur, non mentiri, qui rem dicit falsam, quam veram existimat. Velut si, qui benè numatus domo exivit, se pecuniam in numerato habere affirmaret, nesciens, eam à zonario sectore se clàm ablatam esse. Contrà mentiri contingit eum, qui verum quid profert, sed idem falsum putat. Unde usu protrita apud Ethicos distinctio *Veritatis Logicæ & Ethicæ*. Nec illud temerè additum est; *Prudenter servans consensum &c.* Ut significetur, nec quidlibet, nec semper, nec quolibet modò esse efferendum. *Aliena* quidem vero *proloqui nunquam decet*: sed veracitati tamen danda comes est taciturnitas.

III. Aristoteles posirâ virtutis naturâ in mediocritate affectuum & actionum, Veracitati dedit opposita minimè ex æquo respondentia, neque mendacii malitiam exæquantia, *Arrogantiam* scilicet & *disimulationem*. Qui res promiscuè falsas pro veris refert, numquid mendacem esse dubitabimus? Sic verò nec arrogans fuerit, nec dissimulator, vocibus hisce speciatim, ut fieri solet, acceptis. Qua propter veracitati veriùs mentiendi libidinem opponimus, quæ animi infirmi, abjecti, timidi & malitiosi indicium est, & multifariâ se prodit.

I. Eò spectant omnis generis *mendacia injuriosa & perniciofa*: ubi fallendi animò quid scribitur, notatur, innuitur, quod aliter intelligi nequeat, quàm in eum sensum, qui à mente proferentis discrepet; atque

atque adeò judicandi libertas , quam colloquentes pactò quòdam tacitò , imò & linguæ usu & lege divinitus datis , quasi adjurati , sibi invicem debent , intercipitur. Utrùm eo censu eximi debeant , nec ne , *mendacia jocosæ* , quæ vocant , & *officiosa* , quibus posterioribus ab altero periculum avertitur , aut insigni quis commodò augetur , Theologis disquirendum relinquimus. Interim indubitatum nobis

Lib. III. de J. B. & P. cap. 1. est , omnem illum Grotianæ eruditionis apparatus , quò mendacii jocosæ & officiosæ culpa diluitur , de generis naturæ humanæ esse argumentum. Si enim , qualis à conditu fuit , homo etiamnum esset integer , non permissum , neque necessarium videretur , ut *puerorum ætas improvida ludificaretur* : neque opus haberet quisquam ægrotantem amicum persuasionem non vera solari. In eas verò redigi angustias , ut vitam innocentis , puta , patris , fratris , amici &c. aliter , quàm mendaciò servari ; aut alterum ab improbi facinoris perfectione aliter averti non posse putes , hinc , quidem castigationis divinæ ; inde verò infirmitatis & diffidentiae argumentum est. Cerrè quidem mentitur , quisquis aliter , ac sentit , loquitur , animò fraudandi jus , & intercipiendi libertatem judicii ejus , ad quem sermo dirigitur.

2. Mentiendi lubido vel in rebus ad Religionem & Mores spectantibus ; vel in aliis rerum genere promiscuè cernitur. In *illis* quidem , qui datâ operâ mentiuntur seductorum & falsorum prophetarum nomine infames fiunt. In *his* verò qui mentiuntur , vel commodi sui causâ id faciunt , ut agyræ , veteratores & deceptores magnarum rerum scientiam profitentes. Quòd si fallaces addant ratiunculas , eruditionis speciem præ se ferentes , sophistæ dicuntur. Vel certè nullâ commodi illecebrâ , sed sola animi levitate ducti id faciunt , & vani simpliciter audiunt.

3. Idem

3. Idem vitium eo nomine maximè est invisum, quòd falsis sermonibus honori atque existimationi alterius insidiatur. Quo casu *maledicentia*, & actus ipse *maledictum* ac *convitium* appellatur. Quòd si in Deum; vel virum divinum, puta, Prophetam vel Apostolum; vel rem prorsus divinam, coniiciatur, nominatim *blasphemia* dicitur. Sin verò hominis famam & existimationem lædat, vel in genere *falsum est testimonium*, quo mendax falsum crimen alteri obijcit, aut obijcienti oratione subservit: vel *obtrektatio* est, quâ mendax absentis & inscii famam coram aliis imminutum it: vel *sycophantia* & *delatio*, quâ quis sciens & volens crimina de altero, sive falsa, sive vera, quæ premi potius, quàm promi, oporteat, commodi sui causâ defert ad eos, qui eadem in ipso vindicare possunt. Si grave sit crimen, quod alteri falsò obijcitur, *calumnia* est. In quo genere haud abs re annumerari potest quævis malignitas atque aliena facta dictaque promiscuè vel carpendi vel dilaudandi studium: quale invidorum est, quibus volupe alienas atterere laudes, & adulatorum, qui ficto amore & obsequiò grassantes, indignissima quæque alterius facta laudibus prædicant.

*Hic nigra succus loliginis, hæc est
Ærugo mera.*

4. A falsiloquio eximi non possunt *equivocationes*, quas vocant, & *retentiones mentales*: quas sanè ad fallendum comparatas quidam mentiendi artifices magnò studiò, pessimò exemplò, defendunt. Ut cum dicunt, *nescio*; intelligi posse, *nescio*, ut dicam. *Non habeo*; intelligi posse, *ut tibi dem*: & id genus alia, quæ sensus communis repudiat: quæque si admittantur, jam nihil obstat, quominus qui quid affirmat, id ipsum negare; qui negat, affirmare dicatur: præsertim si verum sit, quod Chrysippus

Noſt. ſippus apud Gellium defendit, nullam eſſe vocem,
Att. 11. quæ non ambiguum recipiat.
12.

§. 6.

Virtus tacendi & loquendi modum præſcribens Taciturnitas dicitur.

Eum modum excedens vitium, Garrulitas; deſerens, moroſa & nimia ſermonis parcitas eſt.

E X P L.

1. **M**odus loquendi & tacendi, quem Virtus tenendum præcipit, in ſeq. ſpectatur officiis.
 1. Sermo ſit præmeditati, non præcipitis: ne poſt locutum fuiſſe pœniteat. *Mors enim & vita in manu linguæ. Sepem prætexis prædio tuo: quin potiùs*
Prov. 18. *oſtium & repagulum obdis ori tuo? Aurum & ar-*
21. *gentum expendis librâ, cur non trutinas verba tua au-*
Eccleſ. *rificis ſtatera?*
28: 28.

29. *Et ſemel emiſſum volat irrevocabile verbum.*

2. Ratio habenda circumſtantiarum, & conſideratè obſervandum, quid tempori, loco, perſonis, rebusque conveniat. De quibus ubi de prudentia.
 3. Non niſi utilia & tempeſtiva proferenda. 4. Brevitati orationis ſtudendum, quantum res ipſa, & auditorum fert ingenium. 5. Secrera, cùm ſua cujuſque, tùm aliena, eſſi vix quicquam videatur ſubefſe periculi, diligenter ſunt celanda. Prudenter Comicus, *Tu Pol, inquit, ſi ſapis, quòd ſcis, neſcis: niſi notam hominis maledici, futile, proditoris incurrere, fidem prodigere, amicum perdere &c. quàm loquendi temeritatem cohibere malis.* Id laudi datur Q. Cæcil. Metello, quòd, cùm omnia propriò & ſubitò conſiliò ageret, amico cuidam, quid acturus eſſet, roganti; *Tunicam, inquit, meam exurem, ſi eam conſilium meum ſcire exſtimarem.* Opportunè Euripides, ſecretorum retinentiſſimus, cui-

S. Aur.
Viſ. de
Vir. Il-
luſtr.

cuidam scetentem animam exprobranti respondisse fertur; *Ne mireris, ô Bone! multum arcani in hoc ore computruit.*

II. Modum excedit *Garrulitas*, sive *futilis & inanis loquacitas*, importunum sanè, plenumque odii vitium, certissimum *inconsiderantiæ* argumentum. *In multitudine sermonum non deest delictum, & continet labia sua consideratus.* Qui diligenter considerat, verborum parcus est: contrà sermonis immodicus nec verba nec res ponderat: hinc *inconsideratè* loquens varia & inter se minimè conformia blatit. Non inscitè Gellius; *Qui sunt leves & futes & importuni locutores, quique nullo rerum pondere innixi verbis tumidis & lapsantibus disfluunt; eorum orationem benè existimatum est in ore nasci, non in pectore.* Quos videas sic scatere verbis sine ullo *judicii negotio cum securitate multa & profunda*, ut loquentes plerumque videantur loqui sese nescire. Quibus vel aures deesse, vel in linguam defluxisse non immeritò dicas. *Garrulitatis verò pessimum est illud de quo Poëta;*

Arcanique fides prodiga, perlucidior vitrò.

Garrulis enim familiare, secreta eadem libidine prodere, quâ audiunt. Unde illa Poetæ præcepta;

Percunctatorem fugito, nam garrulus idem est, Nec retinent patulæ commissa fideliter aures. Item; *Fingere qui non visa potest, commissa tacere* Qui nequit: hic niger est, hunc tu Romane caveto.

Non malè rebus consuleret humanis garrulus noster si *Parmenonis Terentiani exemplò dicturientes præmoneret;*

Plenus rimarum sum, hac atque illac perfluo. Proin tu, taceri si vis, vera dicito.

III. Mo-

Hor. E-
pist. 1.
18.
Serm. 1.
4.

Eunuch.
1. 2.

III. Modum deserit morosa sermonis parcite,
 vel intempestivò silentiò, qui tacet, cùm honestè,
Platarch. decorè & utiliter loqui posset ac deberet. Vitiū cha-
 racterem & originem pandit illud Simonidis ver-
 bum, quò perstrinxit hospitem, cui in convivio
 assedit planè muto: *si*, inquit, *stultus es, benè fa-*
cis: sin sapiens, malè. Stultus igitur stultitiæ suæ
 pœnam dedit ultroneam Diogenes Laërt. quando
 perpetuum tenuit silentium, quòd loquendo matri
 causa mortis extitisset: cui Adrianus ne quidem in-
 dictâ mortis pœnâ vocem exprimere potuit.

§. 7.

Virtus, quando Veritatis amantem apertè & bona fide
dicere jubet ea, à quibus proferendis vel commode
aut exstimationis suæ studium, vel offensionis aut
periculi metus eum abstrerrere possent, Candor appel-
latur.

Ei adversantur tùm Jactantia; tùm dissimulandi stu-
dium.

E X P L.

I. **Q**uia virtus dicendorum cum rebus mente
 conceptis consensum servare præcipit, e-
 tiam quæ in te, sive bona, sive mala, senseris,
 bona fide, ubi opus est, proferre jubet: in quo
 Candor est. Cujus officium cùm in *favorabilibus*;
 tùm in *Odiosis* spectatur.

I. In *favorabilibus*. Hic nonnulla reticere licet,
 aut dissimulare, aut verbis modestè elevare, dum-
 modo cautio sit, ne dissimulatione &c. ampliorem
 laudem provocare velle videaris, re præsertim,
 quam dissimulas, plus satis manifestâ. Semetipsum
 verò tùm demùm laudare licebit, cùm adversario-
 rum calumniæ & obtreccationes ad id faciendum nos
 per-

perpellunt. Facti tamen invidiam modestè deprecabimur, significando, nos invitos ad ea, quæ laudi esse queant, commemoranda, adactos fuisse. Dotes insuper suas prædicare licet, quando id non tam ad nostram laudem, quàm ad eorum pertinebit gloriam, qui earum nobis extitere authores: modò ne nos simul ea propter extollere velle videamur. Senioribus, ut ætate minores exemplò suò ad virtutem extimulent, licet labores suos & præclara facta enarrare, ut juniores domi habeant, unde discant.

2. In *Odiosis*, qualia sunt delicta nostra, nævi, & errores, quæ fateri necessum est, ubi eorum dissimulatio, aut negatio nos vel mendaces, fraudulentos & impudentes; vel certè pertinaces, contentiosos & ambitiosos arguere, aliosque corrumpere & non leviter offendere posset. Id quod fieri solet cum primis, ubi quis convictus etiam res testatas & manifestas fateri præfractè recusat.

II. *Jactantia* vitium est in bonis suis prædicandis modum excedens. Eò culpatur, tum qui laude digna sibi attribuit, quæ nulla, vel certè minora, quàm videri velit, habet: tum qui sibi Suffenus, quæ reapse habet, intempestivè & gloriosè jactat. *Dissimulandi studium* in iis notatur, qui bona, quæ habent, vel prorsus, habere se, negant; vel præ ut æquum sit, extenuant. Quod ipsum ambitiosæ artis ut plurimum esse videtur. Qui enim nimis affectatè sua extenuant, eò ipsò majora sibi inesse credi volunt, & obliquâ viâ ad laudem grassantur.

§. 8.

*Virtus in promissis liquidò & licitè factis sibi constans,
Fidelitas : & Verum , illi oppositum , Perfidia di-
citur.*

E X P L.

1. **F**idelitas, quæ & Fides appellatur, Veracitatis
Offic. 1.º pars est: siquidem, notante Cicerone, dicto-
 rum, conventorumque est constantia & veritas. Unde
 etiam, quia fit, quod dictum est, appellata fides.
 Hæc Justitiæ in contractibus spectatæ fundamentum
 est. Justitiæ enim convenit, suum cuique tribue-
 re, vel, quod illi debetur, exsolvere. At qui li-
 quidò promittit, rei promissæ fit debitor. Unde
 tritum illud; *Omne promissum cadit in debitum.* Et
 verò nō promissa servandi necessitas foret, haud
 quicquam liceret rationes suas firmiter aliorum ho-
 minum subsidiis superstruere. Quin & ex decepta
 fide justissimæ querelarum, bellicque causæ prove-
 nire queunt. Ubi enim ego ex pacto quid præstite-
 rim, altero fidem fallente, mea mihi, frustra fi-
 dem ejus secuto, res & opera periit. Sin verò
 etiamnum nihil præstiti, rationes tamen, & desti-
 nata mea turbari, molestum est, cum aliò modò
 rebus meis consulere potuissem, nisi iste sese mihi
 obtulisset. Adde & indignum esse, me ludibrio
 haberi, quia alterum cordatum ac bonum virum
 credidi. Fecisse, quod recepisset, laudi sibi fore
 sensit etiam homo è parasitorum grege, apud Co-
 micum;

*Ter.
Phorm.
5. 7.*

*Heus, quanta quanta hæc mea paupertas est, tamen
 Adhuc curavi unum hoc quidem, ut mihi esset fides.*

Mina-

Minarum diversa ratio est. Neque enim fides tua laborabit; si quod minatus es, non feceris: quia minis nulli audienti jus acquiritur. Si quid juris hic est; id totum minantis, ut jus pœnæ punientis, est.

II. Ut promissorum constantia virtutis laudem habeat, promissa *liquidò & licitè* facta fuisse oportet. h. e. tùm ultroneo & consulto consensu: tùm de re, quæ sit, aut esse possit in jure & potestate promittentis. 1. *Ultroneo*, inquam, & *non inconsulto consensu*. Cùm enim promissi & pacti cujusque implerio cum aliquo conjuncta sit onere, nulla propior ratio afferri potest, quare super eo rectè conqueri nequeamus, quàm quia ultrò in id consensimus, quod evitare penes nos erat. Quid tenendum sit de pactis & promissis, quibus error vel metus causam dedit, videatur apud Grotium, Pufendorhium &c. *De J. B. & P. l. 2.* 2. Ut deinde promissa & pacta valida sint, necesse est esse de re, quæ sit in jure & potestate promittentis: h. e. ut promissor eam præstare nec lege, nec virium defectu impediatur. Quare promissa facti per se illiciti nulla sunt. Peccat qui illicita se facturum recipit; bis peccat, qui eadem præstat. *Verissimè Papinianus, quæ facta, inquit, ledunt pietatem, existimationem, verecundiam nostram, & (ut generaliter dixerim) contra bonos mores fiunt, nec facere nos posse credendum est. Neque ad impossibile quisquam sese obligare potest. Quòd si res, quæ tempore pacti initi possibilis habebatur, pòst casu aliquo, nullâ pasciscientis culpâ, impossibilis facta sit, re quidem integra, pactum erit nullum. Ubi verò jamjam quid præstitum ab altero fuit, id restitui, aut æquipollens reponi jubet justitia correctrix. Sin res nunc temporis non sit in potestate promittentis, sed futura probabiliter judicetur, pendebit efficacia promissionis, tanquam hac sub conditione factæ, si res in potestatem venerit. Quo casu operam dabit promissor, ut, quoad ejus morali*

rali æstimatione æquum fuerit visum, impleatur. Plura de his atque illis videantur apud Authores. mox laudatos.

III. Sanctam præcipuè fidem esse oportet in jurejurando, cujus ad promissa & pacta firmanda apud
etc. Off. omnes populos & ab omni ævo vis fuit maxima. *Est*
 3. *enim jusjurandum affirmatio religiosa.* (quâ Deum fidei nostræ testem, & perfidiæ vindicem appellamus.) *Quod autem affirmatè, quasi Deo teste promiseris, id tenendum est: etsi præstare, quod juratò promiseris, magno tibi constet incommodo. Intellige tamen, nisi casus ille exceptus censeretur, cui lex non repugnet. Unde ad legem Regni Dei, &*
ἐκ τῶν νόμων civium ejus pertinet quoque Religio jurisjurandi etiam cum damno aut molestia serjandi;
Psalms. *Si juravit ad malum (vel cum malo atque incommodo suo facturum) non mutat.* Qui jusjurandum commodi sui causâ violat, haud dubiè se Deum non reputare satis probat.

IV. Fidelitati adversatur perfidia, quæ in rebus promissis mentiendi fidemque fallendi lubido est; cum primis detestanda in pactis juratis. Hinc gravissima pœna perjuri imminere nunquam non creditur etiam Ethnicis

Hes. Op.
& Dier.
 1. 1.

Clades mortalibus unde
 Adveniunt, quoties fallaci pectore jurant.

§. 8.

*Virtus decorum ubique servans Verecundia dicitur.
Decorum appellamus, quicquid homini ratione habita
naturæ, sexûs, ætatis & conditionis convenit.*

E X P L.

I. **V**erecundiæ non exigua laus, nec minor utilitas est. Unde Ciceroni Custos est omnium virtutum, dedecus fugiens, laudemque maximè consequens. Decorum quod servat, duplex est; Unum quidem commune hominum omnium: Alterum singulorum proprium. Illud ex naturæ præstantia fluit, quâ homo rationis particeps brutis animantibus antecellit; atque eò ipsò monetur, ne quid naturâ hominis indignum committat, seque ad abjectam brutorum sortem unquam demittat. Hoc suocujusque hominis ordini & conditioni proprium est: velut principi, Ministro Ecclesiæ, viro, fœminæ, seni, juveni, nobili, plebeio &c. de quibus tenendum generale præceptum; unicuique sequendum esse, tum quod naturæ consentaneum, tum quod communi hominum sententiâ pulchrum & conveniens est: ne aliorum judicium contemnere, & expectationem frustrari velle videatur.

II. Verecundiam fovent Gloria & Pudor. Illa quidem spe laudis apud alios obtinendæ: Hic verò metu vituperii. Hos affectus qui exuunt, ut olim Cynici, insuper habentes, quid de se sentiant alii, non solum arrogantes sunt, sed etiam dissoluti, quippe ad impudentiam projecti. Ut enim populus, non idoneus rei bene gerendæ author, pessimè de actionibus haud malis judicet, attramen quia procul turbâ segreges vivere non possumus, neque nihil refert, à populo æstimari, hætenus populi potius, quam

quàm nostras, opiniones, quantum ad externa actionum nostrarum attinet, sequi necesse habemus.

§. 9.

Verecundia partes sunt Gravitas & Civilitas.

Gravitas est Constantia quædam & Dignitas in vultu, motu ac gestu corporis, sermone & vestitu, suæ cuiusque conditioni conveniens.

Ei opponuntur cum affectata Severitas & Supercilium; tum soluta Levitas.

E X P L.

I. **V**ultus virum gravem is decet, qui hominis esse solet seria agentis, non tristis tamen, nectetricus. Motus, nisi remoram non ferente, sit æquabilis, non varius, non concitatus. Flexus corporis & artuum sit virilis, non effœminatus, non histrionicus: ita tardus, ut ne ignaviam arguat. Sermo sedatus, stabilis, tardior paulò, non præceps, non acutus, non contentiosus, non jactabundus. Vestitus denique nec colorum varietate, nec affectato splendore insignis juvenilem levitatem præ se ferat.

II. Gravitas ergò pro singulorum conditione variat. Majorem esse convenit in sene, quàm in juvene; majorem in matrona, quàm in juvencula &c. Quin imò & Gentium moribus hæc ipsa variant. Quæ Romanis indecora fuere visa, velut saltare commodè, scienterque tibiis cantare &c. Ea Græci etiam summorum Virorum personis non indigna existimârunt.

III. Modum in Gravitate tenendum excedit, qui Severitatem affectat, qualem ridet Comicus in sene illo vultuoso.

Nescio

*Corn.
Nep. in
præfat.*

Nescio qui senex modò venit ; illum , confidens , Ter.
eatus : Andr.

Cùm faciem videas , videtur esse quantivis preti : 5. 2.
Tristis severitas inest in vultu.

Levitas vultu , gestu , incessu , sermone , vestitu peccante , se prodit , ubique quasi legibus soluta. Unde de indole , habitu & affectu animi non omninò fallax est conjectura : qualis illa Nazianzeni de Juliano Apostata ; *Fecit me vatem gestuum ipsius deformitas , ut colli crebra conversiones , humeri inquieti , oculi torvi & vagabundi , furibundum quiddam contuentes , pedes instabiles , crebra gesticulationes , nasus contumeliam & contemptum spirans , cachinni frequentes &c.* Virum gravem non oportet esse instar statuæ immobilem , neque instar simiæ instabilem. Hist. Eccl. tripart. Lib. 7. c. 2.

§. 10.

Civilitas est externa morum , communi prudentum & bonorum usu probatorum , elegantia.
Ei adversantur tùm Rusticitas ; tùm ridicula Civilitatis affectatio.

E x p l.

Civilitas Verecundiæ pars est , quippe cùm servet decorum illud , quod qui negligit non quidem improbus , sed incultus atque rusticus dicitur. De hac quæ præcipuè tenenda sint , generalia hæc doceant præcepta. 1. Sequenda est hætenus regionis & loci cujusque consuetudo. 2. Exempla eorum imitanda ; qui prudentiorum judiciò elegantioribus censentur esse moribus. 3. Sedulò cavendum , quicquid vitii speciem præbere , aut suspicionemingere potest : contra sectandum , quod laudi fore ,

non vitio versum iri, persuasus sis. 4. Cautè submovenda omnia, quorum aspectus offendere, vel cogitatio molesta esse queat. Quin & illa suppressenda, quæ turpis rei vel memoriam refricare, vel speciem animo objicere possint. 5. Quicquid molle & effœminatum est, id præcipuè viro fugiendum. 6. *Adhibenda corporis munditia est, non odiosa, nec exquisita nimis: tantum quæ fugiat agrestem & inhumanam negligentiam.* 7. Non negligenda benevolentix & honoris testificandi signa, quæ usus probaverit. Quo ipso usu cætera quoque Civilitatis veriùs, quàm præceptis edisci possunt. De vitiis Civilitati opponendis è dictis faciliè constat.

§. II.

Virtus, dum id tibi præstat, ut erga quosvis homines communi cognationis sensu tactus benevolè afficiaris, iisque cum verbis, tum factis, utiliter & honestè placere studeas, Humanitas dicitur, complectens Hospitalitatem, Comitatem, Affabilitatem & Officiositatem.
Adversantur illi Inhumanitas & nimium placendi studium.

E X P L.

I. **U**T quæ humanitatis sit indoles atque præstantia paulò rectiùs intelligatur, juvat ejusdem tantisper inspicere officia. 1. Id agit humanus, ut quantum honestas & vera aliorum utilitas patitur, nemini sit molestus, sed omnibus juvundus. 2. Aliorum rectè facta, quoties fieri commodum videt, libenter laudat. Commodum autem imprimis tùm est, ubi approbatio laudisque testimonium, Vel ei, qui laudatur ad similia, majorave suscipienda; Vel aliis ad æmulandum prodesse, nemini verò nocere, aut saltem longè plus utilitatis, quàm incommodi, afferre potest. Sic enim ferè comparatum videmus, ut
laus

laus hunc inflet deterioremque reddat ; illi contrà calcar ad virtutem addat. 3. Si quæ in aliis reprehensione digna videt, ita vituperare studet, ut reprehensionis asperitatem dexteritate quadam & verborum lenitate, quantum res ipsa, & ejus qui objurgandus est, fert utilitas, emolliat. Imò si peccare contingat amicum, id ipsum vertit in occasionem beneficii ; nimirum, ut Mimus dixit ; *Amici vitia si feras, facis tua.* 4. Quòd si malignitas acriorem postulet medicinam, prout *crudelem medicum intemperans æger facit*, præterquam quòd & audientium utilitas læpè aceti aliquid exposuit, Humanus futurum potiùs eorum, quos monet, commodum, quàm præsentem voluptatem quærendam statuit. Etenim non rarò fit, ut is, quem nunc aliqua ratione offendit aut contristat, quia cupiditatibus ejus, stultis fortè ac noxiis adversatur, pòst, ubi affectus deferbuerit, & judiciò liberò rem expenderit, eò factò vehementer gaudeat, & reprehensori, quòd iniquo ipsius animo obstiterit, amplis verbis gratias agat. Quam voluptatem vir bonus qualicunque offensusculà haud illibenter redimet, nihil morando tritum illud, *Obsequium amicos, Veritas odium parit.* Quin veriùs illud Ciceronis reputando ; *Molesta veritas, siquidem ex ea nascitur odium ; sed obsequium multò molestius, quod peccatis indulgens præcipitem amicum ferri sinit.* Et quod apud Plautum est ;

*Amicum castigare ob meritam noxiam
Immune est facinus, verum in ætate utile
Et conducibile.*

Sed observat diligenter, ne eà castigatione sua potiùs commoda aut victoriàm sectetur, quàm repressi salutem. Quapropter etiam 4. ad temperandam reprehensionis acerbicatem, dat operam, ut cor-

corrigendus sentiat, sese ab ipso amari, & reprehensionem ab animo sibi quàm optimè cupiente vicemque ejus dolente proficisci, atque cognoscat, Censorem suum reprehensione non delectari, sed invitum ad eam adigi. Quantum potest famæ & pudoris ejus, qui deliquit, rationem habet, contemptus suspicionem vitat, convitiis abstinet, delictum morosè non exaggerat, ex imprudentia & imbecillitate veriùs quàm malitiâ peccâsse mavult credere & dicere, nisi ubi res ipsa & emendationis ratio aliud postulant. Obliquè etiam, & velut aliud agens nonnunquam amici vitium tangit, *communicationis* schemate utens &c. Optima verò est reprehendendi ratio, si Cenfor vitam aliis suam ipsa diversitate exprobrat. Alioqui auditurus illud;

Turpe est Cenfori cùm culpa redarguit ipsum.

5. Decorum ubique observat, quid cuique personæ conveniat, cautè expendens: aliter cum patre, aliter cum filio, aliter cum fratre: cum notis aliter, aliter cum ignotis agit. 6. Moniturus temporis captat opportunitatem: nec tùm facilè quemquam reprehendit, cùm animò alias ob causas ita est turbatò, ut reprehensionem vix patienter laturus videatur. 7. De re nihili rixari non sustinet, nec pertinaciter sua defendit, verùm quoad honestè potest, libenter aliis cedit: contentiosa voce non utitur: loquendi vices servat, alienos sermones non interturbans, nec ad primum quodque verbum, quid alter dicere voluerit, divinans, aut responsione præpropera, quæ alter dicturus erat, occupans. 8. Mœstos solatur, dubios ac vacillantes erigit, animumque illis addit: consilii & opis suæ indigis lubens succurrit, officiorum cultu pro re nata de quovis quàm optimè mereri paratus. 9. Nec vultu tristem, nimisve severum, sed serenum potius

tiùs ac permista gravitate blandum, nec aditu difficilem se præbet: libenter salutat, &, ut verbo dicam, *Mitio* est, non *Demea*.

II. Humanitatis denique, partes dicam, an officia? sunt *Hospitalitas*, *Comitas*, *Affabilitas* & *Officiositas*. Per *Hospitalitatem* benevolè & officiosè afficimur erga peregrinos, non solum quòd homines sunt, verùm quòd quibus commodis domi suæ fruerentur, nunc peregrè absentes destitui possunt. Eam peculiari ratione Christianis commendat religiosa Sanctorum communio: de qua multa est Scriptura S. Per *Comitatem* homo hominem ex communi humanitatis sensu blandè benignèque in congressu alloquitur. Per *Affabilitatem* adeuntes & alloqui parantes facilè & benigniter excipimus. Per *Officiositatem* nos pronos significamus & præstamus ad officia quæque honesta, & quæ faciendi potestas sit, aliis exhibenda.

III. *Inhumanitas* vitium est illorum, qui istum humanitatis sensum exuunt, nullam in alios benevolentix & officiositatis curam gerentes, dicta factaque aliorum reprehendere amantes, vultu tristes, aditu difficiles, *agrestes*, *sævi*, *parci*, *truculenti*, *tenaces*: ubi ad castigandum accedunt, *tuberibus propriis offendentes amicum*. Quò etiam referas contendendi & quidvis contradicendi studium cum primis eorum, qui de re levi, tantùm non nihili, acri voce, clamorosa actione, disputant, sua pertinaciter defendentes, ut ne victi quidem de sua sententia facilè discedant, aut se victos fateantur. *Nimium placendi studium* eorum est, qui sic animum inducunt, ut ille apud Comicum;

Est genus hominum, qui esse primos se omnium rerum volunt, Ter. Eunuch. 2. 2.

Nec sunt. Hos confector: hisce ego non paro, me ut rideant,

Sed

Sed eis ultro arrideo , & eorum ingenia admiror simul :

Quicquid dicunt , laudo : id rursum si negant , laudo id quoque :

*Negat quis , nego : ait , aio : postremo imperavi ego-
met mihi ,*

*Omnia assentari . Is quaestus nunc est multo uberri-
mus .*

Sic constitutum illis , qui vel è flammis petere cibum possunt : & commodi sui causâ nutum divitis horrent , ejus iterant voces , & verba cadentia tollunt . Qui autem placendi studiô modum excedunt , non lucri sui , sed offensionis evitandæ , & benevolentiae captandæ causâ , simpliciter ἀρεστοι dicuntur .

C A P. X I.

Appendix de Officiis Justitiæ relativis.

§. I.

Officia homini adversus hominem præstanda è duplici quasi fonte , nimirum , vel ex communi obligatione , quâ Creator universos homines , hætenus naturâ æquales , inter se devinctos voluit : vel ex certo instituto & statu adventitiô , dimanant .

Ista cuilibet erga quemlibet obeunda : hæc quibusdam in quosdam , intuitu conditionis , quam peculiaris ferè jura comitantur , facienda incumbunt . Unde illa Absoluta , hæc Hypothetica & Relativa vocari possunt .

Status adventitiûs , in quo homo factô quôpiam suô antecedente constituitur , è Societate pendet , quam ho-
mines

mines cum hominibus, sic ducente natura; impellente utilitate & exigente officio, diversam inire & colere solent. Atque hæc est Societas humana tantum & temporaria: quæ ut affectu trahente coit, sic bonorum pereuntium communione subsistit, & finem proximum non nisi vitæ præsentis commoda habet.

Verum præter hanc est alia quædam Societas Religiosa & æterna, quæ duce non affectu, sed spiritu & verbo Dei initur, fide, spe & charitate continetur, verorum bonorum communione sustentatur, finem habens beatam immortalitatem in communione Dei consequendam.

E X P L.

1. **H**ÆTENUS de Officiis Justitiæ absolutis: sequuntur relativa. Ad illa quique ex æquo inter se viventes; ad hæc singuli pro ratione status æconomici, politici &c. tenentur. Atque hinc usitata nonnullis Authoribus Justitiæ in *Ethicam*, *Oeconomicam* & *Politicam*, divisio. De officiis Justitiæ relativis, quantò fieri poterit brevitatæ studio, dicendum superest.

2. Status hominis adventitius, unde officiis illis relativis origo est, è varia hominum consociatione pendet. Id equidem fateor verum; nos vix ullo virtutis & probitatis profectu ferè in hominum societate versari; quippe qui ut plurimum non tantum exempli, sed & linguæ contagiò nocent: Hominum sermone; qui societatis conciliator est, usque adeò corruptò, ut loquentes nil nisi pravas de rebus opiniones, rerumque sensibilibus amorem parum cautis instillent atque concilient. Plus tamen periculi ab eorundem est exemplo, quippe quod sermo quidam veluti animatus est, omni persuasione efficacior & vi secreta animum vincens & expugnans.

Sæpè

Sæpè quidem usuenit, ut homo aures intendat in ea quæ dicuntur, neque tamen animum inducat suum audita facere: interim usque adeò ad imitationem propendet exempli, ut *ἀντιποιεῖν*, machinali velut impetu corporis, ad faciendum feratur, quod alios videt facientes. Causa quidem non est, cur tenearis facere, quod alter dixerit, id licèt ipse non fecerit. Nè tamen idem vivendi mos tibi fuerit, illicò te sancta scil. societatis jura violâsse & pacem turbâsse audies, imò quasi schismatis author, qui singulari & insolente vitæ institutò dissidium velis inter homines, in omnium odia incurres. Nihilominus ipso naturæ ductu & indigentia nostræ sensu ad societatem colendam rapimur: ne jam dicam, charitatis lege vetari nòs, vivere singulos & segreges. De quo satis dictum suò locò.

3. Societatis colendæ officia præceptis de *Amore, Existimatione & Honore*, qui personæ & meritis cuiusque conveniat, atque *Reverentiâ* adversus superiores, generatim comprehenduntur. Quorum principia, ut & necessitatem societatis cuiusvis colendæ, videtis suprà, *Part. I. Cap. 3. & Part. II. cap. 9.* Id præcipuè hîc tenendum, *Humanae Societati*, qualis est *Domestica, Civilis &c. Religiosam* semper pro fine propositam oportere: atque adeò, illam eò tibi, mihiq; esse querendam, ut hujus colendæ & augendæ sit occasio: & in id quàm maxime incumbendum, ut quantum in nobis est, & nobis & aliis æternam comparemus felicitatem. Hoc præceptum charitatis officium, conglutinandæ societatis religiosæ vinculum, proximo debes. *Domestica & Civilis societas* sylva est, manu Creatoris & Conservatoris omnium plantata, Christo humani Generis restauratori, materiem ædificandæ Ecclesiæ, quæ Sanctorum societas est, suppetans. De quibus accuratius Theologi.

§. 2.

Societas humana & temporaria alia Oeconomica est, alia Civilis.

Illa Iustitia Oeconomica, hæc Iustitia Politica Officiis continetur.

Officia Iustitiæ Oeconomica sunt, quæ Paterfamilias uxori, liberis & famulis: & hi vicissim illi præstare tenentur.

Officia Iustitiæ Politica sunt, quæ Princeps & Magistratus subditis: hique illis invicem debent.

E X P L.

I. **O**fficia ista explicationis locò summatim enumerasse sufficiet, prolixiore commentatione Authoribus Politicis & Theologis relinquenda. Patrisfamilias in genere hæc sunt. 1. Uxorem perinde ac seipsum amare. 2. Familiæ necessaria, non ad præsentem modo vitam commodè tolerandam, sed & futuram in æterna Cælitum societate consequendam, prospicere: atque ideò 3. Liberos & famulos præceptis ex verbo Dei & exemplò vitæ ad virtutem & obsequia bonæ mentis, non sensûs, affectûs & corrupti moris seculi, formare, ducere, assuescere. 4. Mala exempla quàm maturimè suppressere, aut domo exturbare. 5. Familiam mansuetè & clementer tractare &c. Familia è contrario est, pronò eundem obsequiò & observantiâ colere, nec temerè cum illo, in re licèt paulò iustiore contendere & altercari.

II. *Principis & Magistratum est*, 1. Subditos, eorundemque rem à vi & fraude defendere. 2. Æquis legum sanctionibus universorum tranquillitati & singulorum securitati cavere. 3. Nihil libidine adversum leges Imperii fundamentales in fraudem referre.

reservatæ populo libertatis statuere. 4. Præmia Virtutis & munera publica dignis tantum & idoneis decernere. 5. Pœnas delictis ita attemperare, ut non solum pœnæ meritum, sed etiam utilitas ex pœna, attendatur. 6. Non satis provisum putare subditis, nisi curâ suâ & sollicitudine iusta primum amplexi fuerint, quæ ad pietatem, religiosam societatem & æternam subditorum salutem pertinent. Vice versa *Subditorum* est. 1. Cum jure ex suo pro arbitrio vivendi sese abdicarint, & jus se suaque defendendi in summum Imperantem transtulerint, ei proinde & legibus parere. 2. Sumptus administrandæ Reip. necessarios liberè & alacriter suppeditare. 3. Periclitanti Principis & Patriæ salutis sumptis armis promptè succurrere. Hæc porro officia, quæ domestica, quæ civilia, utrisque in utrosque facienda incumbunt ex amore Veritatis, ut communem Patrem & Dominum, in cælo habentibus.

CAP. XII.

De Prudentia.

§. 1.

Actionum ex Virtute, seu Amore veritatis suscipiendarum Moderatrix est Prudentia, in Attentione, Circumspectione, Providentia & Discretionem consistens.

E X P L.

I. **H**Actenus de Virtutis natura & officiis: nunc quia Virtutis laus omnis in actione consistit, dispi-

dispiciendum, quomodo actiones vitæ dirigi, & suis temporibus dispensari oporteat. Quod ipsum Prudentiæ negotium est. Unde *Virtutum Moderatrix: Rerum mensura: Humana vita auriga; & vivendi ars*, dicta est Philosophis.

II. Prudentiam in *Attentione, Circumspectione &c.* veluti partibus eam absolventibus constituimus. Vir prudens *Attentione* actionis normam; *Circumspectione* actionem ipsam, ejusque circumstantias; *Providentiâ* actionis successum & eventum; *Discretione* denique verisimilitudinem rerum &c. in-tuetur.

III. Ex *Attentione* pendet Σύνσις *Intelligentia*; quâ quis abdicatis sensuum & affectuum præjudiciis, quod cujusque rei verum est, vel ipsemet faciliè assequitur, vel ab aliis probatum amplectitur. Ex *Circumspectione* pendet Δεινότης *Solertia*, sive ingenii dexteritas, in mediis celeriter inveniendis & ad destinata applicandis, spectata. Ex *Providentiâ* existit Εὐβουλία *felix consilium*, quò id, quod optimum & profuturum deprehenditur, ut quidem fert occasio, prosequendum statuitur. Ex *Discretione* est Εὐστοχία & γνῶμη, quibus Vir prudens medium illud & decorum in actione qualibet tenendum rectè conjectat, & quod deliberandum offertur ex æquo & bono dijudicat.

§. 12.

Prima Prudentiæ Pars est. Attentio animi 1. ad regulam vitæ, quæ est, non sensus & affectus, non mos & exemplum vulgi: sed Veritas, quam Virtus amplectitur è Verbo Dei, Ratione sive Conscientia, Legibus & Institutis Reipublicæ. 2. Ad facta præteriti temporis. 3. Ad facultatem è rerum agendarum momentis metiendam.

E X P L.

Atrendendum est Prudenti primùm ad regulam vitæ, ad quam actio quælibet componenda. Quo casu pictorem imitatur, qui defixis in *πρωτότυπον* oculis, similem illo prospectu picturam efformat. Regulam porrò vitæ dirigendæ Prudens eligit non sensum, non affectum &c. quibus qui auscultant, plus ex alieno jecore sapiunt, quàm ex suo: & ut alter ait, foris sapiunt, sibi non possunt auxiliari: scilicet in alienis negotiis oculati satis & consulti, in suis cæci & temerarii: sed Veritatem, quam virtus amplectitur. Qua de re dictum nobis, ubi de Diligentia, suprâ Part. II. Cap. 2. §. 1. Unde constat, veræ Prudentiæ non aliam, quàm virtutem ipsam esse matrem: quod agnovit etiam Cicero; Nam cum animus, cognitis, perceptisque virtutibus, à corporis obsequio, indulgentiaque discesserit, voluptatemque, sicut labem aliquam dedecoris oppresserit, omnemque mortis dolorisque timorem effugerit, societatemque carnis ejecerit, tum suis omnibusque naturâ conjunctos, suos duxerit, cultumque Deorum & puram religionem susceperit, & exacuërit illam, ut oculorum, sic ingenii aciem, ad bona diligenda, & rejicienda contraria: quæ virtus ex providendo est appellata Prudentia: quid eò dicti, aut excogitari poterit beatius?

Addi-

lib. 1. de
Legib.

Addimus illud ; Prudentem nôsse *leges & instituta Reip.* cujus se civem profitetur. Suum enim intelligit esse officium , ut iis , quatenus salvâ conscientia & absque justa bonorum offensione potest , obtemperet & sese accommodet.

II. Attendendum deinde Prudenti *ad facta præteriti temporis* , ut , quo successu hoc illudve olim ipsemet vel alius , egerit , & quid hanc illamve actionis circumstantiam fuerit consecutum , probè memor , nunc quid simile ejus agere paranti expectandum sit , eò feliciùs animò providere possit. *Usus enim magister egregius , & hætenus omnium magistrorum præcepta superans* Ciceroni dicitur. Et rectè Comicus ;

Nunquam ita quisquam bene subducta ratione ad vitam Terent.
fuit, *Adelph.*

Quin res , ætas , usus , semper aliquid apportet novi , 5. 4.
Aliquid moneat : ut illa , quæ te scire credas , nescias ,
Et , quæ tibi putâris prima , in experiundo ut repudies .

III. Denique attendendum Prudenti ad vires , & librandâ rerum agendarum pondera , ne subeat laborem , cui ferendo non sit : & quod aggressus est temerè , magnò suò malò deferat , ludibrio futurus aliis. *Quis ex vobis , si velit turrim ædificare , non* Luc. 14.
priùs considens computat impensam , an habeat , quæ 28. &c.
ad ejus perfectionem pertinent &c. Ita se comparat Prudens , ut sibi dicere liceat ;

Omnia præcepi , atque animo mecum ante peregi .

Ut vis consilii expers mole ruit sua , sic vana est sine viribus Prudentia. Porrò etiam in id maturè tibi incumbendum , ut claram veri & falsi notionem , certamque faciendorum & fugiendorum intelligentiam pares , ne ubi præceptis urget occasio , quid faciendum sit , nescias.

§. 3.

Secunda Prudentia pars est Circumspectio, qua Prudens actionem ejusque circumstantias eum in modum consuetur, accurat & ordinat, ut per omnia cum regula congruant.

E X P L.

I. **U**bi normam agendorum & facultatem non indiligenter expendaris, proximum est, ut actionem ad eam compares, atque capropter omnes circumstantias animo circumspecias, quippe quarum varietas ad actiones distinguendas plurimum valet. Quod enim in his honestum & licitum est circumstantiis, idem in aliis turpe est & illicitum. Sontem capitalis criminis convictum interimere licet Magistratui, non item privato. Hic loci noctu sine face in publicum prodire licet cuivis: secus, ubi ea de re cautum est lege.

II. Circumstantias prudenti circumspecientes vulgatissimus habet versus;

Quis, Quid, Ubi, Quibus auxiliis, Cur, Quomodo, Quando?

I. *Quis*, denotat personam & conditionem agentis. De actione quæ in discepcionem vocatur, primum illud queri solet, *Quis* egerit? Magistratum gerens, an privatus? Dives, an pauper? Nobilis, an ignobilis? Peritus rerum, an rudis? &c. Quod enim huic, non itidem illi, & vicissim, in eodem actionis genere licet. Pauper, verbi gratiâ, accipere potest à multis, quod sine aliqua turpitudinis nota accipere non licet diviti. Tutor & pupillus idem si faciant, non est idem, ubicunque conditio pupilli dete-

deterior reddi potest. Unde Prudenti symbolum, *Nosce teipsum*. Item, *Tuo te pede metire*. Cujus non immemor alia atque alia, prout occasio fert, agenda, vel omittenda, videt in suo prototypo, sive regula vitæ, quam identidem contemplatur.

2. *Quid*, actionem suscipiendam designat, & opus, quod eam consequitur. Exempli causâ: Deliberas, hœccine cœlô utar, animi gratiâ prodeambulaturus, an domi manens studiis incumbam? Dabone Titio stipulanti centum &c. annon? Ubi tenendum Prudenti tritum illud & in vita verè utile, *Ne quid nimis*. De quo alibi nobis sermo fuit.

3. *Ubi*, locum & personas actionem circumstantes significat. Plurimum interest, in publico quid facias & multis consciis, an in secessu & remotis arbitris: inter doctos & intelligentes, an inter idiotas & rudes? &c. Cùm non sit obscurum, non idem semper ubique & apud omnes laudabile vel vituperabile futurum. Seneca hoc Prudentiæ præceptum etiam iteratò commendat animo affigendum; *Aliquis vir bonus nobis eligendus est, ac semper ante oculos habendus, ut sic tanquam illo spectante vivamus, & 25. Epist. 11.* & omnia tanquam illo vidente faciamus. Hoc, inquit, Epicurus præcepit, custodem nobis & prædagogum dedit: nec immeritò. Magna pars peccatorum tollitur, si peccaturis testis adfuit. Aliquem habeat animus, quem vereatur, cujus autoritate etiam secretum suum sanctius faciat. Hæc ille. Malim ego, tibi mihiq; ubi demùm cunque locorum agamus, illud obversari animo, *Deus videt. Heb. 4.* Cujus pervigiles oculos nulla vel abstrusissima mentis humanæ cogitatio fugere potest. *Omnia sunt nuda & resupinata oculis ejus. Et verissimè Seneca alibi; 13.* *Quid prodest, inquit, ab homine esse secretum? Nihil Deo clusum est. Interest animis nostris, & cogitationibus mediis intervenit. Id, inquam malim, ne au-*

thoritatem humanam & Lesbiam vanitatis regulam potius quàm unam Dei legem in agendo sequi assuescamus.

4. *Quibus auxiliis*, designat media, quæ fini consequendo adhibentur. Ea verò, si hætenus per se bona fuerint, tùm demùm optima erunt, ubi intentio nostra & finis pari bonitate commendari poterunt. Contrà, ubi media mala esse contingit, non ideo bona fient, quia finis est bonus. Dare & opem ferre inopi, utique bonum est ex se: idem verò facere, ut cum subornes falsum testem, aut immittas percussorem innocenti, pessimum est.

Joh. 16. Sic ex adverso, cultum præstare Deo, pium est & bonum in se, sed eo fine in promiscuam exardescere necem Christianorum, haud dubiè damnabile est. Unde axioma Ethicum; *Non sunt facienda mala, ut eveniant bona: nec bona sunt, quæ fiunt, ut indidem eveniant mala.* Hæc Prudenti symbolum esto; *A minimis maxima.* Cujus usus in bonis pariter & malis minimè spernendus est. Eo namque monemur, ut ne media, quantumvis abjecta parvique momenti videri queant, facilè repudiemus, quippe quæ sæpe ad finem longè nobilissimum conducant. Particulam temporis diurni decidere, studiis Ethicis quotidie impendendam, leve videatur: conducit tamen ad finem assequendum, quo non nobilior alter, virtutem puta, & sapientiam. Eiusdem quoque symboli usus non minor est in malis, ut quòd à levissimis peccatis, ubi nihili fiunt, facilis est gradus ad scelera gravissima. Id docet furis illius Æsopici exemplum, qui ultimò suppliciò pœnas daturus, matri osculum per simulationem offerens, & quasi extremum vale dicens, nasum ei mordicus abripuit, additâ increpatione, Si, cùm primùm ego puer libellum à sodali meo abstuli, meritas tibi pœnas dedissem, si verbis & verberibus, ut par erat, furunculum objugâsset, res mihi non ad restim venisset.

5. Cur,

5. *Cur* denotat finem, quem agere volenti præstitutum oportet, intellige, *finem cui & ultimum*, qui alius esse non potest, quam Deo & veritati obedire. Hic indefinenter animo obversetur illud; *Hoc age*: vel *age quod agis*: id est, tantum facito præcisè, quantum finis postulat, secus si facis, nimirum plura, quàm quæ ad finem pertineant; amplexus, in tantum à fine deflectis, & alias res agis. Quemadmodum Viator, quamdiu rectà pergit, quò iter habet, tamdiu *hoc agere*, vel *quod agit*, *agere*, dicitur: Quòd si prædiorum objacentium amœnitate, nemorum umbris, fontium scatebris, aliorumque diverticulorum deliciis & obviorum fabulis detentus, in via hæret, tùm verò aliud agit. Media igitur cum fine sunt commetienda, ut ne citra finem consistas, nec ab eo deflectas, nec rursus ultra eundem procurras. Exemplo sit illud; Vivere te jussit Deus: certumne est, ei obedire? Agendum tantum vivere velis, quantum ille jussit. Proinde si adversa ingruant, cave, injussu ejus ex eas: si mors occupet, noli vitam exoptare longiorem. Porro quia vivendum est, honesta ratione necessaria vitæ subsidia parabis, edes, bibes &c. sed præcisè quantum ad id unum satis est: nec ad majora incitet ambitio, nec infra id quod debes, contineat ignavia. Cum primis cave, ne delectamenta quærens sensui, in mediis ita obhæreas, ut perversa agendi ratione, quod medium est finem facias, & vice versa.

6. *Quomodo*, agendi modum definit. Ut rectè vel secus agas, non parùm refert, languidè an ferventer; jocò an seriò; simulatè, an sincerè, agas? Ut potissima verbò complectar, Prudentis Viri proprium est illud; *Seriò & Sincerè*. Seriò agit, qui diligenter, cordatè, deliberatè, non languidè, non per jocum, agit: qualem Viri boni actionem oportet esse omnem. Non, quòd joculari, ludere,

De
Tranq.
Animi
cap. 15.

animum remittere &c. suapte naturâ sit malum, sed quòd hæc ipsa, dum à Prudente & Viro bono fiunt, mutatâ quodammodo naturâ, ludicra esse desinant, & quàm maximè seria fiant. Gratiis subinde litandum est, deambulandum, jocos amicorum & salibus indulgendum, & ferè dixeram, desipiendum, sed, ut ille ait, *in loco*. Retrò nonnunquam animus in hæc ludicra recedat, ut collectis dein viribus, & velut cursu concitatus, tantò fortius, longiusque saltu se transmittat in seria. Danda est, inquit Seneca, *remissio animis*: meliores, acrioresque requieti surgent. Ut fertilibus agris non est imperandum: citò enim exhauriet illos nunquam intermissa fecunditas: ita animorum impetus assiduus labor frangit. Vires recipient paullùm resoluti & remissi. Jocari igitur, ludere &c. tali mente, non jam est joculari, ludere &c. sed officium virtutis facere tam seriò, tam cordatè, quàm cum maximè. Sincera quoque & sine fūco est Viri Prudentis & Boni actio, quippe quam non aliam forinsecus videri vult, atque intus animò est concepta. Neque verò est, cur quidquam simulet, quandoquidem & quod agit bonum est, & procul studiò placendi hominibus, soli Deo & Veritati obedire decrevit. Neque, si quando Vir prudens nonnulla celat & silentiò premit, vel facta improborum non semper reprehendit, & nec dicto nec facto contravenit, illicò fictè & dissimulanter facere, & ipsorum nequitiae consentire dicendus est. Plurimum enim interest inter celare veritatem & mentiri; nequitiam alicujus probare, & eidem non contravenire. Enimverò in loco celare veritatem, sævitiae tyranni ad cædem innocentium grassantis non intercedere privatum salutem in Republ. Prudentiae est. Mentiri tamen & nequitiam improbi probare, adjuvare, non impedire ubi commodè possis, & per officium debeas, à Viro prudente alienissimum est.

7. Quando,

7. Quando, denique tempus significat actioni dandum. Atque hinc Prudenti velut Symbolum est illud; *Deliberandum est diu: exequendum citò.* Quod docet, non agendum esse, prius quam maturè deliberaveris, actione ejusque circumstantiis circumspèctè perpensis, quoad per tempus, rerumque deliberandarum naturam fieri potest: quod verò semel deliberatum & constitutum fuerit, incunctanter exequendum; eoque non committendum, ut per segnitiam nostram præsens occasio, elabatur. Ea igitur, cum fronte sit capillata, retrò calva, ut primum sese dat, arripienda, & si desit, re decreta moram non ferente, non jam expectanda, sed captanda & provocanda est. Optimè Sallustius; *Nam & prius quam incipias, consulto: & ubi consulueris, maturè factò opus est.* Ita utrumque per se indiget, alterum alterius auxilio eget. Cæterum utut haecenus rapienda sit occasio, cavenda tamen, quantum pote, festinatio, comites habens errorem & poenitentiam. Etenim *sat citò, si sat benè.* Porro etiam in mediorem usu is tenendus est ordo, quem ipsa mediorem natura fert: ut nimirum mediorem quodque, quò simplicius est & à fine remotius, hòc etiam prius cæteris adhibeatur. Deinde uno actionis tenore consilia sunt exequenda, non parergis interpellanda, retardanda, nedum revocanda. Incidunt quidem sæpè agenda, quæ bonæ sint, an mala, nulla lege differri agnoscas, & præterea differri non patiantur, quo casu illud prudenti sequendum, quod optimum fuerit visum, & in eo, quod adhibita possibili diligentia tale judicaverit, indubitanter persistendum. Quò pactò, quod sui erat officii fecisse persuasus, animum anxietate & sollicitudine, quæ torqueri solent infirmiores, expediet. Rursum si talia incident, quæ mentem velut in æquilibrio hærentem detineant, eam ne minimo quidem momentò in alterutram partem impellente; alterutrum

terutrum tamen perspecto æquali rationum pondere Prudenti Viro citra ulteriorem hæsitandi moram eligendum, & quod semel elegerit, non amplius ut dubium, quantum attinet ad praxin, sed ut verum & certum habendum est, ne cunctanti & intempestiva dubitatione tempus extrahenti occasio agendi pereat.

§. 4.

Tertia Prudentiæ pars est Providentiæ, quâ Vir Prudens actionis eventum, atque adeo quid ex ea tum sibi, tum aliis futurum sit, animò prospicit.

E X P L.

I. **E**X præteritorum reminiscencia, & præsentium circumspeditione pendet etiam futuri prospectus. Benè Comicus;

Ter. A- Istuc est sapere, non, quod ante pedes modo est,
delph. Videre, sed etiam illa, quæ futura sunt,
3. 3. Prospicere.

Hanc præcipuam Prudentiæ laudem Ciceroni tribuit Corn. Nepos in vita Attici; *Ei rei sunt indicio, præter eos libros, in quibus de eo facit mentionem, qui in vulgus jam sunt editi, 16. Volumina Epistolarum &c. quæ qui legat, non multum desideret historiam contextam illorum temporum. Sic enim omnia de studiis principum, vitiis ducum, mutationibus Reip. perscripta sunt, ut nihil in iis non appareat: & facile existimari possit, Prudentiam, quodammodo esse divinationem.*

II. Qua propter Vir Prudens in id intentus est,

1. Ut quæ impedimenta consiliis obesse, & quæ incommoda nobis aliisve ex actione hõc locò, hoc tempore, hõc modò &c. suscipienda provenire queant, quoad potest, prævideat. Hic utile verbum Comici,

ci; *Pol cavere, quàm pœnitere præstat. Et, Quod cavere possis, stultum admittere est. Quare neque nimio iugias, sive felicitis successus desiderio & moræ impatientiâ, iudicium in deliberando, & industriam in exequendo præcipitat. Latis Prudens non Epist. 78. credit, inquit Sen. omnem fortunæ licentiam in oculis habet, tanquam quicquid potest facere, factura sit. Neque igitur, si omnia præmeditatus successum ominetur prosperum, nimium fidit, non ignarus, animi præfidentis spem sæpè deludi. Qui multa a-* *Sen. de*
git, sæpè fortunæ potestatem sui facit, quam tutissimum Tran-
est raro experiri, ceterum semper de illa cogitare. & quill.
sibi nihil de fide ejus promittere. Navigabo, nisi quid Anim.
inciderit: & prætor fiam, nisi si quid obstiterit: & cap. 13.
negotiatio mihi respondebit, nisi si quid intervenerit.

2. Ut caveat scandalum, hoc est, ne dicat, vel faciat, quod alteri occasio peccandi esse queat, vel mœsticiam inferat. *Scandalum, ut non inicitè Ter-* *De vel.*
tull. nisi fallor, non bonæ, sed malæ rei exemplum est, virg. c. 3.
ædificans ad delictum. Bonæ res neminem scandalizant,
nisi malam mentem. Unde aliud Datum, aliud Accep-
ptum dicitur. Datum, est scandalum ortum ex cul-
pa ejus, qui illud objecit: atque adeò semper con-
junctum est cum gravi peccato dantis, naturâ quip-
pe suâ in aliorum offensionem & ruinam tendens:
etsi bona mens, firmo fidei virtutisque præsidio mu-
nita, non offendat. Quæ verò in scandalo accepto
culpa est, ea accipientis est, nisi ubi promiscuus re-
rum per se non illicitarum usus offensioni esse potest
parum firmis. Viri Prudentis & boni est ab utroque
scandali genere sibi cavere. Cùm enim id unum
studio habeat, ut & ipse & alii Deo veritatisque ob-
temperant, cautè providet, ne quam alii homines
ex eo, quod agendum suscipit, peccandi occasionem
arripiant. Unde sæpè omittit, quæ facere cætero-
quin ipsi integrum esset, quando videt, aliis ea fore
offendiculo. De scandalis verò, quæ ex mera acci-
pic-

pietium malitia proveniunt, non est, cur labores
Rom. 14: vir bonus, *ὁ τῶς ἰδίας τοῖς ἀλλοφροσύναις*, in suo sensu
 5. certus. Novitenim, Veritatis amorem, quem sibi
 legem dicit, deferendum fore, si hominibus, quàm
 Deo, placere & obedire malit.

§. 5.

Discretio, quarta eaque subtilissima Prudentia pars est, occupata in distinguendis bonis & malis, maxime autem, verisimilibus, quia prima fronte & vulgi judicio aut eadem, aut certe affinia sunt, penitus tamen inspecta tantò distant intervallò, ut alterum bonum, alterum malum deprehendatur.

E X P L.

I. **Q**uia vir bonus unum Veritatis amorem amplexus, in opinione, rerumque verisimilitudine non acquiescit, id operam dat, ut quæ veri vel boni specie imponere possunt incautis, accuratè discernat. Atque hîc, quæ regulæ Prudentiæ institutione ejus serviant, tantisper exposuisse, operæ pretium fuerit.

II. Quia deliberatio in constitutione finis & disquisitione mediorum versatur, usus discretionis in hac posteriore insignis est; Prudenti enim consideranda sunt mediorum *qualitas & numerus*, ut ubi plura se offerunt disquirenti; justum habere queat delectum. Quod ad *qualitatem* attinet, dispiciendum est, honestane sint, an turpia; utilia, possibilia, facilia &c. an contrà: itemque facta comparatione, quæ quibus meliora, faciliora &c. ut hæc contrariis rejectis eligantur. *Numeri* quoque mediorum habenda est ratio, cautè reputando, paucisne an pluribus obtinendo fini sit opus. Rem enim destinatam æquè commodè conficere valenti per pauca,

ca, pluribus non est utendum : quia in multitudine confusio & lapsus est facilior.

III. Ne verò, ubi obscurior est mediorum qualitas ex verisimilitudine rerum locus sit deceptioni, Prudens observat

1. Sæpe permitti posse, quod committere est nefas. Vulgo inter permissionem & commissionem nihil, aut paulò plus nihilò interesse videtur : hanc tamen ab illa plurimum differre, & res ipsa & exempla docent. Si tyrannus civem innocentem ad exitium deponcat à Republica, exidium minatus, nō tradatur. Dedere eum non potest, imò ne quidem deserere, ubi sine graviore patriæ periculo defendi posse spes est : sicut enim Resp. malum committeret, & tyranni sævitiam adjutaret. Interim si, quod JCris placet, non iniquum est innocentem cogi, ut pro redimenda patriæ salute fieri patiatur, vel faciat, quod exigit charitas, licebit Reipubl. permitttere (hoc est, non impedire) ut tyrannus innocentem immisiss satellitibus capiat. Non abs re Theodorus de Molossis quibusdam dixit apud Livium; *Equidem pro patria Lib. 45 qui lethum appetissent, sæpe fando audivi : qui patriam 6. 26. pro se perire æquum censerent, hi primi inventi sunt.*

2. Idem medium ad duos fines usui esse posse, quorum alter bonus alter malus. Exilire è turri, cui facies subiecere hostes, usui est ad fugam ex incendio, & simul servit ad propriam necem. Atqui fugam, quippe bonam per se capeßere licet : necem sibi, quippe malam, inferre nefas est.

3. Medium, quod ad utrumque finem facit, naturâ suâ subinde prius ad bonum, quàm ad malum finem : nonnunquam vice versa, prius ad malum, quàm ad bonum : aut certè ad bonum finem non facere, nisi consequenter ad malum. Ex. gr. Exilire è turri incensa in casu dato prius servit ad fugam, quàm ad sui ipsius necem : imò ad istam fugam facit non demùm consequenter ad necem suâ. Tali mediò uti licet, quor-

ries

ties iusta subest causa permittendi, i. e. non impediendi malum, quod consequitur. Rursus, gladio pectus sibi perfodere; facit tum ad fugam ex incendio, tum ad necem sui: verum prius ad hanc, quam ad illam: imò verò ad fugam istam nihil confert, nisi consequenter ad necem. Unde hoc genus media amplecti nefas est. Id enim qui facit, non jam solum illicitum quid fieri, puta, seipsum interimi, permittit, sed etiam grave crimen committit, cum nihil antiquius esse debeat lege Dei, quæ manere jubet, dum evoceris. Hinc satis expeditum est respondere quærenti; *An ob falsum crimen quæstioni subiectus rectè se reum confiteri possit, ut à tormentis liberetur?* Posse nego: quia falsi criminis confessio medium est, ad bonum finem, puta liberationem à tormentis, conducens, sed ita, ut usus iste dependeat à malo fine, extremo scil. supplicio, quod dabit iudici, post criminis confessionem frustrà præsidium in innocentia sua quæsiturus. Item, *An classiaris militibus liceat accendere commeatum pulveris nitrati, certò suo & navis interitu inscutoro, ne navis in hostium imminentium potestatem veniat?* Plerumque saltem licere nego: quia vix unquam contingit, causam subesse satis gravem, quæ audax factum defendi possit. Unde etiam parata responsio quærenti; *An cuiquam liceat seipsum interficere, ne peccare, Religionem Christi ejurare, pudicitiam amittere &c. cogatur?* Item an *εὐλογεῖν ἑξαρχὴν* censeri queat, si quis videns, se deinceps victurum in probrum ipsius Dei, Manes suos anticipat? quò pacto Hebræorum nonnulli impium Saulis, Israelit. Regis, factum nequicquam defendunt. Rectè Darius apud Curtium;

Alieno scelere, quàm meo, mori malo.

4. Eadem circumstantiis variantibus modo lege vetita esse, modo permissa. Ex. gr. aliena auferre etiam naturali jure prohiberi, nobis observatum est suprà,

ubi

ubi de Justitia. Cæterùm in extrema necessitate, si quis ad vitam à præsentè periculo tuendam necessaria sumat aliunde, cum furtum admittere, vel quod illicitum sit facere, negant vulgò Authores gravissimi: eò quòd tali casu, non auferat rem alienam, sed communem usu suam faciat, reviviscente pristina rerum communione in casu ineluctabilis necessitatis. Ea enim conditione & exceptione facta censerì debet rerum in Dominos distinctio, ut ubi noxæ & damno foret, ibi pristina valeret communitas. Sic in navigatione, si quando defecerint cibaria, quod quisque habet, in commune conferri debet. Sic defendendi mei causâ vicini ædificium orto incendio dissipare possum, & funes aut retia discindere, in quæ navis mea impulsæ hæret, si aliter explicari nequit. Variantibus verò circumstantiis, vel ubi par est alterius necessitas, quod ejus est, auferre non possum, ut meæ consulam necessitati: quia ipsa discretio dicat, potiorè hîc esse conditionem possidentis. Sic in communi naufragio non licet alterum de tabula, quam arripuerit, depellere, ut tute ea utaris ad enatandum &c.

5. Quia etiam in actibus, de quibus jus naturæ aliquid constituit, sæpè imago quædam mutationis fallit incautos, Prudens discernere novit inter *jus ipsum & rem*, de qua jus constituit: illud immutabile est; hæc mutationem recipit. Ex. gr. Si creditor, quod ei debeo acceptum ferat, jam solvere non teneor: non quia jus naturæ desierit præcipere solvendum quod debeo, sed quia quod debebam deberi desit. Ita si quem Deus occidi præcipiat, si res alicujus auferri, quod exemplis Isaaci & Israelitarum vasa ab Ægyptiis commodata auferentium illustrari potest, non licitum fiet homicidium, aut furtum; quæ voces vitium involvunt, sed non erit homicidium aut furtum, quod supremæ vitæ & rerum Domino auctore sit.

6. Vir

6. Vir Prudens discernit inter ea, quæ sunt *Juris naturæ* Præcipientis tanquam semper honesta, aut *Veritatis*, tanquam nunquam non turpia; & quæ sunt *Juris permittentis*, qualia non de imperatis naturæ, sed de indulgentia, non leges sed legum beneficia censentur. Quæ proinde sive omittantur, sive fiant, nihil peccatur, nisi quibusdam temporibus & occasionibus. Tale existimatur, bellum gerere in offendentes. Sic Prudens discernit ea, quæ *Juris naturæ* sunt *Propriè*, & alia, quæ, ut Scholæ loqui amant, *Juris* sunt, *reductivè*, puta per applicationem & interpretationem: sicut justa appellari solent, quæ injustitiâ carent: quale est illud, *quæ nullius sunt, cedere occupanti*: quod per se naturæ non est, sed tamen eò reducitur. Item denique alia, quæ ratio *honestæ*, aut *oppositis meliora* indicat, non tamen eandem cum his, quæ *Juris naturæ* sunt præcipientis & propriè dicti sunt, necessitatem inferunt, atque adeò *impropriè*, *Juris naturalis* dici solent. Quale est, velare notas sexus. Quò fortè referri potest illud Apostoli; *Aut an non ipsa natura vos docet*, quod vir quidem si comam nutriat, turpe ipsi est &c. Ad quæ verba Tertullianus notat; *Quæris igitur Dei legem? habes communem, istam in publico Mundi, & in naturalibus tabulis; ad quas & Apostolus solet provocare, ut cum in velamine faciei, Non natura vos, inquit, docet?*

1. Cor.

II: 14.

15.

De Coro-
na mili-
tis.

7. Prudentis est discernere *Dispensationem* sive *Relaxationem*, quæ legis cæteroquin manentis obligatio tollitur, & *Emendationem*, quæ legem interpretatur, declarando, legem tali casu non obligare, vel factum ab initio mente legis non fuisse comprehensum. Sic Maccabæi in hostem pugnârunt Sabbatho, non relaxatione legis, sed vera ejusdem interpretatione, quam etiam Servator comprobavit non uno locò. *Quis erit ex vobis, qui habeat ovem unam, & si ea inciderit Sabbatho in foveam, prehen-*
sam

Matth.

12: 11.

fam non erigat? Et omninò *Discretionis* usus non potestremus in recta legum & pactionum interpretatione spectatur, cujus mensura est collectio mentis ex signis maximè probabilibus, qualia sunt verba & conjecturæ aliæ. De quibus regulas benè multas tradunt *JCti*, ubi de Interpretatione, verborum significatione & regulis juris.

8. Prudentis est, vera bona à falsis, item, quæ simpliciter bona, ab iis, quæ huic illive talia habentur, cautè discernere, atque adeò non opinione, non more vulgi, non sensu & affectu, sed ratione æstimare, & rebus ex natura ipsarum pretia imponere. Eam in rem utile est, non tantum Bonorum genera, sed & usum atque fallaciam sensuum & affectuum nòsse, ut horum errata ratione corrigi possint. De quibus omnibus abundè satis dictum, ubi de Intellectu, Affectibus, itemque de Bono & Malo.

9. Insuper quanquam nobis non tantum debeat esse fiduciæ in Ratione nostra, quin aliorum prudentum, quibuscum vivimus, consilia & actiones inspicere & sequi æquum putemus, in rebus non necessariam & evidentem honestatem involventibus; prudentiorum tamen placita ad rerum agendarum difficultates confestim expediendas audivisse non sufficit: *Discretionis* est, 1. Eorum consilia ad propriæ Rationis trutinam exigere, ut quid suò cuique judiciò statuendum sit, percipiatur. 2. Hactenus actiones prudentum potius, quàm consilia verbis data sequi. Etenim, ut rectè intelligamus, quidnam illi revera optimum esse sentiant, utique satius est & tutius, quid agant, quàm quid loquantur, animum attendere: cum in hujusmodi rerum genere, de quo nobis sermo est, semper verisimilius sit, illos in suis, quàm alienis, negotiis cautius & melius consulere. Adde quòd vulgò homines ita sunt morati, ut perpauci, quid sentiant, eloqui velint. Quid? quòd hæc cautio & hoc habet commodi, ut

alienæ actionis successu sapere discamus; *Scitum est, periculum ex aliis facere, ubi quod ex usu fiet.* 3. Si tamen eorum consilia sequi necesse habeamus, *Discretionis est, non quævis cæcò admittere obsequiò, sed moderatissima, tum, quia ad exequendum facillima & ut plurimum optima sunt; ceterè enim omne nimium vertit in vitium: tum etiam, ut, si nos aberrare contingat, minus saltem à via recta deflectamus, mediam tenendo, quam si extremarum alterutram elegerimus cum opposita altera fuisset sequenda.* Nec temerè additum illud, *inspicienda & sequenda nobis esse consilia & actiones prudentum, quibuscum vivimus.* Cur enim in Europa degens Persarum vel Chinesium mores sequar, etsi forte apud illos sint, qui prudentiâ nostraribus præstent? Unde, quanquam ad virtutem non magni interesse videatur, qualis sit corporis cultus, quales vestium moduli, quales saluandi & compellendi ritus, qualia reverentiæ signa &c. in his tamen à moribus regioni vel civitati, in qua vivimus, vulgò receptis nulla necessitate recedere, & peregrinos, licet fortè commodiores & concinniores, imitari, non modò indecorum, sed etiam parùm prudentis est: cum id fieri non possit, quin alii vernaculi moris amantes, ea novitate non tantum offendantur, sed etiam se vituperari, vel saltem sperni, credant, ipsi verò modorum novatores ineptæ novitatis typho, quasi plus aliis saperent, superbire videantur.

10. Ad eandem denique prudentiæ partem pertinet, *dignoscere characteres & signa*, quibus animi habitus & affectio in verbis, vultu, gestu, vitæ instituto atque tenore se prodant: quod studium ad captandam rei bene gerendæ opportunitatem, maxime verò in congressu hominum, magno usui est. De quo nonnihil supra, ubi de *habitu animi*, Part. I. Cap. VIII. Juvat eam ad rem legisse *Characteres Theophrasti.*

C A P. XIII.

De Virtutis acquirendæ adminiculis
in genere.

§. I.

Illud sæpè quæsitum Philosophis antiquis ; *An virtus hominibus obveniat consuetudine, an naturâ, an divina quadam sorte ?*

Quid respondendum sit juxta præcepta de causis virtutem procreantibus, suò locò tradita, nobis in promptu est : nimirum, *Virtus non solum ex initio suo, sed etiam ex incremento spectata, divini muneris est : Deus, qui bonum opus cœpit in nobis, idem etiam perficit, gratia auxilium & ardorem ministrans, ut ingressi virtutis iter, constanti cursu persequamur, & viam hanc crebrò calcantes majores usque & usque progressus faciamus.*

E X P L.

1. **H** Actenus de Virtute : nunc quod superest, dispiciendum de virtutis comparandæ adminiculis : quâ parte, quàm fieri poterit brevissimè defungemur, quia passim multa nobis dicta, quæ usui esse possunt ad hoc institutum.

2. Non temerè quæsitum Philosophis, ut Plato- *In Me-*
ni, Aristoteli, aliis, *an virtus hominibus obveniat non.*
consuetudine, an &c. ut de virtutis acquirendæ adju- *Nicom.*
mentis rectiùs præcipere possent. Sunt autem, & *l. 10.*
fuere jam olim, qui ab altera quæstionis parte ma- *c. 10.*
jorem in modum abhorrent, ut qui plurimum præ- *Eudem.*
stantiæ & perfectioni humanæ naturæ decessurum *l. 7. c. 14.*

autument, si quis naturâ, vel divinô quôdam fatô bonus foret, eò quòd necessariò, non suô arbitriò, neque adeò ulla sua laude, bonus futurus esset. Sic scilicet libertati voluntatis humanæ & laudi virtutis malè metuent, qui hæreditariam illam & insuperabilem indolis humanæ pravitatem & verum virtutis ingenium ignorant. Ergone Deum minùs adorabilem putabimus, quòd necessariò Optimus est? Et si quis mortalium divinô quodam fatô, vel naturâ bonus tam vivido & efficaci sensu honestatis esset imbutus, ut perinde impossibile foret, ipsum contra hunc sensum quicquam committere, ac hominem sanæ mentis, nec ullis oppressum calamitatibus seipsum pugione transfigere; eum ne quavis laude dignissimum, & veluti heroem, Deorum stirpe prognatum, negabimus? Quemadmodum Homerus, Aristotele citante, Priamum de Hectore dicentem inducit, eò quòd valdè esset bonus;

Nicom.

1.7.c.1. Ἄνδρες γὰρ θνητῶ πατρὶς ἐμμεναι, ἀλλὰ θεῶν.

nec eum esse putares

Mortali genitore satum, at genus esse Deorum.

3. Nec si Virtutis Authorem primum laudamus Deum, vera Voluntatis libertas, & justa Virtutis laus delibatur. Eam enim gratia divina efficaciam in animum nostrum exerit, ut nos quàm maximè volentes, atque adeò liberrimos reddat: Et virtus ipsa, quò corroborata magis est, & immota, eò plus laudis habet. Cui igitur bono, inquis, hominem hortatibus, promissis, minis &c. extimulare ad virtutem amplectendam, si gratiæ divinæ beneficium est? Resp. Hortatus &c. externa sunt virtutis instillandæ organa, gratiæ divinæ non opponenda, sed subordinanda: neque enim Deus cæco impetu

impetu non conscios vel invitos ad virtutem impellit, quemadmodum corpora alieno impulsu cident. Enim verò gratiam intellectui lucem affundit, & suaviter voluntatem flectit, adhibitis eam ad rem hortationibus, promissionibus &c. ut intelligamus, quid & quamobrem velimus & agamus. Quò autem hortatibus illis & promissis persuasi reapse virtuti nostradimus, & recta facimus, Gratia Dei victoria est,

4. Quando igitur hinc gratia divinae necessitas, inde adminiculorum externorum utilitas est agnoscenda, illa nobis quidem enixè ambienda, his verò sollicitè utendum est. Proinde quod unum possumus, optimis quibusque praeceptis, argumentis & exemplis alii alios instruamus, excitemus & urgeamus ad faciendum, quod communis officii conscientia & recta rerum agendarum ratio postulat.

§. 2.

Præcepta de Virtute acquirenda tria sunt.

Primum Virtutem esse necessariam, evincit.

Secundum eandem esse possibilem, ostendit.

Tertium adminicula Virtuti comparandæ servientia suggerit.

Virtutis colendæ necessitatem evincunt propriae conscientia sensus, communis naturæ lex, suum cuiusque sibi suisque commodis prospiciendi officium, relatio denique nostri ad Deum multiplex.

E X P L.

I. **Q**Uæ menti ingenita est veri honesti atque decori notitia facit, ut quid verum falso, quid honestum turpi intersit, ubi vel parùm attendere velit, illicò agnoscat, quin imò idem agnosci, suam quam maximè referre persentiscat, quia illa conscientia

scientiâ homini nihil propius adest, nihil præsentius, familiarius nihil. Hinc nemo hominum est, qui ad Virtutis cultum se obligari, si per ignaviam & morum pravitatem non sentiat, saltem ubi de virtute differentem audiverit, negare possit. Scilicet legem illam rationis, quæ per conscientiam se exerit, menti suæ insculptam nemo eradere, nec refingere, nedum refingere potest, quippe quæ veritatem exhibet æternam & indemutabilem, atque inextricabili nexu ad suamorem devincit.

II. Comuni lege naturæ cuncta tenentur, quæ sua, hoc est, naturæ suæ consentanea sunt, agere. Homines igitur humanam, non belluinam, vitam degere oportet. Atqui certè belluina esset hominis vita, si Virtutis rectæque rationis fructu careret. Quicquid enim infra virtutem rectamque rationem in nobis est, id non nos ipsi, sed bellua quædam est, nobis addita, quam subjugare, veroque homini obsequentem reddere debemus, si vel maximè nostram, non pecudis, vitam vivere velimus. Inde adeò præsci Philosophi, referente Philone, felicitatis humanæ finem dixere τὸ μὲν ἀνθρώπινα φύσεως ζῆν, consequenter naturæ vivere. Et Stoici alta & crebra voce ingeminant illud suum; Idem esse beatè vivere, & secundum naturam. Quod Epicætetus non semel extulit; συμφώνως τῇ φύσει ζῆν concorditer naturæ vivere.

Lib.

πρὸς

Φύσεως.

Sen. de

vit. beat.

c. 8.

Epist. 5.

& alibi.

III. Sibi suisque commodis prospiciendi officium naturæ quoque sensus unicuique ingerit. Unde non defuere Philosophi, qui dicerent, rationem cavendi tum à præsentis vitæ calamitatibus, tum ab horrendis inferorum pœnis, certissimam esse in virtutis cultu. Id quod multis testimoniis ex Platone & aliis comprobari posset. Memorabile est illud Strabonis de Indorum Sapientibus, quos Gymnosophistas vocant; Hanc vitam habendam esse quasi recens concepti fœtus statum: mortem verò partum esse ad eam que

Lib. 15.

quæ verè vita est, planeque beatam, iis scilicet, qui sapientiam sectati fuerint.

IV. Nostri Denique relatio ad Deum multiplex hujus tanti officii servitutem etiam gravioribus argumentis astringit. Quid enim, quòd Deus est Creator noster, Conservator, Dominus, Exemplar, Finis, Bonum, quid, postquam à vera creationis nostræ origine & lege degeneravimus, nostri per Christum redemptio, quid Sanctificatio, quid universa salutis œconomia, aliud clamant, inculcant, ingeminant, quàm virtutis cultum? Illuxit gratia Dei salutaris omnibus hominibus, erudiens nos, ut, abnegata impietate & mundanis cupiditatibus, temperanter & justè & piè vivamus in hoc seculo. Cum primis verò illud nobis oportet esse persuasissimum, totam doctrinam, qua religio Christiana continetur, tum demùm nobis fore fructuosam, si in pectus transfundatur, & in mores abiens, nos in se transformet.

Tit. 2:
11. 12.

§. 3.

Virtutis deinde cultum esse possibilem arguunt auxilia gratia promissio in Scripturis S. facta eam ardentem expetentibus; Exempla proborum, qui bono cum Deo superatis feliciter difficultatibus magnam virtutis laudem adepti sunt; Et sua cujusque conscientiae sensus, qui ubi perperam egimus, nos aliter agere potuisse testatur, atque turpis facti poenitudine tantò gravius nos affligit, quò abstinere ab illo facilius fuisse comperimus.

E X P L.

*Epiſt.
Ench.
cap. I.*

1. **N** Iſi perſuaſum habeamus, quod hòc præceptò docemur, omne virtutis ſtudio non modò elanguere, ſed prorsus emori, necelle eſt. Unde apud Philoſophos inculcata diſtinctio, τὰν ὀντων τὰ μὲν εἰς τὸν ἐφ' ἡμῶν, τὰ δὲ ἐκ τοῦ ἐφ' ἡμῶν, *Res quædam in poteſtate noſtra ſunt, quædam non ſunt.* Inter ea porrò, quæ ſunt ἐφ' ἡμῶν, connumerant virtutem: id quod à nobis aliter admitti non poteſt, niſi quatenus ad virtutem acquirendam rectè & conſtanter voluiſſe ſatis eſt. Interim tamen voluntate noſtra nihil magis proprium habeamus, teſtante conſcientia, quam fruſtrà refellas; attamen rectè & conſtanter velle, quod ipſum veræ virtutis eſt, non in poteſtate noſtra ſitum, ſed gratiæ divinæ munus eſt. Cæterum quod maximè mirum, quibus nihil opis eſt in iſtis ad benè beateque vivendum, iis tamen non ſunt argumenta, quibus naturæ impotentiam excuſare & adverſus peccati impropria conſcientiam tranquillare poſſint: ſentiunt enim, impotentiam iſtam, quanta, quanta eſt; ſuum eſſe vitium, tantò vituperabilius, quò ipſa eſt inſuperabilior. Neque tamen, ſi virtutem ſuo pte Marte

com-

comparare non valet homo, ejus acquisitio desperanda est. Enimverò possibilem esse docent illi studio promissa auxilia, plurima illi servientia adjumenta, & virtutis exempla. Auxilia Gratiae & externa illa Virtutis quærendæ adminicula non sunt dissocianda; quasi illa quidem votis expetere velis, hisce verò uti nolis. Cæterùm quid usus & exercitatio, Authore & Fautore Deo suscipienda, in hisce externis possit, suâ quemque conscientia, officii religio & experientia docebunt.

§. 4.

Adjumenta Virtuti comparandæ suppeditat tùm Theologia, tùm Philosophia: quorum quæ prima putamus, tantum percensebimus.

Primum quod Theologia suppeditat, est sui ipsius abnegatio.

UT Virtutem compares, quæ unô Veritatis amore continetur, necesse est, amorem tuî, & vitia, quæ inde nascuntur, abdicere. Hæc est illa nostri abnegatio, quam discipulis suis à primo *Matt. 16. 24.* rocinio mandat Servator. Eò pertinet 1. Imbecillitatem suam & *edivitiar* ita agnoscere, ut homo sibi diffusus ad gratiam Dei recurrat: qui certè proximus ad Virtutem gradus, imo nonnullus in Virtutis studio profectus est. O quantum ille profecit, qui se *Cato.* non suum edoctus, dominium regimenque suî propriæ *Instit. lib. III.* rationi abrogavit, ut Deo asserat! Nam ut hæc ad *c. 7. §. 1.* perdendos homines efficacissima est pestis, ubi sibi ipsis obtemperant, ita unicus est salutis portus, nihil nec sapere, nec velle per seipsum, sed Dominum præcuntem duntaxat sequi. Idcirco eodem pertinet 2. Sibi renunciare: quia nisi à consideratione tuî discedas, teque ipsum exuas, nec unicùm Veritatis amorem tibi

Instit.
Ibid. 5. 4.
5. &c.

tibi regulam vitæ dices, in quo virtus est; nec officia virtutis in Deum & proximum servanda præstabis. Quomodo enim in utraque fortuna à solo Deo pendebis, & omnes vitæ tuæ partes ejus arbitrio gubernari feres, nisi te totum Domino resignaveris? Quomodo, quæ charitatis & justitiæ opera sunt, proximo exhibebis, nisi tibi renuntiaveris, ut aliis totum te addicas? Utilissima in rem nostram præcepta videsis apud D. Calvinum, ubi de Vita hominis Christiani.

Act. 15.
19.
Gal. 5. 6.

Secundum adminiculum, quod Theologia suggerit, est vera Fides in J. Christum Servatorem. Quam virtuti comparandæ adminiculum esse Scriptura Sacra multis confirmat: ut quando fide corda purgari: ex fide charitatem gigni &c. testatur. Talis autem fides est, geminò suo, quod nobis præstat, beneficiò. Primum enim in nos, Christo Salutis Authori & Præsidi hõc ipsò fidei vinculò junctos inexhaustum gratiæ divinæ fontem derivat, unde gratiam supra gratiam haurientes pro suo quisque demerso, ad obeunda quælibet religionis, virtutis & professionis suæ munia idonei reddimur. Deinde fides acuendo virtutis studio gravissima quæque argumenta è Scripturis S. depromit & animo infigit. Denique fides omnia explorat, & quod bonum fuerit, retinendum, faciendumque conscientiæ intimat. Unde, quod ex fide non est, peccatum esse dicitur. His pro tertio adminiculo accedunt fervida preces, quibus animus Deo devotus, suæque indigentiae sensu tactus identidem ad Deum seu inexhaustum bonorum fontem recurrit: Assidua deinde S. Literarum lectio & meditatio, quippe quæ discendi & proficiendi cupidum ad omnem doctrinam rñs xpiat, erudire possunt: Diligens præterea Inspectio exemplorum virtutis, cum primis Christi, in quo vitæ exemplar est absolutissimum &c.

Arduum opus aggreditur, qui morum emendationem & virtutis cultum suscipit. Id igitur qui
tentat

tentat non auctore & fautore Deo, neque adeò ejus opem efflagitat, pro vera virtute evanidam illius umbram & inane imitamentum sectatur. Hujus veritatis ne quidem paganos prorsus ignaros esse si vit ipsa conscientia vis. Unde Epictetus de studio compescendi affectus, *Certamen quidem magnum est, inquit, opusque planè divinum: Dei igitur memineris, eum invoca opitulatorem & auxiliatorem.* Precibus jungenda lectio & meditatio S. Literarum assidua, quas jam supra curæ nostræ commendatas memini eo præferim nomine, quòd nulla Philosophorum præcepta de moribus illarum doctrinam vel millesima ejus parte æquiparant. Inspicienda denique Sanctorum exempla in S. Literis memoriæ prodita, sed eà diligentia, & quotidiana vitæ consuetudine, ut non jam vivi eum mortuis, sed præsentibus cum præsentibus familiariter conversari, eorumque sermonibus & gestis αὐτῶν οὐκ ἔστιν ἀπορίαι interesse videamur. Epicteti præceptum est; *Cùm aliquid negotii tibi futurum est cum quoquam, ipse tibi proponite, quid in ea re facturus fuisset Socrates aut Zenon. Ita fiet, ut te ratio non deficiat, qua id quod objectum fuerit, ritè administres.* Malim ego Philaretum sic apud se reputare. Quid in ea re facturus fuerat Enochus, quid Noachus, quid Abrahamus, quid alii justitiæ & sanctæ vitæ testimoniò ornati Viri in S. Literis?

*Arrian.
Comment.
lib. 2. c. 18.*

*Enchirid.
Cap. 51.*

§. 5.

Et si quæ Philosophi ex sua arte non pauca suppeditant virtuti sive comparandæ, sive perficiendæ adjumenta, per se nec universa, nec singula præstent, quod illi promittunt, eos nihilominus audivisse juvabit.

IN eo sanè deficit Philosophia, quòd universalem vitiatæ naturæ humanæ impotentiam vincendi, veramque virtutem acquirendi adjumenta non supeditet, quæ nulla satis commoda habet. Utrumque cum polliceatur & præstet sola Religio Christiana, incomparabilem inde suam nobis probat excellentiam. In hanc rem egregia vide apud Lactantium Instit. Div. lib. 1:1. cap. 26.

§. 6.

Eam in rem Philosophi præcipiunt quadam cognoscenda; quadam facienda.

E cognoscendis præcipua sunt sequentia.

1. **D**Eum esse, cujus Providentiâ omnia gubernantur, cujus potestas immensa, decreta certa & infallibilia &c.

De Deo quæ cognoscenda & tenenda sint Philareto, diximus, ubi de Pietate. Nunc quid Philosophi in rem nostram consulere possint, dispicimus. Epictetus, Religionis erga Deos immortales, inquit, præcipuum illud esse scito, rectas de eis habere opiniones: ut sentias & esse eos, & benè justèque administrare universa: parendum esse eis, & omnibus iis, quæ fiant, acquiescendum: & sequenda ultrò, ut quæ à mente præstantissima regantur. Sic enim nec incusabis eos unquam, nec ab eis negligi te conquereris &c.

2. *Men-*

*Enchir.
c. 38.*

2. *Mentem humanam toto suo genere à corpore animali, cui juncta est, esse diversam, atque adeò verè immortalem, & corpori, in pulverem brevi tempore reversuro, supersitem fore.*

Animi immortalitatem & caduci corporis mortem meditando sibi familiarem fecisse, permagnam vim ad depellendum mortis metum, virtuti inimicum, & extirpandas cupiditates, quæ sola corporis incolumitate terminantur, habere existimant Philosophi. Quidni verò, inquiunt, si seriò consideres, brevi futurum, ut personam mutes, & corporis exuvias in pulvere deponas, atque insuper quæcunque ad hanc compagem conservandam, augendam & ornandam pertinent, divitias puta, honores, sensuum voluptates &c. æternum relinquas: Proinde longè consultius fore, nos maturè à caducis & incertis desuefactos, & à societate hujus carnis divulsos, purioribus diviniusque operationibus & voluptatibus, quæ ab illa non pendent, assue fieri. Quæ ipsa summa est Philosophiæ Platonis, quam inde *μελέτη θανάτου*, meditationem mortis definivit. Ergo non rectè Plinius, *Atque etiam lib. 7. morbus est aliquis, per sapientiam mori.* Enimverò 6. 50: sapit, qui in longinquum prospicit, nec præsentis voluptates infinita malorum serie occupari finit & opprimi.

3. *Non metuedum esse, ne, nimis magnificè de operibus Dei sentiamus, si Mundum hunc captu nostro amplio rem esse judicemus: neque putandum, fines, quos Deus sibi proposuit in creando universo, ingenii humani viribus posse comprehendere.*

Si universum Mundum captus nostri limite coarctemus, cælosque omnes non nisi terræ causâ factos, & terram non nisi hominis gratiâ productam, Hominem verò esse parvum Mundum, vel Universi compendium, existimemus, hinc proclive nobis erit, cogitare, terram hanc esse præcipuam homi-

hominis sedem, hæcque vitâ melius nihil ad nos pertinere. Inde porro fiet, ut vera nostri cognitione neglecta, defectus, quibus ipsi nobis carere videbimur, aliis rebus creatis affingamus, insolenter nos efferamus, Deoque esse à consiliis, & mundi, quem, ut inepta opinio est, nobiscum circumferimus, divisum cum ipso imperium suscipere velimus. Unde deinceps inanum curarum & sollicitudinum nec finis, nec modus. Quapropter Philosophi, ut vel hinc animum ad modestiam forment, universi amplitudinem indefinitam cogitare jubent, & considerationem finis operum divinorum *Virginem* dicunt *Deo sacram*, quæ nihil demonstrationis parit. Quidni verò, quæ particula sis mundi in stupenda Operum Dei Vastitate, considerans, demississimè de te, augustissimè de Deo sentias, & admirabundus omnipotentiam ejus deprædices? Abyssum verè dixeris vastissimam hanc universi molem. Tellus, mundi portio, quæ homini & omne genus animantibus data sedes est, *puncti instar habet*. Saturnus, si qua fides calculo, plus minus 10800, terræ semidiametris ab eadem distat, cujus numeri duplum ad Saturni orbitam est ut 1. ad 3. $\frac{1}{3}$. Quod si datâ Orbitæ Saturni semidiametrò semidiametrorum terræ 10800, methodò triplicatæ proportionis procedas, quot, amabò, Terras una capiat Saturni Orbita? Quid si altiùs ascendas ad ipsum fixarum Orbem, quas quidem calculus nunquam tam longè distitas finget, quin, multò sublimiores statui, nulla phænomena prohibeant, ecquis demum prodigiosissimum numerum, qui inde conficeretur, inibit? Quid si mundo, ut debes, indefinibilem suæ molis magnitudinem assignes, quam purabis fore rationem terræ ad Mundum? Aufer maria, lacus, deserta, loca inculta &c. quantillum terræ supererit, quod in censum venire debeat. *Hæc, inquit Plinius, est materia gloriæ nostræ, hæc sedes*

*sedes : hinc honores gerimus , hinc exercemus imperia , Lib. 2.
hinc opes cupimus , hinc tumultuatur humanum genus , hinc Cap. 68.
instauramus bella etiam civilia , mutisque cedibus la-
xiorē facimus terram. Si qui terrarum Domini
Alexandro similes victoriarum armorum gloriam
rantillō Mundi spatiolō terminari indignantur , in
se dictum meminerint , quod eleganter Romanæ
fidicen Lyrae ;*

*Latiùs regnes avitum domando
Spiritus , quàm si Libyam remotis
Gadibus jungas : Et uterque Pænus
Serviat uni.*

*Lib. 2.
Od. 2.*

Cùm fortè præamplum tibi est prædium : quantus tibi vidēre Dominus ? Inspice mappam Geographi-
cam , nuncubi reperias illum angellum , qui unus
rantoperè tibi ridet ? Versaris inter Civitatis , Col-
legii &c. focios atque consortes , apud quos non-
nullam fortè sapientiæ vel opulentia opinione ,
aut rerum domi bellive benè gestarum laudem ob-
tines : nā videbere tibi , quantivis pretii : Fac sis ,
cogites hominum milliones , biliones , triliones &c.
quos omnia retrò secula dedere , & futura fortè da-
bunt : cheu ! quantum est tuū similiū ? quantum
te superiorum ? Adi urbes amplas & frequentes :
nōstine , quàm obscurus futurus ? Ut existeres fe-
cit Deus : sed quid tandem ut ex te caperet commo-
di ? Ecce gentes quasi stilla situla , quasi momentam
statera , reputata sunt. Quòd si frugi esse nolis ,
quid te futurum censes ?

4. Quamvis quisque nostrum persona sit ab aliis di-
versa , cujus proinde res ab orbis reliqui rebus quo-
dammodo sint sejuncta , nihilominus non posse quemquam
per se solum subsistere , sed nos singulas revera esse toti-
dem partes hujus universi , hujus terrarum orbis , hu-
jus civitatis , hujus familiae &c. quicum nascendi sorte ,
domi-

domiciliò , sacramentò , conjuncti sumus : ergò Totius ,
cujus quisque se partem profitetur , Bonum bono suo ,
servatò modò & ratione , esse anteponendum.

De Veritate hujus præcepti videsis suprà , ubi de
Bono suo & communionis , Part.I. Cap.IX. §.3.& 5.
Ejus porrò cognitionem ad virtutem acquirendam
prodesse vel inde patet , quòd , qui omnia ad se re-
ferret , neutiquam religioni haberet , quosvis pro-
miscuè , spe commodi sui , circumvenire , fallere ,
fraudare , atque adeò fidei suæ prodigus nullum so-
cietati , amicitia & omninò virtuti locum relinque-
ret. Cùm ex adverso , si quisque , ut par est , se
tanquam partem communitatis spectet , ei haud du-
biè volupe sit futurum omnibus prodesse , & , qua-
rèntus occasio feret , alienaque commoda postula-
bunt , adire pericula , ipsamque adeò vitam suam
publicæ salutis causâ profundere. Ex qua confide-
ratione facinora illa , quæ heroica dici solent , pro-
ficiuntur.

5. *Affectus , quibus Rectricem damus Virtutem ,
ut plurimum eò nos fallere incautos , quod bona in quæ
prosequenda animum abripiunt , majora nobis repræ-
sentent , quàm reapse sunt ; indeque adeò fieri , ut , quas
afferunt , voluptates spe nostra minores & brevioris
moræ sint , insequente pœnitidine & dolore.*

Hujus præcepti cognitionem usu sibi familiarem
fecisse eò pertinet , ut affectu quocunque commoti
judicium de re prosequenda vel omittenda , quod
Virtutis negotium est , tantisper suspendamus , dum
affectus sic insuper habitus sensim defervescat , ne
falsa bonorum specie deludamur. Unde illud Epi-
cteti ; Si voluptatis alicujus imaginem animo concepe-
ris , moderare tibi , ne ab ea movearis : sed & rem-
examina , & tibi ipse deliberandi præbe spatium.
Deinde utriusque temporis memento ; iùm ejus , quò
voluptate perfrueris ; iùm ejus , quò percepta jam vo-
luptate

inuptate dolebis, teque ipse objurgabis. Atque his illa confer; si abstinueris, fore ut gaudeas, teque ipse colaudes.

§. 7.

Ad assequendum quod in votis est, sequentia deinde Philosophi facienda præcipiunt.

1. **Q**Uæ hæcenus cognoveris instituto tuo profutura, frequenti & diuturna meditatione menti sunt *infigenda, ut in habitum convertantur.*

Quia ad unam eandemque rem animum continenter advertere nequimus, facile fit, ut quantumcunque perspicuitatis habuerint argumenta, quibus persuasi veritatem admisimus, postea tamen falsis speciebus delusi in contrariam opinionem abducamur, nisi veritas cognita in habitum abiverit. Atque hoc sensu virtus rectè *habitus* dicitur.

2. *Nunquam committendum quicquam contra Conscientiam: enimvero eadem in minimis perinde ac maximis integra & intemerata est servanda. Vide supra ubi de Circumspectione Part II. Cap. XII. §. 3.*

n. 4.

3. *Quod, consulta Veritate, tibi visum fuerit optimum, ea lex sit inviolabilis. Epict.* *Enchir. c. 75.*

4. *In singulis quæ nobis occurrunt, exercendæ virtuti quaratur materia. Quidlibet enim vel rectè fieri potest, vel perperam; decorè vel indecorè; justè vel injustè; certa ratione & modò, vel secus. Idcirco semper nobis invigilandum, nec segniter dispiciendum, quid, quemadmodum decet, agamus; & quid, ut par est, feramus. Unaquæque res binas* *Epict. c. 65.*
habet ansas; unam tolerabilem, alteram intolerabilem. Si frater injuriam fecerit, non eâ prehendas, quâ facit injuriam; ea enim ejus ansa non est tolerabilis: sed illic potius, esse fratrem, esse unâ educatum.

X

§. VI.

§. *Vigilantiâ & sollicitudine animi, itemque continua ingenii & artis exercitatione opus habet Philare-tus: Illâ quidem, ne quod affectu incitatus agit in consuetudinem verti sinat: Hâc verò, ut contractæ consuetudinis vim infringât.*

Epist. 50. Laborandum est, inquit Seneca, & ut verum dicam, ne labor quidem magnus est, si modò ante animum nostrum formare incipimus & recorrigere, quàm indurescat pravitas ejus. Sed nec indurata despero: Nihil est, quod non expugnet pertinax opera, & intenta ac diligens cura. Robora in re-ctum, quamvis flexa, revocabis: curvatas trabes calor explicat: & aliter natae in id finguntur, quod usus noster exigit: quanto facilius animus accipit formam, flexibilis, & omni humore obsequentior? Hactenus Seneca. Industria porrò in id omnis im-pendenda, ut motus spirituum animalium his illis-ve cogitationibus junctos, usuque firmatos & fami-liares factos (in quo ipsa vis consuetudinis consistit, vide supra Part. I. C. VI II. §. 4.) sejungas. Id fieri posse & ratione & experientiâ confirmatum est. Si, notante Philosopho hujus seculi, habitus per uni-cam actionem acquiri possit, velut cum ex inopi-nato res quaedam valde sordida reperitur in cibo, qui avidè & summa cum voluptate comede-batur, inopinatus ille casus usque adeò mutare potest cere-bri dispositionem, ut talis cibus posthac sine horro-re videri nequeat: haud dubiè actio etiam atque etiam iterata idem faciliùs præstabit. Laudatur So-cratis industria in id maximè intenta, ut affectio-nes animi motusque cupiditatis haberet in potestate. Convicta a quo animo ab uxore tolerabat domi, ut mo-deratius injurias ferret ab inimicis in foro: post pale-stram cum vehementissimè sitis ussit, abstinebat potu, ne, ut ipsemet agebat, affectibus obsequi assuesceret: honestas quoque voluptates, ubi non essent necessaria, respuebat, ut se faciliùs contineret à turpibus &c. Hâc in-

*De pas-sionib.
Part. I.
§. 50.*

*J. el. Pe-regr. de emend.
af.*

industriâ & exercitatione id tandem consecutus dicitur, ut & fortunæ tenuitatem regis opulentix anteferet, & injuriosius appellatus non permoveretur, pulsatus non excandesceret, morti demum per summum nefas addictus, nulla vivendi cupiditate adduceretur, ut quicquam remitteret de celsitudine animi, vel causam sceleratos apud judices dicere sustineret. Tenendum verò interim, Philosopho non posse probari studium, quò affectus affectu contrario in ordinem cogitur; quemadmodum venatores & aucupes belluarum operâ ad belluas, volucrum ad volucres capiendas utuntur. Et si enim is legum civilium in Rep. usus sit, ut metu & spe affectus, pejores coërceant: tamen non modò nobilius sed & longè satius est, debellare affectus suos armis propriis, hoc est, firmis animi decretis faciendi semper, quod amor Veritatis convenit, quàm armis alienis, vel ab ipso hoste petitis: quia animus affectum affectu pellens cò sanè miser & mancipium esse non desinit: quemadmodum si in Civitate factio factione supprimitur, non æquè damnò caret, ac si ratione & æquitate turbæ consopiantur, & mutua civium benevolentia redintegretur.

6. *Conversatio cum Probis maximè juvat.* Nulla res, inquit Seneca, magis animis honesta induit, *Epist. 94.* dubiosque & in pravum inclinantes revocat ad rectum, quàm bonorum Virorum conversatio. Paulatim enim descendit in pectora, & vim præceptorum obtinet, frequenter audiri, aspici frequenter. Occursus ipse sapientium juvat: & est aliquid, quod ex magno Viro vel TACENTE proficias.

7. *Examen quotidie apud se instituendum, quo quisque se ipsum sibi velut Censorem & Judicem ferat, & priusquam somnum capeffit, studia sua, dicta, factaque diurna recogitet juxta illud;*

*Mollia ne prius obducatur tua lumina somnus
 Exacti quàm ter reputasti facta diei:
 Quid lapsus feci? quid rectè? quid boni omisi?*

Eò salubris instituti consiliò & fructu, ut quæ mala fecerit, severè apud animum reprehendat corrigatque: & rectè factorum memoriâ veluti stimulo & protelo Virtutis, sanctum Voluntatis suæ propositum magis magisque firmet. Hæc disciplina Pythagoræ apud Laërtium, jubentis discipulos, quoties domum repeterent, seipsos excutere; *Quid prætergressus? quid gestum in tempore, quid non? Animus*, inquit Sen. quotidie ad rationem reddendam vocandus est. Faciebat hoc Sextius, ut consummato die, cum se ad nocturnam quietem recepisset, interrogaret animum suum: quod hodiè malum tuum sanasti? Cui vitio obstitisti? qua parte melior es? Et paulo post; *Quid pulchrius hac consuetudine excutiendi totum diem? qualis ille somnus post recognitionem sui sequitur? quàm tranquillus, altus & liber, cum aut laudatus est animus, aut admonitus, & Speculator sui Censorque secretus cognoscit de moribus suis?*

E T H I C A E

LIBER SECUNDUS,

QUI EST

EUDÆMONOLOGIA

D E

Præmiis Virtutis, in quibus est
hominis Beatitudo.

C A P. I.

De Summo Bono & Fine hominis
in genere.

§. I.

*Aretologiam seu Doctrinam de recta Vita, excipit
Eudæmonologia, sive Doctrina de recte vite præmio
quod est beata vita.*

E X P L.

HActenus de Virtute, ejusque acquirendæ
adminiculis, superest dispiciendum, quò
operæ pretio Virtus colatur. Id autem
est vita beata, quæ insolubili nexu cum vita recta
jungitur. Quemadmodum in Deo divelli non pos-
sunt

X 3

sunt

sunt τὸ ἀγαθὸν καὶ τὸ μακάριον, quæ duo etiam sola nobiscum ita communicare potest, ut ejus imaginem quodammodo repræsentare valeamus: sic etiam felicitas nostra τῷ ἀγαθῷ propago est, nec aliunde manat, quàm ex eo, quòd τὸ ἀγαθόν, ubicunque suis numeris absolutum est, etiam τῷ μακαρίῳ, quod non in spe solùm, sed etiam in re situm sit, comitatum flagitat, neque patitur Dei vel Bonitas, vel Sapientia, ut duo ista separata maneant.

§. 2.

Quæstio de summo bono & fine hominis ad omnem vitam gravissimi momenti est.

E x p l.

*l. i. de
fin. bon.
& mal.*

*Nicom.
l. i. c. i.*

I. **I**D agnovêre, qui inter Paganos sapientiæ laude floruerunt. Quid est, inquit Cic. in vita tan-
toperè quærendum, quàm cùm omnia in Philosophia, tum id quod his libris (de finib. bon. & mal.) quæ-
ritur, quid sit finis, quid extremum, quid ultimum, quò sint omnia benè vivendi, rectèque faciendi consilia referenda. Et Aristoteles, postquàm omni arti, omnique methodo, actioni item & electioni propositum dixisset, bonum quoddam expetere, idque exemplis illustrasset, subjicit tandem; Nonne igitur magnum ad vitam cognitio finis momentum affert? nam sagittariorum instar scopum habentes facilius quod oportet assequemur. Quidnî enim? Omni actioni humanæ finem præstitutum oportet: secus si vel temerè, vel incerto fine suscipiatur, etiam ipsa actio incerta & vaga inter appetenda & omittenda oberrabit. Hinc Seneca suo Lucilio; Quoties, inquit, quid fugiendam sit, aut quid petendum, voles scire, ad summum bonum & propositum totius vitæ respice. Illi enim consentire debet, quicquid agimus.
Non

Epist. 71.

Non disponet singula, nisi cui jam vitæ suæ summa proposita est. Nemo, quantumvis paratos habeat colores, similitudinem reddet, nisi jam constet, quid velit pingere. Et aliquantò post; Errant consilia nostrâ, quia non habent, quò dirigantur. Ignoranti, quem portum petat, nullus suus ventus est. Necesse est, multum in vita nostra casus possit, quia vivimus casu.

2. Hoc ipsum Stultus ac Sapiens interest. Stulti vita temeraria est & vaga, incerto vel nullo fine circumscripta. *Inter cætera mala hoc quoque habet Seneca stultitia proprium, semper incipit vivere: quotidie nova vitæ fundamenta ponit, novas spes etiam in exitu inchoat: vitâ antea actâ pro nihilo computatâ. Sapiens contra finis est certus & summus, ad quem omnia consilia & actiones refert; nec de partibus solum vitæ, sed etiam de summa deliberat; hocque suum unum necessarium reputat.* *Luc. 10.*

3. Id ipsum verò quantum momenti afferat ad vitam rectè instituendam, vel hinc satis liquet, quia prout quisque de fine suo ultimo constituerit, ita universa ejus desideria, vota, consilia & actiones hætenus rectè vel secus erunt comparata. Veluti qui summum bonum suis commodis; divitiis, puta, honore, vel ventre metitur, eò intendet omnem vim consilii & opis suæ, ut ista sibi commoda paret &c.

X. 4. p. 116. non §. 3.

§. 3.

Quòd & quis sit finis , in quem omnia consilia , dicta factaque nostra respiciant , nemo nisi Conditoris suū & universorum ignarus vel oblitus , nescit.

E X P L.

Nic. 4. l. 1.

I. **A**ristoteles ubi rerum agendarum aliquem esse finem docuit , quem propter ipsum , & propter quem alia volumus , neque omnia ob aliud eligimus , eò usus argumentò , quòd alioqui in infinitum fieret progressus , vanusque & inanis appetitus noster esset , se & sua vota vanitatis damnavit , nullò nisi subalterno fine inventò. Equidem vanum fore appetitum nostrum fateor , si finis aliquis summus , voluntatis motionem in se sustens , non esset , quia suapte naturà ultimum quid appetentis votum necessariò frustraretur : sed in infinitum heic fieri progressum , satis arguunt hominis peccatoris , nūquam consistendi locum invenientis , errores. Hic ipse tamen progressus pro argumento est , finem aliquem esse ultimum.

II. Quòd Conditoris suū & universorum ignarus sit vel oblitus , qui finem ultimum nescit , patet attendenti ; quia alium esse finem ultimum , quàm Conditorem universæ ejusque gloriam , absurdum & à ratione alienum est. Id quod sic probatur. 1. Cur Causa prima penderet ab alia ? Atqui omninò ab alia penderet , si causa rerum finalis alia esset à causa efficiente prima. 2. Nonne gloria Virtutum Conditoris è rebus conditis undiquaque relucens saltem est finis operis ? Unde sequitur , eandem oportere esse finem summum hominis operantis , qui operum Dei visibilium longè illustrissimum & quasi cophon est , quippe cui Deus intelligendi vim & ratio-

rationem cum sapientia, iustitia aliisque imaginis
suz dotibus addidit, ut idoneus operis divini spe-
ctator & æstimator Conditorum suum æternis laudi-
bus prosequi posset. 3. Quomodo summè perfectio
negabitur ulla perfectio? Atqui finem esse & haberi,
ad quem omnia referas, non minùs perfectio est,
quàm esse causam primam, unde omnia originem
suâ ducunt. 4. Quomodo vel summus, immen-
sus, optimus, independens; vel gloria summi,
immensi &c. ad finem ulteriorem ordinari potest,
quin summus ipse subijciatur & Gloria summi glo-
riæ suæ vel alterius alicujus summò majoris servire
cogatur, & hac ratione summus ipse negetur? Qua-
propter etiam Scriptura S. disertè *omnia ex Deo, per Rom. 11:*
Deum & ad Deum: item propter eum & per eum ^{36.}
esse docet: atque ideò quicquid facimus, ad gloriam ^{Heb. 2:}
Dei facere jubet. 1. Cor. 10: 31. ^{10.}

III. Ut autem Gloria Deo est, virtutes suas ex-
cellentissimas in Universi, præsertim verò hominis,
creatione, conservatione & restauratione multifari-
am patefecisse: ita non alium finem ultimum no-
bis propositum oportet, quàm illas ipsas virtutes
Dei, potentiam puta, sapientiam, sanctitatem,
iustitiam, bonitatem &c. recognoscere, amare,
laudibus efferre, earumque amorem verbis & fa-
ctis testarum facere, atque adeò ad gloriam Dei
vivere.

§. 4.

Summum bonum significat vel causam beatitudinis nostræ, h. e. rem, quæ tot tantasque habet perfectiones, ut sui perceptione & communionem plenam & perennem afferat satietatem: Vel ipsam Beatitudinem in adæptione & perceptione istius Boni consistentem.

Quò observatò intelligitur, Summum finem idem esse, quod summum Bonum, & rursus ab eodem differre.

E X P L.

I. **N**Ominis *summum Bonum* in utroque significato usus est promiscuus apud Authores. Priori quidem significato summum finem idem esse quod summum bonum, parebit suò locò. Posteriori verò sensu distingui, vel inde liquet, quia finis summus propter se est expetendus, non item beatitudo, etsi eâ fruens nil amplius desideres: nisi tute tibi ipsi velis esse finis ultimus, & amorem Dei, studiumque serviendi gloriæ ejus, facere mercenarium: quæ non jam virtus, sed detestabilis *φιλανθία* foret, & causa exitit ruinæ generis humani. Cum enim primus homo, qui medius inter Deum & creaturas constitutus principium & finem amoris sui Deum habere debebat, & creaturas usibus suis subjicere poterat, affectata similitudine cum Deo hunc ordinem luxâset, ipse sibi principium atque finis appetitionum & motuum suorum factus, turpiter à Deo descivit, seque & totum genus nostrum unâ secum in casum dedit. Hinc Augustinus; *Perversa*, inquit, *celstudo, desertò eò*, cui debebat animus inhaerere, *principiò*, sibi quodammodo finis esse voluit atque principium.

Civ. D.
XI. 13.

2. Etsi autem à virtutis studio non sit alienum, respi-

respicere ad beatitudinem, ceu virtutis præmium; imò ad gloriam Dei pertineat, quæri velle, tanquam Bonum hominis, idque non frustrâ: *neque enim Esai. 45: dixi semini Israelis, frustrâ quærite me: Nihilominus* immota stat veritas, solam Dei Gloriam ultimò & propter se, non ullius commodi nostri gratiâ expetendam esse, ut Deo asseratur. Ipsa igitur Beatitudo non propter se quærenda, sed studio illustrandæ gloriæ Dei subijcienda est. Id quod piis usque *Exod. 32: 32. adco persuasum, ut fuerint, qui anathema fieri mallent, quàm committere, ut gloria Dei quoquò Rom. 9: 3. modò obscuraretur.*

§. 5.

Datò igitur summò fine, datur etiam summum Bonum, priori significatu, quod vera felicitatis est causa, satietatem perennem asserens percipienti.

E X P L.

Summus finis voluntatis motionem sistit. Atqui idem facit summum Bonum priori significatu intelligendum. Ergò illò datò, & hoc dari, vel in summo fine inesse summum bonum, necesse est.

§. 6.

Nihilominus etiamnum superest locus questioni; An detur summum Bonum, posteriori sensu sumptum: b. c. Beatitudo ex perceptione istius Boni expectanda, tanquam Virtutis præmium.

E X P L.

Causa dubitandi est, quia homo violatò ordine primævò, de quo suprâ, summo suo fine & bono

bono excidit. Inde adeò quæstionis sensus huc redi-
bit; *An homini aberranti locus pœnitendi, & regres-
sus ad bonum suum sit relictus?* Habet quidem Ratio
naturalis, quod sic quærenti respondeat: nempe,
innatum esse homini appetitum, quò fertur in bo-
num, cui acquiescat, vitam desiderans perpetuam
& mortem horrens. Eum porrò appetitum semper
vigere, inquietem, indomitum, cruciabilem.
Licet enim aliæ quævis voluptates olim abblandiri
desinant, & sensibus fastidio esse soleant, quæ ju-
venes in deliciis habuere, felicitatis tamen cupido vi-
cissitudinem nescit. Atqui talem appetitum in ho-
mine non esse, nisi à Conditore, hoc ipso naturæ in-
stinctu hominem ad suâ communionem trahente:
proinde frustrâ esse non posse; secùs futurum, ut
homini torquendo veriùs, quàm oblectando addi-
tus dicatur. Id quod ab Optimo Conditore haud
dubiè longè alienissimum est. Id equidem, fateor,
argumento est, hominem primitùs talem fuisse fa-
ctum, qui si integritatem naturæ servare vellet, Bo-
num suum cognoscere, cognitum quærere, & quæ-
sitò sine frustratione frui posset. Verùm, ut nunc
sunt res humanæ afflictæ & deploratæ, quæ illius
primævæ integritatis supersunt parietinæ & rudera,
beatitudinis denuò consequendæ spem certam pecca-
tori non faciunt; sed summum, longanimitate Dei
non oscitanter animadversa, suspicionem ingerunt.
Hinc est, quòd etiam Paganorum Sapientissimi,
cùm ad eam rem argumenta conquirerent, nihil at-
tulerint certi, & nunquam non hæsitanter fuerint
locuti. Adeò, inquit Tertull. *omnis illa tunc sa-
pientia Socratis de industria venerat consulta æquanimi-
tatis, non de fiducia compertæ Veritatis.* Unde conse-
quitur, id, quod in quæstionem vocatur, è sola
luce verbi divini post peccatum humani generis mun-
do illata, decidi posse. Peccatori porrò consequen-
dæ beatitudinis spem non pro: sus interclusam esse,
pate-

*Lib. de
Anima.*

patescet ex dicendis. Quâ enim operâ docemus quâ vera sit hominis beatitudo, & quomodo comparanda, etiam parabilem esse probamus, ut sic laboris fiat compendium.

§. 7.

De summo Bono & fine hominis omnes penè Philosophi scripserunt, verùm vix ulla in re magis cecutivisse, imo nihil unquam infelicius aggressi videntur, quàm cùm felicitatis rationem explicandam susceperunt. Unde etiam inter Doctissimos semper magna fuit dissensio. Cujus variae afferri possunt causæ.

1. *Quia non satis curâ posuerunt in cognitione sui ipsarum.*
2. *Non tam ex ratione & conscientia sensu, quàm suo affectu & propensione animi rem tantam aestimârunt.*
3. *Non attenderunt ad finem creationis sui & universi.*
4. *Quia quæ finem & bonum hominis spectant, mera sunt tenebræ destitutis verbô vita.*

E X P L.

I. **Q**uanquam, ut est animus humanus insatiabilis, cuncti mortales ad summam aliquam perfectionem tendant, qua tamen in re summa ista bonitas & perfectio ponenda sit, non magis inter eos convenit, quàm inter Babylonicæ turris structores. Unde M. Varro apud Augustinum jam suo tempore ducentos octoginta fines eruit, qui pro summo Bono partim haberentur, partim si quid seorsim alicui placuisset, haberi possent.

II. Unde verò factum fuerit, ut alius aliud de summo bono sentiret, operæ pretium est cognoscere.

1. Vulgò non satis curæ in eo posuere, ut sibi ipsis innotescerent, & ut animæ suæ naturam, ejus à corpore & functionum animæ à moribus corporis distinctionem, atque independentem immortalitatem, compertam haberent. Hæc causa fuit, cur multi hospite neglecto solius domicilii commodo studerent; sive ut planius dicam, neglectis quæ ad animæ salutem pertinent, tantum quæ corporis sunt curarent, bonumque supremum & finem hominis collocarent in rebus, quarum voluptas sensibus perciperetur.

2. In dijudicatione Boni non tam quod sibi supererat lucis in ratione & conscientiæ sensu, quam affectum quisque suum & inclinationem, secuti sunt. Hinc adeò non quid omnino & omnibus, sed quisque quod sibi videretur, bonum judicavere. Atqui certe non omnes eadem mirantur amantque de quodictum nobis alibi.

3. Quò conditore, quò itidem fine & usu tum ipsi, tum cætera omnia in universo existent, non considerârunt. Unde factum, ut quanquam Deum omnino ignorare non possent, nihilominus ut Deum non glorificârint, quod fecisse tamen Virtutis erat, & vani facti fuerint in ratiocinationibus suis &c. Quinimò Philosophorum plurimi etiam illi, qui aliquo Veritatis amore accensi rerum causas indagare videri vellent, ita suas instituerunt rationes, ut diligenter evitâsse comperiantur, ne in Deum primam omnium causam, ejusque *Dei gloria* inciderent. Neque verò mirabitur, qui ingenium atque animum peccatoris & hominis *ψυχὴς* vel parùm noverit.

4. Judicare de vero hominis fine & bono non potuerunt, qui nondum sapere cœperant, destituti luce verbi divini. Hinc Lactantius, postquam Epicuri, Aristippi, Calliphonis, & aliorum Philosophorum Sententias de summo Bono retulisset, non præteritò Academicò, qui nos palliò retrahit ac ve-

tat

Rom. I.
21.

Div. In-
stit. l. 3.
c. 7. 8.

rat cuiquam credere, ramentſi non afferat ipſe, quod ſequamur: tandem ſic concludit; Quid ergò ſuper eſt: niſi ut omiſſis litigatoribus furioſis ac pertinacibus, veniamus ad iudicem illum ſcil. datorem ſimplicis & quietæ ſapientiæ, qui non tantum formare nos ac inducere in viam poſſit; verum etiam de controverſiſ iſtorum ferre ſententiam. Hæc nos docet, quid ſit hominis verum ac ſummum Bonum. Iudicem intelligi vult Deum in verbo ſuo, quod verum ac ſummum ſit hominis Bonum, planiſſimè docentem.

§. 8.

Ut liquido conſtet, quodnam ſit ſummum Bonum, ſui perceptione beatitudinem afferens homini, ejus expendenda nobis ſunt requiſita.

1. Tale eſſe oportet, ad quod quærendum, amandum & poſſidendum homo creatus dici poſſit: quodque adeo homine, Dei imagine dotato, dignum ſit.

2. Tale eſſe convenit, quod, vel in quo ſit ſiſis ſummus homini propoſitus: nè boni ſui quærendi ſtudio à fine creationis exeret.

3. Tale ſit; quò homo frui, non uti, debeat, atque adeo quod per & propter ſe ita expetatur, ut ſui perceptione fruentem perfectè beet.

4. Oportet eſſe ſummum, quò omnia hominis deſideria expleat: quò cognitò ſapiens, quò amatò bonus, quò perceptò felix ſit. Proinde

5. Tale, ad quod per virtutem perveniatur, & quod virtute poſſideatur: neque adeo cadat in malos.

6. Denique neceſſe eſt eſſe perenne & æternum, cujus amittendi non ſit metus.

Atque hinc iudicatu proclive eſt, ſummum hominis Bonum eſſe Deum Optimum Maximum.

1. **I** Sta requisita non negabit, qui naturam & finem hominis conditi, atque ingenium veræ virtutis & Boni, quod ipsa sectatur, paulò penitiùs inspererit. Non defuere inter Philosophos, qui hujus veri nonnihil in Gentilismi tenebris viderunt, undeunque demùm ista lux ipsis affulserit. Plato enim in *Idea*, hoc est, ipso Deo, quem *αὐτάζων* vocat, summum hominis bonum constituit. Et Pythagorici felicitatem hominis dixerunt, Deo quàm simillimum reddi.

2. Requisita ista cùm in solum Deum competant, etiam in ipso solo summum esse hominis Bonum, ostendunt. Imò verò res creatæ cum in finem existunt, ut suò quæque locò creaturæ intelligenti testentur, finem atque bonum ejus verum & unicum esse Deum. *Cœli enarrant gloriam Dei &c.* Intelligit homo, in rebus creatis non esse, quod, tanquam bonum ipsius, studium atque amorem mereatur, & desiderium expleat. Novit, creaturas omnes, præter mentes Angelicas, dominio suo subiectas, neque ad eò se dignum quid facere, si studio suo & amoris affectu se infra illas demittat. Sic enim amor rei creatæ, tanquam Boni sui, necessario comparatus est, ut amantem rei amatæ subijciat, sollicitudinem, inquietudinem, cruciatum atque omninò servitutem secum ferens. Amais rei amatæ fortunâ, qualis qualis est, afficitur, ejus præsentia lætatur, absentia cruciatur, periculis angitur, zelò uritur, atque in omnes affectuum formas pro re nata vertitur, certissimò argumentò, amantem rei amatæ, veluti boni sui, imperio subijci. Atqui isthæc quidem servitus homine, imaginem creatoris præferente, indignissima est, & ordinem divinitus constitutum, quò cætera creata homini sub-

Psalm.
119. 1.

subesse jubentur, turbat & evertit, ipsumque amantem, inultâ quasi vilitatis notâ, dignitate pristina exuit. Amor enim est quidam veluti contractus animi, imò & immigratio ejus in rem amatam, quæ si amante fuerit ignobilior, ejus dignitatem multis iisque pudendis modis deprimit. *Fieri non potest, In Psalms.* inquit August. ut res deterior te faciat meliorem. 33.

Homo es, deterius te est, quicquid cupis, quò beatus esse desideras. Aurum, argentum, qualibet corpora, quibus inhias acquirendis, possidendis, fruendis, inferiora te sunt. Tu melior es, tu fortior es: & utique vis melior esse, quàm es, cum beatus esse vis, quia miser es. Vis esse melior te, & quaris, per quæ id fiat, deteriora te. Quapropter rebus creatis uti quidem licet, ceu adminiculis ad finem consequendum profuturis, non item frui, tanquam ipso fine & bono nostrò per & propter se, atque adeò unicè amandò: quomodo amari non meretur nisi Deus. Si quid præter se amari mandat Deus, velut proximum, fratrem, hominem quemvis, utique eum amari vult non per & propter ipsum, non ut finem & bonum ultimum, sed in ordine ad Deum, & propter Deum, ut communi nobiscum bono fruatur in Deo. Sed de hisce plura alibi.

3. Superest difficultas expedienda. Summum bonum, inquit Philosophus, oportet esse *πρᾶξις καὶ κινήσεως ἀνθρώπου* hominis studio & industria comparabile. Atqui Deus non est tale Bonum, quod homo per industriam, sibi comparare, & quàm maxime suum facere ac proprium habere queat. *Resp.* Deum & posse & velle fieri Bonum hominis proprium, eamque ad rem conducere virtutis cultum, probant tum mox, tum capite seq. dicenda.

Beatitudo est communio cum Deo, quem homo suum esse novit, cui, ut suo, imperturbato amore adhaerescit, quò demque ut suo eternum latatur.

E x p l.

1. **S**I Deus est summum hominis Bonum, quod nobis hæcenus probatum dedisse videmur, vera beatitudo haud dubie alia esse non potest, quàm communio cum Deo. Id quod Scriptura S. multis ostendit: extra eam porro hîc sapere non datur.

2. Ut rem in pauca conferamus, Deus ipse Beatitudinis humanæ summam complexus est, quando
- Gen. 17:* se *Abrahamo & semini ejus fore Deum* promisit in
7. fœdere, quod sibi cum illo esse voluit. Quâ phrasi communionem bonorum quæ homini beando satis sint, significari, liquet Scripturæ loca benè multa
- Psal. 33:* conferenti. *Beata gens, cujus Jehova Deus est.*
12. Ergo cui communio cum Deo est talis, ut eum possit dicere suum ex ore Dei promittentis & promissa præstantis, ei ad beatitudinem nihil deest. Hinc
- Psal. 73:* adeò pii, Deo, tanquam *portione sua*, & tanquam
26. *sorte sibi addicta* gloriantur. Et ne favoris divini beneficia præsentis tantùm vitæ terminis inclosa, verbo isto, *Ero Deus tuus*, portendi putes, audi Apo-
- Psal. 119: 57.* stolum, qui promissioni sensum suum plenissimum
Thren. 3: inde demum constare arguit, quod Deus fidelibus
24. suisque amantibus civitatem *fundamenta habentem*, nunquam igitur perituram paraverit. Quidnî verò Deus promissionem suam sic intelligi velit? cum Abrahamo, cæterisque patribus, in hoc ævo nihil contigerit, quod tanti nominis *Ero Deus tuus & seminis tui*, magnificentiam impleret. Unde etiam
- Matt. 22: 32.* Servator noster, eò quod Deus se vocat *Deum Abrahami,*

hami, Isaaci & Jacobi, qui dudum *de vita* excesserant; argumento verò inexpugnabili conficit, pios istos Patriarchas potiore sui parte etiamnum vivere; futurum præterea, ut eorundem corpora sepulchris condita olim reviviscant.

3. Qualis autem sit ista communio, quantum ejus ex revelatione verbi divini scire datur, pluribus doceant Theologi. De eadem satis est nobis pro præfenti instituto sequens Theorema.

§. 10.

Communio cum Deo, in quâ nostra versatur beatitudo, consistit. Ex parte quidem Dei, in amore nostri & indidem proveniente patefactione gloriæ ejus in nobis. Ex parte nostri, in Visione & amore Dei mutuo, & indidem existente gaudio ineffabili.

E X P L.

1. **B**Eati sunt haud dubiè, qui Deum habent amicū. Atqui familiare commercium *Jehova*, *Psal. 25: 14.* amicitia, siue conjunctio habens communicationem consiliorum, est timentibus ipsum, & fœdus ejus, ut gnaros reddat. Unde Abrahamus, qui cum Deo fœduserat, amicus Dei dictus est. Et Christus discipulis, non voco vos, inquit, *Jac. 2: 23.* servos, sed amicos *Efsai. 41: 8.* meos: quia omnia, quæcunque audiivi à Patre meo, nomen *2. Chron. 20: 7.* ta feci vobis. *Joh. 15: 15.*

2. Cæterum in patefactione gloriæ Dei in nobis speciatim sitam esse nostram beatitudinem probat illud Apostoli; *Gloriamur spe gloriæ Dei. Quorum Rom. 5: 2.* verborum non is sensus est, quasi gloria Dei fieri possit Bonum hominis proprium, virtutisque præmium; *Gloriam meam*, inquit Deus, alteri non dabo: Verum gloriæ Dei patefactio in nobis est Bonum & beatitudo nostra. Sicut enim gloriam Deo *Efsai. 42: 8.* damus,

damus, quando cum id esse statuimus, quod unum nos satiare & explere possit, eique ut tali omnem amorem nostrum atque studium impendimus, totumque animi obsequium illi uni addicimus: Sic vicissim è bonitate Dei certò futurum speramus, ut se glorificet in nobis, tanquam divitem, potentem, misericordem, justum, veracem & unicum Bonum, atque ut verbò dicam, Deum nostrum, nosque adeò totos ad imaginem suam transformet. Hinc idem Apostolus alibi *Dominum venturum dicit, ut gloriosus fiat in sanctis suis, & admirationi sit in omnibus credentibus.* Atque hinc patescit, nec Bonum nostrum, quod beatitudinem affert, nec beatitudinem ipsam, ex re ipsa spectatam, à summo sine diversam esse.

2. *Theff.*
1: 10.

3. Pariter cum Scriptura Sacra Beatitudinem, ex parte nostrì spectandam, definimus *visionem & amorem Dei*, atque indidem existens *gaudium ineffabile.* Eam enim modò *Visionem & aspectum Dei*; modò *gaudii satietatem* appellat: cujus primitias piis hanc viventibus vitam prægustandas offert; plena perceptione futuræ vitæ reservata. Quod ipsum satis ostendit, hominem etiam ante mortem posse esse beatum, secus quàm olim Soloni visum, ex cujus mente Ovidius;

*Scilicet ultima semper
Exspectanda dies homini est: dicique beatus
Ante obitum nemo supremaque funera debet.*

Quod nec Stoicis arridet, qui usque ad contemptum doloris & mortis doctrinæ suæ culmen, si fides est magnifica jactantibus, erexerunt, dictitantes, etiam in catenis atque suppliciis beatum esse sapientem.

§. II.

Et dictis iudicatu primum est, quid de variis vel Vulgi, vel Philosophorum opinionibus super Beatitude & summo hominis bono sentiendum sit. Scilicet in omnibus illis bonorum generibus, quæ vel à Philosophis commendata, vel vulgo pro summis fuisse habita, desiderantur conditiones suprà in summo bono nobis requisitæ.

E X P L.

I. **L**ongum foret, hæc omnia errorum Vestigia persequi. Operæ tamen erit pretium, præcipui nominis Philosophos, Zenonem, Epicurum & Aristotelem, tantisper audivisse, eorumque placita saltem perstrinxisse. Cum etiam Gentilium Sapientissimi de vita post hujus conspicuæ vitæ interitum spem certam non haberent, & de immortalitate animæ hæsitanter loquerentur, ut ex Socratis dissertationibus, ex Scriptis Ciceronis, Senecæ & aliorum apparet: negari tamen non posset, quin homini finis aliquis esset propositus, eo perductus est Zenon cum sequacibus suis de Stoa Philosophis, ut virtutem diceret propter ipsam esse amandam eamque sibi esse præmium: porro satis beatum esse sapientem, etiam in Phalaridis tauro. Hi si veram Virtutis rationem cognoscerent, in amore sitam æternæ veritatis, quæ Deus est, ejusque glorificatio, hæcenus non malè sentirent. Nunc quum ab ea veritate deviant, stulti fiunt admiratores sui ipsorum, laudatores ac testes in cæcitate mentis, & omnino idololatæ atque superbi. Sic nescii, virtuti suæ deesse præcipuam summi Boni conditionem, quæ est esse vel saltem continere summum hominis finem, semetipsos sibi finem constituunt: quæ quidem dete-

*Plato in
Phædon.
Tusc. I.
Epist. 64.*

stabilis φιλαυσία est. Deinde, quis non videt, in ea re, quæ secum habet pericula, incommoda, cruciatum, interitum; utique felicitatem, præsertim summam, non posse esse positam, nisi hominem exuere, & inanem verborum sonum sine rerum sensu sequi libeat?

Epist.
66.

Epist.
85.

2. Epicurus summum bonum dixit voluptatem. Quam deinde alii, æquius de ipso sentientes, tranquillitatem animi ex virtute proficiscentem, & doloris privationem, interpretantur. Apud Epicurum, inquit Sen. duo bona sunt, ex quibus summum illud beatumque componitur: ut corpus sine dolore sit, animus sine perturbatione. Et alibi; Epicurus quoque iudicat, eum, qui virtutem habeat, beatum esse, sed ipsam virtutem non satis esse ad beatam vitam, quia beatum efficiat voluptas, quæ ex virtute est, non ipsa virtus. Verum etsi tranquillitas animi Virtutis fructus sit certissimus, quia tamen non propter se est expetenda, nisi virtutem mercenariam, & virtutis cultorem φιλαυσίαν facere velis, voluptas certè nequit esse summum hominis bonum, quod, vel, in quo sit summus finis. Quod addunt Epicuri è grege Philosophi de doloris vacuitate, ridet Lactantius; Quid tam ridiculum, quàm id habere pro summo bono, quod medicus possit dare?

Div. In-
stit. 1. 3.
c. 8.

3. Aristoteles considerans id, quò omnia hominum vota eunt, quodque, ut Poëta ait, navibus atque quadrigis petimus, non esse simplex quid & uniusmodi, neque adeò ad unum aliquod bonorum genus vel animi, vel corporis, vel fortunæ, restringendum, summum bonum ex omnibus istis conflavit. Ne tamen ipsum in se varium & mutabile videatur, in summo bono distingui jubet τὸ κύριον sive Essentiam: τὰ ἐπιτηδεύματα necessaria adjuncta vel consequentia: & σύνεργα sive ὑπηγετανὰ adiutoria & subservientia. Τὸ κύριον in operatione animæ rationalis secundum virtutem optimam & perfectissimam

firmam constituit. Τα ἐπιγνώμενα dicit rectè factorum conscientiam & animi voluptatem. Τα οὐκ ἐπιγνώμενα docet esse bona, saltem mediocria, tum fortunæ, qualia sunt divitiæ, potentia civilis, amici, honor &c. tum naturæ, ut sunt formæ felicitas, nobilitas, bona proles &c. Rationem addit, *Nic. l. 1. enim non potest, aut certe non facile fit, ut cui necessaria non suppetunt, is bona atque honesta agat.* Multa etenim & per amicos, & divitias, & civilem potentiam, quasi per instrumenta, quædam aguntur. Quibusdam verò privati nonnulli, ut nobilitate, bona prole, pulchritudine, beatitudinem maculant. Verùm vel obiter intuenti, quas in summo bono requirimus conditiones, illico patet, in istis nec universis felicitatis humanæ summam; nec singulis peculiare quoddam ad eandem inesse momentum. Satis est observasse, quod hæc beatitudo Aristotelica, quasi per mendicantem à rebus creatis corrogata, studium atque amorem nostrum totum jubeat esse affixum creaturis, eoque ipsò nos à fine & bono nostro aberrantes, turpique & miseræ servituti naturâ mancipatos in errore & servitute detineat.

4. Sed missis tandem cæcis illis cæcorum ducibus, de quibus verissimè usurpaveris illud Prophetæ; *Qui ducunt te, vel quæ etiam verbi in origine significatio est, qui te ἡγορεύουσιν, hōc, illōve bono beatum prædicant, sunt deceptores tui: descendamus ad specialem præmiorum Virtutis contemplationem, postquam quid de summo fine & bono nobis tenendum sit, ex verbo Dei didicimus. Cui enim magis de Deo credamus, quàm Deo?*

C A P . II.

De præmiis Virtutis in genere.

Item de communione & amicitia
cum Deo, in specie.

§. I.

Præmia Virtutis dividi placeat in Essentialia & Accidentalialia.

Illæ sint, quæ Virtutem per se sequuntur, & cum virtute semper conjuncta sunt.

Hæc, quæ sæpè absunt, tamen illis digna esse virtus non desinat.

E X P L.

UT constet, quæ vera demùm Virtutis præmia sint, distinctionem præmiorum præmissam oportet. Communio siue amicitia cum Deo, tranquillitas, libertas, pax animi &c. præmia sunt essentialia; vera proinde, & cum virtute, prout illa profecerit, semper conjuncta: etsi pro vitæ præsentis statu, virtute laborante, luctante, atque adeo multis modis imperfectâ, sæpè virtutis cultori obscurum sit communionis & amicitie inter Deum & ipsum intercedentis experimentum, & tranquillitas animi familiaribus vitæ humanæ lapsibus & erroribus inturbetur. Cæterùm amariâ vulgo, honorari, laudari, præesse, & omninò gratos invenire Virtutis interpretes, præmia sunt accidentalialia, quia quan-

quanquam virtus ex se amabilis & honorabilis sit, ista tamen, nempe *honorari, laudari &c.* à Virtute separari possunt & solent. Unde non rarum & insolitum in Virtutis cultore illud; *benè mereri, & malè audire.*

§. 2.

Vtrum Virtutis præmium finis est Operis ipsius Virtutis, hoc est, tale bonum, ad quod Virtus suapte naturâ conducit.

Ejus sequentes sunt Conditiones;

1. *Virtutis sit proprium.*
2. *Non jam referatur ad officium, sed officio sit ali- quid posterius.*
3. *Sit bonum jucundum ipsius operantis.*

E X P L.

1. **V**erum Virtutis præmium, quod essenziale diximus suprâ, *finis est operis*: quoniam τὸ αἰνέειν & τὸ μακάριον tam arctè copulata sunt, ut Divina Bonitas ea divelli non patiat. Neque tamen *finis est Operantis*. Boni enim, non commodi sui cupiditate, quæ φιλαυδία est, sed amore Veritatis atque studiò parendi Deo & amplificandi gloriam ejus, ducuntur.

2. Quando præmium dicimus Virtutis proprium, eò ipsò à Virtute, nolente licèt STOÀ, distinguimus. Neque enim

Ipsa sibi merces rerum pulcherrima Virtus

aliter dici potest, quàm quatenus non ut officium, sed ut decus quoddam, animo ex continuo ipsius pro-

profectu accrescens, spectatur. Deinde excludimus, quæ superius præmia Virtutis accidentaliter dici permisimus. *Laudari enim, exempli causâ, Virtutis & Viri boni non perinde proprium est, at-*
Ep. 102. que laude dignum se præstare. Seneca de claritate loquens, Ad summam, inquit, dicite nobis utrum laudantis an laudati bonum sit? Si laudantis bonum esse dicitis, tam ridiculam rem facitis, quam si affirmetis meum esse, quod alius bene valeat. Insuper quia præmium haud dubiè non ad officium referendum, sed officiò posterius statuendum est, consequitur inde, non quicquid Virtuti proprium, illicò ejus esse præmium. Diligentia, Obedientia, Justitia correctrix & Humilitas, Virtutis propria, neque tamen ejus præmia sunt; quia universa illa pariter ad officium pertinent. Denique præmium Virtutis oportet esse Bonum jucundum, quò fruens Virtutis cultor beatus sit. Ergò Gloria Dei, in se spectata, prout ad Deum ipsum refertur, etsi Virtutis officiò posterior; quinimò eam provehere, Virtutis proprium sit, tamen Virtutis præmium non est: quippe quia hoc sensu intellecta non est bonum aliquod jucundum operantis. Aliter autem sentiendum de patefactione gloriæ Dei in Virtutis cultore: de qua præced. Cap.

§. 3.

Primum, idemque Ultimum, quia Summum, Virtutis præmium est Communio & Amicitia cum Deo.

E X P L.

1. **I**N communionem & amicitiam cum Deo sitam esse hominis beatitudinem vidimus cap. præced. Eandem porrò Virtutis esse præmium & Scriptura S. docet, & Ratio confirmat. Deus quondam Abrahamo,

mo, *Ego sum*, inquit, *Deus sufficiens*, tibi ad o- *Gen. 17.*
 mnia, *ambula coram me*, & *esto integer*: & *dabo* 2.
fœdus meum, æternam pacem & amicitiam, *inter te*
 & *inter me*. Deus credi vult *remunerator quærentibus* *Heb. 11.*
ipsum: qui nempe, quâ par est ratione, quærenti- 6.
 bus inveniri velit, neque spem eorum frustrari pos- *Esai. 40.*
 sit. Studii illius & quæsitûs præmium minus esse 19.
 non potest, quàm ipse est, qui quæri vult. *Ne* *Gen. 15.*
metuas Abram, *Ego clypeus tuus*, *merces tua magna* 1.
valde. Si in luce, amore Veritatis, *ambulamus*, si, 1. *Joh. 1.*
cut ipse est in luce, *communione cum eo habemus* 7.
mutuam. Sic Petrus cum maxima nobis & pretiosa 2. *Pet. 1.*
 promissa donata dixisset à divina potentia, ut per 4. 5.
 isthæc divinæ naturæ participes efficeremur, elapsi
 ex corruptione, quæ in mundo est, per concupiscen-
 tiam, subjicit, *Ad hoc ipsum verò vos omni præterea*
collatò studio, adjicite fidei vestræ virtutem, virtuti
notitiam &c. Idem probant characteres, quibus
 Servator æternæ Beatitudinis Candidatos describit *Matt. 5,*
 apud *Marthæum*. 3. &c.

2. Quidni verò Deum inter & Virtutis veræ cul-
 torem intercederet communio & amor mutuus?
 Vir bonus amat Deum amore Obedientiæ, amando
 Veritatem & Legem Dei. Deus amat Virum bo-
 num amore Benevolentia, quò illum ut suum, ima-
 gine sua signatum, agnoscit, favorisque & gratiæ
 suæ beneficiis cumulat & beat, ad laudem gloriosæ
 suæ bonitatis. Hoc ergò inter amorem utriusque
 interest: Amor Viri boni in Deum, Obedientiæ;
 Amor Dei erga Virum bonum Benevolentia est. Ille
 in Deum tendit, in Deo terminandus: hic Virum
 bonum prosequitur, ab ipso ad Deum, ut finem
 omnium ultimum, revertens. Unde illud adden-
 dum; ad laudem gloriosæ suæ bonitatis.

3. Neque tamen, si communionem istam mu-
 tuo amore definimus, id ipsum amoris nostri meri-
 tum esse putamus, ut Deus nos redamet. Amor
 ille

ille Dei , quò amamus, amoris Dei, quò amamur, argumentum est infallibile : non enim Vir bonus prior amat Deum , sed amatus redamat, alioqui ne quidem futurus quod est , nempe Vir bonus , quando solo amore reciproco , quem illi Deus intillat , bonus est. Hujus veri nonnihil vidit Seneca ; *Miraris hominem ad Deum ire ? Deus ad homines venit , imò (quod propius est) in homines venit. Nulla sine Deo mens bona est. Sed quanto* *Epist. 73.* *luculentius & significantius Scriptura S. In hoc,* *1. Job. 4.* *inquit , est charitas , non quòd nos dilexerimus Deum,* *19. 19.* *sed quòd ipse dilexerit nos &c. Atque iterum ; Nos diligimus eum , quoniam ipse prior dilexit nos.*

4. Unde sequitur , Virum bonum reapse beatum esse jam in hac vita , beatissimum deinde futurum in altera. Quid enim ad veri nominis felicitatem desit illi , quem Deus amore , quantò creaturam ad imaginem sui conditam completi potest maximo , prosequitur ? Quid ab illo amore non expectet , quod dare possit Omnipotens , quod dare velit Optimus ?

CAP. III.

De Tranquillitate Animi.

§. I.

Proximum Virtutis præmium est Animi Tranquillitas, in gaudio, libertate & pace animi consistens.

Gaudium intellige, quod rectè factorum conscientia parit.

E X P L.

I. **S**olidam animi tranquillitatem, quam beatæ vitæ summam dixere nonnulli Philosophorum, non fortunæ munus, neque adeò è divitiis, honoribus &c. expectandam, sed Virtutis fructum atque præmium esse certissimum, patebit attendenti ad partes ejus singulas, in quas instar maris tranquilli, longè latèque patentis, sese diffundit. Verissimè Poëta;

*Non enim Gæxa, neque consularis
Summovet lictor miseros tumultus
Mentis, & curas laqueata circum
Tecta volantes.*

*Hor. Od.
2. 16.*

Et alibi;

*Non possidentem multa vocaveris
Rectè beatum: rectius occupat
Nomen beati, qui Deorum
Muneribus sapienter uti,
Duramque calles pauperiem pati,
Pejusque letho flagitium timet: &c.*

Od. 4. 9.

2. Pri-

2. Prima animi tranquillitas est *Gaudium* è rectè factorum conscientia: qui certè fructus Virtutis est certissimus, longè dulcissimus & perpetuus. Unde
- III. Off. Ambros. *Beatam vitam efficiunt Tranquillitas Conscientiæ, & Securitas Innocentiæ.* Hæc illa Veterum laudibus celebrata *εὐθυμία*, quam sensu comperire, quàm verbis exprimere facilius sit & satius. Solidum verò gaudium è Virtute esse multa comprobant. 1. Optimus naturæ Author isti veritati testes dedit affectus naturales, qui rectè vel pravè factorum conscientiam insequi solent; *acquiescentiam* puta, & *pœnitentiam*, de quibus alibi dictum. 2. *Εὐθυμία* fons est, benè convenire cum Deo. Hoc ipsum autem in quem veriùs, quàm in Veritatis amantem & Virtutis cultorem congruit? 3. Gaudia è rebus extrariis adventitia & infirma sunt, tenuemque habent ac perfuloriam voluptatem. Quodcunque enim in vectitium gaudium est, fundamentò caret: Sed in virtute fundatum necesse est, velit
- Sen. de Vit. Beat. c. 4. nolit, sequatur hilaritas continua & lætitia alta ex alto veniens, ut quæ suis gaudeat, nec majora domesticis cupiat. Scitum & verissimum est illud Tso-
- Job. 20. 5. pharis apud Jobum, *Jubilatus improborum ex propinquo est.* Quemadmodum gramen, quod è tecto; culmus, qui è terra petrosa nascitur, citò retorrescit, adolescendi causam & vigorem non ex alto, sed propinquo habens. Vel ut torrens è nive, quæ resoluta magno agmine diffluit, & dilapsa alveum nudat, è propinquo est: sic comparata sunt gaudia improborum: exultant rebus nihili, commodis fraude vel arte paratis, bonis extrariis, fortunæ obnoxiiis, citò dilapsuris &c. Ex adverso lætitia bonorum alta est, ex alto veniens, fluvii instar, venam perennis aquæ ex imis terræ visceribus habentis. Cui cor benè habet, convivium perpetuum. Bona conscientia fida comes nullo loco, nullo tempore à boni viri latere recedit. Eum enim ad omnia sacra
- Prov. 15. 15. Philostr. in Vit. Apoll. mittit,

mittit, per omnes vias, per omnia templa, ad omnes hominum species: & plaudens, canensque, ipsum ubique laudat, dormienti quoque assistens præclarum chorum è somniorum domo circumponit.

§. 2.

Libertas animi in eo consistit, quod Vir bonus, uno Veritatis amore contentus, nihil agit, nihilque patitur illibenter & contra animi sententiam.

E X P L.

1. **S**ECUNDA tranquillæ animi dos, quam Virtus suo cultori largitur, est *Libertas*, non postrema sanè felicitatis pars, si *felicem* dicas, cui, quæ agit, ex animi sententia succedunt. Atqui viro bono animi sententia alia non est, quàm agere, quod Veritatis amori convenit, unde feliciter succedere semper, quod agit, necesse est. Cur verò liberum negemus Virtutis cultorem? nemini enim servit, qui Veritatis amori obsequitur, eò ipsò liberrimus: quippe faciens quod vult; quod non vult, omittens; tantumque faciens, ac non faciens, quantum ipse constituit. Etsi fortè veneat & iniquam servitutem servire cogatur, nihilominus liber est, quia ne tunc quidem quod liber, sive ex animi sententia, agere desinet. Herus cum suus arare, bajulare, pecora pastum agere, verrere, & quæ id genus alia abjectæ servitutis sunt, facere jubeat: faciet opus imperatum, non quia jussit herus, sed quia facere vult, officii amore ductus. Quo casu etsi servilis sit ejus conditio, attamen ne servire quidem putandus est eò, quòd herus imperat, & ipse imperata facit. Nunquid si vicinus tuus, quoties te domo exeuntem videt, exire; quoties redeuntem, introire jubeat, ridebis nugæ hominis inepti? nunquid te illi obedire purabis; etsi quod jussit, agas?

agas? Nempe non ideo exis & redis, quia vicinus iusserit, sed quia tu sic constituvisti. Idem comparata est viri boni vita. Unde si mander herus, ut innocentem occidat, ut alienum auferat, ut insidias struat &c. quod in mandatis est non faciet, quia non vult: porro non vult, quia amor Veritatis vetat; etiamsi non obsecutum flagra, lora, pistrinum, furca, & quid non? maneant.

2. Vir bonus etiam, si rem ex vero arbitrari velimus, nihil patitur contra animi sententiam, atque adeo mediis in malis libertate sua gaudet. Sæpius quidem multis cum calamitatibus, pauperie, morbis &c. conflictatur, sedibus suis exagitur, calumniis divexatur, ex hominum odio laborat &c. Unde verò ista, quæ mala putamus? Homines sanè illa nisi Deo volente inferre non posse; quinimò nullam rem creatam hac in parte quicquam valere, suò locò demonstratum dedimus. Numquid igitur à Deo Oprimo, simulque amicissimo & benevolentissimo, qui velit, viro bono ut benè sit; numquid item ab Omnipotente, qui, cum benefacere voluerit, impediri nulla manu potest, impituntur? Quæ ergo fieri potest, ut virtutis cultori verè mala sint ista & calamitosa? An igitur Vir bonus, qui se totum ita resignavit Deo, ut omnes vitæ suæ partes ejus solius arbitriò gubernari ferat, non libenter ista subit omnia? Estne in illis aliquid contra animi ejus sententiam, cui nihil adversum esse potest, nisi quod cum amore Veritatis pugnat? Quid verò hîc, quod amorem Veritatis convellat? Igitur qui sic animò compositus est, quicquid accidat, nec miserrum se reputabit, nec de sua sorte, cum Dei invidia conquæretur. Proinde sive suas ades, sublati propinquis, in solitudinem reductus videat, ne sic quidem desinet benedicere Domino, Sive adustis pruina segetibus, aut gelu consumptis, aut grandine proculcatis, imminere famem videat: non tamen despondebit animum, nec Deo invdiam

Latv.

Inst.

Lib. III.

c. 7.

Invidiam faciet, sed in hac fiducia permanebit; nos tamen in tutela Domini sumus; alimenta igitur nobis etiam in extrema sterilitate, suppeditabit. Sive morbo afflictabitur, ne tum quidem frangetur doloris acerbitate, ut ad impatientiam prorumpat, atque ita cum Deo expostulet: sed justitiam ac lenitatem in Dei ferula consideranda, ad tolerantiam se revocabit. Denique quicquid eveniet, quia sciet manu Domini ordinatum, placido gratoque animo suscipiet: ne contumaciter ejus imperio resistat, cujus in potestate se suaque omnia semel permisit.

3. Neque tamen negamus accidere posse Viro bono, quæ molesta sint sensui, & tristitia, quia non est ἀπαίσιος. Sed solo sensu calamitatem non esse æstimandam, vel inde liquet, quia sæpè gratum nobis est & volupe, exercere corpus laboribus, luctâ, periculis, & similibus, quæ sensui molestiam creant. Sola igitur oblectatio animi, adversa ægrè ferentis, calamitosum & miserum facit. Non ergo virum bonum *ca-* *Sen. de*
sibus hominum excipimus, sed erroribus: nec illi omnia *Tranq.*
ut voluit, cedunt, sed ut cogitavit: inprimis autem *An.c.13.*
cogitavit, aliquid posse propositis suis resistere.

§. 3.

Pax animi est quies illa affectuum, quâ non quidem existere, sed velut adempto stimulo, animum efformare desinunt.

E X P L.

1. **E**TH affectus suâptenaturâ mali non sint, pessima tamen est illa animi intemperantia & mollities, qua propendet ad agendum vel omittendum, non quod Lex & Ratio, æternæ veritatis interpretes, jubent, sed quod præsens affectus imperat: quò quidem casu passionibus vitiò animi remissi stimulos habent

bent actes, imperia sava, & semel concitatae per proclive labuntur & locum consistendi non reperiunt. Verum & hoc benefici Philareto nostro praestat Virtus exercitatione & usu adulta, ut Veritatis amore contentus sola legis & Rationis, sive Veritatis, imperia audire; affectuum vero illecebras negligere assuescat? quò ipso fit, ut affectus neglecti, sensim vires suas simul cum imperio amittant, Rationique sua auctoritas, & animo sua quies restituatur.

2. Id errat Vulgus, quando modus animi sedari putat obsequio, exempli causâ, tristitiam sedari, si ei indulgeas ad ejularum usque, questum, gemitum, & lachrymas: itam, si vindices & verberes: metum, si stationem deseras, & te protinus in pedes conijcias &c. Ut enim id verum fatear, pro eo temporis articulo, quò indulges & obsecundas, motus istos sedari: nego ramen sic recte consuli in futurum, passionum dominatu per animi indulgentiam usque & usque ingravescente: neque enim obsequio remittuntur vel verè sedantur: sed intenduntur & efferantur. Qui sæpè se dedit lachrymis & lamentis, tandem prorsus liquescit mollitiâ, ut apes aculeum sine clamore ferre non possit. Quibus sæpè dulce fuit, ulciscendo injuriam à se propulsasse, tandem eò impotentiae proficient, ut ad quamvis occasionem exardescerent jurent, spiritum antè, quàm ultionem, amissuros. Atque hæc est *vulgi vita*, verè turbida & inquietas, facere quod praesens affectus suadet.

3. Vulgò haud multò meliora sapiunt, qui affectum affectu, ut clavum clavò, pellunt. Velut, qui metu in audaciam verso, malis ad contemptum usque mortis indurescunt, quales sunt gloriosi milites: Item, qui voluptatis cupidinem solo infamiae metu coercerent &c. Id verò non est pacem animo conciliare, sed novas turbas dare. Videsis supra Arétol. Part. II. Cap. 13. §. 7.

4. Philosophi contrâ, ut certiolem consequenda
tran-

tranquillitatis rationem inirent, animadversò, Vulgum actionum suarum authorem atque ducem ferè non alium habere, quàm affectum, contrariam viam insistere; passionibus bellum indicere atque contra eas agere decreverunt: ita tamen ut institutis haud parùm inter se differrent. Stoici affectus omnes, *Lactant. quorum impulsu animus commovetur, ex homine tollunt: Inst. div. sapientem ἀνθρώπου imperturbabilem esse dicunt.* 6. 14. Atqui passiones extirpare, insanum, impossibile & illicitum esse, suò locò ostensum. Alii his paulò rectiùs sapere volentes, eò omne suum studium advertendum existimârunt, quâ ratione actiones illas omitterent, vel certè tantisper suspenderent, ad quas affectu aliquo se concitari sentiebant. Ex quo *Cic. Tusc.* illud laudatur Architzæ, qui cùm villico factus esset 4. iratior, quò te modò, inquit, accepissem, nisi iratus essem! Significans, se ulciscendi vim differre in tempus aliud, dum ira defervescente dispiciat, justumne & rationi consentaneum foret facinus, ad quod se irâ instigatum videbat. Id verò intutum, & à prudentia alienum est, si enim actio omittenda vel differenda, quia affectu ad eam suscipiendam extimulamur, sæpè sæpiùs occasio benè agendi antè elaboretur, quàm affectus refrixerit. Quid? quòd viri boni non sit propter affectum agere vel omittere quicquam, sed veritatis amore duci, sive jam affectus cum veritate congruat, sive diversus abeat.

5. Aliis alia compescendi affectus studia sunt. Ut quòd iis, in quæ animus impetu passionis suæ fertur, identidem contraria facienda vel sectanda suadent: velut si cibus apponatur laurus simul & vulgaris, hunc illi ingratis tuis esse præferendum & captandum: convivium facienti esse assentandum &c. Atque hac suâ arte insidiosissimo hosti insidias parandas existimant. Veruntamen vana sunt hæc studia, nisi amore veritatis, quid sectandum, quid rursus fugiendum sit, docentis, regantur. Etenim absque amore veritatis si animum obfirmes in contrarium,

facile fit, ut fugienda sequaris, sequenda fugias, & ad emendationem moris, animique tranquillationem nihil proficias. Adde, ut plurimum & hoc evenire, ut qui passioni sine amore Veritatis reluctatur, eam magis irriter & laceat. Hisce enim flammis oleum suffundit, qui oblequitur; flammis minimis oleum suffundit, qui oblequitur; flammis minimis oleum suffundit, qui oblequitur. Exemplò pudoris id manifestissimum est: qui erubescere cœpit, & niti contra pudorem suum directè pergit, tantò plerumque magis erubescit. Nec mirum, quia passionibus nostræ directè per actionem Voluntatis nec excitari nec auferri possunt, sed demùm indirectè per representationem rerum, quæ solent jungi passionibus, quas habere volumus: & quæ contrariæ sunt iis quas volumus rejicere &c. Satiùs ergò est, animum ad aliam aliā quam cogitationem deflectere, & quantum pote, affectum, ejusque causam prorsus negligere, quàm pugnam inire apertam.

6. Aristotelici denique *Misericordiam* commendant. Super hac re inquit Seneca, Virum satius sit modicos habere affectus, an nullos, sæpè quæsitum est. Nostri illos expellunt, Peripatetici temperant. Quos deinceps totâ Epistolâ centesimâ sextâ decimâ refellit. Disputatio longa est, & non hîc retexenda. Negamus, vel tantillum, quod illi volunt, passioni rationem prævertenti esse indulgendum, ut non jam modò cum ea, sed etiam ex ea, licet contracta & moderata, agas: negamus eam, nisi amore veritatis prævertente, ad justum modum ita contrahi posse, ut actionis nec initiò, nec progressu peccetur. Non est, inquit, nimîa latitiâ gestiendum, sed modicè ac temperatè. Hoc verò tale est, quale si dicrent: non esse currendum concitatè, sed gradiendum moderatè. At potest & qui graditur, errare: & qui currit, rectam viam tenere. Quid si ostendo esse aliquid, ubi non tantùm modicum, sed vel punctum gaudere vitiosum sit? Et aliud contrà, in quo vel exultare latitiâ,

mini-

Cartes.
part. I.
de passio-
nibus.
S. 45.

Lactant.
div. Inst.
l. 6.
c. 16.

minimè criminofum? Quid tandem nobis ifta mediocritas proderit?

7. Quare concludendum, Virum bonum illam, de qua quærimus, animi quietem, ceu Virtutis fructum, cōſequi, quòd nec ex affectu, nec contra affectum, ſed veriùs præter affectum, quippe ſolo Veritatis amore contentus, agere conſuevit. Affectum negligens, non curans, adſit an abſit inſuper habens, in id unum intentus eſt ſemper, quod amor Veritatis convenit. Unde affectus tandem obſtrepere deſinunt, neglecti: quemadmodum qui quempiam allocutus & alloqui pergens, nullum reſponſum fert, tandem, laſſus ſurdo fabulam canere, ſilet. Iraque iratus non ideò verberat, quod impotentis Vulgi eſt: nec ideò verberibus abſtinet, quod ſummorum Philoſophorum eſſe videtur. Non dicit cum vulgo; vapulabis, quia irasco: nec cum Philoſophis; vapulares, niſi iracerer. Sed, vapulabis, non vapulabis, quia ſic fieri jubet, vel vetat veritas; quam amo. Cauſam igitur, non affectum intuetur, quæ vera demùm affectibus moderandi ratio eſt. Unde rectiſſimè Lactantius locò mox citatò; *Non in his moderandis*, inquit, *Sapientia ratio verſatur, ſed in cauſis eorum; quoniam extrinſecùs commoventur: nec ipsis potiffimum franos imponi oportuit; quoniam & exigui poſſunt in maximo crimine, & maximi poſſunt eſſe ſine crimine.* Nihil interim vetat; Viros bonos agere cum affectu, hoc eſt, affectu actionem comitante, non actionis Authore & duce, quod juris ſoli amor Veritatis eſſe volunt. Cæterùm, quæ Virtutis in hocce rerum ſtatu perpetuò luçantis & certantis conditio eſt, hic labi pro dolor! proclive nimis & quotidianum.

C A P. IV.

De Sapiencia & Dignitate.

§. I.

Alia Virtutis præmia sunt Sapiencia & Dignitas. Sapiencia est rerum divinarum & humanarum, præsertim, quæ finem & officium hominis spectant scientia.

Sapiencia, si ad os deducatur, Doctrina: si per Doctrinam animis aliorum instilletur, Disciplina est.

E X P L.

1. **S**apiencia à sapere dicitur, voce à sensu gustûs translata, eò quòd gustatu interiora rei exploramus, reliquis sensibus quasi in cortice & superficie rerum hærentibus. Unde sæpè quod tactu frigidum, idem gustu calidum deprehenditur, ut Spiritus vini. Et deaurata medicorum catapota, quæ visus placida & jucunda dixerat, gustatu horrida & amara comperiuntur. Similiter Sapiencia in rem quamque objectam profundè penetrat, intima ejus perquirens, & sæpè longè aliud de re judicat, quàm vel communis hominum sensus, vel recepta Scholarum sententia fert. Sapiencia igitur hætenus est cognitio, qualis penitiorum rei explorationem consequi solet. Neque tamen quarumlibet rerum cognitio nomen tam magnificum meretur. Hinc addimus, esse scientiam rerum divinarum & humanarum, præsertim, quæ finem &c. Quapropter sapere dicitur, qui vero fine cognito, quæ in rem suam sint, conspicit: & Sapiencia in rebus agendis mutato nomine Prudentia appellatur.

2. Sapien-

2. Sapientiâ esse Virtutis præmium, non potest esse obscurum vel obiter attendenti. Unde enim Sapiëntia, nisi ex amore Veritatis, in quo Virtus? Et ex diligentia siue studio attendendi & inquirendi veritatem, in quo proprietas Virtutis est? egregiè studium illud adiutante & provehente ipsa animi tranquillitate, quâ mens φιλαρέτης consulescentibus sensuum & affectuum turbis in altum sese abdit, veritati audiendæ & consulendæ intenta.

3. Sapiëntiam porrò suâ Vir bonus cum aliis communicare potest, quidni verò & velit? Quæ enim ritè percepimus, & sæpè apud animum volutando nobis familiaria fecimus, etiam ad aliorum caput edisserere possumus, juxta Poetam;

Verbaque prævisam rem non invita sequuntur.

Quod si faciat Vir bonus, Sapiëntia ejus dicitur *Doctrina*, quippe ad usum docendi in os deducta. Sic verò fieri necesse est, hominibus naturâ ita comparatis, ut quæ Sapientes diuturna meditatione & usu de æternâ veritate didicerunt, alii docentium viva voce vel scripto longè facilius capiant & breviori tempore assequantur, quàm si ipsi suo Marte & studio eadem eruere deberent. Constat utique in scientiis & artibus quæ complurium annorum lucubratione inventa fuere, à sapiente vel artifice ita tradi posse, ut paucis mensibus vel annis feliciter ab aliis percipiantur & ediscantur. Hæc porrò Sapiëntia aliorum animis instillata, dum à Doctore dirigi, foveri & velut manu doceri opus habet, *Disciplina* dicitur. Ubi discipuli eò profecerint, ut ipsi sua attentione & studio eadem assequantur, quæ pridem non nisi docentium operâ assequi valebant, Sapiëntia, quæ hætenus erat *Disciplina*, ipsis nomine verso fit *Doctrina*, quam & ipsi ad os deducere, & aliorum in usum docendo depromere possunt.

§. 2.

Vir bonus hoc ipso quod bonus, etiam dignus est omnium amore: eo, quod sapiens est, etiam dignus est honore, reverentia, praesidio: quod doctus, & pro re nata docens, dignus est laude.

E x p l.

1. **V**ir bonus dignus est amore omnium. Dignus est, cui bene cupias & recta monenti auscultes, ut nimirum Deo & legi ejus, cujus se quasi praekonem praestat, obedias. Dignus est cujus societatem ambeas, cui te jungas, quia ore suavis & opere gratus est.

2. Quia honor est testimonium, quod alteri ex concepta de virtute ejus opinione perhibetur, jure meritissimo Virtutis cultori debetur. Quia reverentia est veneratio amore & timore permixtis temperata, quae facit, ut non quaelibet eo, quem revereri diuimus, praesente & spectante audeamus, sed multis abstineamus, certi, ea illi nec probari, nec cum moribus ejus congruere: haud dubie Vir bonus etiam merito suo reverendus habetur. Quia insuper, qui alios regere velit, necesse est, ante seipsum regere sciat: An enim ille mihi rex erit, cui muliercula imperat? cui pecuniola, gloriola, alii animorum tyranni? *Refranet prius libidines, inquit Cicero, spernat voluptates, iracundiam teneat, coarceat avaritiam, ceteras animi labes repellat: tum incipiat aliis imperare, cum ipse improbissimis Dominis, dedecori ac turpitudini, parere desierit.* Vir bonus etiam dignus est qui praesit, regat, & in consilium adhibeatur. Ridet hic Stoaam Comicus, quod Sapientem suum solum Regem praedicet. Ille a porticu sapiens, clamans altum & intonans, Ego solus Rex sum; Ego solus dives: & conspicitur interim ad alienas fores mus-
sians.

*Paradox.
V.*

Da

*Da tegmen Hipponacti: namque frigeo,
Totusque contremisco.*

Stoam defendit Cicero, verè ista nomina omnia possidere sapientem, quæ irrideri ab imperitiis solent. *Re-* ^{3. De} *Finib.*
Ejus enim appellabitur rex, quàm Tarquinius, qui nec se, nec suos regere potuit. Quæ verò sunt ista nomina? audi Poëtam;

*Ad summam, Sapiens uno minor est Jove, dives,
Liber, honoratus, pulcher, Rex denique regum.*

Vix tamen Sapiens ille Stoicus, annis forte & pannis oblitus, nudus, algidus, famelicus, omnium inops &c. locum suum tuebitur, ullique Sapienti se regem esse persuadebit. Paulò igitur modestiùs, de viro bono sentiendum, & præmia, quæ Sapienti *κρείων*, ab illis quæ non nisi *συμβεβηγώς* illi conveniunt, cau-
rè discernenda sunt. Vir bonus, quia sapit, dignus est, qui præsit & regat: quemadmodum dignus est, cui honor habeatur &c. At regem creati, honorari, in arbitrio populi est.

*Qui dedit hoc hodie, cras, si volet, auferet: Ut si
Detulerit fasces indigno, detrahet idem.
Pone, meum est, inquit. Pono, tristisque recedo.*

*Hor. E-
pist. 1. 16.*

4. Quia laudem habet Doctrina clarè & scitè explicans Veritatem, quam sciri & amari quorumvis intersit, Vir bonus ab ea parte de quibusvis benè mereri, eosque Doctrinâ & exemplò sibi similes reddere paratus, hac laude, quæ etiam defunctum sequatur, sese dignissimum præstat.

CAP. V.

De Amicitia bonorum cum bonis.

Ut & de Virtute, quodammodo
sui mercede.

§. 1.

Inter Virtutis fructus atque præmia est bonorum cum bonis amicitia, sive Sancta illa & familiarissima conjunctio, summa animorum consensione & mutuo amore constans.

E X P L.

*Cic. de
Amic.*

I. **Q**Uando bonorum cum bonis amicitiam Virtutis præmium facimus, hoc primum sentimus, nisi in bonis amicitiam esse non posse: intellige, veram, non infidam, non incertam, non temporariam. Cui rei hoc dicimus argumentum: Amicitia conciliatricem constat esse similitudinem. Atqui viri boni sunt simillimi; animorum enim & voluntatum consensione summa soli conspirant, soli idem volunt, scil. obedire veritati, solis eadem animi sententia & intentio, quæcunque denique sit vitæ fors, conditio, genus, ætas. Voluntatis enim unitas ex fine æstimanda est, qui cum unus idemque sit bonis omnibus, nempe obedire Deo, servire gloriæ ejus provehendæ, amplificandæ, una omnium Voluntas rectè dicitur, etsi mediorum usu interdum fortè non conveniant. Velut si bonorum unus minis licitis extorquere velit, quod alter promissis honestis commodius impetratum iri putet. Hic me-
diorum

diorum maxima est discrepantia, minæ & promissæ idem tamen est finis utrique. Sic Virorum bonorum alius philosophatur, alius artem mechanicam, alius mercaturam exercet, alius agrum colit &c. Inter omnes tamen de fine convenit: idem enim omnibus est propositum, Deo obedire & gloriæ ejus servire. Ergo nulla voluntatis hic est discordia: finem enim propriè & quàm maximè volumus, media non nisi propter finem, Voluntate mediis non adhærente, sed ea perlabente & transmittente, ut fini se suo affigat.

2. Mali ex adverso non inter se tantum, sed etiam sui ipsorum dissimillimi sunt animo, voluntate, studiis &c. Alii alia volunt, quia quisque se vult, & quæ suo cujusque affectui, quò nihil est varium & mutabile magis, arrident. Et si verò mali quandoque idem velle videantur, ibi tamen nego veram esse voluntatis concordiam & animorum consensionem, quia non eodem fine conveniunt, etsi fortè mediocri usu conspirent. Sic avarus & gloriosus unâ militatum euntes, ille ut lucrum, hic ut gloriam aucupetur, diversa volunt, & absolutè dissentiant, dum quisque seipsum duntaxat respicit, & quod facit, non nisi gratiâ sui facit: mediis verò adhibendis consentientes, non nisi quadantenus consentiunt.

3. Cùm igitur amicitia e radice sua spectata nihil aliud sit, quàm animorum consensio, (*idem enim velle, atque idem nolle, ea demùm perfecta amicitia visa est etiam Ciceroni*) necessum est, bonos omnes & solos verè amicos esse. Nunquid verò etiam in alios, quàm in bonos quadrat illud Aristotelis, qui interrogatus, quid esset amicus? respondit, *una anima duobus corporibus inclusa*. Vel ut alius, *animæ duæ, animus unus*?

4. Ex consensione animorum velut vivit radice germinat amor mutuus, quò boni bonos amplectuntur. Cùm enim bonis idem sit animus, eadem voluntas, idem in votis summum bonum & finis &c. quidui

con-

De Amicitia.

constantissimo & ardentissimo amore bonus bonum, velut alterum seipsum, prosequatur. Ipsa quoque virtus per se amoris quoddam velut illicitum est. Rectè Cic. Deinde cum similis, inquit, sensus existit amoris, si aliquem nacti sumus, cujus cum moribus & natura congruamus, quod in eo quasi lumen aliquod probitatis & virtutis perspicere videamur. Nihil enim est amabilius virtute, nihil quod magis alliciat homines ad diligendum: quippe cum propter virtutem & probitatem eos etiam, quos nunquam vidimus, quodammodo diligamus. Ex quo amore porro necesse est consequi, ut boni sibi mutuò quàm optimè velint, quisque alterum perinde ac se ad gloriam Dei esse, & summò suò bonò frui cupiat; ei omnia humanitatis, charitatis &c. officia prona voluntate præstet; honorem, reverentiam, laudem, quam quisque meretur, ab alio non solum consequi permittat, sed ipse etiam proclivi obsequiò deferat; docentem, monentem, ubi opus corripientem &c. æquò & gratò animò ferat: sic si occasio se dederit, doceat, ut vicissim velit esse discipulus. Sunt enim boni sibi invicem discipuli & Doctores. Nec certè ulla ferè insignior probitatis nota est, quàm velle discere, & facilem docilemque se præbere vera & recta monenti. Denique consortium inter bonos rerum omnium facit Amicitia: nec secundi quicquam singulis est, nec adversi.

5. Unde liquet, quæ vera & durabilis amicitia sit, & quæ rursus assimulata & temporaria: nimirum illa solo communi amore Veritatis & bonò honestò, quod nullis fortunæ casibus obnoxium est, nititur; hæc verò ex φιλαυδία nascitur, nec aliud fundamentum habet, quàm bonum jucundum & utile, pro cuiusque palato & affectu plurimum varians: Unde temporariam existere amicitiam, qualis est illa Vulgaris plerorumque, necesse est. Qui se spectat, inquit Sen. & propter hoc ad amicitiam venit, malè cogitat: quemadmodum cœpit, sic desinet. Paravit amicū adversus vincula laturum opem: cum primum crepuerit

crepuerit catena, discedet. Hæ sunt amicitie, quas temporarias populus appellat. Qui causâ utilitatis assumptus est, tamdiu placebit, quamdiu utilis fuerit. Hac re florentes amicorum turba circumfudet: circa eversos ingens solitudo est: & inde amici fugiunt, ubi probantur. Hi non Personæ, sed fortunæ sunt amici, de quibus Poëta;

Diffugiunt cadis

Cum fece siccatis amici,

Ferre jugum pariter dolosi.

6. Obijcienti fortè, amicitiam esse virtutem, vel virtutis officium, malè igitur inter Virtutis præmia connumerari: respondeo; Si amicitiam spectari placeat ut Virtutem, illa certè diversa non erit à charitate, humanitate, comitate &c. Unde quæ alii de amicitia contrahenda, colenda, conservanda, & rursus dissolvenda tradunt præcepta, ad virtutes, quas ad justitiam reduci diximus, non incommode referas. Præstat ergò eam hîc tanquam Virtutis fructum & præmium, quod suprâ nobis ostensum, considerari. Est enim bonum jucundum è virtute proveniens, in quo felicitatis Viri boni nonnulla est accessio. Quàm ille gratulatur sibi obviam factos amicos!

O qui complexus, & gaudia quanta fuerunt!

Nil ego contulerim jucundo sanus amico.

Cicero de Amicitia loquens, quâ quidem, inquit, Lib. de
haud scio an, exceptâ sapientiâ, quicquam melius ho- Amic.
mini sit à Diis immortalibus datum. Post ubi bonorum genera, quibus alii & alii summum bonum metiri solent, enumerâisset, virtutemque amicitiæ matrem & nutriculam, commendâisset exemplis, tandem subjicit; Cui potest esse vita vitalis, qui non in amici mutua benevolentia conquiescat? Quid dulcius,

630. quàm

quàm habere, quicum omnia audeas sic loqui, ut tecum? Quis esset tantus fructus in prosperis rebus, nisi haberes, qui illis æquè, ac tu ipse, gauderet? Adversas verò ferre difficile esset sine eo, qui illas gravius etiam, quàm tu ferret &c. Verissimè etiam Cassiodorus; *Amicitia*, inquit, divitibus pro gloria est; pauperibus pro censu, exulibus pro patria, imbecillibus pro virtute, pro medicina ægrotis, mortuis pro vita; sine qua nullum est vitæ humanæ solatium. Nec dubitant Theologi, ipsum Sanctorum consortium aliquod allaturum esse momentum ad beatitudinem immortalis vitæ cœlitum.

§. 2.

Ipsa denique Virtus suo quodam modo, sui merces atque præmium est.

E x p l.

Epist. 81. **I**llud Senecæ; *Virtutum omnium pretium in ipsis est.* Non enim exercentur ad præmium: rectè facti fecisse merces est: admittam, si de fine operantis, non operis, accipiatur. Neque enim convenit, virtutem aucupio commodi tui atque delectationis servire. Virtutis quidem ipsius fructus atque præmium multiplex est præter ipsam; nihilominus etiam ipsa inter sua præmia est duplici nomine. 1. Quatenus est decus quoddam animæ, & imago Numinis, quâ Virtutis Cultor ornatur & perficitur. Eum nempe fructum fert Veritatis amans, quod Deo Veritatis auctori & exemplari, quoad creaturæ & vitæ præsentis fert conditio, similis evadit. 2. Quatenus amanti Veritatem in quotidiano amoris profectu lucrum est certissimum & incomparabile. Læta Virtutis incrementa sunt ei, qui ideo tantum probus esse vult, ut probus sit semper magis magisque, laudabilis de Virtute in Virtutem progressus ei, qui semel positus impedimentis beatissimum Virtutis curriculum ingressus est. Felix, qui se, suæque vora & desideria
omnia

omnia intra hujus curriculi limites conclusit ! Atque hæc sunt, quæ bonos expectant præmia. Ex adverso, quæ malos mancant mala, nihil ferè est negotii conjicere, cum contrariorum contraria sint consequentia.

C O N C L U S I O.

Hic finem facimus institutioni nostræ. Horranti tantum estis, quotquot hæctenus inter discipulos Veritatis nomen profitemini vestrum, in animum dicta admittere, ad usum & opus exserere, id est, facere fructum. *Sicut parum est audisse (ait Epictet.) probas drachmas accipiendas, falsas rejiciendas esse: sed opus est facultate probandi & discernendi: ita haud in magno, de bonis malisque audisse; tractanda sunt & pernoscentia usu; tum hæc fugienda, illa amplectenda.* Quid juvabit ista omnis dissertatio & indagatio, si ea tantum? Non enim qui sermone sapit, is mihi sapit, inquit Greg. Theol. nec qui linguam disertam & volubilem habet, mentem autem inconstantem & indoctam: sed magis, qui pauca de Virtute disserit, multa autem factis ostendit, & fidem verbis suis ipsâ vitâ conciliat. Vera didicisse, & quæ didiceris agendo confirmasse, solidum operæ pretium est.

F I N I S.





